



მოთხრობა

აფხაზურიდან თარგმნა ჯუმბარ თითხერიამ

ბერიკაცი ფიქრობდა მთებზე, მაგრამ მათკენ არ იმზირებოდა, უკვე ველარც ლანდავდა მათ. ეს ერთი წელია, ცოტა მეტიც, რაც მთები გაქრნენ მოხუცის თვალთაგან, თითქოს გემები გავიდნენ ზღვაში შორს, შორს, თვალსაწიერს იქით. და ახლა ის ქათქათა, გაფხეკილ-გაპრიალებული ძვლის მსგავსი მოტიტვლებული მთის წვერი, ამ ეზოდან ყოველთვის რომ ჩანდა, ძლივს გამოკრთოდა მსუბუქ, უწვიმო ნისლში. დილიდანვე ღრუბლებმა რამდენჯერმე სცადეს ამ ნისლების ზემოთ თავაყოფილი მწვერვალის მთლად დაბურვა, მაგრამ თავზე ვერ მოექცნენ და მსგავსად იმ მოლაშქრეებისა, რომელთაც ალყაშემორტყმული ციხესიმაგრე ვერა და ვერ აეღოთ, უკან იხევდნენ. ხეობისკენ ეშვებოდნენ და თხემდათხემ ნაკუწ-ნაკუწ ძონძებსლა ტოვებდნენ.

ამ მთაზე გაწეწილ ღრუბლის

ფთილებს თუ არად ჩავაგდებთ, ცას მოწმენდილი, გადაქარული ეთქმოდა.

ცვარი უკვე აორთქლდა, მაგრამ ჩრდილი ხისა, რომლის ძირშიც ბერიკაცი მოყუჩებულყო, ჯერ ისევ კარგა გრძელი იყო და ზედ აივანს მიდგომოდა.

მოხუცს ფეხი სტკიოდა, დაუსივდა, ჩაუშავდა, წვივზე კანი დაუსკდა. მტკივანი ფეხი ჯორკოზე ჰქონდა შემოდებული.

...იმდამით თვალზე რული არ მიჰკარებია, ლოგინიდან წამოდგა, აივანზე გავიდა და. სულგაკმენდილი, დიდხანს უგდებდა ყურს ლამის წყვილიადს. მიმცხრალი, მკრთალი მთვარე, ან დღეს ან ხვალ სულაც რომ გაქრებოდა ციდან. უკვე გადასულიყო ჰორიზონტს მიღმა, როცა მოხუცს რულმა თვალი წაართვა. ახლა კი წავუძინებო, გაიფიქრა მოხუცმა, შინ შევიდა და სიბნელეში საწოლს წაჰკრა ფეხი.



უკვე სამი წელია, რაც ასე მოტყდა. სიბერემ ერთბაშად დარია ხელი. მოფამფალდა, წელში მოიღუნა, ყურთაც დააკლდა და თვალთაც. მაგრამ ვიდრე ფეხები უვარგოდა, შეეძლო ახლო მისულიყო იმასთან, რაც შორს იყო, რასაც ვერ ხედავდა. ახლა კი, ახლა, ფეხი აღარ უვარგა და წახდა კაცი. უმწეოა.

... ლოგინზე იტკინა ფეხი, ლოგინზე... ჰო, ლოგინზე, აბა, სადმე ომში კი არ დაშავებულა!..

— ოდესღაც ეს ხელისგული ტყვია-წამალს წონიდა... შუათითი ზუმბად მქონდა. ტყვიას ტყვიაზე ვდებდი ლულაში... ახლა ვარ, მარა რა ვარ, გმირი ვარ, აბა! — მოხუცმა მწარედ ჩაიციინა. — საწოლს მივაფშვენი ფეხი, საწოლს...

ახლა ყველაფერი რკინისაა, ეს ოხერი. ყველგან წვეტიანი რკინაა გამოჩხერილი. ფეხს წაკრავ და კარგად მეყოლე. მრგვალი არაფერი შეგვრჩა, მრგვალი, რომ არ დაგჩხვლიტოს კაცი. კარი გინდა. საწოლები, ახჩნიზა¹ — სულ ცარიელა რკინისაა. ვაზსაც რომ რკინის მავთულზე ახვევენ.

ვაზს რკინა არ ეჭაშნიკება და წაქცევაზე რომ მივა, მაშინლა თუ ჩაეკვრება მავთულს. მზე მავთულს ახურებს, ვაზის ფოთოლი ჭკნება, იჭუჭკება, სათუთ მტევნებს კი ჟანგი აჩნდება.

ლითონი, ლითონი, — ირგვლივ ლითონია, ნამეტანი ბევრი ლითონია ირგვლივ. ლითონი მკვიდრია. დიდხანს ძლებს. ეს იციან და სხვა ყველაფერი დაივიწყეს ადამიანებმა...

ფეხი ახლა არც მაინცდამაინც ტკიოდა, არც ფიქრობდა მასზე, საკუთარი უმწეობა უფუჭებდა გუნებას და კიდევ ის, რომ ფეხი მოსავ-

ლელი გაუხდა. გამომხმარ, გაცრეცილ სხეულს საკუთარი ძვლებიც ემძიმებოდა.

— მაგარი ვარ, მაგარი... ჩაიციინა მოხუცმა.

სახლს უკან დიდი გზა გადიოდა. იგი ზემოდან, ხეობიდან ქურანასავით ჩამორბოდა, დაბლა, სწორზე, მას მდინარე ჭრიდა, წყალს გაღმა კი გზა კვლავ იღვრებდა თავს, ცოცხლდებოდა და წაბლისფერი სარტყელივით გადიოდა გაუთელავ ხასხასა მდელოებში.

დილდილაობით გზა ხმაურობს: ისმის გადაძახილი, სახრეების ლაწუნნი, ფეხათრეული ურმის ჭრიალი, საპალნიანი ცხენების ფრუტუნნი, ფლოქვების ბაკაბუკი, შიგადაშიგ, უფრო იშვიათად, — ტალახში მოსრიალე მანქანების ვაი-ვიში.

შემდეგ საღამომდე გზა ყუჩდება. მხოლოდ იშვიათად, უცაბედად თუ გამოჩნდება ვინმე, ვისაც ყანაში მუშაობას სოფლის შარა-შუკებში უსაქმოდ ყიალი ურჩევნია. ეს მოსეირნე მეჩრდილიები ფუთფუთით, ხვნეშა-ხვნეშით მიდი-მოდნიან, თითქოს ამბობენ, გვეჩქარება, ბატონო, ისე გვეჩქარება, თავზე ტეცხლი რომ წაგვეკიდოს, იმის ჩასაქრობადაც ვერ მოვიცლითო.

— შემო, მობრძანდი, — შიიბატიყებს რომელიმე მოსახლე ამ მოჩქარეთაგანს, უკვე რამდენჯერმე რომ აიარ-ჩამოიარა იქაურობაზე.

— აგაშენა ღმერთმა, მაგრამ მეჩქარება, — წუთით შეჩერდება ის კაცი და მაშინვე წინ გადაიძაგრება, აქაოდა, ა, ბატონო, მივდივარ, გავრბივარო.

— შემო, თუ კაცი ხარ...

— გეფიცები, არ შემძლია...

— შენც დიდხანს კი ნუ დარჩები...

— მაღლობა, მაღლობა.

¹ კერძოზე შემას ახჩნიზაზე აწყობენ.

— ფეხზე მაინც დაგველია თით-თითო ჭიქა... იმ ჭურს გუშინლა მოგხადე თავი და...

— რატომ წუხდებით, რატომ... ეგ რომ მცოდნოდა, სხვა ვზით წავიდოდი...

— რას ბრძანებთ, რა შეწუხებთ...

— ისე, მართალი ხარ, ხომ იცი, ახარდანის ღვინო ამ სიცხეში გაფუჭდება...— ამბობს მოსეირე და კიდევ არ მიდის და კიდევ მიდის ჭიშკრიდან სახლისაკენ.

მერე ის ცეცხლწაკიდებული მოჩქარე შებინდებულზე თუ გავა სტუმრისმოყვარე ოჯახიდან და თავმოწყვეტილი წალასლასდება სოფლის გზაზე.

ახლა მოხუცი ვერც ხედავდა იმ „მოჩქარეებს“, მათ ხმას ისმენდა, მაგრამ იცოდა, რა დროსაც უნდა გამოფენილიყვნენ გზაზე. რამდენ შარახვეტიას იცნობდა, თავისი დრო და წუთისოფელი მიდი-მოდიში რომ გაეფანტათ! და გასაკვირია, ნამეტანი გასაკვირია, დაბერებულებს ახლები ენაცვლებიან, თითქოს მემკვიდრე ვაჟებს ღონეგამოღებული მამები შეუსვენებიათ და მათ ნაცვლად გუთანს თუ აჩაჩას თვითონ მოჰკიდებიან. ესენი, „მემკვიდრეები“, ამგვარ გზას იმთავითვე, დედის რძის შეშრობისთანავე ირჩევენ. მათი წინამავლების გულმოდგინებით ცლიან ჭიქას ჭიქაზე, გაუთავებელ სადღეგრძელოებს ამბობენ, სულ ერთსა და იმავეს ამბობენ, ოღონდ ამ სადღეგრძელოებს, პირველად რომ ითქვა, მაშინ თუ ჰქონდა თავისი აზრი. ახლა, როცა კვლავ და კვლავ ისმენ, გაბეზრებული ისმენ.

დრო მიედინება, ადგილზე როდი დგას. ამას წყალი არ გაუვა,

მაგრამ როგორც ხომალდი მიასვენებს ხოლმე თავის ბანზე ცხედარს, ასევე მძიმედ მიჰყვება ცხოვრებას ის, რაც უკვე დრომ მოჰამა.

ბერიკაცი ბევრს იცნობდა ამ გზის მიერ მოყვანილ-წაყვანილთაგან. ახლაც კი, ახლაც, როცა ცუდად ხედავდა და ყურშიც ცუდად ესმოდა, მოფუთფუთე გამვლელეებში ცნობდა იმ მეჩრდილეებს, ცნობდა და გული ემღვრეოდა.

ბერიკაცს ისევ მთები გაახსენდა. თვალით ვერა ხედავს, მაგრამ ის მთები ხომ ისევ ისე, ფიქრში დაძირული კერპებით დგანან. ცად აჭრილ და იქ გაშეშებულ ზღვის ტალღებს ჰგვანან. მაგრამ საკმაოა მოხუცმა მთის წყაროს წყლის გემო გაიხსენოს, რომ გაშეშებული, გახეფებული მთები უმაღლეს ცოცხლებიან.

მოხუცს თვალწინ დაუდგა მთის ანკარა, ფერდობებზე მოჩხრიალე წყაროები და მისი შხეფები შემოესხურა თითქოს, ისეთი სიამე იგრძნო, თითქოს ეს-ესაა აციხა-ძის ყინულივით ცივი ვეძა შეესვას.

მოხუცმა ნერწყვი გადაუღება, მაგრამ გამშრალი ყელი ვერ გაისველა. მთის წყაროების გახსენებისთანავე მოსწყურდება ხოლმე. მოწვიმს თუ არა, აქ, ქვემოთ, მათი წყაროს წყალი იმღვრევა. გაზაფხული თაფლისფერი ხდება. ძლიერ გვალვაში კი წყაროში წყალი ცოტალა რჩება, მაგრამ თბება და რამდენიც არ უნდა დალიო, წყურვილს არ კლავს. კიდევ უფრო ქვევით, ზედ მდინარესთან პირდაპირ კლდიდან გადმოწანწკარებს წყალი, რომლის მსგავსსაც სხვაგან ვერ ნახავ. როცა ფეხი არ აწუხებდა, ჩადიოდა და წყაროს ნაკადს ამოასუფთავებდა ან ღარს დაუყენებდა. ამ წყალს მხოლოდ მთის წყა-

როს წყალი თუ შეედრებოდა: ერთი ყლუბიც კი ჰკლავდა წყურვილს და სიმხნევებს მატებდა კაცს.

ახლა წვიმებისგან მოდიდებულმა მდინარემ წყარო დაშლამა. ეს ოხერი ფეხი რომ მივარგოდეს, რამეს ვილონებდი, თორემ ხომ შეიძლება, წყარო სულ დაიშრიტოსო, წუხდა მოხუცი.

კაი წყალი სიცოცხლესა ჰგავსო, ფიქრობდა მოხუცი. წყალი სიცოცხლეა, სიცოცხლეო. ადამიანი წყლის გემოს ერთბაშად როდი იგებსო.

მოხუცს უყვარდა ზღაპრების მოყოლა. უყვარდა და კარგადაც ჰყვებოდა. მაგრამ მას არ უყვარდა ზღაპრები, სადაც წყალი ნაღების ნაპირებიან რძის მდინარეებად გადაიქცეოდა.

თუთის ხის ჩრდილმა აივანი უკვე დატოვა. ჩრდილი ეზოში, მდელოზე ჩამოშრიალდა, მაგრამ ქალიშვილი სამუშაოზე რატომღაც ჯერაც არ წასულა. მან მოხუცი ადრე დილით ჩამოიყვანა ეზოში. სკამამდე მიიყვანა, თვითონ შინ შებრუნდა და აქამდე არ გამოჩენილა. ასე ჩვევია: საათი ისე გავა, ორიც, რომ დაჯდება და არ გაინძრევს.

რკინის კუტიკარმა გაიჭრიალა. სახლისკენ მსუბუქი ნაბიჯით, ფრთხილად-ფრთხილად, თითქოს ბალახის გათელვისა ეშინიაო, მოდიოდა მაღალი მამაკაცი. მას აკაპიწებული აბრეშუმის პერანგი და სარკესავით გაზიმზიმებული აზიურები ეცვა. კაცი მიხვდა, მოხუცმა შემამჩნიაო, პირისახეზე ღიმილი აიკრა და მისკენ წავიდა.

„ამ დილაადრიან ნეტა რას გამოწყებილა?“

ფეხს აუცქაფა. თითქმის მიიბრინა მოხუცთან.

მოხუცი ხელებით სკამს დაეხვინა, წამოდგომა სცადა.

— ბრძანდებოდეთ, ბრძანდებოდეთ, — პირმოთნელ აწრიალდა სტუმარი და მოხუცს შენამულივით სველი ბუნჩულა ხელი გაუწოდა.

მოხუცს ეს კაცი ბალღიც ახსოვდა: მის თვალწინ გაიზარდა, სქელ თმაში ახლა უკვე ჭალარა შეჰპარვია.

— თქვენი ფეხი...

„თქვენო“, — თითქოს სიმამრს ელაპარაკება.

— ჩემი ფეხი რა ბედენაა, დად... ბებრის ძვალსა და ხორცს ძაღლიც კი არ დააკარებს პირს.

კაცმა გაიცინა. მოხუცი მას ვერ ხედავდა, მაგრამ იმ გაცინებით მიხვდა, რომ იგი სადღაც სხვა მხარეს იცქირებოდა.

მოხუცს არ უყვარდა ის ხალხი, ვინც დღედაღამ თავაუღებლივ მიწაში იჩიჩქნება, მიწის გარდა ვერაფერს ხედავს და არცა სურს დაინახოს; ამათთვის შრომა სენად ქცეულა. მოხუცს სწამდა: ეს სიცოცხლის გაუგემურების, გაშხამების, მისი ნამდვილი აზრის გაუკულმართების გზა არისო. შრომა შრომაა. გლეხკაცის შრომა ხომ მით უფრო მძიმეა, მაგრამ სენად არ უნდა ეიყარო იგი. ყოველგვარი ზღვარგადასული ლტოლვა რაიმესკენ ბოლოს უღებს ადამიანს, მაგრამ მოხუცს ყველაზე მეტად ის კაცი ეჯავრებოდა, ვინც თავისი დღე და მოსწრება ათას და ათას თავის გასამართლებელ მიზეზს ეძებდა, ოღონდ კი ხელი არ გაენძრია.

ის კაცი, ვინც თავაუღებლივ, გაკერპებით იჩიჩქნება მიწაში და წუთსაც არ დაკარგავს უკანმოსახედვად, — იქნება რა ხდება ამქვეყნად, — ვინც ირგვლივ თავისი წილი მიწის გარდა ვერაფერს ხედავს და ყვავილების ცქერითაც კი ერთხელ

მაინც არ დამტკბარა, შესაძლოა საშიში ვინმე აღმოჩნდეს. კი, შესაძლოა, მაგრამ მისი ბედშობა მაინც ხელისგულზე ჩანს გაშიშვლებული და ამიტომ წინასწარ შეგუმანებული გაქვს, სად წახდება და რას იკადრებს.

არაფრის მაქნისი კი ყოველთვის საშიშია.

ძნელია, თითქმის შეუძლებელია გაიგო, როდის ჩაგწიხლავს და საიდან დაგიდებს კვანტს. წარბსაც არ შეარხევს, ისე გააკეთებს იმისთანა უმსგავსოებას, რომ კაცს თავს მოაკვლევინებს და მერე ამ სიკვდილსაც თავისი უსაქმურობის გასამართლებლად გამოიყენებს. არაფრის მაქნისობის, უსაქმურობის გამამართლებელი მიზეზის პოვნა იქცეოდა არაფრის მაქნისთა, უსაქმურთა ცხოვრების აზრად, ღირსებად აღმად.

* *

— სისა! — ჩაესმა მოხუცს ქალიშვილის ხმა. — სად იყავი, სისა, სად?

სად იყავიო... სად იყო და... თავის წაბლა ცხენს ეძებდა. მაგრამ ვერ უპოვნია! არა, არა, თავის ფურკამეჩს ეძებდა, მაგრამ ტყეში დაკარგვია და არსად ჩანს. იმდენი ამას შეურცხვა თავ-პირი!

სისა ფრთხილად, ფაჩუნ-ფაჩუნით წავიდა ბერიკაცის ქალიშვილისკენ.

სისა...

მოხუცს შეაყრეოლა, თითქოს დაშაქრული ცივი წყალი დაეღიოს.

— ქუ, ქუ, ქუ! — მაშინვე ფიცხლად შეუძახა ბერიკაცმა, ძერა ეგონა.

ლობეწულს გადმოაფრინდა ჭრელი დედალი, მას კი წითელბიბილონი ლამაზი ყვინჩილა გადმოჰყვა. ის იყო დაეწია დედალს, რომ უშველებელი მამალი დააცხრა და გვერდზე მიაგდო. ყვინჩილა საშიშ ნისკარტს მოერიდა, მოშორებით დადგა და ფრთები გაშვეტა. ბებერი მამალი ღონიერი იყო და ჯერ ისევ მაგრად გრძნობდა თავს. ყვინჩილამ ერთი კი წყენით მოხედა და სხვა დედლებს გამოენთო. ის ჭრელი დედალი კი, ყვინჩილას რომ გაუბრბოდა, თვინიერად დამდგარიყო ბებერი, ძლიერი მამლის წინაშე. ბებერი მამალი ფრთების ფაშფაშით, ზვიადად გამოემართა მისკენ... ჭრელმა დედალმა ფრთა შეიბერტყა, ბებერი მამალი კი გვერდზე მიდგა, მიწაში რაღაცას დაუწყო ძებნა, იპოვა, სასურველ დედალს დაუძახა და ლამაზმანიც შეექცა მამლის მონაგარს.

ვიდრე უშველებელი მამალი უბატონოდ ხელისუფლობს ამ ეზო-ყურეში, ლამაზმანი გვერდიდან ვერ მოსცილდება.

— ხიკა, — დაუძახა მოხუცმა ქალიშვილს. — კრუხი სადაა, რატომ არა ჩანს?

— სად უნდა წასულიყო?

— ძერამ არ გაჰკრას კლანჭი!

— ნუ დარდობ, მამი, არაფერი მოუვა.

მოხუცს ესმოდა, ხიკა და სისა როგორ ქირქილებდნენ და ჩურჩულებდნენ რაღაცას.

„გამოყრუვდება კაცი და ყველაფერს ისე დაჰკანკალებს, გეგონება, მას სხვაზე მეტი გასჭირბოდეს, სინამდვილეში კი...“ — აი, რას ჩურჩულებდნენ. მოხუცს კი არ ესმის. მაგრამ დარწმუნებულია, რომ ამის მსგავს რამეს ამბობენ. ბოლომ-

დე არა თქვეს, „აგერ, ხვალ თუ ზეგ წერილს წაიღებსო“.

ისე, სწორი კია: სიკვდილი კარსაა მომდგარი. სხვა ბებრებისა არ იცის, მაგრამ თვითონ კი სხვისი რაიმე არასოდეს სდომია. სანამ ადამიანს პირში სული უდგას, უბრალოდ მარტო თავის თავზე ვერ იფიქრებს, არც შეუძლია სხვისმა საწუხარმაც არ შეაწუხოს, აი, დავიწყება მაშინ მოვა, როცა ყველაფერი გათავდება. ასეა.

— ხიკა!

— რა იყო, რა?

— ბალღი სადაა?

— ჩვენთანაა, — სისას ხმა იყო.

მოხუცის შვილიშვილი, მისი ბიჭის ბიჭი, უკვე ერთი კვირაა სტუმრად ჰყავთ. მეექვსე წელშია. მოხუცი ფიქრობს, ჩემი ბიჭიც ჩამოვა, რაღაი დღეს შაბათიაო. მაინცდამაინც დიდი იმედი არა აქვს, მაგრამ ელოდება, ელოდება კი. ძალიან უნდა ნახოს შვილი, ნახოს და ესაუბროს, ზღაპარი უამბოს... მის ზღაპარს ვაჟილა უსმენს გულისყურით. ეს ორი წელია, რაც სახლიდან ვერ გადის, ვიღას არ ეუბნება, ზღაპრებს მოგიყვებითო, მაგრამ ყველამ წაუყრუა.

ხიკას ყოველ დილით ეტყოდა ხოლმე, დაჯე, ვიდრე სამუშაოდ წახვალ, ზღაპრებს მოგიყვებითო.

— ზღაპრების თავი მაქვს?! — გაჯღანებდა ხიკა და რაღაცას ფართიფურთობდა.

ვინც არ უნდა მოსულიყო, ბერიკაცი მორიდებულად, თითქოს ბოდიშობსო, თხოვდა:

— დაბრძანდით, შეისვენეთ, მე კი ზღაპარს ვამბობთ...

— კი, შენ კაი ზღაპრები იცოდი, — ზეზევე ეტყოდა ერთი და არა ჯდებოდა, რადგან ზღაპრის მოსმენა არ უნდოდა.

— ზღაპრებს ვაღმერთებ, მაგრამ... — მიუგებდა მეორე.

— ზღაპრებისთვის სადა მცხელა, წუთი მოცლა არა მაქვს. — ბუზუნებდა მესამე, ვინაც თავისი დღე და მოსწრება მიწაში იჩიჩქნებოდა და ირგვლივ ერთხელაც არ მიმოუხედავს.

— ზღაპრებმა მოგჭამეს ჭირი, ზღაპარი დღეს ცხადად იქცა, აბა! — მეოთხე ჭკვიანი კაცის სახეს იღებდა, ცდილობდა მეზობელ მასწავლებელს მიმგვანებოდა.

მაშინ მოხუცი კვლავ თავის ქალიშვილს მიუბრუნდებოდა:

— ხიკა, მოდი, დაჯე, ყური დამიგდე. მოეშვი, ადამიანო, იმ ჯამჭურჭელს, სად წაგივა. ისეთი ზღაპარი ვიამბო...

— ზღაპარიო... რას ავიჩემებია ერთი! შენი ზღაპრების მოსასმენად მცხელა?

— ვითომ რატომაც არა? — წყინდა მოხუცს. — ზიხარ მანდ, შენს ბიბლიოთეკაში, და ყარაულობ წიგნებს. მერე და ვინ კითხულობს იმ წიგნებს, ვინ? როგორც წყლიდან მშრალად ვერ ამოხვალ კაცი, ისევე გლეხკაცი ერთი ხელით თუ ხნავს, მეორე ხელით წიგნს ვერ დაიჭერს. ისედაც არ გბეზრდება მთელი დღე ერთ ადგილზე ყურყუტი?

ხიკა გაცხარებით, თავგამოდებით იცავს წიგნს, ლაპარაკობს ჩვენს დროში, ჩვენს ცხოვრებაში წიგნის მნიშვნელობაზე, ერთი სიტყვით, გარგა გრძელ ლექციას კითხულობს.

— ამდენი ხანი, რაც შენ ლაპარაკობ... თუმცა მეშინია, ნამეტანი ჭკვიანი არ გახდე.

— ეჰ, შენი ზღაპრებით ვინმეს ჭკუა რომ ემატებოდეს...

ბერიკაცმა იცის, რისი თქმაც

სურს შვილს: „მაშინ შენ თვითონაც ამდენ ხანს მოჭკვიანდებოდიო“, — მაგრამ, რაღა თქმა უნდა, ამას ვერ ეტყვის. ეგ ხომ კომკავშირელი იყო (ახლა კომკავშირობის ასაკს გადასცდა და შინაბერაც ეთქმის). ამბობენ, კომკავშირლების წესდებაში მოხუცების პატივისცემაც შედისო.

ახლა როცა შვილის ნართაულად ნათქვამი გაიხსენა, გაელიმა.

მოხუცს გულით უნდოდა, რომ შვილი გაბედნიერებულიყო. დედის სიკვდილისა და ძმის ქალაქში გადასვლის შემდეგ ხიკას ბევრი საზრუნავი გაუჩნდა.

— მამა, სისასას გადავალ, სტუმრები ჰყავთ, მოვეხმარები, — სთხოვა ხიკამ მოხუცს.

ქალიშვილმა დივანის მუთაქა სკამზე ჩამოდო და რკინისწვეტიანი ხელჯოხი — ალაბაშა იქვე მიაყუდა.

— შენ მე მახაზირებ, გატყობ. ახლავე, დავკრავ ფეხს და დავადგები გზას, — მოხუცი ალაბაშის მრგვალ ტარს შვილივით მოეფერა.

— რა გზას დავადგებიო?! — ვერ მიუხვდა შვილი.

— რა გზას და საიქიოს გზას, — გაიცინა მოხუცმა.

— იტყვი შენც ერთი!

— ღმერთმა ნუ ქნას, ბატონო! — დაიფაჩუნა სისამ, თითქოს ეშინია, მიქელ-გაბრიელმა არ გაიგონოსო.

მოხუცმა შვილს აჰხედა. ადრე იგი კაფანდარა იყო და ტანწერწეტა, ახლა კი მოსუქებული, ჩაბუნჩულებულია. ადრე რამე გაუხარდებოდა თუ ეწყინებოდა, ლოყაზე სიწითლე აჰკრავდა. ახლა თუ რამე ეწყინა ან გაბრაზდა, ანჩხლდება.

— ვინ სტუმრებია, ვინ ჩამოვიდა? — იკითხა მოხუცმა.

— სოხუმიდან ჩამოვიდნენ, —

სისა დაიხარა და მოხუცს თვალი გაუსწორა, — გაზეთიდან არიან. მა-მაჩემს კი იცნობთ, მგონია, სტუმრებს უბურმარაილოდ ვერ გავუშვებო. კაი ბიჭები არიან, მანქანაც უყენიათ ჩვენს ალაყაფთან.

— ვიცნობ, მგონია, ვიცნობ, — თქვა მოხუცმა.

იგი სისას ჩექმებს დასცქეროდა და უკვირდა: ე ბიჭი თითქო მალაღია და ეს ერთი გოჯი ჩექმა რაღააო.

— ორნი არიან?

— კი, ორნი არიან, კაი ბიჭებია.

— კარგები იქნებიან, რატომ არა... ხელმეორედ დაიბადნენ ალბათ...

— მაინც რამე, შენებური რომ არა თქვა, არ იქნება, — უსაყვედურა ხიკამ.

— გაზეთში მუშაობენ, ხალხი იმათ პატივსა სცემს. ჭიშკართან ახალთახალი მანქანაც უყენიათ — თავგამოდებით ეფოფრებოდა სტუმრებს სისა.

— მერე აქ რაღას უდგახარ, შინ თუ სტუმრები გყავს?

— კაი ბიჭები არიან... სულ ახალთახალი მანქანაც უყენიათ.

— ბიჭი გამომიგზავნეთ, — თქვა მოხუცმა.

— მეზობელს ვთხოვ მიხედოს.

— აქეთ გამომიგზავნეთ!

— მეზობელსაც ვეტყვი და ორივენი მოვლენ.

— წყალი ახლოს დაგედგათ.

ხიკამ წყლიანი ჭურჭელი და ალუმინის ჭიქა მოიტანა.

— ისევ ის წყალია?

— არა, ზღვის გაღმიდან მომიტანია! — გაიცინა ხიკამ.

— ბავშვი მოვიდეს.

— კარგი, ჰო... ექიმიც მოვა, გუშინ ვთხოვე.

— ფერშალი მოვა?

— ფერშალი ექიმი არაა, თუ?

- სანამ არ დაღევს...
- მამა, შენ აუტანელი გახდი!
- ბავშვი გამომიგზავნე.

ისინი წავიდნენ.

თუთის ხის ჩრდილი სულ უფრო და უფრო მოკლდებოდა, მაგრამ ჩრდილშიაც უკვე ძალიან ცხელოდა.

მოხუცი კვლავ მთებზე ფიქრმა გაიტაცა.

თავიდან მთები დედამიწის ვეება, გაშიშვლებულ ძელებად წარმოუდგებოდა თვალწინ. მერე თანდათან ეს ძელები მის წარმოსახვაში ცოცხლდებოდა, ფერებით, ხმებითა და სურნელებით ივსებოდა. პირისახეზე მთის ნიავის სუნთქვას გრძნობდა. ალპიური ბალახების მიწიწიყებული სუნი სცემდა... საღამომობით მწვერვალების განბანილ ტანს ღრუბლების სამოსი შემოეძარცვებოდა.

მთელი ჰორიზონტი დაიფარება დაისის ცეცხლწაკიდებული მოზოზინე ბომბორა ღრუბლების ბორცვებით. და პირდაპირ კლდიდან გადმოდის აციხა-ძის ქაფქაფა სპეტაკი ჭავლი... იქ ... იქ... იქ...

მიწას ამო ოხშივარი ასდის. იქაც და აქაც... ყველგან ყველაფერი გადაქათქათებულა.

ირგვლივ ყველაფერი დახშობილა.

... მოხუცს წყურვილი კლავს. ნახევრამდე ივსებს ალუმინის ტიქას და რამდენჯერმე მოყლუპავს.

წყალი თბილია, რკინის გემოს დაიკრავს და ამიტომ სქელი ეჩვენება.

— წყალი კი არა, ჭოჭია, — მოხუცს პირისახე ეღრიჯება, თითქოს აღებინებსო. — შენი მომგონი შეაჩვენა ღმერთმა! ჭის წყალი, იცოცხლე, უკეთესი იქნებოდა.

მაგრამ აქ ყველგან ერთი მეტრის სიღრმეზე კლდეა. სცადეს ჭების დათხრა, მაგრამ არაფერი გამოვიდა.

ის ბიჭი, სუნარი, მაინც ჩამოვიდოდეს. იქნებ იმან მაინც შესძლოს წყაროს ამოსუფთავება, ლამისაგან დაწმენდა. მეზობლების ბაღლებიც მოეხმარებოდნენ ალბათ.

იტყოდნენ ამ მთისას, იმ ბრისას, სათქმელი იმდენია... ზღაპარსაც მოჰყვებოდა კაცი!.. სუნარს სიამოვნებით უყვები ზღაპარს. გულისყურით გისმენს. ზოგჯერ სუნარს ერთი ყმაწვილი ეახლებოდა და იწერდა ზღაპარს. მაგრამ იმას მოთმინება არასდროს უოფნიდა, რაც უნდოდა, იმას დაიწერდა. მერე იჯდა და ამოქნარებდა. ჩაწერითაც ცოტას იწერდა. ამისთანა მსმენელი საუბრის საღერღელს ვერ აგიშლის კაცს და შენც მოიწყენ.

სრული მარტოობის ამ დღეებში ბერიკაცს რამდენჯერმე გაახსენდა ჯერ კიდევ სიჭაბუკეში განაგონი ერთი ზღაპარი.

შვილის მოლოდინში ზოგჯერ ხმამაღლა ჰყვებოდა იმ ზღაპარს...

— ...იყო და არა იყო რა... იყო ერთი ქვრივი. იმ ქვრივს ერთი ვაჟი ჰყავდა. ერთხელ იმ ვაჟს მშვენიერი სიზმარი ესიზმრა...

სუნარი, ეტყობა, გზაშია. მაგრამ დიდხანს უნდა ელოდო იმას, დიდხანს, ვიდრე აკუადან¹ მოაღწევდეს.

„რა გაეწყობა. დაველოდები, ვიდრე ჩამომივა.“

... ოღონდ კი ჩამოვიდეს“.

სუნარი: მითხრეს, წყარო დაიშლამაო. მამას ალბათ სულ მუდამდღე წყურია. მინდა და მინდა, სულ ვაპირებ ჩავიდე სახლში, მაგრამ ვერ წავსულვარ. თვითონაც არ ვიცი, რა

¹ სოხუმიდან.

მემართება. ადრეც ასე მიჭირდა. იქნება მე ძალზე იშვიათად ვაკითხავდე მამას, მართალია, მაგრამ ჩემი ბრალი არაა, ღმერთმანი, იმდენი მიზეზია და მაინც მრცხვენია, რომ მიგვიანდება ხოლმე ჩასვლა. ბოლოს და ბოლოს ვახერხებ, ჩავდივარ და მამას ერთხელაც არ დასცდენია საყვედური, გახარებული მხვდება და მეც ვმშვიდდები. მაგრამ ამ ბოლო ხანებში რაღაცა მიფორიაქებს სულს, არ მასვენებს... თითქოს რაღაცაში ვცოდავდე... რაში, ვერ ვეტყვით... საძაგელ გუნებაზე ვარ და ამის ბრალია ალბათ... შინ ყოფნა კი ძალიან მინდა ხოლმე. მაგრამ რაღაცნაირად არ გამოდის...

მოხუცი ჯორჯოდან მტკივანი ფეხის ჩამოუღებლად, ალაბაშის მოშველიებით წამოწვა გრძელ სკამზე.

— უუჰ, — ამოიხვნეშა მან.

„...სინამდვილეში კი დღეს თუ ხვალ მოკვდება...“

რაც მართალია, მართალია, რომ დაბერდები, მერე სიკვდილიც მალე გეწვევა. მისი ხნის კაცი სიკვდილის პირისპირ დგება. ჰოდა, დგას ასე, მერე ამას ეჩვევა...

მოხუცმა არ იცოდა, სხვებს ეშინოდათ თუ არა სიკვდილისა. მაგრამ ეს კი კარგად იცოდა, რა მარტოხელანი იყვნენ ბებრები. ადრე ეჩვენებოდა, სიკვდილის მოახლოება ადამიანს უჩვეულო თავისუფლებას ანიჭებსო.

ასე არა ყოფილა.

მართალია, რაღაცისგან ერთგვარ გამოთავისუფლებას კი გრძნობდა, მაგრამ კიდევ უფრო ძლიერ დაეძაბა და ავადმყოფურად მგრძნობიარე გაუხდა ცხოვრებასთან მაკავშირებელი ფესვები. სულ უფრო და უფრო ხშირად, დღეში რამდენჯერმე მისკენ არყოფნის წკვარამიდან, რო-

გორც შუალამისას პატარა ბაქნისკენ შუქით გაბრდღვიალებული მატარებლები, მოქროდნენ, მოქროდნენ მოგონებები დიდი ხნის წინათ გარდასული და მის გარდა ყველას მიერ გადავიწყებული ამბებისა, რომელთა დავიწყება თავადაც სურდა, მაგრამ ვერა და ვერ მოეხერხებინა. შემდეგ კი ეს მოგონებების „მატარებლები“ თითქოს მისი მეხსიერების სათადარიგო ლიანდაგზე გადაჰყავდათ და მოსაცდელ დარბაზში თავშეყრილი მგზავრებივით კარგა ხანს ზუზუნებდნენ იქ.

აი, სუნარი ჩამოვა და მოხუცს შვება მიეცემა, დამშვიდდება.

თქმა რად უნდა, ბიჭი გაიხარებს ახალი ზღაპრით.

— ზღაპარი ცხადად იქცაო, — გაიცინა მოხუცმა. — იმდენი შენ რა გითხარი...

ზღაპარი, რომელიც ახლა გაახსენდა, მართლაც კარგი იყო, კარგი.

... ჰოდა, ერთხელ მას ესიზმრა მშვენიერი სიზმარი: თავით მზე ბრდღვიალებდა, ფერხით მთვარე ქათქათებდა, გულზე კი, გულზე ვარსკვლავი დაჰნათოდა...

აქამდე ჩრდილი შუა ეზომდე იწვა. ახლა სულ გადავიდა. სიცხემ დააჭირა. პაპანება იდგა. მიწიდან ოდნავ გასაგონი ვანუწყვეტელი ხმაური ამოდიოდა.

სითბოშემდგარ ნიადაგში მიწის წვენი იხარშებოდა. შუადღისთვის ყოველი მცენარე, თითქოს მზის სხივებით დათვრაო, მოითენთა და მიიჭუჭკა. საღამოსთვის ზარხოში გაუხელდათ. კვლავ ყველაფერმა განაგრძო ზრდა, ყველაფერი მწვანედ ხასხასებდა. ამო სურნელს აფრქვევდა და მიწის გულს თესლს ღმზადებდა. ადამიანის ყურთასმენისთვის მიუწვდომელი მუშაკობა ბუნებისა, აღმოცენებისა და ზრდისკენ

ეს ლტოლვაა სწორედ სიცოცხლე. მოხუცი მთებზე ფიქრობდა.

იქ კი, მთებში, მოხუცს რომ დამზერდნენ, დაჯარული უწვიმო ღრუბლები ისევ ისე ევლებოდნენ თავზე მწვერვალს.

პატარა რომ იყო, დიდხანს არ უნდოდათ მისი წაყვანა მთაში.

მამამისიც ერთი იმათთაგანი იყო, ახლა მოხუცი რომ მიწის გიჟებს ეძახის. მთელი სიცოცხლე, ვიდრე ფეხზე დგომა შეეძლო, ერთი დღით არც თვითონ დაუსვენია და, ვიდრე მის ხმას გასავალი ჰქონდა ოჯახში, სხვისთვისაც არ მიუცია ჩამუხლვის საშუალება. მის სახლში ზამთრისა და ზაფხულის, გაზაფხულისა და შემოდგომის გარჩევა არ იცოდნენ, ყოველთვის დილაუთენია დგებოდნენ, მაგრად დაბნელებამდე გახვითქულნი იჩიჩქნებოდნენ მიწაში. სამი ვაჟიდან უფროსი მამამ მწყემსად გაუშვა — იგი მამის დიდ ფარას მწყემსავდა; მიწის სამუშაოები უმთავრესად შუათანას კისერზე გადადიოდა — იგი ხნავდა, თესავდა, მკიდა, ნაბოლარას კი მამამ არც არაფერი არ გაუპიროვნა.

ნაბოლარა ეს ჩვენი მოხუცი გახლდათ. მას მოსვენებას არ აძლევდნენ, გაუთავებელი ჭკუის სწავლებით გულს უწყალებდნენ. მაგრამ მარტო მას არაფერ საქმეს არ ანდობდნენ. ყველაფერს უწუნებდნენ. რამეს გააკეთებდა და არც აცხებდნენ და არც აცხელებდნენ, მის გაკეთებულს ხელმეორედვე აკეთებდნენ.

მას კი უნდოდა ენახა თავისი შრომის ნაყოფი, უნდოდა ენახა, როგორ იზრდება და მწიფდება ის, რაც მისმა ხელმა ჩათესა მიწაში. მაგრამ ყველანი, თითქოს ეშინოდათ, ვაითუ სიხარული იწვნიოსო, ყველაფერში ელობებოდნენ და მისი

ნასაქმი უკვალოდ იშლებოდა. გული ემდურებოდა. ის პირველი წყენის შეგრძნება სამუდამოდ დაამახსოვრდა, რადგან სწორედ იმან, იმ ტკივილმა მისცა დასაბამი მის თვითშეგნებას. ადრე თავისი თავი გარესამყაროსთან შერწყმულ, თითქოს ამ სამყაროში გათქვეფილ აბსებად მიაჩნდა, წყენამ და ტკივილმა კი ყველასაგან გამოაცალკევა, და ამ განდევილობამ თავისი თავი სამყაროს ცალკე ერთეულად შეაცნობინა.

მოხუცს წოლა უჭირდა. ჩრდილშიც კი ჭირდა სუნთქვა. სიცხე სულ უფრო და უფრო ამძიმებდა და ხუთავდა უნიავო ჰაერს. გადაბრუნდა, სცადა უფრო მოხერხებულად წამოწოლილიყო.

დიდხანს არ მიჰყავდათ მთაში. მაგრამ ერთხელ ციება შეეყარა. მთელი თვე სიმწრით კბილებს აკაწკაწებდა, ტანზე ყვითლად გამოაყარა და მუცელიც გამოებერა, ქვასავით გაუმაგრდა. დედამ დაიჟინა, ამ ზაფხულს მთაში ავიყვანოთო. არასოდეს დაივიწყებს იმ პირველ ასვლას მთაში. აგერ, ა, ახლაც ბუსუსს აყრის, რომ ახსენდება. კაი სიმღერის მოსმენისას ემართება ხოლმე ასე.

მთაში ადამიანებს ხასიათი ურბილდებათ, მგრძნობიარენი და ერთმანეთის მიმართ გულითადნი ზღვებიან. თუმცა, რაღა თქმა უნდა, იქ ბარში შეძენილ ჩვევებს მთლად ვერ იცვლიან. მაშინ ეს ცხადად შეიგრძნო.

როგორც კი მომაგრდა, თიკნები ანდეს...

ტყრუშულში წიწილები გამომძვრალიყვნენ და ეზოში შემოწიფწივდნენ. კრუხი ფრთხილად მოუძლოდა, ბალახების წაწიწკვნის სა-

შუალებას აძლევდა. ტყრუშულს გარეთ ჩამორჩენილი წიწილა წიაპობდა.

— ალბათ რამეს თუ გამოება, დედა რატომ არ ეხმიანება, ნეტაი.

წიწილები არხეინად იწიწკნებოდნენ, ტყრუშულს გარეთ ის მაჩანჩალა წიწილა ისევ ისე გულისგამაწვრილებლად წიაპობდა. მოხუცი ალაბაშას დაეყრდნო. წამოიწია და ჩამოჯდა. ფეხში ტკივილმა დაუარა. თავი ვერ შეიკავა და წამოიკვნესა.

„შვილიშვილი მაინც გამომიგზავნონ იმ ოხრებმა. თუმცა რა, იმათ სახლში შესული შელამებამდე რას გამოვა. რაღაცას მაინც გააკეთებინებენ კაცს თავისთვის. ადრე ხიკა მეზობლებს არ ეხმარებოდა ხოლმე სტუმრების გამასპინძლებაში, თავს არ იმცირებდა. ახლა ერთი სული აქვს, როდის დაუძახებენ.“

— ო, ეგ ძალღი მამაძალღი, ეგა!— ჩაიბურღლუნა მოხუცმა, როცა იმ ოჯახის უფროსი გაახსენდა.

სოფელში ადაუს ეძახდნენ. ადაუს ანუ გოლიათს, რადგან ტანად უშველებელი იყო, მხარბეჭიანი, და ფართოდ დაგრეხილი ულვაშები ჰქონდა.

მოხუცის ზღაპრებში ადაუ ადამიანებს შამფურზე ბრაწავდა და ამ დროს ტანზე რომ ქონი აღნებოდნოდა, წვეთწვეთობით აგროვებდა და ხვრებდა. როცა ზღაპრების გმირები ადაუს თავს კვეთდნენ, ერთი თავის ადგილზე მას ორი თავი ებმოდნო, ადაუს მოკვლას კი მხოლოდ მაშინ შესძლებდნენ, იმ მოჭრილი თავის ალაგას ცხელ ნატარს თუ მოაყრიდნენ.

ეს ადაუ ძალზე შეძლებული კაცის შვილი იყო. ახალი ხელისყოლება რომ მოვიდა, სულ იმედი ჰქონდა, აგერ ახლა გადაბრუნდებიან, აგერ ახლაო, და რითაც კი შე-

ეძლო, დღისით თუ ღამით, კვანტს უდებდა ახალი დროის მომხრეებს. როცა დარწმუნდა, ამათ ძვრას ვერ უზამენო, ამ ნაპირზე გადმობარგდა, ისე გადმობარგდა, რომ იმ ნაპირზე ყველა კვალი წაშალა, მას აქეთ ახალი დროის თავგამოდებულ დამცველად მოევლინა სოფელს, კრებებზე სიტყვის თქმას არავის აცლიდა, ყურადღებაც მიიპყრო და სოფლის თავკაცობაც გაიკრა. ძალღმა რომ მოულოდნელად შეიძლება გიკბინოს, ისე იყო, ყოველთვის იმათ გვერდით წანწალებდა, ვინც მართლა აკეთებდა საქმეს. უტყუარი, უცდომელი ყნოსვა ჰქონდა, სულ იცოდა, საიდან დაუბერავდა ქარი. ვინ მართალი იყო და ვინ მტყუანი, არას დაგიღვედათ, მთავარი ის იყო, გამარჯვებულთა მხარეზე აღმოჩენილიყო. შორიდან ისე ჩანდა, ამაზე სამართლის მაძიებელ კაცს სოფელში სხვას ვერავის ნახავო. კრებებზე ყოველთვის თამამად გამოდიოდა და გაბედულად აკრიტიკებდა, ვისაც ჯერ არს, თუმცა გულში კი სულ სხვა ზრახვებს მალავდა.

— ძალღია ეგა, ძალღი-მამაძალღი, — ჩაიჩიფჩიფა ერთხელაც ბერიკაცმა. არაერთხელ ყოფილა ადაუს გვერდით, ბევრჯერ უნახავს მისი უშველებელი ხელების ქნევა და დაჭიმული ღიმილი, რომელიც ულვაშებს განზე უფარჩხავდა და მაგარ კბილებს უჩენდა.

ზღაპრებში ადაუსა და ადამიანებს შორის ყოველთვის სამკვდროსასიცოცხლო ბრძოლა იმართებოდა და ამ ადაუს რომ დაინახავდა, მოხუცს თავისი ემართებოდა.

ტყრუშულს იქით ის წიწილი ისევ ისე წიაპობდა. კრუხი კი სხვა წიწილებთან ერთად დანავარდობდა ეზოში.

— შე ქორის კერძო, შენა, ვი-

თომ არაფერი გესმის, შენმა მხემ! — გაუბრაზდა მოხუცი კრუსს.

კუტიკარმა გაიჭრიალა. მოხუცმა მიუყურადა, გული შეუტოკდა. სუნარი თუ მოვიდაო. მაგრამ ეზოში მეზობლის დედაბერი შემოფლატუნდა.

„ეშმაკმა წაიღოს შენი თავი და ჭირმა, — გუნება წაუხდა მოხუცს, — სახლში ვერ დაჯდებოდი, შე შეჩვენებულო დედაკაცო!..“

— ცოცხალი ხარ, ჩემო ბებერო? — ჩიფჩიფით ჩაეკითხა იგი, როცა კოჭლობა-კოჭლობით მიულასლასდა.

მოხუცს გულზე ისე გაკაწრა, თითქოს გაუპოხავემა კარმა გაიჭრა-ჭუნაო!

„ჩემო ბებერო! შენ დაიწვი, ერთი!“

— ბიჭი სადაა?

— იმ შენი შვილიშვილის გარდა სხვას ვერავის ხედავ ამ ქვეყანაზე? — გვერდით ჩამოუჯდა და მოხუცს თავისი ძვალტყავა მხარი გიჟმაყურად წაჰკრა.

მოხუცი აიმღვრა და ალაბაშაზე დაბჯენით გვერდზე გაჩოჩდა.

დედაბერმა ამოიხვნეშა და გული ამოაყოლა.

— დაბერდი, შხაპნიკვა, შენ, დაჩაჩანაკდი. მე და შენ ახლა სიკვდილის მეტი არა დაგვრჩენია რა.

— შენ რა გიჭირს. მაგრადა ხარ, ჯერ სადარდებელი არაფერი გაქვს, — ბერიკაცს უნდოდა მისი შებრალება, მაგრამ ვერ შესძლო.

— შვილო, მოდი, აბა, მოდი, მოიწი!

ლოყალაყლაყა, ჯირკუტანა ბიჭი უხალისოდ მიეახლა ბაბუას. ბაბუამ სიხარულით მოხვია მას თავისი დაძაბუნებული, დამძიმებული ხელები. შვილიშვილი ადგური თბილ, ფუმფულა ბარტყად ეჩვენებოდა.

ბავშვის სხეულის სითბომ მას გული აუჩუყა. სინაზე მოერია და ტანზე კვლავ ბუსუსები დააყარა, თითქოს კარგ სიმღერას ისმენსო. კეფაზე ტყავი დაეჭიმა, ფელში ბურთი გაეჩხირა, ორიოდ ღერმა ბებრულმა კურცხალმა ქუთუთო აუწვა. შვილიშვილის სიყვარულის ბედნიერებამ მთელი მისი არსება გათანგა და ყველა სხვა გრძნობა გააქარწყლა.

— სად იყავი. ა? ბაბუა სულ მიატოვე, სულ, — ბაბუა შვილიშვილს თავზე ხელისგულით ელაციცებოდა, — მე უშენოდ მოწყენილი ვარ, ძალიან მოწყენილი ვარ.

— სად იყავი შენ? — გაიმეორა პატარა ადგურმა ბაბუას კითხვა და დასაქოქი სათამაშო ძაღლისკენ გაიშვირა ხელი.

— ვხედავ, დად, ვხედავ... — სიხარულმა ცივი წყაროს წყალივით დაუარა სხეულში, სული მოათქმევინა.

— ჩვენ... ლა... ლა... — ბიჭს სურდა ეთქვა „ალა“, რაც აფხაზურად ძაღლს ნიშნავს, მაგრამ ვერ ახერხებდა და სხვა რაღა დარჩენოდა, თვალეხს ჭუტავდა.

— რომელ ძაღლზე მეუბნები. ჩვენს ჩალიკზე? — ჩაეკითხა მოხუცი, — სადაა ჩალიკი ახლა? რაღაც არა ჩანს დღეს.

— ჩვენთანაა, — თქვა დალონებით იქვე მოჭუჭკულმა დედაბერმა.

— ძაღლების ღმერთი ალიშკინტრი გაუწყრეს იმას, იმ მუდრეგს!

— ლა... ლა... — ბიჭს კისერი წაეგრძელებინა, დაძაბული ხრახნიდა სათამაშო ძაღლის თათებს, — ჩალიკი... ჩალიკი...

— მომისმინე, — აჩიფჩიფდა დედაბერი, — ბიჭმა ენა ალ იცის. ალ იცის.. — პირზე ხელი აიფარა. უნდოდა გაეცინა, მაგრამ ლუყლუყი

გამოუვიდა, გეგონებოდათ, დოქიდან წყალი იღვრებო.

მოხუცს მოეჩვენა, გამჭირდავად ლაპარაკობსო.

— სამაგიეროდ, შენ რომ ენად გაიკრიფები... — ამრეზით მოხედა დედაბერს.

— ო, ჩემო საწყალო ბებელო. თულმე ლოგოლ ეკალივით გესობი თვალში, ლომ ჩემი ხმა ასე გალიზიანებს... — დედაბერმა კვლავ წაჰკრა თავისი ცარიელი ძვალი მხარში, — ხედავ, ქათმებს თევზს აჭმევს, ბიჭი კი არა, ანგელოზია, ანგელოზი, — დედაბერმა კვლავ სიცილისთვის მომანჭა პირისახე, მაგრამ ძალა არ ეყო.

— ლა... ლა... ჩალიკ... — ლულ-ლულეზდა ადგური.

— და, — მიუხვდა მოხუცი, — შენ გინდა მითხრა, რომ ჩალიკს შეიძლება ფეხი მოახრახნო?

— კი! — გაეხარდა ადგურს.

— ისე, იცოცხლე, კაი იქნებოდა. მეზობლებში ვერ იწანწალებდა, — თქვა მოხუცმა. — მაგრამ ჩალიკს ფეხს თუ მოახრახნი, მერე უკანვე ვერ მიახრახნი...

ბიჭი, თითქოს ენა ჩაუვარდაო, არაფერს ამბობდა; მოხუცი შეწუხდა და სიხარულს, რომელსაც წყაროს წყალივით დასწაფებოდა, კაეშანი შეეპარა.

— ხო. ხო... ფეხი უნდა მოახრახნო იმ ყურუმსალს, რომ სხვის კარებზე არ ჰქონდეს თვალეზი და ჰყეტილი! — მოხუცმა თავისი გულისჯავრი ძაღლზე იყარა.

შარშან ზაფხულს ბიჭი აფხაზურად თავისუფლად ტლიკინებდა. ამ ერთ წელიწადში კი ყველა სიტყვა დავიწყნოდა. ხანდახან, როცა ცდილობდა რაიმე ეთქვა და არ გამოსდიოდა, უცებ გაიტრუნებოდა და შეფიქრებინებოდა. თითქოს უკვირს,

რომ საერთოდ არსებობს რაღაც სიტყვები აზრების გამოსახატავად. ბიჭმა იცოდა, რომ ზანბუას მხოლოდ თავისი მშობლიური ენა ესმოდა და სხვა რომელიმე ენაზე კაცს ვერაფერს გააგებინებდა.

სიტყვასაც, წყლისა და ჰაერის მსგავსად, თავისი განსაკუთრებული გემო აქვს. სულ სხვანაირი გემო... ზოგი მწკლარტეა, ზოგიც ტკბილი. ზოგი ცივია. ისეთი ცივი, კბილებს დაგამტვრევს, ზოგიც ისე ვარვარებს, დაგწვავს... სიტყვის გემო თუ გაგებული არა გაქვს, სწორად ვერ ამოთქვამ.

რა დაემართა ამისთანა ი ბიჭს, სუნარს? ვერ ხედავს ამ ამბავს? „თვითონაც ხომ სიტყვასთანა აქვს საქმე, ასე ვიცი მე“.

შარშან ზაფხულზე მოხუცს შეეძლო შვილიშვილისთვის ეამბნა გასაგები, მარტივი ზღაპრები — ადგური იჯდა და უსმენდა. ახლა კი წუთითაც ვერ დაისვამ გვერდით... ვერაფერს იგებს. მთელი დღეები ამ სათამაშო მანქანებს, თვითმფრინავებსა და ლითონის სხვა ხარახურას უკირკიტებს. ზოგჯერ ისე გაერთობა, რომ ირგვლივ ვერაფერს ამჩნევს და არც აინტერესებს სხვა რამ.

„მანქანა, რაკეტა, თვითმფრინავი“ — აი, რა სიტყვებს ისერის ხოლმე წამდაუწყუმ ისე, რომ ოდნავაც არ წაიბოროძიკებს.

ძერას ლანდმა ეზოს გადაუარა, მამალმა ხმამალა შეჰყივლა, ბელლის ქვეშ თბილი მტვერი აამტუტა და წამოხტა. მისი ყივილი ამას ნიშნავდა: „ფრთხილად იყავით, ასე მალა რაც დაფრინავს, მისანდო არააო.“ ქათმებიც აკრიახდნენ. კრუხმა მამალს ბანი მისცა, აკაკანდა და წიწილები თვალის დახამხამების უმალ მიიმალნენ ბალახში.

— თვითმფრინავი, თვითმფრინავი-

ვი!—ბიჭი თან ცას ასცქეროდა, თან ძერის ლანდს მისდევდა. ძერა ნება-ნება აკეთებდა ირაოს ეზოს თავზე.

— თვითმფრინავი, თვითმფრინავი!

— ამას ყველაფერი, რაც ფრინავს, თვითმფრინავი ჰგონია.

— ეგ ჯერ პატარაა, — თქვა დედაბერმა.

— მას აქეთ, რაც ადგურმა ამეების ძახილი დაიწყო, ლითონის რაცაა, ყველაფერი ჭირის დღესავით შემჯავრდა, — მოხუცმა ნაღვლიანად ამოიხვნეშა, — ყველაფერი, რაც ლითონისაა... ეგ ბიჭი ასეთი არ იყო... ვერ გამიგია, რა უყვეს ასეთი ამ ერთ წელიწადში...

დედაბერმა თავი ჩაჰკიდა, არ ინძრეოდა.

მისი პირისკანი ერთთავად წვრილი ნაოჭებით დაღარულიყო. ხელები ქვედაკაბაში დაჩენილ გამხდარ მუხლებზე ეწყო, ფრჩხილები თუთუნისაგან დაყვითლებოდა. ბერიკაცს ისევ მოუნდა შებრალებოდა იგი, მაგრამ ისევ ვერ შესძლო.

ნუთუ ესაა ის ჯანით სავსე, გიჟმაჟი ქალი, მოჩერჩეტო, მაგრამ კეკლუცი, მაცდური ღიმილით რომ იღიმებოდა. ნუთუ ის ქალია, ვისაც სოფელში გულგრილად ვერავინ ჩაუვლიდა და ვისთანაც მოხუცი ჯეგლობაში ასე ახლო იყო? ახლა მას გვერდით უჯდა უსისხარელო ზღაპრიდან გადმოსული ქვეყნის ყველა სხვა ბებრუტუნას მაგვარი ბებრუტუნა. ვატი იფიქრებდა, იდლიიდან კუდიანი დედაბერივით თავის ჯადოშაობას აგერ ახლა, აგერ ახლა გამოიღვებო და, როგორც ზღაპრებში ხდება, ყველა სულდგმულს გააქვავებო.

— რა სიჩუმეა ამ თქვენს სახლში?

— სოხუმიდან ჩამოვიდნენ... —

თქვა დედაბერმა. — აქამდე თვლები-და, ახლა თანდათან იკრებდა გონს, — კარგი ბიჭებიანო, მაგარი ადგილები უჭირავთო. მე მგონია, გახვითს აქეთებენ მაგენი...

— რაღაც არ ეტყობათ...

— იმ ზაფხულს ადრე ჩაბეჭდეს გაზეთში, ნაბდიანად ჩაბეჭდეს, ჩემი ნახელავი იყო ის ნაბადი...

— ამისთანა გაგანია სიცხეში ნაბადი რად უნდოდა?

— ამბობენ, ახლა ძველი ნივთები მაგარ პატივშიაო... განსაკუთრებით, როცა სურათს იღებენ... ის ჩემი საწყალი ძმა რამდენი ხანია მუშაობს, თავისი დღე და მოსწრება შრომაშია.

— აბა, აბა, გადაიქანცა საწყალი, — იქედნურად ჩაიციხა მოხუცმა. — მაშინდელ ჩამოსვლაზე იმ ბიჭებმა უშობელი შეგიქანქლეს, ახლა რისი ჯერი დადგა?

— ერთი კიდევ მყავდა საკლავი საქონელი, მაგრამ ამისთანა ხალხისთვის არ მენანება, ისეთი მხიარული ხალხია. ან რამდენს იცინიან, ან რამდენს სვამენ.

— რა აცინებთ ნეტაი...

— იცინიან, აბა, ძალიან კარგად იცინიან...

— კიდევ უნდა ჩაბეჭდონ შენი ძმა გაზეთში?

— კი, ეგეთი პირი უჩიანს. რამდენი იშრომა იმ საცოდავმა. რაღაცას ლაპარაკობდნენ მანდ. — ბრძოლაო. მტრებო, მეგობრებო. რა ვიცის რა... მაინც რაა, იმათ რომ არ იცოდნენ. რაც ქვეყანაზე ჭკუა და ცოდნაა, სულ თავში ჩაუდგიათ.

— აბა, მტრებზე ლაპარაკობდნენო, ამბობ, არა? მტერი იქით იყოს და შენი უშობელი შორჩა, გაქრა, აღარაა. არც ხორცს წაადგება შენსას და არც სულს. არადერი შეგარჩინეს, შე საცოდავო. დაგაძლენ

ეგ მუდრეგები! რა ოჯახია, ღმერთო. ოჯახი კი არა, წკვარამია, წკვარამი და უფსკრული!..

— შენ გაგისკდა მიწა, — დედაბერმა კვლავ გაპკრა თავისი გაძვალტყავებული მხარი. — სხვებთან კი არა ვარ, ჩემს სახლში ვცხოვრობ...

— ჩემს სახლში ვცხოვრობ! რა ხანია ეგ სახლი შენი აღარაა. თავს რად იტყუებ, თუ ქალი ხარ...

— ეჰ, რას იზამ... — შეეხმიანა ქალი და გაყუჩდა. თითქოს საბოლოოდ, უსაშველოდ ჩასწყდაო სხეულში ის ზამბარაკი, აქამდე კიდევ რის ჭაბანწყვეტით რომ ამაგრებდა. — ცოცხლად ხომ ვერ ჩავწვები მიწაში...

უნაყოფო, ფესვებდამხმარ ხესავით იყო: უშვილძიროდ გადაგებული ამ ქვეყნიდან.

დალეული ხელები თავზე შემოიყრდნო, თითქოს ეშინია, მთლად არ დამვარდესო ძირს.

— ამის თქმა კი არ მინდოდა, შენ კიდევ რა გიჭირს, შენ ჩვენზე უკეთეს დღეში ხარ, — უთხრა კაცმა, რადგან მიხვდა, რომ ნამეტანი მოუვიდა, — შენ რა გგონია, ჩვენ რალაი შვილები გვყავს, ბედნიერები ვართ? მთელი სიცოცხლე გულის ფრიალში გაილია, ძილი ჩვენთვის არაა და სიმშვიდე, ვაი არაფერი მოუვიდეთ და ვაი, არაფერიო...

ბერიკაცს უნდოდა მისი შებრალება, მაგრამ ვერ შესძლო.

— რაკეტა, რაკეტა, თვითმფრინავი, თვითმფრინავი!

— ამ ბაღს რამე სასწაული არ დაემართოს! — აწრიალდა მოხუცი.

დედაბერი უსიტყვოდ წამოდგა და იქითკენ წალასლასდა, საიდანაც ბაღის ხმა ესმოდა. მოხუცს იმ ერთ წამს რომ ზღაპრულ კუდიან დედაბერად მოეჩვენა, ახლა აგერ მილასლასებდა ერთი შეუხედავი,

დედამიწაზე ყველა სხვა ბებრუცუნას მაგვარი ბებრუცუნა.

— რაკეტა, თვითმფრინავი, თვითმფრინავი, რაკეტა!

ადგურის აღტაცებული ძახილი უკვე მოსახვევს იქიდან ისმოდა.

მოხუცს ამ შეძახილებმა გული გადაუქანა, ეჩვენებოდა, ბიჭუნა ნამდვილად რაიმეს რკინისას, ლითონისას დაეჯახებოდა.

მოხუცი ხუნეშა-ხუნეშით, ალაბაშის მოშველიებით, უფრო მარჯვედ დაჯდა და იქვე მდგარ დოქს დახედა. წყუროდა, მაგრამ მოვითმენო, ამჯობინა, — მთლად არ წაწიხდეს გუნებაო.

თუთის ხის ჩრდილი მალე სულ დაილეოდა. ნიავიც არ იძვროდა. აუტანელი სიცხე სულ უფრო და უფრო ხუთავდა კაცს.

— რატომ არ ჩამოდის, რამ შეუშალა ნეტავი ხელი, — მოთმინებას კარგავდა მოხუცი, — რამ დააგრძელა მაინც ეს გზა.. ჩამოვიდოდეს, ოღონდ ჩამოვიდოდეს...

სუნარი: აგერ მოდის ახალგა-მომცხვარი კანდიდატი. დამინახა. შეშლილივით მიქნევს ხელს, მიხმობს. რალაც ნამეტანი სალმიანი გახდა, ნამეტანი. ეს რა ხალხი მოსდევს? ვცნობ, როგორ არა ვცნობ. მისი თანამოგვარენი, ახლო და შორეული ნათესავები არიან. „საქმის“ ხალხი სულ აქაა. ვაჭრობის სისტემაში მუშაობენ. ერთი სიტყვით, „მეცენატები“ მოდიან. „ჩვენს გვარში ეგ ერთი გაგვიკანდიდატდა, არაფერი არ უნდა დავზოვოთ მისთვის, არაფერიო“, ხშირად იტყვიან ხოლმე და ისიც იფერებს, ფანტავს და ფანტავს ნათესავების ფულებს. ეტყობა, ახლა თავის „მეცენატებთან“ ერთად კანდიდატობის დასველებას აპირებს. დღეს ამას იოლად ვერ და-

უძვრები კაცი. ახალგამომცხვარი კანდიდატი არაფერს დაზოგავს, ეგ ყოველთვის უსაზღვროდ გულუხვია, როცა ფულს სხვა იხდის. აი, მე მივალ, მივულოცავ და დავემშვიდობები, წავალ სოფელში. კი... გული გადაელია ალბათ მამაჩემს ჩემს მოლოდინში... რაც ადრე დავეთხოვები ამათ, მით უკეთესი, ნამდვილად!

მოხუცი ჯდომით დაიღალა და მიწვა. ახლა იგი უფრო მშვიდად სუნთქავდა. კვლავ მთებზე ფიქრობდა.

იქ კი, მთებში, ღრუბლები კვლავ იჯარებოდა. ალყა შემოარტყეს მათ თავზე ციხე-სიმაგრესავით აღმართულ კლდეს და შიგ „ყრონტში“ მისწვდნენ. მაგრამ ზენა ქარმა სწრაფად დაარღვია მათი რკალი. ღრუბლების ჯარმაც შემოტევას ველარ გაუძლო, დაიშალა, დაიქსაქსა, წვერწამახულ თხემებზე მცირე რაზმებილა დატოვა და კვლავ ხეობისკენ ჩამობრუნდა.

იმ ზაფხულს, მოხუცი პირველად რომ მოექცა თავზე მთებს, ერთხელ საბალახოდ გადენა თიკნები. მზე უწყალოდ აცხუნებდა და სხვა დროს მოუსვენარი თიკნები, ახლა წყურვილისგან მისავათებულნი, გრილ გამოქვაბულში შეიყუყუნენ. ბიჭმაც ქვეშ საგებელი დაიგო. ზედ შესასვლელთან ჩრდილში მიწვა და მთის ჩქერალთა ხმაურს მიუგდო ყური. როგორ მღეროდნენ! ჰო, ჰო, მღეროდნენ ნამდვილად! მოძახილს სიბ ნალარს ჩამოყოლილი ნაკადული ამბობდა. წყალი დიდ ქვა-ლოდებში ჩამორბოდა და მის ხმას წვერწამახული მწვერვალი ბანს აყოლებდა, რის გამოც სიმღერა მაღლა იწევდა და მკაფიოდ უღერდა. სხვა ნაკადებიც, ფერდებს რომ ჩამოყოლილიყვნენ და ამ

მწვერვალის ძირა უფსკრულში იყრიდნენ თავს, თავთავიანთ ხმას აწევდნენ, ქვევით, ღრმა ხევში, ერთმძლავრ ნიაღვრად შერთულნი, ბანს აგუგუნებდნენ. იქიდან განუწყვეტლად მოისმოდა: უ-უ-უ-უ-უ-უ. ხმა თითქოს ვერ ეტეოდა იქაობაში და სივრცეებს ეფინებოდა. მაგრამ უცაბედად გვერდიდან, კლდეების შვერილებიდან გამოვარდებოდა ქარი და ნიაღვართა ხმაშეწყობილ ჰანგებს შთანთქავდა. ზოგჯერ კარგა ხნით მიგუდავდა სიმღერას. ასეთ წუთებში ჩამოწოლილ სიმყუდროვეში გაისმოდა სხვა ხმები, რომლებთანაც ქარს ვერაფერი გაეწყო — ეს ხმები აჩამგურის ჰანგივით ჩვეულებრივ იმ საერთო ქოროში იკარგებოდა. ეს იყო ხმა ხის სიმაღლე ჩანჩქერისა. პატარა ნიაღვარი ფრი-ალო კლდიდან ვარდებოდა, მაგრამ რაღაი წყალი უღონო იყო, ფრი-ალო კი მაღალი, ჩანჩქერი წვრილ-წვრილად, უხეფებად იფშვნებოდა და, როცა ქარი ჰაერში მოკიაფე წვეთებს ციბრუტივით ატრიალებდა, ისინი, ყველანი ერთად, ჯადოსნურ ხმებს გამოსცემდნენ, თითქოს სასწაულმოქმედი მუსიკოსის თითები გადარბოდესო აჩამგურის აბრეშუმის სიმებზე. მაგრამ ქარი თავისი ხახიდან უშვებდა ხოლმე ყველა სხვა ნიაღვრის ერთობლივ გუგუნს და ეს სიმღერა ირგვლივ ყველაფერს ფარავდა. ამ ჯადოსნური მელოდიის იავნანამ და მთების დამატობელმა სურნელმა ამო ძილი აწვინა პატარა მწყემსს.

მოხუცს მოეჩვენა, კუტიკარმა გაიჭრიალაო. მაშინვე ჩამოიშორა მოგონებები და ყურთასმენად იქცა. მაგრამ კუტიკარის ჭრიალი მოჰყურებოდა.

თუთის ხის ჩრდილი კვლავ მისკენ მოიწევდა. თავარა ჰაერში რა-

დაც გაბმული, ოდნავ გასაგონი ბუ-
ბუნი იდგა. ცა ვეებერთელა დოლა-
ბად გადაქცეულაო, იფიქრებდით.
დაბლა, დაბლა, ზედ მიწის პირზე
ზუზუნებდნენ ფუტკრები. ჩიტები
მიყუჩდნენ. სიგრილეში, ხშირ ფოთ-
ლებში შეიმალნენ. მხოლოდ დრო-
დადრო ენადგაკრეფილი წიწკანას
ხმა თუ გამოკრთებოდა ან წიწკანა-
სადმი გულგრილი ბელურები რა-
დაც დარდიანად, ზარმაც-უგერგი-
ლოდ თუ წაუყლივლებდნენ ხოლმე
ხანდახან. დროდადრო ბუდეებიდან
ცაში შავ ისრებად აიჭრებოდნენ
მერცხლები და თავიანთი მშვენიერი
მაკრატელა ბოლოთი და კოხტად
ნაკეცი ფრთებით თვალს ახარებ-
დნენ.

— რაკეტა, რაკეტა, თვითმფრი-
ნავი, — საიდანღაც შორიდან მოის-
მა ბიჭუნას ხმა.

— არაფერი დაემართოს ამ
ბავშვს, მიხედონ მაინც იმ ოხრებ-
მა! — ბრაზობდა მოხუცი. — ლო-
რია, ლორი, აბა რაა, მთელ დღეებს
მოგიხმარიებს, ვითომც არაფერიო...
თითქოს ყველანი მისი მოვალენი
იყვნენ. საწყალი ხიკა, ე, რა მორჩი-
ლი დადგა...

სუნარი ჩამოვა და პირველ რიგ-
ში ადგურზე მოელაპარაკება. რა
ამბავია, ცოდოა ბიჭუნა, არ შეუძ-
ლია თავისი აზრი სიტყვებით გამო-
ხატოს.

ზოგი ფიქრობს, ადამიანი ლაპა-
რაკს სწავლობსო. არაფერიც. ენა
სულივითაა, სისხლში აქვს ადამი-
ანს, მაგრამ მის სიღრმეში უნდა
დაყვინთო და წყაროს წყალსავით
დაეწაფო, რომ იგრძნო გემო მისი
და სიციცხალე, აი, მაშინ კი სი-
ტყვები თავისით ამოგჩქეფენ სხეუ-
ლიდან.

სუნარი ჩქარა ჩამოვიდოდეს მა-
ინც... სადაა ამდენ ხანს... ისე, უეჭ-

ველად დღეს ჩამოვა. შეიძლება მარ-
თლა ცოტა კი შეაგვიანდეს, მაგრამ
დღეს ჩამოვა, დღეს...

სუნარი: ძველისძველი ციხე ბურ-
ჯი. ოდინდელ ლაშქრობათა აკვა-
ნი... სახელგანთქმული ქელეშის
სამფლობელო, საპყრობილე, სადაც
სარდაფებსა და ჯურღმულებში
იტანჯებოდნენ თავისუფლებისთვის
მებრძოლნი... მიწიძვროსგან დაშავე-
ბული ლოდების უწესრიგო ყორე-
სავით დგანან აფეთქებული ციხე-
სიმაგრის ნანგრევები (იგი ააფეთ-
ქეს, რათა სანაპირო თვალწარმტაცი
სანახავი გაეხადათ!). ერთ-ერთ ასეთ
კლდე-ნანგრევებზე გამართულია
რესტორანი „დიოსკურია“. ასე და-
არქვეს. აი, ჩვენ ახლა სწორედ ამ
რესტორანში ვსხედვართ. ხუთი კა-
თხა უკვე დავლიე... რით არიან
ცუდი ბიჭები... ერთი მათგანი —
ახალგაზრდა კანდიდატია, წარმა-
ტებით დაიცვა დისერტაცია ჩვენი
ხალხის ისტორიის საკითხებზე...
როგორც იტყვიან, ახალგაზრდა სპე-
ციალისტია... ახალი კადრი... მისმა
„მეცენატებმა“ იმისთანა სუფრა გა-
აწყვეს, სულო, გულო, ჩიტის რძე
რაა, ჩიტის რძე არ აკლია... თუმცა...
რა მალე ამივარდა თავში ეს ღვი-
ნო... თავი მიბრუის... მაგრამ რა-
ტომ არ უნდა მოვილხინო — ვზივარ
კეთილმოწყობილ ჩინებულ თანა-
მედროვე რესტორანში, რომელიც
ბნელი წარსულის ნანგრევებზეა
აგებული, შევყურებ ლაყვარდოვან
ზღვას — ევქსინის პონტოს. მე იგი
ამო ნიავით მესალბუნება... სახლში
მაინც ვერ წავედი... ახლაც ვერ წა-
ვედი... ვერ მომიხერხდა... მამა
ალბათ გულგადაღებული მელოდე-
ბა... ბიჭიც მომენატრა, მაგრამ ამხა-
ნავ კაცს ხომ ვერ გავუტეხავდი
ხათრს, ასეთი დღე აქვს... და საერ-

თოდაც კაი დღეა დღეს. თუმცა ცოტა კი ცხელა, მაგრამ ზღვის პირას სიცხე ისე არ იგრძნობა. ზღვამ იცის თავისი საქმე... თავი მიბრუნის... რა მალე მომეკიდა...

მოხუცს არასოდეს დავიწყნია, რა შეემთხვა მაშინ მთაში. ძილში ძაღლების წკავწკავი ჩაესმა და გამოეღვიძა. თიკნები ახალი გასული იყვნენ გამოქვაბულიდან საბალახოდ. დამფრთხალნი, ამ წუთში გამოღვიძებულ თავიანთ მწყემსს მიაწყდნენ, ჩლიქებით გადაუარეს და გამოქვაბულში შეკუნტდნენ. ყეფა ძაღზე ახლოდან ისმოდა. მის ნაცნობ მწყემსებში ბევრი ჩინებული მონადირე ერია, დროდადრო, ორისამი დღით რომ აღიოდნენ მთაში ჯიხვებზე სანადიროდ. მაგრამ სხვებიც იყვნენ, — ესენი უსაქმურობის ჟამს ტყვია-წამლით დატენილ კაჟიან თოფებს გადაიკიდებდნენ, სანადიროდ უვარგის ძაღლებს წაიგდებდნენ და ალალბედზე მიდოდნენ; თუ წააწყდებოდნენ, ისედაც სასიკვდილოდ განწირულ ქურციკსაც არ დაინდობდნენ, ესროდნენ. ეს ვაიმონადირეები იქვე, დაბლა, ვაკეზევე ძაღლებს მაღალ ბალახში ან ჯუჯა წიფლნარში — აასში შეაგდებდნენ და უწყალოდ ხოცავდნენ ნადირ-ფრინველს. მაგრამ მიწაში არასოდეს აჯვარედინებდნენ ატამხას — მარგილებს, რათა მათზე გასატყავებლად ჩამოეკიდათ ნანადირევი!

პატარა მწყემსმა ყური მიუგდო: ძაღლების ყეფა ნიაღვრის მოძახილივით გაღმიდან მოისმოდა. ბიჭი წამოხტა და ჯუჯა წიფლის კომბლის მოშველიებით გამოქვაბულის თავზე დაკიდულ კლდეზე აბობდა. ზედ მის პირდაპირ ორი უშველებელი ფრიალო კლდე აღმართულიყო. ამ კლდეს შუაზე ბურღავდა მდინა-

რე, თეთრ სარტყლად რომ მიიკლაკნებოდა ღარტაფში. მრგვალი თექის ქუდივით მოჩანდა ქვემოთ კარავი — იმ მიდამოებში მდგარი ყველა ცხვარ-საქონლის მწყემსის თავშესაფარი.

გზის მხრიდან რაღაც ხმები მოესმა. მოხუცი ფიქრებიდან გამოერკვა. მოგონებებს მოწყდა. ყური მიუგდო. ვიღაცეები ხმამაღალი ლაპარაკით მოდიოდნენ. როცა მათი ხმები მიწყდა, მოხუცს ყურს მოსწვდა ბიჭუნას სუსტი ძახილი: „თვითმფრინავი, თვითმფრინავი!“ ცა წუთში რაღაცამ გააყრუა. მოხუცმა აიხედა, მაგრამ, რაღა თქმა უნდა, თვალი ვერ ჰკიდა წუთით გაელვებულ და ლაყვარდოვან შორეთს შეთქვეფილ თვითმფრინავის ვერცხლისფერ ტანს.

— ამ გზაზე შუადღესაც ამდენი მოძრაობაა, — წუხდა მოხუცი. — ემანდ იმ ბიჭს არაფერი დაემართოს... იმ მუდრეგმაც რაღა დღეს გამოიღო თავი... ხალხი ყანაში ოფლისგან იწურება. ესენი კი, ეს ღვთის პირიდან გავარდნილები, სხედან და არხეინად ღრეობენ.

— რაკეტა, რაკეტა! — მოისმოდა ბიჭუნას ხმა.

მოხუცი არ ცდილობდა გაერკვია, ვისი ხმა მოისმოდა გზიდან, ბიჭის ხმას კი მაშინვე ცნობდა.

მოხუცს იგი ყოველთვის სძულდა. რა რჯულის ხალხი არ უნახავს წუთისოფლის გზაზე, მაგრამ ამისთანა გლეხი, ვისაც მთელი დღე და მოსწრება სულ სხვების ხარჯზე გაეტარებინოს არხეინად, სხვა არავინ შეხვედრია. რაღა თქმა უნდა, ზოგ სხვასაც დაუწყია ცხოვრება ამგვარად, მაგრამ თანდათან შებეზრდებოდათ ძაღლუმადური ცხოვრება. ან სინდისის ქენჯნა შეაწუხებდათ, ან კიდევ სხვები ნამეტანი აჩენდნენ

თავიანთ სახეს, ხელისგულზე მოქმედებდნენ და მათ უნაგირიდან იგივე ხელები გადმოსვამდნენ, რომლებმაც ზედ შეასკუბეს. აი, ამას კი, ამას, პირველივე ნაბიჯი რომ გადადგა, მერე არ შეუცვლია ნირი და წესი. მერედა სახელიც როგორი ჰქვია, ა! — ბადრაკი ტყუირი, ველური სახელია.

ერთხელ, როცა ბადრაკი და ეს ჩვენი მოხუცი ჯანზე კარგად იყვნენ, რაიონიდან რომელიღაც ხელმძღვანელობა ჩამოვიდა და, როგორც წესად დადგენილიყო, ბადრაკის სახლში მიიპატიჟეს.

თხა და ღვინო კოლმეურნეობისა იყო, დანარჩენი მეზობლებმა იკისრეს. „პურმარლის“ გამწყობად კი ბადრაკი გამოვიდა.

ჭამეს, დალიეს, შემდეგ კი ეს ხმაურიანი და ნაქეიფარი ხალხი დიდი ხის ჩრდილში ჩამოსხდა. ბადრაკი ყველაზე მეტს იცინოდა. კბილების ღრჭიალ-ღრჭიალით უმიზეზოდ როხროხებდა. ძირს ჩამოშვებული ბანჯგვლიანი ულვაშებიც კი ვერ უფარავდა ღოჯებივით კბილებს. იფიქრებდით, კბილები კი არა, ტახის ეშვებიაო, რომლებითაც, თუ მოეგუნებებოდა, ამ ხალხს ყველას სულ როხროხ-როხროხით მიფლეთ-მოფლეთდა.

ბადრაკმა სტუმრებს უამბო, თუ ერთმა სახელგანთქმულმა მონადირემ, სახელად ბაგდუალამ, როგორ წაიყვანა იგი ერთსახეზე — მთელ აფხაზეთში ყველაზე მაღალ თოვლიან მწვერვალზე — ჯიხვებზე სანადიროდ (სინამდვილეში უახლოეს უღელტეხილს იქით ფეხი არც არასოდეს გადასცდენია!). ბაგდუალა მართლაც ცნობილი მონადირე იყო, მაგრამ ბაგდუალა აქ არაფერ შუაშია. საქმე ისაა, რომ ამ მონადირის შვილს მაღალი თანამდებობა ეჭი-

რა. ძალზე სწრაფად დაწინაურდა და ეს ყველამ შეამჩნია. ბადრაკს-გასათოცარი ალლო ჰქონდა, უცდომლად გრძნობდა, ვისი კოჭიც დაჯდებოდა ალჩუზე. თანაც ყოველთვის ეხერხებოდა თითქოს სხვათა შორის ჩამოეგდო საუბარი ამ ბედის ნებერა, წინწაწეულ ხალხზე. და ისეთნაირად ჰყვებოდა მოგონილ ამბებს, რომ ყველას აჯერებდა. მოხუცმა იცოდა, ბადრაკის მოყოლილი ამბები სულ მონაჩმახი რომ იყო. ბევრმა სხვამაც იცოდა, მაგრამ სიამოვნებით უსმენდნენ, თითქოს გაბრუებულანო, და უკვე ეჩვენებოდათ, რომ ბადრაკი კი არ ცრუპენტელობს უნამუსოდ ზოგ-ზოგების გულის მოსაგებად და თავისთვის სახეიროდ, არამედ ის სხვები მიჰქარავენ, ბადრაკს ცრუპენტელობას რომ სწამებენო. მოხუცს მოტყუებულთა მაგივრადაც რცხვენოდა.

იმ დღეს ბადრაკი ბაგდუალაზე ლაპარაკობდა გაუთავებლად. ჩვენათ ჯიხვი ასე და ასე მოგკალითო, იმხელა იყოო, რომ თუმცა ჯანი და ღონე არ მაკლია, ძვრა ვერ ვუყავი, ბაგდუალამ კი ბუმბულივით აიტაცაო (ბაგდუალა მკვირცხლი, მარჯვე, მაგრამ ჩია, უღონო კაცი იყო). მსმენელები იმშუშნებოდნენ და იმავდროულად გაოცებულნი მისჩერებოდნენ ბადრაკს ვეება ხახაში, ვითომდა სიამოვნებით ჩახევამდე რომ აფჩენდა და ელოდნენ, მონადირეთა ცხოვრებიდან კიდევ რა საფათერაკო ამბებს გვეტყვისო.

შემდეგ ბადრაკმა გადაწყვიტა, ბაგდუალაზე რაც გოქვი, კმარაო. სიტყვა არავინ წამართვასო, შეეშინდა და ბაქიბუქს მოჰყვა, ესა ვარო, ეს ჩამიდენიაო, ის ჩამიდენიაო, კაცს, გნებავთ ოთხსაც, ვინც უნდა იყოს, ბეჭით გავაკრავ მიწაზეო.

— თუ ეგრეა, მოდი, ვიჭიდა-

ოთ! — შეუძახა მაშინ მოხუცმა და წამოდგა.

ყველამ ერთმანეთს გადახედა და გაყუჩდნენ. ბადრაკს ყბა ჩამოუვარდა და ეგრევე პირდაფრენილი დარჩა. მაგრამ გონს მოეგო და ერთი გულიანად გადაიხარხარა. აქაოდა ვიგულები, სიცილი მახრჩობსო. ისე მეცანება, ისე მეცინება, მინდა, მაგრამ პირი ვერ მომიმუწავსო.

— აბა, მოდი, მოდი, დამეჭიდე! — უთხრა მოხუცმა, თექის ქუდი მიწაზე მოისროლა და მისკენ წადგა ნაბიჯი.

— შენ რაო. სიცოცხლე ხომ არ მოგბეზრებია, შხანიკვა! — გაიოცა ვილაცამ.

— ხუმრობს, ვერა ხედავთ! — ნაძალადევი სიცილით თქვა ბადრაკმა.

— არა ვხუმრობ! — მოხუცმა ისევ მოავლო თვალი ყველას, სტუმრებსაც და მასპინძლებსაც და გაშრა: ყველანი გამკილავი თვალით შესცქეროდნენ, თითქოს მათთვის რამე უსაშველო ეწყენინებინოს.

— ბადრაკ, მოდი, თუ კაცი ხარ, ხათრს ნუ გაუტეხავ, სხვა დროისთვის მაინც შეგეშვება, — დაუძახა ერთმა სტუმარმა და გაიცინა. გაიცინა და მერე, ფუი, როგორ გაიცინა!

— რას ამბობთ, მეზობელი კაცია, რა გული მიზამს... — ბადრაკს უცებ ხმა თაფლივით დაუტკბა. იმ ჯიბიდან გავარდნილს არაფერი ეშლებოდა, უნდოდა სტუმრების თვალში კიდევ უფრო ამალღებულყო, — მე და ეგ ასე ვემასხრებით ხოლმე ერთმანეთს, — განაგრძო მან. — სიყმაწვილეს ვიხსენებთ.

ესეც მტკნარი სიცრუე იყო, რადგან ბავშვობის შემდეგ მათ არათუ არ უჭიდავიათ არც წაჰკარებიან ერთმანეთს.

რალაი ყველა იქ მყოფი უბღვერ-

და, მოხუცს ჭიდაობის სურვილი ცოტა კი ჩაუცხრა, მაგრამ უკანდახევას არ აპირებდა. იგი ბადრაკთან მივიდა.

— ჩვენ არც ბალები ვართ და არც ჭაბუკები, ხომ იცი, — ჩაიბურღლუნა ბადრაკმა, იმით შეცბუნებულმა, ნუთუ მართლა ვერ ავიცდენ ჭიდაობასო.

ერთმანეთს დაეჯაჯგურნენ. მოხუცმა იგრძნო, რომ ბადრაკს ნიკაპი უცახცახებდა. — ზურგით გრძნობდა, ბადრაკი ზურგზე აჭერდა ნიკაპს. უფრო მაგრად ჩაეჭიდა მეტოქის ქამარს და მოსინჯა, მაგრად დგას ფეხზე თუ ვერაო. გაოცდა: ბადრაკს თავისი გრძელი — ხარისხსავით ფეხები თართოდ გაეჩაჩხა. მაინცდამაინც დიდი ძალა არ იყო საჭირო მის ასატაცებლად. ბადრაკი ჭიდაობის ბაიბურს არ იყო და ფეხზე ძლივს იდგა, თანაც კაი გვარიანი დედალიც იყო. შესახედად იყო ასეთი მოდღღეზილი, თორემ არაფერი ისეთი ღონე არა ჰქონდა.

— ეგა ტანით პატარაა და ნახეთ, როგორ ეჭიდება, წესს არ იცავს, უსირცხვილოა ვილაცაო! — იყვირა სტუმარმა.

სტუმარი ბოღმას ვერ მალავდა — ხმამ გაყიდა. ბადრაკიც ცდილობდა ქედმაღლურად გაეცინა. მაგრამ მისი ყბა — ნიკაპი ჯერაც ისევ მოხუცის მხარზე ხვანცალებდა.

მოხუცს გულით ეწადა, ბადრაკი გაქიჩმაჩღებოდეს მაინც, რომ თავი დასაცავი გამიხდეს და ამ მერყეობას შეეგშვაო. ბადრაკი თავის უპირატესობაში დარწმუნებული რომ ყოფილიყო, რა შეილია, დაენდო მეტოქე. ყველას თვალწინ გაამასხრებდა, როგორ თუ დაჭიდება შემომბედეო. მაგრამ მან მაშინვე ისაზრა, რისი თავიც ჰქონდა, მიხვდა, მოხუცს ყურებზე ხახვს ვერ

დააჭრიდა და ახლა ხვანცალებდა, ოღონდ კი რითიმე დაეჯახნა მეტოქე. მამა აბრამის ბატკანივით ამიტომ ეჭირა თავი (რომც ორივე ბეჭით გაგეკრა მიწაზე, ხალხს მაინც დაუმტკიცებდა, იმან კი არ წამაქცია, მე წავაქციეო). ბადრაკს ის კი შეეძლო, რომ მაშინვე, როგორც კი შხანიკვა საჭიდაოდ გამოვიდა, ავარდნილიყო და დავარდნილიყო, ვითომ მაგრად გაბრაზებულყო და მოხუცისთვის კუდიტ ქვა ესროლინებინა, გაეედო. დიდის სიამოვნებითაც გააკეთებდა ამას. ისიც იცოდა, რომ ეს გამოწვევა მისი ბაქიბუქობის ბრალი იყო. მაგრამ იმდენიც ესმოდა, რომ გულის მოსვლა საუკეთესო გამოსავალი არ იყო. თვითონ შხანიკვას რომც ეთქვა, თუ რატომ გამოვიდა საჭიდაოდ, სიცილს დააყრიდნენ, რადგან ბადრაკის ტყუილებს ტკბილი ზღაპარივით უმტკივნეულოდ, ლაღობით ეკიდებოდნენ და თავადაც აქეზებდნენ: ეგრე, მიდი, მიდიო. ბადრაკი მარიფათიანი ბიძა გახლდათ და არ უნდოდა შხანიკვას ან სხვა ვინმეს კბილი გაესინჯა მისთვის. კარგად იცოდა, რომ სიტყვა ჩიტი არაა, პირიდან გამოვიფრინდება და მორჩა, ვერ დაიჭერ. ხმამაღლა ნათქვამს უფრო მეტი ძალა აქვს, ვიდრე იმას, რაც ყველასთვის ცხადია, ოღონდ დუმილითაა ჩავლილი.

და შხანიკვამ გაიგო, რომ ყველაფრისდა მიუხედავად, მას არ შეუძლია და არც უნდა წააქციოს ახლა ბადრაკი ყველას თვალწინ ორივე ბეჭზე. შესაძლოა არც ერთია მთლად სწორი და არც მეორე, მაგრამ, მართლა და მართლა, ყმაწვილები ხომ არ არიან, რომ ეყვინჩილონ ერთმანეთს... და საერთოდ. რა სულელურად იქცევა, სხვა ვერაფერი მოიფიქრა ამის ყურის ასაწევად? ახ-

ლა, როცა დარწმუნდა, რომ ბადრაკი ასე გულდელადი ყოფილა და ღონის ნატამალიც არა ჰქონია, კიდევ უფრო ძლიერ შესჯავრდა იგი.

— გამიშვი, გამიშვი, — მოუთმენლად უთხრა მან ბადრაკს, ისე რომ სახელი არ დაუძახნია, რადგან მისი სახელიც ეზიზღებოდა.

ბადრაკი რას არ მისცემდა, ოღონდ კი გასცლოდნენ და თავისი მოცახცახე ხელები შეეშვა. ერთი სული მოითქვა და ახვიხვინდა. სხვებიც ახარხარდნენ.

— ერთი ისეთი უნდა ჩაგეფეთებინა ამისთვის, რომ თავბედი ეწყევლა, — თქვა ერთმა სტუმარმა და თავისი გამგმირავი თვლები მოხუცს აავლ-ჩაავლო.

— მეზობელიც შინაურია, — წამოიძახა ბადრაკმა და ისევ დაიხვიხვინა. ახლა უფრო სუნთქვადაოკებული ხითხითებდა, ნიკაპი არ უკანკალებდა.

— არამზადა, — ამობოლმა მოხუცმა, როცა ის ჯაჯგური გაიხსენა ახლა, თუთის ხის ძირში გრძელ სკამზე წამოწოლილმა.

მიწა ვარვარებდა, გადახურდა და მოხუცი მის გუგუნს ფეხისგულით გრძნობდა. სიცხე ისე დასარსალებდა ჰაერში, როგორც წყლის ზედაპირზე მოვლებული ცხიმი რამ.

ჯობია შვილიშვილი აქაურ სკოლაში შეიყვანონ. ბაბუას ფეხი მოუტრჩება, ბოლოს და ბოლოს ხომ შეუხორცდება ეს ოხერი ჭრილობა და შვილიშვილის მიხედვის მეტს არაფერს გააკეთებს. ადგური ჩქარა ისწავლის ლაპარაკს, იმის გამოხატვას, რაც აწვალებს. აი, მაშინ კი მოკედება მოხუცი გულარხეინად.

ამ ფიქრებმა ცოტა დააშოშმინა, გაახსენდა შვილიშვილის სხეულის სითბო და ბაღურის სურნელი და

ისევ ის განწყობა დაუბრუნა, კარგი სიმღერის მოსმენისას რომ ეუფლებოდა.

„ბიჭს არაფერი დაემართოს“.

ახლა ის დედაბერიღა უგდებს ყურს. მისთვის არავის სცხელა, არც ხიკას სცალია, მოხუცს კვლავ მოუნდა შებრალებოდა დედაბერი, მაგრამ გულში სიბრაღის გრძნობა რატომღაც არ აღეძრა. უცაბედად გაახსენდა, რაც ოდესღაც მომხდარიყო მათ შორის და სირცხვილის ოფლმა დაასხა, თითქოს ვიღაცას მისი ფიქრი გაეგონოს. იმ დღესაც, როცა პირველად გაიფიქრა ის, რაც მერე მოხდა, დღევანდელივით პაპანება იდგა. სიმინდს თოხნიდა, ქალი კი მდინარიდან ამოდიოდა, სარეცხი ამოჰქონდა. ქალს თვალი ჰკიდა თუ არა, თოხი მიაგდო და ჩრდილში ჩამოჯდა. უნდოდა მხოლოდ წაესაუბრა მასთან და ცოტა სული მოეთქვა. იმ წუთში ფიქრადაც კი არ მოსვლია რაიმე. ქალი ორნაქმარევი იყო, მაგრამ ორივეჯერ უშვილო რომ დარჩა თუ სიანხლის გამო, ვერც ერთგან ვერ მოიკიდა ფეხი და ახლა ეს ერთი წელია ძმასთან ცხოვრობდა.

— იქნება მითხრა, როგორ იყო, ჩემი ძმის წაქცევა რომ გინდოდა? — სიცილით ჰკითხა ქალმა, როგორც კი სარეცხის ტაშტი ჩამოდგა მიწაზე, — მთვრალი თუ იყავი, თორემ ეს აზრად როგორ მოგივიდოდა, ხომ ასეა? მიაშხე რა, მიაშხე, როგორ იყო...

ქალი, როგორც კი დროს იხელთებდა, ყოველთვის ამაზე ემასხრებოდა ხოლმე შხანიკვას. თავიდან ვაჟს სწყინდა, მაგრამ მერე კი შეეჩვია და ქალის სიტყვები გულთან არ მიჰქონდა.

მაგრამ იმ დღეს, როცა ქალთან დალაპარაკება გადაწყვიტა, ბადრაკ-

თან დაჭიდების შეხსენებამ გააცეცხლა. ქალს მოუტრიალდა, უნდოდა რაიმე მაგარი ეთქვა... მის წინ იდგა და უტიფრად მოსჩერებოდა მდინარის ცივ წყალში ეს-ესაა განბანილი ახალგაზრდა ქალი. ოქროსფრად დაწვოდა სხეული და ნამზეური უთავდებოდა მკერდთან, რომლის ნაზი თეთრი ხაზებიც მოუჩანდა ჩითის კაბის ჭრილიდან.

— თუ გულით გინდა, შემიძლია გიჩვენო, როგორც იყო... — თქვა შხანიკვამ, ერთი ხელი წელზე შემოხვია, აიტაცა და გულზე მიიზიდა.

— კი, მაგრამ... — დაიბნა ქალი, მაგრამ მისი თვალები მიაღერსებამოწადინებული ძაღლის თვალებს მიემგვანა.

ქალს თავის დახსნა არც უცდია. ერთი წამით ასე ჩახვეულნი გაირინდნენ და შხანიკვამ იგრძნო, როგორ გამალებით უცემდა ქალს გული და როგორ აუღ-ჩაუდიოდა მკვრივი, ბავშვის ტუჩდაუკარებელი ძუძუები, რომლებსაც ასეც სწერებიათ, რომ არც არასოდეს ეგრძნოთ დედობის ნეტარი საიდუმლო. ვაჟმა ქალი ფრთხილად წამოაწვინა მიწაზე და ხელი უშვა.

— ესეც ასე, — ხრინწი შეუდგა ხმაში, თითქოს თვითონ კი არა, ვიღაც სხვას ეთქვას, ისე გადაუსხვაფერდა კილო.

ქალი, თითქოს არც არა მომხდარაო იქვე ქვაზე ჩამოჯდა, მაგრამ შხანიკვა ხედავდა, როგორ ებურცებოდა ძუძუები. მდინარიდან ვრილმა სიომ დაუქროლა. ვაჟმა გულისპირი შეიხსნა და სული მოითქვა. მოჭრილი ანწლის მძაფრმა სუნმა ნესტოში შეუღიტინა. ვერა და ვერ მოეცილებინა თვალი ხავსმოკიდებულ ქვაზე ჩამომჯდარი ახალგაზრდა ქალისთვის.

ახლა, ამის გახსენებაზე, მოხუცი

სინდისის ქენჯნამ შეაწუხა და შუბლი ცივი ოფლითაც კი დაეცვარა.

ღმერთმა იცის, რით დამთავრდებოდა იმ დღეს მათი შეხვედრა, ცოლს რომ სამხარი არ ამოეტანა. რა დაქანცული იყო საწყალი ქალი!

— ამ დილას ამოვწმინდე, შენ რომ გიყვარს, ის წყარო, — თქვა ცოლმა და ცივციველა წყლით საგსე, გარედანაც დაცვარული დოქი დაუდგა.

— წყალი კი მოგიტანია, კარგია, მაგრამ ღვინის მოტანა არასოდეს მოგიფიქრებია, — განაწყენებით უთხრა ქმარმა.

— ღვინოო!.. ამ სიცხეში ღვინო რად გინდა, ისედაც იხუთება ადამიანი... იმ წუთში ჩაგაგდებს ლოცვინად, — გულწრფელად გაიოცა ქალმა. ვერც კი შეამჩნია, რომ ქმარი გაღიზიანებული ლაპარაკობდა.

გვალვისაგან დახრუკული მოჭრილი ანწლის ღეროები აუტანელ სუნს აყენებდა.

ცოლი მშვიდად, აუჩქარებლად ალაგებდა საჭმელს ქათქათა, თავისებურად სურნელოვან ცახოცზე. რარიგ სათუთად, რარიგი სიყვარულით მოძრაობდნენ მისი ხელები!

— ო, ღმერთო, ღმერთო... — ახლაც წაიკვნესა მოხუცმა. ცოლის გახსენებაზე ყოველთვის ასე წაუკვნესებდა, ყელში ბურთი ეჩრებოდა და სული ეხუთებოდა.

აუტანლად ცხელოდა. მზემ თუთის ხის ჩრდილი თითქოს ხის ტანზევე ააკრა. ღობეწნულში წიწილები გამოძვრნენ. კრუხი ერთხანს გასაძრომს ეძებდა. იპოვა, თავის ჭუჭულებს დაეწია და ეზოს სიღრმეში გაიყვანა. მოხუცმა ისევ გაიგონა ერთი წიწილის წიაპი. თავი ასწია და შეხედა, რა ხდებოდა. ის მოწიაპე

წიწილი თავისი ბუდის წიწილებს მოშორებით მისდევდა. ახლოს მისვლა ვერ გაეზედა. ყველაზე დიდი, ჭრელა და გასაოცრად ლამაზი იყო. ბოლოს გაბედა და დაეწია თავისიანებს, მაგრამ კრუხი მიეჭრა და ორჯერ მტკივნეულად ჩაუნისკარტა. წიწილა ბალახში წაიქცა და ცეროდენა ფრთები ააფათქუნა. როცა მისიანები კარგა შორს წავიდნენ, წიწილა წამოხტა, იმათ კვალში მისდია, ოღონდ შორიახლო მიჰყვებოდა.

— რას ამოიჩემა ამ ძერის შესაჭმელმა, ნეტა რას ერჩის! — ბრაზობდა მოხუცი კრუხზე. — სხვას რომ არა ჰგავს, ან ყველას რომ სჯობია, ალბათ იმიტომ...

კრუხმა ბედელს ქვემოთ მტვერი მოქექა და ფრთებგაფაშფაშებული ჩაბუღდა. წიწილები კი ფრთებქვეშ შეეჭუჭკნენ. ჭრელაც ჩუმად შეემალა ფრთის ქვეშ.

მოხუცი ხედავდა ამას.

— ძერამ შეგჭამოს შენა და ტურამ!

მოხუცს წყუროდა. დოქი აიღო და წყალი ხელზე დაისხა. თბილი იყო.

წყაროს წყლისთანა გემრიელი ხომ ვერა და ვერ იქნება. მაგრამ ცივი მაინც რომ იყოს ეს ოხერი, კი მოიტყუებდა კაცი თავს.

დოქი ჩამოდგა, ალაბაში მოიშველია და ისევ ისე მიწვა.

მოხუცმა ისევ გაიხსენა მთები და ისიც, თუ რა დაემართა იმ დღეს, როცა პირველად მწყემსავდა თხებს.

თვითონ უფსკრულის პირას იდგა და პირდაპირ დაუჯერებელი რამ ხდებოდა: ძაღლები გააფთრებული ყეფით და ავი ყმუილით მოქროდნენ უფსკრულისკენ და დრუნჩები

მისკენ მოემართათ. მიმოიხედა და უფსკრულის თავზე ახლალა დაინახა ქურციკი; აქამდე ძაღლების ხროვას უყურებდა, ქურციკისკენ არც მოეხედა. ქურციკი გრძნობდა, ძაღლები ვერ დამეწევიანო, ამაყად იდგა და კლდეს ურტყამდა ჩლიქებს. არ იმალებოდა, არა, პირიქით, უნდოდა ძაღლები თავისკენ მოეხიდა. ალბათ მათი ყურადღების აქეთ მომართვა თუ სურდა ვისმე გადასარჩენად.

ყველაფერი ეს სიზმარივით იყო და სიზმრისეულად აბობლდა იგი იმ კლდის შვერილზე, ქურციკი რომ იდგა. ქურციკი ვერსაით გადადგამდა ნაბიჯს, რადგან ერთადერთი ბილიკი ახლა ბიჭს ჰქონდა ჩაკეტილი. წინ კი უფსკრული იდო. ჯერ როგორ შეტოკდა იგი და მერე როგორ გახევდა, უკან ბიჭს რომ ჰკიდა თვალი! მას აქეთ ყოველთვის თვალწინ უდგას ის გამოხედვა ქურციკისა — ის წარმოუდგენლად ლამაზი, უსაშველოდ სასოწარკვეთილი და ენით აღუწერელ უბედურებაზე მეტყველი თვალები...

— ღმერთო, ღმერთო, — დაიკვნესა მოხუცმა და ალაბაშის მოშველიებით წამოჯდა.

კრუხს ჯდომა მობეზრდა, ფრთები აკეცა და წიწილები გამოცვივდნენ. ჭრელა წიწილაც რომ აქ ნახა, კრუხმა ისევ გამოაგდო იგი, მაგრამ წიწილა მაინც საწყალობელი წიაპ-წიაპით აედევნა თავისიანებს. ახლაც კარგა მოშორებით მისდევდა.

— შენი ქოჭი გაწყდეს, შენი! — ახლა კიდევ უფრო გაუბრაზდა მოხუცი კრუხს.

ეს ხიკაც კაი ვინმეა — იმ დაწყევლილი სახლიდან ვერ გამოდის, თუ რაა. წიწილები მაინც დააბუროს.

წიაპობენ, გული წაიღეს, შიათ ალბათ.

— არამზადა, — კვლავ ბადრაკი წარმოუდგა თვალწინ მოხუცს.

ზღაპრებში, ვინც კი დევების სახლში შევა, უკან ცოცხალი ვერ გამოდის. იქ აღამიანს უბრალოდ ყლაპავდნენ. ბადრაკის სახლშიც თუ შეხვედი, შენც გადაგყლაპავს და მთელ იმდღევანდელ დღესაც ჩაგიყლაპავს. მერედა, რამდენი ასეთი დღე აქვს წელიწადში...

მოხუცმა კრუხს დაუძახა, კრუხმა — წიწილებს და ერთად გამოემართნენ მოხუცისაკენ. მაგრამ მერე რატომღაც გადაიფიქრეს და სხვა მხრისკენ დაადეს თავი. ჭრელაც წია-წიათი მიჰყვებოდა მოშორებით.

— შენ შეგჭამა ძერამ და ტურამ...

— არამზადა, — ისევ ამ ერთი სიტყვით ამოანთხია მოხუცმა თავისი ბოღმა.

იმის მერე, რაც მასადა ბადრაკის დას შორის რაღაცნაირი ურთიერთობა დამყარდა, ღამე ვერ იძინებდა. ადრე ცოლის ღალატი ან სხვა ვინმესთან დაწოლა აზრადაც არ მოსვლია. ახლა კი ეს განზრახვა ვერ მოეცილებინა. თვალსა და ხელს შუა, სულ რომ არ ელოდა, ისე შესცოდა მან და ის შეცოდება ნამეტანი მიმზიდველი, ამო გამოდგა. უნდოდა იმ შეცოდების კარები სამუდამოდ დახუროდა თვალთა წინ, მაგრამ უკვე არაფრის თავი არ ჰქონდა. თვალი უნდა დაესუჭა, ფეხი დაეკრა და შორს, შორს უნდა განრიდებოდა იმ ცოდვის კარებს, მაგრამ რაღაც საბედისწერო ძალა უკანვე ეზიდებოდა უნებურად. ცოლი გულს გარეთ რჩებოდა და იმ კაცს ჰგავდა, ვინც თვითონ ქეიფის სუფრას მისჯდომია, ამხანავს კი ჭიშკართან ალოდინებს.

— რამდენი სიკეთის გაკეთება შეუძლია ადამიანს, რამდენის, სინამდვილეში კი...

„რამდენი ჭუჭყი და ლაფია ირგვლივ, რამდენი ადამიანი ცხოვრობს უნამუსოდ. განა მე მარტოს შემძლია ეს ქვეყანა უცოდველად ვაქციო? — თათხავდა თავს და ღამეები იტანჯებოდა. — თითქოს არც კი ვცოცხლობ; ხალხთან ადამიანური დამოკიდებულება ვერ დამიმყარებია. მერედა რატომ, ნამეტანი მოკრძალებულობის გამო“...

სულ ბაღობიდანვე შეეჩვია მარტობას. ადამიანები — ჯერ მამა, მერე — ძმები და თითქმის ყველა, ვისთანაც კი ბედმა შეახვედრა, თითქოს გვერდს უვლიდნენ მას. ვინმესთვის თუ ალაღად გაუწვდენია დახმარების ხელი, იმას, ვისი დახმარებაც განუზრახავს, ამისკენ არც მოუხედავს, ვისთანაც ვინდა მისულა რჩევისათვის, ოღონდ მასთან არა. რაიმე საქმის გარჩევას თუ დასწრებია, ისეთი სახე მიუღია ყველას, თითქოს ეგ აქ არც არისო, და ისე უსაუბრიათ ერთმანეთთან, ამისთვის არაფერი უკითხავთ. სულ მუდამ ისე ხდებოდა...

...მაშინაც კი, როცა რაიმეს მოყოლის სურვილი გამოუთქვამს (მოყოლა კი მას ნამდვილად შეეძლო, ეს მისი საყვარელი საქმე, მეტიც, თითქმის მისი ცხოვრების აზრი იყო), ენად გაკრეფილი, ყბედი ვინმეებიც კი აჩუმებდნენ. შეკრებულობაში მივიდოდა და თავიანთ წრეს შეკრავდნენ, მას გარეთ ტოვებდნენ. ერთხელაც ვერ მოახერხა იმ კედლის დარღვევა, რომლითაც, თითქოს თავს იცავენო, მისგან იმიჯნებოდნენ ადამიანები, ის ადამიანები, რომელთა გვერდითაც ცხოვრობდა. ყოველთვის ასე მოტყუებული რჩებოდა... მაგრამ ბოლმა და გეს-

ლი არავის მიმართ არ ჩაუდვია გულში. ერთი რბილი და გულისხმიერი კაცი იყო, სახითაც ლამაზი და ტანდაც აღნაგვი გახლდათ. რაიმე

ისეთი ნაკლი არ ჰქონდა, რომ ვინმეს მასთან ახლო ყოფნით ზაფრა მოსვლოდა. აბა, ისეთს რას აშავებდა, ვერ გაეგო... ეგ კია, ზღაპრები უყვარდა და უყვარდა მათი მოყოლა, ძალიან უყვარდა... იქნებ ამიტომ აითვალისწინეს? მაგრამ სხვებს რომ ბევრის სმისთვისაც კი აქებ-ადიდებენ! მან იცოდა, რომ იმ წრეს, რომელმაც იგი მოიკვეთა, აქვს თავისი ნაკლი. თუ იკადრე, ამ ნაკლსაც გამოუჩენ ხალხს. ასეთი ნაბიჯი ძალზე გამოუვალი მდგომარეობის დროს თუ გადაუდგამს და ყოველთვის ფეხი წაუტეხია. ის წრე მისთვის ყველა არასასურველ კაცს უმოწყალოდ უსწორდებოდა. ასეთი ბედი ეწია კაცს, ვინც სახელი გაიღდო ენამახვილობით, მაგრამ იმ „წრის გარეთ“ ყოფნა რაღაი თავმოყვარეობის შებლაღვად ჩათვალა, ზემდგომთა გემოვნებას დაჰყვა, მათ ფულის ხმას აუბა ფეხი, ოღონდ კი მათთვის ეამებინა. ცხრა პირი ტყავი გაიძრო და თანდათან უგვანო ვინმედ, ყეყეჩად იქცა, თავისი სახიერი. შთამბეჭდავი ოხუნჯობის ნაცვლად ათასი აბდაუბდა არახუნა.

მერე, სიკვდილის შემდეგ, იმათი შვილები, ვის ნებასაც ის კაცი დაჰყვა. საუბარში თუ სიტყვებში ჩაურთავდნენ ხოლმე მის არაკებს, ოღონდ. რაღა თქმა უნდა, ამ არაკების ავტორს არ ასახელებდნენ. მაგრამ როცა უგერგილო უდიმლამო ნათქვამს გაიხსენებდნენ, მის გვარსახელსაც უეჭველად წამოისროდნენ.

ხელმარჯვე კალატოზი თავისი ნახელავით იწონებდა თავს, მეურნე

კაცი — თავისი საქმით, ცხენოსანი — ცხენოსნობით, მწყემსი — მწყემსობით. „წრეს“ ეს ესმოდა, რადგან ყველაფერს, რასაც ეს ხალხი აკეთებდა, შემოსავალი მოჰქონდა ანუ გარკვეული ფასი ედო, როგორც ნივთებს, საჭმელს, სასმელს. მაგრამ ამ კაცს ხომ ვინმეს ნასუფრალით არასოდეს უცხოვრია. თავის ლუკმას თვითონ, თავისი შრომით შოულობდა. ოღონდ თითქოს იმისთვის — და ცხოვრობდა ამქვეყნად, რომ ზღაპრების მოყოლის საშუალება ჰქონოდა. ზღაპრების მოყოლა მისთვის ყველაზე დიდი, ყველაზე მნიშვნელოვანი საქმე იყო. ზღაპრების მოყოლას თუ აუკრძალავდით, ამით სიცოცხლის ყოველგვარ აზრსაც მოუსპობდით. მხოლოდ თავისი ზღაპრების წყალობით გრძნობდა იგი სიცოცხლის სისავსეს, მის გემოს, მაგრამ სწორედ ეს ვერ ეპატიებინათ მისთვის იმ ადამიანებს, ვინც ფიქრობდა, რომ ზღაპრების და რაგინდარა ამბების მოყოლა წყლის ნაყვავა, ღროის დაკარგვა და ხალხის მოცდენაო. და ისინი, თითქოს პირი შეუკრავთო, როგორც უდიდეს საიდუმლოს რასმე, მალავდნენ მისგან თავიანთ ყოველდღიურ საქმეებსა და ფიქრებს. ეგრე ჩანს, ეშინოდათ, იმის მოსაყოლ ამბებში არ მოვხვდეთო. მეზღაპრის უიღბლობის ერთი მიზეზი ეს იყო. მიზეზები ალბათ სხვაც იყო, მაგრამ ამათი წვდომა მეზღაპრეს არ შეეძლო.

წიწილა ისევ საწყალობლად აწიოკდა.

— სულს ამოართმევს, ეტყობა, — მოხუცმა ერთხელაც მოუხმო კრუხს.

კრუხმა იცოდა, რომ მის შვილებს შიოდა და მოხუცისკენ წამოვიდა. ჭრელა წიწილა შუა ეზო-

ში, თავარა მზის გულზე დარჩა, ისევ საწყალობლად წიაკობდა, მაგრამ და-ძმებთან მიახლოებას ვერ ბედავდა.

მოხუცმა კიდევ დაუძახა კრუხს. კრუხი მოცუხცუხდა და წიწილებიც თავიანთი ცეროდენა ფრთების ფათქუნით მოცანცალდნენ. ამ საერთო გაწამაწიას ჭრელა წიწილაც აჰყვა. ეტყობა, ძალიან მოშივდა, რომ ყოველგვარი სიფრთხილე დაავიწყდა, წამში დაეწია თავისიანებს, მაგრამ კრუხი მაშინვე გაკაპასებული დააცხრა და რამდენჯერმე ჩაუნისკარტა.

... ერთხელ, ორჯერ, კიდევ, კიდევ და კიდევ...

ჭრელა წიწილა ცდილობდა გასხლტომოდა, მაგრამ ვერ მოახერხა, ბალახში ჩავარდა და აწიატდა.

მოხუცმა ვერ მოითმინა, ფეხის ტკივილი დაავიწყდა, წამოიწია, კრუხს ალაბაშა ესროლა მთელი ძალით და მოახვედრა. კრუხი გადატრიალდა და დაიკრუნჩხა.

— აგრე გინდა შენა, აგრე, ახია!

კრუხი რომ პირქვე დაეცა, წიწილები დაფრთხნენ, გაიქც-გამოიქცნენ და ხშირ ბალახში ჩაიმაღნენ. ჭრელა წიწილა, ეტყობა, მთლად წახდა, რის ვაი-ვიშით დადგა ფეხზე და სუსტი ხმით აწიაწიავდა. კრუხი ისევ ისე იკრუნჩხებოდა.

მოხუცმა ახლალა იგრძნო ფეხის მწიწკნავი ტკივილი. ისეთი შეგრძნება ჰქონდა, ფეხი ძარღვების მაგივრად თხელი მავთულებით ამვსებია და ისინიც ერთიერთმანეთზე მიყოლებით მაწყდებო.

— როდის გახმები, როდის!

მოხუცი ხედავდა კრუხის გაქუცულ მუცელს. მას გამხდარი გვერდებიდან ძვლები გამოსჩხვეროდა: მეტი რომ არ შეიძლება, იმდენი წი-

წილი გამოსჩეკა, ქანცი წაერთვა... ცოტა ხნის შემდეგ ფრთებს უკვე აღარ აფართქალებდა. გადაბრუნდა, მობლანდული თვალებით მიიხედ-მოიხედა, წამოიწია. შვილების ხმაც რომ გაიგონა, თავს ძალა დაატანა და წამოდგა. ჭრელა წიწილა იქვე ახლოს იდგა, მაგრამ კრუხს ახლა მისი თავი არ ჰქონდა ან იქნებ სულაც ვერ ხედავდა.

— არამზადაა, აბა რაა! — გადართია მოხუცი, — არავინაა, რომ წიწილები დააბუროს!

კრუხმა წიწილებს გასძახა, ისინიც აქეთ-იქიდან მოფრთხილდნენ და ბელლისკენ გასწიეს.

ნიაფი არ ქროდა. ჰაერი ოდნავად არ ინძრეოდა, ყველაფერი გათანგა მთელ სივრცეს დაუფლებულმა გვალვამ, ყველაფერი ხურდა, ვარვარებდა...

... იმ შორეულ, როდინდელ ზაფხულსაც ასე გადაგვალა ყველაფერი... იმ ზაფხულს, როცა მეორედ შეხვდა ბადრაკის დას.. მზე უკვე გადახრილიყო, მაგრამ ისე იკბინებოდა, შუადღეზე რომ იცის ხოლმე. ირგვლივ ყველაფერი ისე გაილურსა, გეგონებოდა, მორჩა, სიცოცხლე გათავდაო. სანამ არ შესაღამოვდა, სიცხე აჭერდა და აჭერდა. და თოხნა შეუძლებელი იყო. შხანიკვა მდინარეზე ჩავიდა და ქალიც დაბარებულევით იქ გაჩნდა. თითქოს ამოსარეცხი ამოვრეცხე, ახლა უნდა ვიბანაოო, ერთხანს იფართიფურთა, მერე ჩრდილს შეეფარა და შხანიკვას მიუჯდა. საუბარს თავი არ ებმებოდა, აღარც შეხუმრება გამოსდიოდათ და ქალი რატომღაც თვალს არ უსწორებდა კაცსა.

კაცი გაუნძრევლად იჯდა და მაშინ ქალმა ხერხი იხმარა (კაცს ვე-

რატრით წარმოედგინა, თუ ქალს ასეთი რამის მოფიქრება შეეძლო).

— საწყალი ჩემი ბადრაკი! — არაფერ შუაში იყო. მაგრამ ძმაზე დაიწყო საუბარი ქალმა.

ეს კაცისთვის იგივე იყო, რაც ხარისთვის წითელი ნაჭერია. საძულველი სახელის ხსენებაზე პირობითობის ბორკილები სულ დაწყდა და კაცმა შურისძიების ყველა უფლება დაუტოვა თავს.

— შენ რას იტყვი, სხვა მამაკაცებს რომ არ უყვართ, ის კაცი თუ შეუყვარდება ქალს? — თითქოს სასხვათაშორისოდ ჰკითხა ქალს.

— მამაკაცი, რომელიც მამაკაცებს სძულთ, ქალს ძალიან უყვარს, — მიუგო ქალმა და თითქოს ამ სიტყვებით დარჩენილი სირცხვილის გრძნობაც მოიშორაო, უტიფარი თვალებით მიაკვდა კაცს.

მაინც ვერ იფიქრებდა, ქალი ამდენს თუ გაბედავდა...

იმ დღეს კაცმა პატიოსნების ზღურბლს გადააბიჯა და ცოდვას ეზიარა, რითაც მარტოობას თავი დაუტოვა. მაგრამ, რაც არ უნდა საოცარი იყოს, მარტოობამ ამ დღის მერე უფრო დარია ხელი და მეტის ტკივილით აუფორიაქა სული.

მან დაკარგა ერთადერთი ერთგული ადამიანი — ცოლი, ვისაც ერთადერთს შეეძლო მისთვის მარტოობა არ ეგრძნობინებინა. სინდისი ქენჯნიდა, რად ვერ დავთრგუნეო თავი. და ყოველივე ამის ჯავრს ცოლზე იყრიდა. ცოლი მიხვდა, რაც მოხდა. მაგრამ ამაზე კრინტიც არ დაუძრავს, მხოლოდ გაცრეცილი პირისაზე და დღემუდამ ნამტირალევი თვალები ამხელდნენ მის უსაშველო ტკივილსა და ნაწყენობას.

ბადრაკმაც გაიგო მალე ყველაფერი, მაგრამ არასოდეს არაფრით უგრძნობინებია, რამე თუ იცოდა,

საამისოდ ის თავისი ქეციანი უღვა-
შიც კი არ შეტოვებია. შესაძლო
იყო სამკვდრო-სასიცოცხლოდაც შე-
ტაკებოდნენ ერთმანეთს (სხვა ყა-
იდის კაცი თავს შეურაცხყოფილად
ჩათვლიდა და სიკვდილის გარდა ვე-
რაფერი იხსნიდა დის გამბახებელს).

ცოლი მისთვის ყოველთვის ყვე-
ლაზე წმინდა, ყველაზე ახლობელი
არსება იყო. მაგრამ ეს საკმარისი
არ აღმოჩნდა. მეტისმეტად ხშირად
რიყავდნენ მას ადამიანები. ამიტომ
ძნელი აღმოჩნდა სულ მუდამ დაჯაბ-
ნა საკუთარი თავისა. ძნელი აღმოჩ-
ნდა ღალატის ცოდვისაგან გამორი-
დება... „ნეტა რამე მწარეს, საწყენს
მეტყოდეს, რომ გული მატკინოს!..
მაშინ მეც არ დავრჩებოდი ვალში,
ხურდას ორმაგად დავუბრუნებდი...
იქნებ ამით მეტი შვება მეგრძნო...“

— ღმერთო, ღმერთო, — წაუკ-
ვნიესა მოხუცმა.

ეს ამბავი ოდესღაც, დიდი ხნის
წინათ კი არა, აგერ, ა, გუშინ, გუ-
შინ კი არა, დღეს მოხდაო, ეჩვენე-
ბოდა და ეს ორი დღე, ეს ამდენი
ტკივილისა და წყენის მომცველი
ორი დღე საშინელ ლოდოდ და-
აწვა გულზე და სუნთქვა გაუძ-
ნელდა.

როცა გამოერკვა, იგრძნო, მთლად
გახვითქულიყო ოფლში.

თუთის ჩრდილი მოხუცს უკვე
სულ აღარ ეცემოდა. მზემ ჯერ ხომ
ხეს ტანზე ააკრა თავისი ჩრდილი,
ახლა უკვე მეორე მხრიდან დაუღ-
ვარა, თანდათან მეტ სივრცეზე გა-
უშალა. გეგონებოდათ, ხის დაღლი-
ლი სხეული ვარჯიშობსო. მოხუცის
ალაბაშა, საითაც მოისროლა, იქვე
ეგდო. შეეძლო ოთხით მიფორთხე-
ბულიყო მასთან, მაგრამ იმის გა-
ფიქრებამაც კი, რომ შესაძლოა
ფორთხვა დასჭირებოდა, შეჰხარა.

... ამბობენ, ადამიანს დილით

ოთხი ფეხი აქვს, შუადღეზე — ორი,
საღამოთი — სამიო (ბავშვობას, სიმ-
წიფეში ყოფნას და სიბერეს გუ-
ლისხმობენ). ახლა მოხუცს შეეძლო
ოთხივე ფეხი აქონოდა. მაგრამ იგი
ოთხით არ გაფოფხდებოდა, უეჭვე-
ლადაც რომ სცოდნოდა, მზის დაკ-
ვრა მელისო.

ძალა მოიკრიბა, შინაგანად და-
იძაბა, მტკივანი ფეხი მიწას ააწორა,
მეორეზედა დადგა და ასე, ცალ
ფეხზე, საშინელი ტკივილის შეგ-
რძნებით იგრძელი სკამი და ჯორჯო
ჩრდილში გადადგა. შემდეგ ქანც-
გაწყვეტილი დაშვავდა სკამზე და
ის ფეხი ჯორჯოზე შემოდო. ტკი-
ვილმა დაცეცხლა—თითქოს ის ათა-
სი წვრილი მავთულძარღვები ერთი
ერთმანეთის მიყოლებით ატკარ-
ცალდაო, ან ფეხი ათას პატარ-პატა-
რა ნაჭრად დაუწიწკნესო. ტანზე ოფ-
ლმა დაასხა. ცოტა ხანში ტკი-
ვილმა გაუარა და შვება იგრძნო.
მიწვა. ძალიან წყუროდა. მის ამღ-
ვრეულ მზერას კვლავ წარმოესახა
შხეფებად დანამცეცებული, პირდა-
პირ კლდიდან გადმომდინარე ცივ-
ციველა წყაროები....

მათი ჩხრიალი და რაკრაკიც ჩა-
ესმა, მაგრამ ამო სიგრილეს კი ვერ
გრძნობდა, ტუჩები დაუსკდა წყურ-
ვილისგან, ყელი გაუშრა...

მთაში კი ისევ უწვიმო ღრუბლე-
ბი დასჯაროდნენ მწვერვალს, შემო-
ხვეოდნენ. მაგრამ მთის წვერი მაინც
მიუდგომელი ციხე-ბურჯის კოშკი-
ვით ამაყად გადმომზერდა სივრცეს.

და მოხუცი ფიქრმა კვლავ
მთებში, იმ შორეულ დღეში გადა-
ავანა, აგერ გუშინდელივით ცხადად
რომ დაუდგა თვალწინ...

... ქურციკმა იგი დაინახა, მაგრამ
რას გააწყობდა: ერთადერთი, აქედან
თავდასალწვევი გზა ბიჭს გადაეკეტა.

წინ კი უფსკრული იყო. უცნაური განცდა დაეუფლა ბიჭს. გულმა ბაგაბუვი დაუწყო, შეწრიალდა. ვერ დაეჯერებინა, რომ ქურციკი, ზღაპრულ არსებად რომ ესახებოდა, რაღაი არასოდეს ენახა, ახლა ორიოდენაბიჯზე ედგა. საკმარისი იყო ხელი გაეწვდინა, რომ მისწვდენოდა და კიდევ მოჰფერებოდა. პირდაპირ მისკენ წადგა ბიჭი. რაც უფრო უახლოვდებოდა, მით უფრო ტანში იწურებოდა ქურციკი, მით უფრო იჭუჭკებოდა, თითქოს უნდა დაიგორგლოს და თავქვე ჩაქანდესო. ცალი გვერდით კლდეს მიტმასნოდა, თითქოს უნდა ზედ შეეხორცოსო. ბიჭი კი მთლად ახლოს მივიდა და ბეწვზე ხელით მიელაციცა. ქურციკი შეტოკდა და მისი თრთოლვა დენივით ვადმოვიდა ბიჭის ხელში. ქურციკი კიდევ უფრო მოიკუნტა და ლამის კლდეში შევიდა. ბიჭს მონადირეებისგან გაეგონა, ჩიხში მომწყვდეულ დაფეთებულ ქურციკს შეუძლია, ვინც გნებავს, წააქციოსო, მაგრამ ეს გახევებულიყო. ბიჭს შეეძლო გვერდზე გადასულიყო, გზა მიეცა მისთვის... ზღაპარი იხილა თვალით, ხელით მიელაციცა ზღაპარს... გაუშვებდა და დაინახავდა, თავისი ლამაზი ფეხებით როგორ წაათიმთიმებდა იგი წმინდა ცხოველ სულს... მაგრამ თითქოს ტანში ეშმაკი შეუჯდაო, მსგავსი რამ ფიქრადაც არ მოსვლია, ლამის თვალთ დაუბნეილდა, ისე დაძაბულიყო, ოღონდ კი როგორმე, როგორმე დაეჭირა.

ფეხები გაფარჩხა, მკვიდრად, მყარად დადგა და თავისი მძიმე კომბალი ორჯერ გამეტებით შემოჰკრა. პირველი დარტყმისაგან ქურციკი უკანა ფეხებზე დაეცა, მაგრამ მაშინვე წელში გაიმართა. კიდევ უფრო დაიძაგრა ზამბარასა-

ვით, დაგორგალდა. მეორე შემორტყმაზე კომბალი დაძაგრული სხეულიდან აღრკა და ქურციკს კენესა აღმოხდა. ამდროს ბიჭმა ქვევით ჩაიხედა და თვალი ჰკრა მწყემსების კარავს, ველზე დავარდნილი პაწია თექის ქუდად რომ მოჩანდა. მაშინვე თავში გაუკრთა, რა უნდა ექნა და როგორ ექნა. ფეხებით კიდევ უფრო მყარად დაეხივნა მიწას, ქურციკს შემოეხვია და მთელი ძალის მოხმობით, ბიძგაბიძგით, ჩაიყვანა თავქვეზე... ქურციკი მთელი ტანით თრთოდა და ეკვროდა, ეკვროდა...

— ღმერთო, ღმერთო!

ბადრაკის სახლიდან ყვირილი და რალაც შეძახილები მოისმა.

— აქშა! აქშა! აქშა!

ვილაც აფრთხილებდა ქათმებს, საფრთხე გელითო.

— თვითმფრინავი, თვითმფრინავი! — წკრიალებდა ადგურის ხმა.

მოხუცმა ვერ მოასწრო გაერჩია, საიდან მოდიოდა შვილიშვილის ხმა: ბადრაკის ეზოდან თუ აქვე, გზის პირიდან, რადგან მის ეზოშიც შექოთქოთდნენ ქათმები.

ციდან ქვასავით ჩამოცხრა ძერა.

— აქშა, აქშა! — ყრულ შეუძახა მოხუცმა, მაგრამ ძერას უკვე არაფერი ესმოდა და თავისი სამსხვერპლოს გარდა ვერც ვერაფერს ხედავდა.

თითქმის მიწის პირზე იყო. მშინერს, თავზეხელაღებულს, იმტაზე მოსულს, უკვე დაეფარჩხა ბასრი ბრჭყალები. მაგრამ იმავე წამს მოხუცის თვალწინ ისარივით გაკრთა სიმჭლევისაგან ბუმბულივით მსუბუქი მკერდგაქუცული, ჯოხისგან ტანდაბეგვილი კრუხი — ძერას გამეტებით შეეხალა.

— აბა, მიდი, აბა, ჰე!

ბრწყალებითა და ნისკარტებით ჩააფრინდნენ ერთმანეთს. ბალახში კოტრილობდნენ. ჰაერში მათი ბუნდლა დაფარფატდა. კრუხი გაცილებით უღონო იყო, ძერამ რამდენჯერმე მოიგდო ქვეშ, დაკლანჭა, მაგრამ კრუხი თავს აღწევდა და ძერა კვლავ და კვლავ აცხრებოდა. კრუხმა, როგორც იყო, მთელი ძალა მოიკრიბა და ძერას ღრმად ჩაურჭო ნისკარტი. ამანაც ვერ გაუძლო, თავი აიშვა და აფრინდა. ჯერ ჰაერში დაბლა იწრიალა, ეტყობა, მთლად ვერ მოსულიყო გონს, მერე უკვე სწრაფად აუტია ცისკენ. დაკაწრული, დასისხლიანებული, ნაბეგვი კრუხი ეზოში დალასლასებდა და თავის უჭულ-ბუჭულებს მოუხმობდა. ჭრელი წიწილა ისევ ისე გულის გამაწვრილებლად წიაგწიავობდა თავისთვის. მოხუცმა მოიხედა, სად არისო, და ნახა — ისევ იქ იდგა, მზის გულზე. ალბათ ბაიბურში არაა, რაც მოხდა — ძერამ რომ საკბილოდ სწორედ ის აირჩია! რეტ-დასხმული თუ იყო, რადგან დამალვა არც კი უცდია. გულგადაქანებული წიწილები ბალახში ჩაჭუჭკულიყვნენ და შიშით დედასაც კი ვერ ეხმაურებოდნენ.

მოხუცს შეებრაღა კრუხი, შერცხვა, რომ ჯოხი მოახვედრა.

— ძალღი, ძალღთაპირი! — მოხუცს ბოღმა ახრჩობდა.

სუნარი: სოხუმიდან ჩვენს სოფლამდე ორი საათის გზაღა... მაგრამ ეს ბოლო ორი წელია იგი თითქოს სულ უფრო და უფრო მშორდება. და ახლა გულში უკვე სიყვარული კი არა, ტკივილი ჩამბუდებია. არ ვიცი, რატომ ხდება ასე, მაგრამ სულ უფრო და უფრო ვერ ვუსწორებ თვალს. იმას კიდევ ჩემი ჩასვლით ცა ეხსნება. მისთვის ისევ ის

პატარა ბიჭი ვარ. შორი შორს რომ ვართ, წამოსვლისას რომ ვიყავი, ისეთს მხედავს. ასე სულმთუთქმელად რომ არ მელოდეს და ნამეტანი რომ არ უხაროდეს ხოლმე ჩემი ჩასვლა, იქნებ შეხვედრის დროს გული არც ასე დამმძიმებოდა...

...როგორც კი ჩვენი ეზოს ბალახს დავადგამ ფეხს, ჩემი მემართება. პატარა ეზოა — ერთი მტკაველი სიმწვანე ამ უზარმაზარი ცის ქვეშ, ეს გლეხკაცური ეზო, ეს მრავლისმომსწრე ოდა-სახლი, ეს დაღლილი, ამდენგზის გადაბრუნებულ-ჩაბრუნებული მამული, უხმაუროდ, თვინიერად რომ იძლევა ამდენ სიკეთეს... იმდენ სითბოს ჩუქნის ყველას, ვინც ამას საჭიროებს... ყოველივე ეს — ეზოც, ოდაც, ყანაც — ალაღად, უდავიდარაბოდ იხდის თავის მიწიერ ვალს. მაგრამ მხოლოდ ამათ, — ამ ეზომ, ოდამ, ყანამ, — და არაფერმა სხვამ დამაყენეს მე ფეხზე, წელში გაწყდნენ და განათლების მიღების საშუალება მომცეს... იქნებ მეცა ვარ ბრალში. რომ ჩემი და, ვისიც ბევრ ძლიერ, მაგრამ უპატიოსნო ადამიანს ასე ეშინოდა, რადგან უსამართლობას არავის შეარჩენდა, ახლა ყველაფერს შერიგებია და ბედისგან მივიწყებულ შინაბერად დარჩენილა... მე კიდევ, მე გულში ჩამიჭრია, რაც შეიძლება მალე გავკანდიდატდე („იცით, ვგ ნიჭიერია, კი, ნიჭიერია“, იტყვიან ჩემზე). მერე, მერე? კანდიდატს საქმე ცოტათი, მხოლოდ ცოტათი უკეთ მისდის... და მაინც სჯობია, თუნდაც ახალგამომცხიარი კანდიდატი იყო, ვიდრე არავინ. კარგა ხანს ასე. კანდიდატად ივლი... მერე, ჰო, მერე? როგორც საკანდიდატო გააკეთე, ისევე გააკეთებ სადოქტოროს (უფრო სოლიდური და სქელი იქნება). დრო მოგთხოვს.

— შენც ასე ფიქრობ! — ვეუბნები ახალგაზრდა კანდიდატს, როცა „დიოსკურიიდან“ ბანცალბანცალით გამოვედით ღვინით შებრუყულნი და მსუყე საჭმელებით დამძიმებულნი, — შენ მეკითხები, „იმასაც ასე გააკეთებ“, რას ნიშნავსო? ახლავე აგისხნი... რასაც ჩვენ ვაკეთებთ, სულ წყლის ნაყვია და მეტი არაფერი. ვწეროთ და ვიცითხოთ, ვის რაში სჭირდება.

კანდიდატმა გაოცებისგან პირი დაალო.

— სირცხვილი არ მაჭამო, ნუ გამაწითლებ, თუ ძმა ხარ, ამ ხალხს, მეგობარია-მეთქი, შენზე ვუთხარი...

— ამათ ვუთხარიო... — ხმამალლა შევეპასუხე და იმ ხალხს თითი მივუშვირე. — ამათთან არ გაჭამო სირცხვილი? ამათთან რაღამ უნდა გაგაწითლოს. ამათთან? ამათ, ამათ კარგა ხანია დაივიწყეს, გაწითლება რაცაა, გადაეჩვივნენ! ხომ ხედავ, დარდისაგან აღარ არიან, წინაპრებმა სიმდიდრე არ დაგვიტოვესო. დაფნისა და ხილის ბაღები უნდოდათ, წალკოტები უნდოდათ, რათა ყველაფრის გემო ხელის გაუნძრევლად ეგემათ, ხა-ხა-ხა!

თქვა და მაშინვე, თითქოს ქარმა გააქრო, ვერაფერი დაინახა. პო, მთვრალი ვარ, ცხადია, და ქალაქში ასეთი „პატივცემული“ ხალხი ხომ შეიძლება უხერხულ დღეში ჩავადო, შემომელანძლოს კიდევ...

მაგრამ მე არც მთლად მთვრალი ვიყავი. ღმერთო, პირუტყვი ვარ, პირუტყვი, აბა რა ვარ! აბა, რას ვაკეთებ, ეს საქმეა? როგორ გავიარო ჩემი ეზოს ბაღაზე, ლოდინით გაბეზრებულ მოხუცს როგორ შევხედო თვალებში!

სანაპიროთი წავბორიალდი. მზე უწყალოდ იკბინებოდა. ხელშარ-

ცხნივ, ნაპირის ერთ პატარა მონაკვეთზე, სადაც ბანაობა და შიშველი წამოწოლა აკრძალული იყო, ეგრეთწოდებულ „ძაღლის“ პლიაჟზე, ერთმანეთში ირეოდა ჩაცმული და ჩაცუმედი მობანავე ხალხი, ქალი და კაცი, მოხუცი და ახალგაზრდა. ზღვა აქ ბინძური იყო, სულმთლად მაზუთით გაზიმზიმებული.

მცხელოდა. სუნთქვა მიჭირდა. ვიხუთებოდი.

.. იმათ ყველაფერიც დაგვიტოვეს... — ჩემს თავს ველაპარაკებოდი. — ჩვენი მამები, პაპები, პაპის-პაპები ჭირსა და ლხინში, ძნელბედობაში, როცა მტრის ხელი ყელზე ჰქონდათ წასახრჩობად შემოჭერილი, ფიქრობდნენ მომავალზე, იმათზე, ვისაც უნდა გაემრავლებინა წინაპართაგან დატოვებული მონაგარი, ვისაც იავარსაყოფად არ უნდა დაეგდო, თვალსა და ხელს შუა არ უნდა გაქრობოდა მრავალი და მრავალი თაობის სისხლის ფასად აქამდე გადარჩენილი სამშობლო...

ესენი კი, ესენი, ჩემი დღევანდელი თანამეინახენი, ყველაფერს კბილით ზინჯავენ და რაც საჭმელად არ გამოდგება, ყველაფერს ძირს ავდებენ, ფეხით თელავენ. ხილის ცულის ამომტმელი მატლებივით არიან. წინაპართა მონაგარს, დანატოვარს სულიერ არსებასავით თუ არ შემოეგლები თავს, არ მოუვლი, სულ დაილევა, შარშანდელი თოვლივით გაქრება.

მოდი და ამათ, ამ მუცელდმერთებს ესაუბრე გენიაზე ხალხისა, რომლის ეპოსმა და განუმეორებელმა სიმღერებმა საუკუნეების წიად მოიტანეს ჩვენამდე ხალხის ცხოველი სული, მისი უდრეკელობა... ამათთვის ან ლაშკინდარი რაა, ან ამბარა ან დიდებული მოქვის ტაძარი? გახვრეტილ შაურიანად არ

უღირთ! მე კი ვზივარ ამათთან, ათას სისულელეს ვჩმახავ, მერე რაზე არ ველაპარაკები: ყოველი ხალხის ისტორია წმინდათაწმიდა რამაა-მეთქი, ცალცალკე ვეუბნები დაშაქრულ სადღეგრძელოებს, ვსვამ ამათი ნაქურდალი ფულით ნაყიდ ღვინოს, ვისმენ ამათ უხამს, გულისამრევ საუბარს. ვზივარ და სად ვზივარ — რესტორანში, ძველისძველი ციხესიმაგრის ნანგრევებზე, ამ მიწისთვის დაღუპულ გმირთა საფლავებზე რომ არის აგებული!

ასეთი გაგანიაა, მაგრამ სანაპირო ხალხითაა სავსე. კაცს გვერდს ძლივს აუქცევ. ირგვლივ ფუსფუსებენ ტურისტები, ჩაკოსტუმებულ-ჩაგალსტუკებულნი (ღმერთო, ამისთანა სიცხეში!) ადგილობრივი ლოთი-ფოთები და შარისთავეები...

მცხელა, ვიხუთები...

ვცდილობ სწრაფად გავეცალო აქაურობას... მაგრამ წამდაუწუმ მეჯახებიან გამვლელები, იქნებ მართლა ძალიან მთვრალი ვარ? ხალხის ზღვა რაღაც ნამეტანი მარწევს. რა ხალხმრავლობაა, ძლივს მივიწევ წინ. სკვერში მინდა შევადწიო როგორმე, აგერ, იმ ფიჭვთან მინდა მივიდე, ჩამოვჯდები და ცოტა სულს მოვითქვამ...

... მეორე დღესაც ჭამეს ბიჭის მიერ დაჭერილი ქურციკის ხორცი.

— მეძუძურები ჰყავდა. მაგრამ მაინც რა ქონიანია... გადასარევი ხორცი აქვს... — ერთხმად აქებდნენ.

— შარშანდელი თიქნის ხორცი რომაა, როგორ ეტყობა, წუთში მოიხარშა, — მერამდენედ ამბობდა ერთი მონადირე და ნაყვავილარი პირით ქანქლავდა კაი-კაი ნაჭრებს.

ბოლოს ყველით შეკაზმულ შიგანს შეექცნენ, ნეტარებისაგან კინალამ ენაც ჩააყოლეს. ყოველ ლუგმაზე ქილიკობდნენ:

— ქურციკი დაიჭირა, ხედავთ!

— თავისი ხელით, აბა...

— მაშა, კაცო, მაშა!

მთელი ის დამე და მეორე დღე სიხარულით მეცხრე ცაზე იყო. სადღა იყოს ის კედელი, ყოველთვის რომ ზღუდავდა მას ყველასაგან, ამარტოხელებდა. ნამთვრალევივით იყო, თითქო ძილბურანში არისო...

... მაგრამ მეორე დღეს კი მოფხიზლდა... ისევ გადენა თიქნები დიდი ჩანჩქერისაკენ და უცებ მოუნდა სალამური გამოეჭრა, რადგან სული მუსიკას სთხოვდა. მაგრამ დანა კარავში დარჩენოდა, სადილზე მისცა ვიღაცას. კარავი არცთუ შორს დაეტოვებინა და სირბილით გაბრუნდა, რომ დანა წამოედო. ერთი სული ჰქონდა, როდის გამოჭრიდა სალამურს, რათა საამო, ტკბილი ჰანგი დაეკვნესებინა.

კარავთან ახლოს რომ მივიდა, ხორხოცი შემოესმა და შედგა.

— ყური მიგდე, იმ სიმალლეზე ნეტა რამ აიყვანა ეს ციებისაგან პალეგასიებულო...

— რამ და ღმერთმა შეაშველა ხელი.

— ისე, მკვდარს ჰგავს ეგ ჭირიანი. ქურციკს ალბათ შეეშინდა და ფეხი ვერ დასძრა...

— ქურციკის დამჭერია, ეხუმრები!

— ჰო, ჰო, ხელით, თანაც ხელით!

— თანაც თავისი ხელით! ისევ ახორხოცდნენ.

— თქვენ თუ იტყვით, ისეთი უნდა თქვათ, რომ...

— მტერი ჩავარდა თქვენს ყბაში.

— ალბათ ჩვენზეც ასე ლაპარაკობთ და ამიტომაც ბედი არ გვწყალობს, ეს მერამდენედ ვბრუნდებით ხელცარიელნი (ხალხს სწამს, თუ

ვინმე ცუდს ლაპარაკობს მონადირეზე, იმას ხელი მოეცარება).

ეს ნამდვილმა მონადირეებმა თქვეს.

ბიჭი კარავში შევარდა, ხმა, კრინტი არ გაუღია, ჩოფურას თავისი დანა გამოსტაცა ხელიდან და გამოიქცა... არ ახსოვს, ღვარი როგორ გატოპა და მკაუნას ხშირ ბარდებში როგორ ჩარგო თავი... ქვითინის ხმამ გამოარკვია. თურმე თვითონვე ტიროდა. ხმამაღლა, გულამოსკვნით ქვითინებდა. თბილი ცრემლები ჩამოჰვარდვარებდა. ქვითინის ნახმევრიც უკანვე ბრუნდებოდა გამოქვაბულიდან, მისი ქვის თალი ეკლესიის გუმბათივით დაკიდულიყო ბიჭის თავზე. დიდხანს ქვითინებდა. როცა ტირილით გული მოიოხა, პირაღმა დაწვა, ხელ-ფეხი ისე გაშხლართა, გეგონებოდათ, მკაუნას ბარდებით დაფარულ ამ ფერდზე ჯვარს უცვიათო. ცრემლები გაუშრა, მაგრამ შიგნიდან მოწოლილი ქვითინისაგან კიდევ კარგა ხანს ტოკავდა. თანდათან თავს მოერია. ჰაერი შეგრილდა, დაამდა, ნაწვიმარზე რომ იცის, ისე, და ბიჭი ნაღვრის შემდეგ კალაპოტდაწმენდილ ღელესავით დამშვიდდა. თითქოს პირველად დაინახა მაღალი, ლურჯი, კამკამა ზეცა. მის სარკეში ერთი ფთილა ღრუბელიც არ დაფიორობდა. ადრე არასოდეს არ ჩაუხედავს ზეცის თვალეებში ასეთი გულისყურით. არასოდეს უფიქრია, რა დაუსაბამოდ ღრმაა იგი. სუნთქვაც შეუგუბდა, როცა გაიფიქრა, რომ ადამიანის თვალი ვერაფერს იხილავს ამ წკვარამი სიღრმის მიღმა. ეს იდუმალი სიღრმე სწორედ იმ უსასრულობით იზიდავდა რაღაც უსაშველოდ. და ამის გამო, ან იქნებ კიდევ სხვა რამის გამოც, იგი უცაბედად მსუბუქ, მსუბუქ ბუმბულად

იქცა... თითქოს გაითქვიფაო ვრცელ უკიდევანო სამყაროში, რომლის ერთ ბეწვადაც ქცეულიყო, მაგრამ იმავდროულად ძალუძდა ეგრძნო, რომ რაკილა ბეწვია სამყაროსი, ამიტომაც ნაწილია მისი. და როცა მყისით არა მარტო გაიგო ეს, არამედ იგრძნო კიდევ თავი ნაწილად სამყაროსი, ბუნებისა, ყველას და ყველაფერს რომ აერთიანებს, თავისი გასაჭირი არაფრად მოეჩვენა... ადამიანები კი, ადამიანები ეკეთილა, თანამდგომლებად შეიგულა. ყველა ტკივილი, დარდი და კაეშანი გადაეყარა გულს, გაქრა, აღარსად იყო და ბიჭი ნებიერად, ლაღად, უშფოთველად დათიმთიმებდა სამყაროში, ვითარცა მტვერი მისი, და მაინც მთელი ამ სამყაროს დამტვევი და ამრეკლავი... და სიხარულით შეემსჭვალა გული ...

იმ შემთხვევის შემდეგ, თითქოს სულ სხვა ვინმე გახდაო, ცოლის მიმართ მთლად გამოიცვალა. ვითომ აღარ უყვარდა? უყვარდა, როგორ არ უყვარდა! ის კი არა, უფრო ძლიერაც უყვარდა. მაგრამ, საკვირველია, ღმერთმანი, სულმუდამ შარზე იყო. მიზეზს ვძებდა, თლონდ კი რითიმე ეწყენინებინა, გული დაეწყვიტა მისთვის. აჯობებდა კია, ცოლს რომ ყოველთვის არ აეტანა ამდენი ტკივილი, არ მიეტევებინა ხოლმე. იქნებ სხვა უყვარდა, ა? არა, სხვა ნამდვილად არა ჰყვარებია! მაგრამ ერთხელ რომ აცდუნა უკეთურმა, მერე თავისდაუნებურად სულ დაბლა და დაბლა ეშვებოდა, თითქოს ვიღაცა უჯიკავებსო. რაღაი ერთხელ ოჯახში საქმე აეწეწა, ახლა არც ნანობდა და არც არაფერი. ბადრაკთანაც შეჯახება უნდოდა, მაგრამ ახლა უკვე ან ერთი უნდა დარჩენილიყო, ან მეორე. მაგრამ ბადრაკს

თავი ისე ეჭირა, ვითომც არაფერი ესმოდა.

მოხუცმა დაიკვნესა. ძველმა, შეუხორცებელმა იარამ გაუხსენა.

ჩრდილი უკვე ორღობეს მიდგომოდა. მაგრამ ისევ ისე ცხელოდა. გავარვარებული მიწა გუგუნებდა. მიწა აძლევდა ძალას ყველას და ყველაფერს, ვისთვისაც და რისთვისაც სიცოცხლე ებოძებინა. მიწა ღმერთი იყო, ღმერთი, სიცოცხლის მიმმადლებელი ანდა, როცა მოეგუნებებოდა, სულეთს წარმგზავნი.

და ახლაც ყოველი სულიერი, რაიც იძვროდა და ფუთფუთებდა, ადამის ძის თვალთ ხილული თუ უხილავი, მცირე ბალახით მოკიდებული და გოლიათი ხეებით გათავებული, ყველაფერი ერთი საქმით — სიცოცხლით იყო გართული. გუშინდელი კვირტები სკდებოდა და ფოთლები ჩნდებოდა, ათასფერადი ყვავილები ჰყვავოდა, ნაყოფი მწიფდებოდა, იღვრებოდა სიყვარული. დედის საშოში ისახებოდა პირველი ჩვილი — ყოველივე ამას გულდაჯერებით, შეუსვენებლივ, თავისი არსით, სასრულით და უსასრულობით თავს აბამდა მოუღლევი იგი მუშაკი — ბუნება.

...და კრუხიც, ჯერეთ ისევ სისხლიანი, თავისი უჭულ-ბუჭულითურთ ორღობეში მიტუსტუსებდა. ჭრელამ, ეტყობა, სული მოიბრუნა და შემხიარულებული წიაპობდა. ცდილობდა მთლად ახლოს არ მისულიყო დედასთან, მაგრამ სხვებს მაინც კვალში ედგა.

სუნარი არ ჩანდა. მაგრამ მოხუცი იმედს არ კარგავდა. ბიჭს გული არ გაუძლებს და ჩამოვაო.

აი, როგორც კი სუნარი ჩამოვა, გულს დარდი გადამეყრება და აწეწილი სული დამიმშვიდდებაო.

სუნარი: ჩვენ ისევ აქ ვზივართ, „დიოსკურიაში“. ყველა დათვრა, ერთმანეთს სადღეგრძელოებით ყურები გამოუჭედეს. ზღვის ნიაფიც არ შველის საქმეს — ოფლად ვინვითქებით. ენად გაიკრიფა ხალხი. ყველას რაღაცის თქმა სურს. „მეცენატებმა“ და ვილაც ორმა უცნობმა ჯერ წინაპრებს გადაჰკრეს — ინტენსიურ მეურნეობას ვერ მოაბეს თავი, დაფნა ვერ მოაშენეს და ხილის ბაღები საკმაოდ არ დაგვიტოვესო... შემდეგ იმაზე კი შეთანხმდნენ, გინდა ასე თქვი და გინდა ისე, მაინც წინაპრებიდან მოვდივართო. მერე თავიანთი ხელმძღვანელობის დახასიათებაზე გადავიდნენ, ვინ შეაქვს, ვინ გაკენწლეს (არა, შეკრული კოლექტივი კია, რაც მართალია, მართალია), ბოლოს ახალ ტელევიზორებზეც თქვეს თავიანთი სიტყვა და ერთხმად დაადგინეს, საუკეთესო ტელევიზორები უფრო ძვირი ღირსო. სიტყვამ მოიტანა და რომელიღაც მეყასბეზეც გააბეს საუბარი... აქებდნენ, ცამდე აჰყავდათ, ვილაცისგან იცავდნენ, განსაკუთრებული მოწიწებით ახსენებდნენ მის სახელს... სულ გადაუსხვაფერდათ პირისახე (ორი გაიბადრა, ორი სხვა — გაფერმკრთალდა, ეტყობა, ეს ორი იმდენ ფულს ვერ შოულობდა), როცა აყაყანდნენ, აი, ხელგაშლილი კაცი თუ ვინმეა, ეგააო, ფული ჯიბეში ჩეჩქივით უყრია და ბლუჯა-ბლუჯა იღებსო (საფულეშიც კი არ იღებსო), მარჯვნივ და მარცხნივ ფანტავსო. ოფიციანტები და ტაქსის მძღოლები ხომ ააშენაო...

მეყასბის ქება-დიდებათ გული რომ იჯერეს, ბედნიერად იგრძნეს თავი, თითქოს მორწმუნენი არიან და ილოცესო, და ისევ ჭამაზე გადავიდნენ. კანდიდატმა ამომიჩემა: სულ დაწვრილებით მიამბო, დისერ-

ტაცია ასე და ასე დავწერო, მავანს და მავანს წავაკითხო, კეთილის მსურველებმა მიჩიეს, განსაკუთრებით შესავალზე გაამახვილე ყურადღება; დაცვაზე თავი ასე და ასე გეჭიროსო: მეტი უსმინე სხვას, შენ კი ნუ აიძულებ დიდხანს გიგდონო ყური...

რალა დამრჩენოდა, ჯერ თვითონაც გამბობდი სადღეგრძელოებს, ვალაბაშებდი ენას, სულ მივჭარგ-მოვჭარგე იქაურობა. ახლა კი ვიჯექი და ამის ჰაიპუსის ვისმენდი...

ნუთუ ამას ნამდვილად სჯერა, რომ ეგა ან მისი მრჩევლები ვისმე რამეში არგიან? ერთი ყური მიუგდეთ, აფხაზეთის მიწა-წყალზე არსებულ სავაჭრო ფაქტორიუმებზეც მელაპარაკება!

— იცი, რა დღე აყარეს ერთი კაცის, აი, იმის, დისერტაციას? — წყენით მეუბნება, — იმანაც შუა საუკუნეებზე დაწერა. მაგრამ ვინ დააცვევინა! რაკი მეც შუა საუკუნეებზე მქონდა. ზოგ-ზოგებს ეგონათ, რომ მეც იმასავით დავიწყებდი ისეთი რალაც-რალაცების მტკიცებას... ორიგინალობა მომინდომა ბიჭმა!.. ასეთი ავტორიტეტის წინააღმდეგ გალაშქრება იქნებოდა?!..

გული მიღონდებოდა. აქ ყოფნას ვერ ვიტანდი. მაგრამ არ ავმდგარვარ და არ წავსულვარ. ვიჯექი და ვუსმენდი...

პირისახეზე შემატყო, რომ გუნება წამიხდა და უფრო „გულწრფელად“ ამიხსნა:

— მესმის, იქნებ სულაც მართალია... მაგრამ ამისთანა პიროვნებების წინააღმდეგ გალაშქრება მაინც ნამეტანია... ხალხმა ამ საკითხებით სახელი, წოდებები, აღიარება, ჯილდოები მოიხვეჭა... შენ კიდევ წყალში გინდა გადაუყარო ყველაფერი... ვინ მოგ-

ცემს მაგის ნებას... ამდენი კი უნდა გესმოდეს კაცს... ვინ გაგიშვებს... ამას ვერ უნდა მიხვდე? შუშუ უნდა იყო, რომ ამას ვერ მიხვდე...

— ასეა, რალა თქმა უნდა! — რატომღაც კვერი დავუკარი.

შემდეგისათვის მშობლიურ სოფელში განუზრახავს სუფრა... მადლიერი თანასოფლელები თავიანთ კანდიდატს სანაქებო პურმარილს გაუმართავენ.

...აბა, როგორ გინდა! ამან ხომ თავისი წინაპრების წარსულს შუქი მოჰტინა!

...არა, როგორ შემიძლია ამის გვერდით ჯდომა... ჩვენი ბიჭებიდან ჩემ გარდა არავინ წამოვიდა. კაი მაგარი გარეწარი ვარ... ჩემი მომავალი დისერტაცია ამ ყაიდის დისერტაციასთან ახლოა. თავიდან მუშაობა რომ დავიწყე, რამდენი აზრი, რამდენი ვარაუდი დამებადა. მერე თანდათან „მოვჭკვიანდი“, რჩევადარიგებები შევისმინე. სადაო და საკამათო ამოვშალე, მივარბილ-მოვარბილე. ლიტერატორები არც ისე მამა აბრამის ბატკნები არიან, როგორც ბევრს ჰგონია. რატომ უნდა გადავიკიდო ვინმე...

მაგრამ ხომ არსებობს სიმართლე, ხომ არსებობს ჭეშმარიტება, მტყუანსა და მართალს ერთმანეთისაგან რომ არჩევს.

შეიძლება სიმართლე დაიწეროს თუნდაც ამ ჩვენს ღრეობაზე. დანგრეული, აფეთქებული ციხე-სიმაგრის ადგილზე აგებულია რესტორანი და ჩვენ ვზივართ და ვყლურწავთ ღვინოს — ვასველებთ დისერტაციას იმ ხალხთან, ვისაც ერთადერთ ნამდვილ საქმედ მუცლის ამოყორვა გაუხდია. ჰოდა, უზის ასეთი ხალხი ხორავით დატვირთულ სუფრას და ამბობს მამულზე, სამშობლოზე ბრტყელ-ბრტყელ სადღეგრძელო-

ებს. სინამდვილეში კი, სინამდვილეში... ჩვენმა მწერლებმა რატომ არ შეიძლება დაწერონ ამათზე, ამ ხალხზე, ვინც არიან და რაც არიან...

— ხა-ხა-ხა!

ყველამ ჩემკენ მოიხედა.

— თქვენ არასოდეს გიფიქრიათ იმ ტიპზე, ამ ციხე-სიმაგრის აფეთქების განკარგულება რომ გასცა?

— ვინ არის, რა კაცია?

— ვინ არისო? ვინაა და ბარბაროსია. ბოროტმოქმედია. საფლავების წამბილწველია!

— აურია ახლა, — ჩაიბურღლუნა ვილაცამ.

ციხე-სიმაგრე რა შავ ქვად გინდა. ლოდები და ნანგრევები ყველგან არა ყრია? — თქვა „მეცენატმა“.

— არა, რალაცაში ეგ მართალია, — დინჯად შენიშნა ერთმა უცნობმა, — აფეთქებით, რალა თქმა უნდა, კი უნდა აეფეთქებინათ, მაგრამ ეს ქვა-ლოდები ზღვის ნაპირიდან უნდა გაეტანათ... ბანაობაში უშლის ხელს. სანახავადაც არაა ლამაზი. სირცხვილია. დამსვენებლებს რას ეუბნები...

ხედავთ, შერცხვა კაცს, რა სტუმართმოყვარე ვინმე ყოფილა!..

— ის ქვა-ლოდები სულ რომ გაეტანათ, ეს რესტორანიც არ აშენდებოდა. — შეეკამათა სხვა, — ლამაზიცაა და მყუდროც... ზედ ზღვას გადაჰყურებს.

— თქვენ რაც გინდათ, ისა თქვით, კაი კი ქნეს, კაი, — თქვა აქამდე ჩუმად მჯდარმა „მეცენატმა“, — ეს სულელური ქვების გორა რომ ააფეთქეს, სანაპირო მოასუფთავეს და რესტორანი ააშენეს.

— И на обломках самовластья напишут наши имена, — პათეტიკურად წამოიძახა ახალგაზრდა მომცხვარმა კანდიდატმა, — მაგას

ყურს ნუ დაუგდებთ. საზეიმო შემთხვევის გამო ვართ აქ შეკრებილნი!

უცხად ერთ-ერთმა „მეცენატმა“ ჩემი სადღეგრძელოს თქმა მოიგონება:

— ჩემო კარგო, სულ ყოველთვის ისე იყავი, თითქოს ეს-ესაა ლატარიაში ათი ათასი მანეთი მოგეგოს!

— ღმერთო, ღმერთო! — დაიკვნესა ბერიკაცმა.

როგორ ცდილობდა ცოლი, თავისი დარდი რომ დაემალა მისგან! ერთადერთი ადამიანი ეგ იყო, ვინც ჭირსა თუ ლხინში ყველაზე მეტად უგებდა გულისთქმას. ახლაც, დღემდე ასეა. თუმცა რა ხანია აღარაა ამქვეყნად... ფიქრით, წარმოსახვით ემუსაიფება მას, სიხარულს თუ დარდს უზიარებს. ცოლი რომ ცოცხალი ჰყავდეს, რაოდენ ნეტარი, ბედნიერი სიბერე ექნებოდა, რა უღარდელად მოკვდებოდა. „არა, ჩემზე ადრე არ უნდა მომკვდარიყო, არა“... ახსოვს მისი ღიმილი, ესმის მისი წყნარი ხმა, მაგრამ უფრო მეტად მოწყენილი. დარდიანი ახსენდება იგი.

„ღმერთო, რა სიხარულით მოგკვდებოდი მასზე ადრე“.

სიცხემ იკლო. მაგრამ მიწა ჯერ ისევ ხურდა.

მოხუცი კვლავ მიწვა. ძალიან წყუროდდა. მაგრამ წყლის მომტანი არავინ იყო. დოქში წყალი გათბა: დიდი ხანია დოქი გაგანია სიცხეში დგას. მოხუცს დაავიწყდა ჩრდილში გადაედგა.

და მოხუცს კვლავ მთები გაახსენდა...

... ქურციკი წიკავ-წიკავით ჩაჰყავდა ქვევით. ის კი, ქურციკი, ბიჭს ეხუტებოდა და ეხუტებოდა. ბიჭი

რატომლაც იბოღმებოდა და ისევ ჯიკავ-ჯიკავით მიაქანჩალებდა, თითქო ამით რაღაცის სამაგიეროს უხდისო. ბოლოს ქურციკი აუსხლტა და ქვასავით ჩაეშვა უფსკრულისკენ.

ისწრაფა და თიკნები ერთად მოაქუჩა, მოაქუჩა და სადგომისკენ წაიდენა. რატომლაც ეჩვენებოდა, ამ ქვეყნის ერთი თილისმა ეს წუთია მოვიხელთე და მისით გზას გავიკვალავ, ცხოვრებას გავისხვაფერებო.

ქურციკს ძვალ-რბილი გაერთიანებოდა, მთლად დაბეჭილიყო, სულს ლაფავდა, თრთოდა, ცახცახებდა. ბიჭმა დანა იძრო, ყელი გამოლადრა და... სამუდამოდ მოასვენა. გვიმრა დაგლიჯა, მკვდარი ქურციკი მიმალა და თვითონ კარავში შევიდა...

— ცუდად ხომ არა ხარ? — ჰკითხა მზარეულმა, ვინაც კერიასთან რაღაცას იტეტყებოდა და ბიჭს თავისი შეშუპებული, კვამლისგან წამოსიებული, შეწითლებული თვალები გულგრილად შეავლო.

— არა, არა ვარ, — დაუგდო სიტყვა ბიჭმა და თვითონაც გაოცებული დარჩა თავისი უკმეხობით.

— ასე ადრე რაღად მობრუნდი სადგომში, რა დროსია?..

— რაღაი მოვედი, მიზეზიც მექნებოდა. — შეეყვინჩილა ბიჭი.

მაგრამ მზარეულს თავისი საქმე ჰქონდა. ბიჭისათვის არა ცხელოდა, თითქოს წმინდათაწმიდა მსახურებას რასმე ასრულებდა და, აბა, გაპეცალეა, ხელს ნუ მიშლითო, ეწერა პირისახეზე.

შელამებულზე ის ოხოხია მონადირეები თავიანთი არასანადირო ძაღლებითურთ კარავში მობრუნდნენ დაბოღმილნი და ქანცგაცლილნი.

— ააქვეიპშაამ კი გაგვიღიმა,

მაგრამ ფურ ქურციკს გადავეყარეთ და იმან მთელი დღე გზა-კვალი აგვიბნია, ოღონდ კი თავისი მონადირისათვის გავერიდებინეთ აქეთ და ბოლოს იმდენი ქნა, სახამშრალი დაგეტოვა, — თქვა ერთმა.

— თქვენ ერთი ნუკრი მაინც მოგეკლათ და მერე ჩემი მე ვიცოდი, — გამოეპასუხა მზარეული. — შიგანს ჩაგიქათავდით, იფ, იფ, უკეთესს ვერაფერს ინატრებდა კაცი, — თქვა და ნერწყვი გადაუღაპა.

— ნუკრის ხორცი, იცოცხლე, ცხონებაა...

— ქურციკი თავის ნუკრებს, ვიდრე ფეხს არ მოიმაგრებენ, მალე ტოვებს, მთაში, თვითონ კი დაბლა ჩამოდის ხოლმე წასაბალახებლად, — თქვა ვითომ მონადირეებში უფროსმა.

— ამას, ეტყობა, სადღაც ახლომახლო თუ ეგულებოდა შვილები და ამიტომ იწრიალა იმდენი ადგილზე.

ლაქლაქი გააბეს. ბიჭის გარდა ყველა შეხალისდა. ბიჭს ერთი სული ჰქონდა ამოეთქვა თავისი საიდუმლო, ოღონდ კი ყველას მოესმინა და ისე არ მოჰკიდებოდნენ, თითქოს ეგ ვინაა, აქ გინდ ყოფილა და გინდ არაო.

... ჰოდა, ამოთქვა...

თავიდან არც მოჰხედეს, ერთმანეთს კი მიაღლ-მოავლეს თვალი, ბიჭის ნათქვამი არად ჩააგდეს. მათ შორის მანძილი თითქოს უფრო გაიზარდა. მაგრამ როცა საკუთარი თვალით ნახეს ის ყელგამოღადრული ქურციკი, ზღაპარში რომ ხდება ხოლმე, იმის მსგავსად ყველაფერი ერთ წამში თავდაყირა დადგა. ყველანი, თითქოს ამდენი ხნის უნახაობის შემდეგ მონატრებიანო, შემოეხვივნენ, ვინ რა ჰკითხა და ვინ რა. ყველა თავს მოვალედ

თვლიდა შეპლიმებოდა ბიჭს, რაიმე ეთქვა მისთვის... როგორღაც ხელე-ბი ჩამოჰყარეს მის წინაშე, დადრ-კნენ, თითქოს ბაღლები არიან და როგორმე თავი უნდა იმართლონო. ადრე ბიჭს ამდენი ყურადღება არა-სოდეს უგრძენია და ახლა დაიბნა. როგორ მოქცეულიყო, არ იცოდა და დაიხარა, რატომღაც ქურციკის ცური გამოწეა. იქიდან კი მო-მოულოდნელად რძემ, შესისხლის-ფერებულმა რძემ გადმოიჩქედა.

კედელი, აქამდე ამ ხალხისაგან რომ მიჯნავდა, ახლა ჩამოშვავდა და ბიჭი უკვე მარტოკა აღარ იყო. რო-ცა ისევ მოჰყვა, რაც მოხდა, ყველა გულისყურით უსმენდა. ისე შემო-ხვეოდნენ ირგვლივ, თითქოს ეწი-ნოდათ, ჩვენ თვითონ არ გავირი-ყოთ ამ წრიდანო, ვითომ ახლა ბიჭ-ზელა ეკიდა, ვის დაიუცხოებდა და ვის კიდევ დატოვებდა ამფსონებ-ში...

— ხელით დაიჭირა ქურციკი, ხე-ლით! — წამდაუწუმ გაიძახოდა გა-ხარებული მზარეული, შიგანს ასუფთავებდა და ჭყინტი ყველით კმაზავდა.

— სამუდამოდ დაიგდო სახელი, სამუდამოდ... რავარი საქმეა, ხელით დაიჭირა ქურციკი, ხელით...

— ხელით დაიჭირა, აბა! — გა-ოცებას არ მალავდნენ სხვებიც.

მეორე დღეს მთებიდან მართლა მონადირეები დაეშვნენ. ისინიც ხელ-ცარიელნი დაბრუნდნენ. როცა არც აციეს და არც აცხელეს და იმათ უამბეს, როგორ დაიჭირა ბიჭმა ქურციკი, ხმა არ გაუღიათ, ერთმანეთს კი გადახედ-გადმოხე-დეს.

მზე გადაიწვერა. ჩრდილი დობე-წნულს გადაცდა. ბოსტანს ჩაეფინა, მერე ხევში გაწვა. გაიშალენ, სული მოითქვა თაკარა მზისაგან დაჭუჭ-

კულ-დამჭკნარმა ფოთლებმა, სიმინ-დის ღეროები კი შევერცხლისფერ-და.

მოხუცი წამოჯდა, მიმოიხედა— არსაით ძეხორციელის ჭაჭანება არ იყო. ყველანი სადღაც გაკრეფილან, მარტო დაუგდიათ ბერიკაცი.

მზე იქვე გორაკზე მდგარი მუხის მიღმა გადავიდა და მუხის ვარჯი მყის წითლად აბღღვრიალდა. მზის სხივებმა ხშირ ფოთლებში გამოაშუ-ქეს, ტოტების წვეროკინებზე ვარს-კვლავებივით აციმციმ-აკიაფდნენ და ზღვის ტალღებივით ათიმთიმდ-ნენ. მოხუცი თვალით მიელაციცა მუხას, გული დაუამდა და თავბრუ დაეხვა, თითქოს რამდენიმე ყლუბი კაი მაგარი ღვინო დალიაო. „ღმერ-თო, გამახსენე, სად და როდის ვნა-ხე წამით მზედ გადაქცეული დიდი მუხის ვარჯი, რომლის ტოტებსაც ასე მზის ტალღებივით ეღელვოთ?“

იქნებ ეს მაშინ იყო, როცა პირ-ველად აახილა თვალი, ან იქნებ იმ გაზაფხულზე, როცა მაჭარივით, მა-ინცადამაინც მათრობელა რომ არაა, დაუარა ტანში პირველად სიყვარუ-ლის კრთომამ? ვერ გაუხსენებია, მაგრამ იყო, ოდესღაც იყო ის ნეტა-რი წუთები მის ცხოვრებაში... იყო, კი... მკრთალი, ბინდბუნდი გახსენე-ბაც კი იმ წუთებისა ახლაც, ამდენი ხნის შემდეგ გულს უტოკებს. იმის-თვის, რომ ადამიანმა ბუნება, მზე რაღაც სხვაგვარად დაინახო და სა-მუდამოდ თუ არა, დიდი ხნით მაინც ჩაირჩინო გულში ის სხვარიგ ნანა-ხი, ხომ ძლიერ უნდა განიცადო რაღაც, იშვიათზე იშვიათი ბედნი-ერება უნდა წარმოესახოს თვალებს, რათა ყოველი არსი შენში და შენი თავი მთელი სამყაროს მოუცილებელ ნაწილად იგრძნო. ან უსაშველოდ დიდმა მწუხარებამ თუ სინდისის ქეჯნამ უნდა შეგძრას. მოხუცს

ცხოვრებაში არც ერთი დაჰკლებია და არც მეორე. მისი ცხოვრების მდინარეს აურაცხელი მორევი და ტოტი ჰქონია, სადაც ოქროს კალმანებივით ურიალიათ ამგვარ წამებსა და წუთებს.

— ურაიდა, რაიდა, ურაიდა, რაიდა... — წაუღიღინა მოხუცმა და ნაღვლიანად გაიღიმა.

მერე თავი ასწია და ისევ იმ მუხას აჰხედა.

თანლათან მთელ ვარჯს ვერცხლი გადაედვარა... მოხუცმა მთართოლვარე თითები თვალთან მიიტანა და მოისვა — უბეები სველი ჰქონდა...

სიწყნარეა. შარავნიდან ჩქამიც არ ისმის — სალამომდე კაცი არ ჭაუნებს. ბადრაკის სახლიდანაც არაფერი ისმის — ეტყობა, სხედან და შეექცევიან პურმარხის. ყველანი შიგნით არიან. ჯერ მასპინძელი იკითხეთ... რომ დაიწყებს, რა შეილია, გაჩერდება!..

— არამზადაა ეგა, არამზადა, — გული მოიოხა მოხუცმა.

სუნარიც რომ არ ჩამოვიდა... ვერც ხვალ ჩამოვა, ისეთი პირი უჩანს... აქეთ და იქით გზას თითქმის მთელი დღე უნდა, ზეგ კი სამსახურში უნდა იყოს...

— ბიჭი მაინც არ ედარდება?!

წყენამ დარია ხელი, მაგრამ მაშინვე თავის თავს დაუწყო თათხვა: მოეხუცდი და ხალხს გულს ვუწყალებ. ჩემს ნება-სურვილზე ხომ არ ივლიან, რამდენი რამეც მე მომინდება. ყველაფერს გულთან კი არ მიიტანენ. მეც ვიყავი ახალგაზრდა... ცხოვრება ცხოვრებაა. ახალგაზრდებს იგი გულის გულში რომ ჩაითრეის, მიდი-მოდიზე ხელს აადებიან... აი, მარტოკაცი ვარ. იული, დარდა და ნაღველი მომძალდება, სიკვდილიც სადღაც ახლო-მახლო

ტრიალებსო... და კაცს ეჩვენება, სიკვდილის ალესილი ცელის წკრიალი და ცივი, ყინულივით ცივი სუნთქვა აგერ აქვე, ყუბისძირში ისმისო...

მოხუცს წყუროდა, გაიტანჯა. ისევ მიწვა, წავთვლემო ვითომ, მაგრამ ძილი არ ეკარებოდა. ფეხის ტკივილი მიავიწყდა, მაგრამ როგორც კი შეინძრა, ტკივილმა ისევ გაახსენა თავი. თუმცა, ეტყობა, სიმსივნე ცოტა დაუცხრა.

...სუნარი არ ჩამოვიდა. მოხუცი ცდილობდა გაემართლებინა იგი. აკუა-სოხუმი იმ სიშორეზეა... მთლიან ადვილი საქმეც არაა ამ სიშორეზე წამოსვლა და უკან მიბრუნება...

...მწყემსები და მონადირეები შელოცვილებივით მიყუჩებულყვნენ. ბიჭმა მაშინვე იაზრა, რომ მისი ქვითინი გაეგონათ. როცა რამეს ეკითხებოდნენ, ან საჭმელს სთავაზობდნენ, ფრთხილობდნენ, რაიმეთი უნებლიეთ გული არ ვატკინოთო. ეტყობა, არც ამ შეკრული „წრის“ შიგნით იყო მაინცდამაინც დიდი სიმშვიდე და ბედნიერება. ბიჭი მიხვდა, რომ ეს „წრეც“ პატარ-პატარა უჯრედებად დაყოფილიყო და მათ შუა აღმართულ კედლებს შორის გაეკვეთებოდა ხოლმე რომელიმე გარიყულთაგანი.

მთიდან დაეშენენ და ყველაფერი თავიდან დაიწყო. ბიჭს ახლაც არ უჩვენებდნენ თავისი შრომის ნაყოფს. რასაც კი ეგ გააკეთებდა, თავიდან აკეთებდნენ, ოღონდ კი მისი ხელი არაფერს დამჩნეოდა. და რადგან უნდობელი ცივი თვალები შესცქეროდნენ დღენიადავ, ყველაფერი უკუღმართად გამოსდიოდა, ყვილაფერი. ნერვს ჩარგავდა და უხმებოდა, დაამყნობდა და არაფერი. თესლს ჩაყრიდა და ცოტა ხეირობ-

და... ასე გამორიყულად მუშაობდა. ვანაწამებმა გადაწყვიტა ბოლოს და ბოლოს რამე ნაბიჯი გადაედგა მათგან დამალულად. სახლთან ახლოს ციკაბო ფერდა იყო, ზედ მდინარემდე ჩადიოდა. ფლატეზე მეწყერი კარგა ხანია ხშირ ბალახსა და ბუჩქნარს აღეკვეთა. ფლატე არც მთლად ისე დამრეცი იყო, რომ კაცი ნება-ნება ვერ ჩაცურებულყო თავქვე. ამ ფლატის ყოველი ბუჩქის ძირში ბიჭმა ვაზი ჩარგო, ჩუმად, ვინმესთვის გაუმხელად. ვაზმა იხარა და გაჩნდა მთელი მალლარი. ფლატე ვენახად იქცა. ადგილიც მზიანი იყო, მიწაც მისწრება და ვენახმა იბარაქა. ბიჭის გარდა ამ ფლატეზე ვენახის ჩამოკრეფას ვერავინ ბედავდა, მდინარეში მოტალიკტალიკე ბიჭებიც ვერ გადიოდნენ ქარაფზე გადმოკიდებულ ხეებზე. ბიჭი კი, იმის რწმენით, რომ რაღაი ვენახი მე გავახარე, ღვინის დაყენებაც უნდა შევძლოო, ყოველგვარ შიშს სჯაბნიდა, ისე ძალა გადიოდა ხეების წვეროკინებზე, რომ შიშისაგან ხალხს ტანში აური-ალებდა და უმაღ ეცლებოდნენ იქა-ურობას. ამ ხეების წვეროებიდან თხემი ქათმის ოდენა ჩანდა, ხოლო მდინარე — აქა-იქ თეთრი ჩხრიალა ჩანჩქერებით გადაკვეთილ ვიწრო ლურჯ ქამრად... მთელი ყურძნის ჩამოკრეფა მას არ შეეძლო და დიდხანს, კიდევ დიდხანს, ვიდრე ზამთარი არ მოდვა კარს, ფოთლებისგან გაძარცულ ტოტებში კონწილობდნენ მტევნები, მხოლოდ ფრინველთა წილად რომ დარჩენილიყო.

ვიდრე ქალი არ შეირთო და მამას არ გამოეყო, ეს მალლარი და ეს ღვინო იყო მისი წვლილი ოჯახის ჭირნახულში. მაგრამ ქალი შეირთო თუ არა, მაშინვე გამოეყო მამას, მას ერგო ეს უჩვეულო ვენახი, კუთვნილი მიწის თითქმის ნახევარი

რომ დაიჭირა. მისი ქორწილის წელს განსაკუთრებით ბარაქიანმა მოსავალმა უწია და გულის ფანცქალით ელოდა შემოდგომას, რთველს. მისი ცხოვრება გადასხვაფერდა და იმიტომ უყვარდა ცოლი. მისი არსება აღსავსე იყო ამ სიყვარულით.

— ო, ღმერთო, ღმერთო!..

როცა ახალგაზრდა ცოლმა პირველად ნახა მისი ვენახი, გაფითრდა, დააფიცა, რომ არასოდეს გავიდოდა ამ ხეებზე ყურძნის ჩამოსაკრეფად, თორემ სახლიდან წავალ და ვერასოდეს მნახავო.

ახლა თვითონაც არ უნდოდა ხედახე ძროშიალი. მაგრამ შემოდგომაზე ყურძენი თუ ვაზის ფოთლებთან ერთად დაცვივა, მასხარად ამიგდებენო, ფიქრობდა. რთველი ხომ ქორწილამდე უწევდა. შიშობდა, ენამწარე ხალხი ჩაუმწარებდა სიხარულს, მისი გათოშილი გული რომ გაეთბო. ერთ იქედნურ, ქილიკურ სიტყვას დაავდებდნენ და მორჩა, გულს დასწყვეტდნენ...

შემოდგომის პირზე კოკისპირული წვიმები გადააბა და გადაღებას თითქოს არც აპირებდა. როგორღაც ალიონზე საშინელმა ხმაურმა წამოავდო. იგუმანა, რაც მომხდარიყო, ფლატესკენ გავარდა და გაოგნდა კაცი: პირდაპირ მის თვალწინ მიწა ნაფლეთ-ნაფლეთ ჩაცურდა თავქვე. ვაზებშემოხვიარებული ხეები შეჯანჯლარდნენ და ყურძნის მწიფე მარცვლები სეტყვასავით წამოვიდა. შემდეგ მიწა იძრა, აიყალყა. ფესვებდაწყვეტილი ხეები ჩაიქც-ჩამოიქცნენ და სულ რამდენიმე წუთში მოვარდნილ ტალახის მდინარეში დაინთქნენ. დასახრჩობად განწირული ადამიანების ხელებივით სხმარტალებდნენ ლაფის ნიაღვარიდან ტოტები, თითქოს შველას ითხოვენო. ასე ნახევარ საათში ყველაფერი

გათავდა: ფლატე უშველებელ ჭრილობასავით ჩანდა, ვენახი კი, ვენახი მდინარის პირზე, დიდი გორაკის ძირში ჩამარხულიყო...

უცნაური განწყობა დაეუფლა. ბოლო ხანებში ეს თავისი ვენახი თავსატეხი გაუხდა. მაგრამ როცა დაედუბა, საოცარი სიცარიელე იგრძნო სულში. ალბათ ამ დღეშია მამა, მახინჯი შვილი რომ უკვდება.

ცოლი, ვინაც ეს ვენახი თავიდანვე აითვალისწუნა, შეძრწუნდა. ქალს ქმრის გამო შეეშინდა — არაფერი მოეწიოსო (ვთქვათ და, ცუდის ნიშანია, ა?)

— ღმერთო. ღმერთო!

... უცაბედად მოკვდა, მოულოდნელად. ქალმა ერთი სიტყვის თქმაც ვერ მოასწრო გამოსათხოვრად, ხოლო ქმარმა — მის თვალში ჩახედვა, ყველაზე მტკივნეულ ადგილას ტყვიანაკრავი ქურციკით გათავდა... თქვეს, ციმბირის წყლულმა მოუთავა ხელიო... მაგრამ ქმარმა ხომ იცოდა, რომ გულმა ვერ გაუძლო ქალს, გულმა...

ღალატის ასე წლის თავზე ქმარმა შეამჩნია, რომ შუალამით ცოლი დგებოდა, ოთახში ბორიალ-ბორილით ეძებდა ფანჯარას, გამოაღებდა და ხუთვა-ხუთვით ისუნთქავდა ჰაერს, თითქოს იხრჩობა და თავის გადასარჩენად ლოდს ჩასჭიდებიაო.

— ღმერთო, ღმერთო!..

— რაღაც ჰაერი არ მყოფნის, — უთხრა ქალმა, თან ცდილობდა გულის ვარამი დაემალა; როცა ქმარმა ერთხელ ჩამოუგდო ამაზე სიტყვა, — ეტყობა, ნამეტანი გადავიქანცე ამ დღეებში...

— განა ჩემთან ასეთი ლაპარაკი იყო საჭირო? კომბალი უნდა აეღო, კომბალი და გაეხეთქა თავი ჩემთვის! — მოხუცმა დაიკვნესა და თავი მძიმედ ჩაჰკიდა.

დიდხანს ასე იჯდა.

ბოლოს და ბოლოს კუტიკარმა გაიჭრიალა და მოხუცმა იმედიანად გაიხედა იქით, მაგრამ დედაბერი მოსულიყო.

წყალმა წაიღოს შენი თავი, წყალმა და მეწყერმა!

მისკენ მოკოჭლაობდა. მოხუცს მოეჩვენა, ამ დილას აქედან რომ წავიდა, იმის შემდეგ კიდევ უფრო დაბერებულაო. თითქოს ახალგაზრდა არც არასოდეს ყოფილიყოს...

— სხვა რომ დღეობით იზრდებოდა, ეგ საათობით იზრდებოდა... — ნაღვლიანად გაეცინა მოხუცს.

— ჟღაპრის მოყოლას ჩდილობ? — ჰკითხა დედაბერმა, როცა მისი სიტყვები ჩაესმა, — შე საწყალო, შიმშილით არ მოგკლეს დღესა!

— ეგ შენ ნუ გადარდებს, — გაბრაზდა მოხუცი, — ბალღი სადაა?

— თამაშობს... რას შექამ?

— ვინ გითხრა, მშიაო, წყურვილით კი მწყურია. მაგრამ მე რომ მინდა, იმ წყალს შენ ვერ მომიტან... ისევ ის აჯობებს მოვითმინო ერთხანს...

„ვიდრე სუნარი ჩამოვარო“, უნდოდა ეთქვა, მაგრამ შეეშინდა, ამ ენაქავია დედაკაცმა ცუდი არაფერი მითხრას და გული უფრო არ მატკინოსო, და გაჩუმდა. დედაბერმა იცოდა, რომ საკმელს მისი თანხმობის გარეშე ვერ მოიტანდა — გამაგდებსო ადრე. ე მაშინ, ახალგაზრდობაში, რამდენჯერ სცადა ყანაში მისთვის საკმელი ჩაეტანა, მაგრამ ისეთი დღე აყარა, რომ ამაზე ხმის ამოღებასაც ვერ ბედავდა.

— იქნება ღვინო გინდა?

— მომწყდი თავიდან! — ზიზლით უყვირა მოხუცმა. — თქვენ ღვინოს კი არა, ჯამფეზით შეღებულ წყალს ასმევთ კაცს. ეშმაკმა

იცის, კიდევ რას არ ურევთ შიგ, ოღონდ ორიოდე ჭიქის შემდეგ ფეხზე ვერ დადგეს სტუმარი... პურმარული გგონიათ თქვენ ეს!.. მე მომეშვით, ღმერთმა დამიფაროს ამისთანა პურმარულისაგან. ახლა მე ღვინოს არცა ვსვამ, კი უნდა იცოდეთ შენ...

მოხუცი მიხვდა, რომ გადაამლავა — დედაბერი არაფერს უშავებდა. ისევ თავისი ბრალი იყო. დედაბერი დღეში რამდენჯერმე მოლასლასდებოდა, იქნება მისგან თბილი სიტყვა გავიგონოო... დედაბერი ჰგავდა ყავარდამპალ ძველ გომურს, დაწვა რომ დავიწყნოდათ. მოხუცი მას არასოდეს არ ანებივრებდა ტკბილ-ტკბილი სიტყვებით, მაგრამ მისი მკაცრი ნათქვამიც კი ქალს ამოდ უჩნდა, ამშვიდებდა. მოხუცმა ეს იცოდა. მაგრამ დედაბერმაც იცოდა, რომ მოხუცი მათ პურმარულს პირს არ დააკარებდა და ამიტომ ყლაპავდა წყენას.

— დაკლეს ჩემი დეკეული... ჩემი ქვევრიც მოხადეს... იქ ნამდვილი წვენი მიდგას. განა შენ ჩემი ყველაფერი გეზიზღება? — დაღლილი, აწითლებული თვალები ცრემლით აევსო დედაბერს.

მოხუცმა დაინახა ეს და თუმცა შებრალება არ შეეძლო, მაინც ქვის გული არ ჰქონდა, მართლა და მართლა...

— მე შენზე კი არაფერს ვამბობ... მაგრამ რად თვალთმაქცობ, რად? დეკეული რომ შეგიქანქლეს და ღვინო ოხრად გამოგიწრუბეს, მიწა გაგსკდომიათო, რად არ მიააწყევლი...

— აბა, რას ამბობ! ჩემთვის ვის სცხელა? თუმცა ღმერთმა კარგად ამყოფოს ეგენი.

ქალი სკამის კიდებზე ჩამოჯდა. თავი ჩაჰკიდა და გაიბრინდა.

... ცოლი რომ მოუკვდა, მას შემდეგ ამასთან სკამზეც კი არ მჯდარა... იმ სიკვდილმა ლახვარი ჩასცა. მანამდე კაცის ცხოვრება მდინარის დინებას ჰგავდა: ხან მოდიდებდა, აიძვოვდა, მერე ისევ დაწდებდა, წყალმარჩხობს. იმ სიკვდილის შემდეგ კი კაცის ცხოვრება დაემსგავსა წყაროს წყალს — წყაროს წყალი სულ მუდამ მჭვირვალეა. არახოდეს იმღვრება, არც იკლებს და არც იმატებს, რაცაა, ისაა...

— რა ხალხია ეგ თქვენი სტუმრები?..

— ერთი სვამს, მაგრამ რას სვამს...

— ჯანდაბამდეც გზა ჰქონია...

გაყუჩდნენ, ორივე თავისას ფიქრობდა.

ჩრდილს დაეფარა ეზო-კარის დიდი ნაწილი, მაგრამ მაინც ცხელოდა. ნიაგი არ იძვროდა, სიოც არ უბერავდა.

— ცოფიანი ძაღლი, ცოფიანი ძაღლი! — გაისმა ყვირილი ბადრაკის სახლიდან თუ გზიდან.

— ჰო, ჰო, თქვეს, სოფელში ავიძაღლი დაძრწისო, — შეშფოთდა დედაბერი, — ის სამგლე, ისა!

— შენ რისი გეშინია, შე უბედურო. მე და შენ ცოფიანი ძაღლიც კი არ გვიკბენს ახლა, — მწარედ გაიღიმა მოხუცმა. მაგრამ შილიშვილი გაახსენდა და გული შეუქანდა. — ბიჭს არაფერი მოუვიდეს, ბიჭს... წადი, თუ ქალი ხარ, და ჩქარა მომიყვანე ი ბაღანა აქ...

— ცოფიანი ძაღლი, ცოფიანი ძაღლი!

— ბიჭი სახლშია... ცოფიანი ძაღლი რა, მე დამინდობს? დამკბენს.

— შენ გაგაცოფა ღმერთმა იმ ძაღლივით! — გაბრაზდა მოხუცი და წამოდგომა სცადა, მაგრამ ტკი-

ვილმა დაკრუნჩხა და ვერ აღვა, —
ბიჭს არაფერი დაემართოს, თორემ
შავი ღლე დაგადგებათ!

— ცოფიანი ძაღლი, ცოფიანი
ძაღლი!

სადღაც ახლოს, ყურის ძირში,
დაიყეფა ძაღლმა. შეშინებული დე-
დაბერი წამოვარდა. მოხუცმა ზიზ-
ლით ახედა.

— ცოფიანი ძაღლი!

ზედიზედ ორჯერ გავარდა თო-
ვი.

— უი, უი, — იკივლა დედაბერ-
მა.

წკმუტუნი მოისმა და ღობის
ხვრელიდან ეზოში შემოსავსაგდა
ციცქნა თეთრი ფინია, გაწამებული
და ტალახში ამოთხვრილი. თავი და
ყურები დასისხლიანებული ჰქონდა:
ან დაეჭირათ ან ძაღლებს დაეკბინათ.

— უი, უი! — ისევ იკივლა დე-
დაბერმა და სახლისკენ უნდა გავარ-
დნილიყო, რომ უცბადვე შედგა. —
უმაღლესი რატომ მიწა არ გამისკდება.
ეს ხომ ქვრივის ძაღლია?!

გაუმაძღარმა ეზოს ძაღლებმა
აქამდე მოსდიეს ფინიას. მაგრამ
ვერც გამოძვრნენ ღობეში, ვერც
ვადმოახტნენ და ყეფა-ყეფით ტრი-
ალეზდნენ ადგილზე. თეთრი ფინია
კი სახლქვეშ შეძვრა და იქ მიიმა-
ლა.

— მაინც საიდან გაიგეს იმ ჭკუ-
ის კოლოფებმა, ძაღლი ცოფი-
ანიაო, — მხრები აიჩეჩა მოხუცმა, —
ცოფიანი საიდანაა ნეტავი, ამ ღი-
ლასაც აქ არ იყო!..

— ქვრივი საავადმყოფოში წა-
ყვანეს, სიკვდილის პირასაა, — თქვა
დედაბერმა. — ძაღლი მასთან გაიქ-
ცა... ორნიღა ცხოვრობდნენ. ჰოდა,
დარჩა ეს უპატრონოდ...

— ერთი მანახა, ის საქმედალე-
ულები, ამ საწყალ ფინიას რომ დას-
დევენ!..

ამ დროს ეზოში შემოირბინა სი-
სამ. ორლულიანი თოფი ეჭირა, უკან
ოჩოფებებზე შემდგარივით წოწო-
ლა მწითური კაცი მოსდევდა. იმა-
საც რალაცნაირი გრძელი, გამჭვარ-
ტლული, ძველებური თოფი ეკავა.

— ცოფიანი ძაღლი ხომ არ და-
გინახავთ?!

— ცოფიანი ძაღლიო?

ამათი ხმა რომ გაიგონა, ფინია
წკმუტუნ-წკმუტუნით გამოძვრა სახ-
ლიდან და თავგამეტებით გავარდა.

— ხელი არ ახლოთ, არ გაბე-
დოთ, ეგ ძაღლი ცოფიანი არაა! —
გაბრაზებით უყვირა მოხუცმა თო-
ფიანებს, მაგრამ ყურიც არავინ შე-
იბერტყა.

— ნუ ეშვრით, თქვენ რა, ხომ
არ შეიშალეთ! — დედაბერი ძაღ-
ლის მდევრებს ტუსტუსით გაეკიდა,
მაგრამ სროლის ხმისა შეეშინდა და
უკანვე მობრუნდა.

ჯერ სისამ ისროლა, მერე იმ წო-
წოლამაც. ძაღლი იწვა სისხლიანი.
უსულო. ეზოს ძაღლები ახლოს მის-
ვლას ვერ ბედავდნენ, რატომღაც
შორიახლო ტრიალებდნენ და ყმუ-
ოდნენ.

— მოუსვით აქედან! — უყვიოა
მათ სისამ და ორლულიანი თოფის
ბიჯგვა-ბიჯგვებით ამაყად თავაწეული
მოხუცისკენ გაემართა.

— ძაღლის შვილო! — შეაგინა
მოხუცმა.

— ძა-ა-ღლები შე-ი-ძლება და-
აცოფდნენ, — ენის ბორძიკით თქვა
ოჩოფებებიანმა.

— შენ რაო, გგონია, რომ კი-
დევა აქვს ამას კბენის თავი? — ჩაი-
ხითხითა სისამ.

— ვი-ი-ინ ი-ცის, — მიუგო
ოჩოფებებიანმა. — ი-ქნე-ბა თა-ავს
ი-ი-იმკვდა-ურუნებს...

— კი, მასე იქნება, ორი ტყვია
შიგა აქვს და იმკვდარუნებს თავს.

ოჩოფეხებიანი მაინც გავიდა კუტიკარიდან, კისერი დაძაგრა, სისხლიან ტბორში ჩაწოლილ ფინიას დააცქერდა და მერე ეზოს ძაღლებს უყვირა. ძაღლებიც, თითქოს ამ ნიშანს ელოდნენო, ერთხელაც აწკავწკავდნენ უგუნებოდ და დაიშალნენ. მოხუცის ძაღლიც, ჩალიკა, მათ გაჰყვა.

— რას იტყვი, — ჩაეკითხა სისა მოხუცს, როცა ახლოს მივიდა, — მარჯვედ ვისვრით თუ არა, იმედი მაქვს, თქვენი თვალით ნახეთ...

ძალიან მთვრალი იყო. ამ დილას ჩუმად და შემპარავად რომ ლაპარაკობდა, ისე კი არ იყო, ახლა თავხედურად, ხმამაღლა ყვიროდა. ღვინომ თითქოს სააშკარაოზე გამოიტანა მამამისისეული თავგასულობა, ქედმაღლობა, ორპირობა.

მოხუცი შეტოკდა.

— ბედმა გაგიღიმა, რომ საკუთარი თვალით ნახე, რა მსროლელიცა ვარ. ყველას კი არ უნახავს ამისთანა რამ... — სისა მთლად ახლო მივიდა მოხუცთან, თოფი ჯოხივით დაიბიჯგა და, ასე ამაყად მკერდგამოწეული, „შენობით“ ელაპარაკებოდა ბერიკაცს. მოხუცი ხედავდა მის პატარა, თითქმის ბავშვისნაირ ფეხებს, გალაპლაპებულ რბილ ჩექმებს, თუთის ძირას ბალახს რომ თელავდნენ.

— ლატომ ქენით ეს, ლატომ? ეს ძაღლი ჩოფიანი კი არაა, ქვლივისაა, ქვლივისა, — თქვა დედაბერმა.

ეტყობოდა, რომ ძმისშვილის შიში ჰქონდა და ამიტომ გულისწყრომას მალავდა.

— რა მოხდა მერე, ეს თუ ცოფიანი არაა, ცოფიანსაც მოვკლავთ! — კიდევ უფრო თავავდებულად იყვირა სისამ.

— სა-ა-დმე შო-ორს უ-უნდა

ვა-ა-და-ვაგდოთ, თო-ორემ და-ა-ცოფავს ვი-ინმეს!.. — ბოგორც იყო დაადგა საშველი ოჩოფეხებიანს (ფერშალი-მეანი გახლდათ, მაგრამ რაკილა სოფელში სხვა ექიმი არ იყო, თერაპევტობასაც ეგ სწევდა).

— ფლატიდან ვისროლოთ, — თავს გავიდა სისა...

— რო-ო-გორ შე-ე-იძლე-ება, ჰი-ი-ი-გიენა ნუ გა-ა-ვიწყდე-ებათ! — მკაცრად თქვა „ექიმმა“ და ჩხირივით საჩვენებელი თითით დაემუქრა.

— თქვენი თავფეხი იყოს ამ ძაღლის ტყავში, — გამოსცრა კბილებში მოხუცმა და დაუფარავი ზიზლით შეავლო თვალი ორივეს.

— რაო, რაო?! — ვითომ ვერ გაიგონა სისამ მოხუცის სიტყვები.

— უსაქმურები ხართ, არაფრის მაქნისები!

— აბა, აბა! — პირისახეზე მათ-რახშემმორტყმული ცხენივით შეაქანჩალა თავი სისამ.

— არამზადებო, რატომ ეშროლეთ ჯაღლს, რატომ! — უცებ გამამაცურა გული დედაბერმა და შეუტია თოფიანებს.

— შენც ხომ არ გინდა მიგაყოლო? შენ რა შავი ქვა გინდა? — გამეხდა სისა, — ხმა ჩაიკმინდე, შეკუდიანო, შენა!

დედაბერს მაშინვე ენა დაება, რაღაცის ჩიფჩიფ-ჩიფჩიფით წატუსტუსდა კუტიკარისაკენ.

— ტყვიას ვერც გავიმეტებდი თქვენთვის. ცოფიანი თქვენა ხართ, ეგ ძაღლი კი არა! — უყვირა მოხუცმა.

— კარგი, ჰო, გეყოფა. — სისამ ჭოჩრიანი თავი გაიქნ-გამოიქნია, — ეტყობა, არაფერი დაგრჩენია აქა, — თითი საფეთქელთან დაიბზრიალა და გაეცალა.

— ბიძა, გენაცვალე, — უცებ

სრულიად ენამოუკიდებლად დაიწყო საუბარი ოჩოფეხებიანმა. წელში სამად მოკაკულიყო, რათა მოხუცი-სათვის რალაც ეთქვა. ისეთი ნასვამი იყო, რომ მისმა ამონაორთქლმა მოხუცს კინალამ გული აურიო.

— მიდი, მიდი, შენს საყვარელ ძმაკაცს მიპყე, — ზურგი შეაქცია მოხუცმა.

— თქვენ, როგორც ჩანს, ფეხი... თქვენი ქალიშვილი ამბობდა. — ენას არ უკიდებდა, მაგრამ სიტყვებს ნელა, ნელა ამოთქვამდა ოჩოფეხებიანი, თითქოს პირში ცხელი ნაჭერი უღევს და ვერა და ვერ დაუღეჭიაო, — ნურათრის გეშინია... ისეთნაირად გაგხდი, სულ ცეკვა-ცეკვით იარო! — ღიმილისმაგვარი რალაც გაუკრთა პირისახეზე ფერშალს.

მისი შეხედვაც კი გულს ურევდა მოხუცს. განსაკუთრებით ის აცოფებდა, მძიმე-მძიმედ რომ ამოთქვამდა სიტყვებს. მაინც რა ბუზანკალი შეუჯდა ღღეს! თუ ყოველთვის ასე იყო... ალბათ ასე იყო. მაგრამ ვერ ამჩნევდა... რახანია ადამიანის ჭკვიანური საუბარი არ მოუსმენია. შეილიშვილმა დაავიწყა, რაც იცოდა. ორ სიტყვას ვერ აბამს ერთმანეთს. ეს უკბილო დედაბერია და ჩიფჩიფებს. გული გიღონდება კაცს, ეგ რომ იცოხნება. სისაა და ხან დამტკბარ-დაშაქრულად გელაპარაკება, ხან თავხედურად როტავს, ეს ენა-ბლუ ექიმი სიფხიზლეშიც დაბმულ ძალს ააწყვეტინებს და სიმთვრალეში ხომ მტერს მასთან ყოფნა. რაღა დარჩა, ეგ და ხიკა თუ შეეხმიანებიან ერთმანეთს დილდილობით და ეგეც, რასაც ამბობს, ნახევარი უხიაგია, საწყენი ნათქვამია... რა ღვთის წყრომაა... შენი არაფერი მინდა, ნუ მასმევ და ნუ მაჭმევ, ოღონდ ადამიანური სიტყვა გამაგონე, კაცური სიტყვა; კაი სიტყვის გემო

კარგა ხანს ყოფნის კაცს სიხარულად.

— რა წამალი გინდა, რომ არ მქონდეს... სულ იმ ხალხის გამოსობით... მყავს ხალხი... იქიდან მიგზავნიან... — ძლივს ღერღავდა ფერშალი სისულელებს, — გაცეკვებს, გეუბნები...

მოხუცმა მისი ხელი მოიშორა.

— რაო, ბიძა... იცი, საიდან მიგზავნიან წამლებს?

— მსირიდანაც რომ გიგზავნიდნენ, მაინც... წადი, გამეცალე, კიდეც დაგრჩებოდა დასალევი...

— აჰა, — ისევ ღიმილისმაგვარი რალაც გადაეკრა პირისახეზე კაცს. კე-ე-ე-თილი... მაშინ ხვალ... მე წამალი მაქვს... ამისთანას ვერც თბილისში იშოვი და ვერც სოხუმში...

— ჩემი ჭიშკრიდან ის მკვდარი ძალღი გადაათრიე, — უთხრა მოხუცმა, — თუ გინდა, იმ შენს სტუმრებს მიმირთმიე სუფრაზე. ალბათ გაგონილი გექნება თქმულება, მღვდელმა რომ ღორი აჭყივლა და ძალღი დაკლაო...

— რრ-როგორ შეიძლება... ჰი-გიენა! — ისევ ღიმილისმაგვარმა ნილაბმა მოუქცია პირისახე ფერშალს და თავისი გამჭვარტლული თოფის ბიჯგებით ჭიშკრისაკენ წავიდა.

— რა აზრი აქვს ამაზე გულის მოსვლას, — უთხრა მოხუცმა თავის თავს, — ამ მათხოვარს რას სთხოვ?

მოხუცმა თვალი გააყოლა და გაეცინა. სიცხე თანდათან იკლებდა. მაგრამ ნიაფი ახლაც არ იძვროდა: ერთი ფოთოლიც არ შერხეულა, ყველაფერი მოჯადოებულებით გალურსულიყო. ბოსტნიდან ჯერ ისევ ყვავილიანი საადრეო ღობიოს სურნელი მოვიდა, მერე კი გოგრისა და კიტრის ყვავილებისაც. შემდეგ სი-

¹ მსირი — ეგვიპტე



ცხე მთლად დავარდა და ქვემოდან, ნოღებიდან ველური ყვავილების ძალუმი ამო სურნელი და შემქნარი ცაცხვის ფოთლების სუნი მოვარდა. გუგუნი, რასაც მოხუცი მთელი სხეულით გრძნობდა, მიხუსტდა, მინელდა, და ყოველი სულდგმული ახლა უფრო შვეებით სუნთქავდა, იზრდებოდა, მხრებში იშლებოდა, ფესვებს სჭიმავდა და მიწა ახლა უფრო იოლად მიჰყვებოდა მათ ნებას. მოხუცი თითქოს განუწყვეტლივ გრძნობდა სიცოცხლისათვის და სიცოცხლის გამოისობით მიწის ამ მუშაკობას.

ალაყაფს იქიდან ერთხანს კიდევ მოისმოდა „ექიმის“ ხმა და ბალღების ჩქამი. მოხუცმა დაძაბულად მიაყურადა: ადგური იმათში არ არის. „ექიმი“ და ბალღები მკვდარ ძალღს რაღაცას ეცოდვილებოდნენ, შემდეგ აიღეს და საღლაც წაათრიეს. ბავშვების ჟრიაშულში წამდაუწუმ გაისმოდა „ექიმის“ ყვირილი: „ჰიგიენა, ჰიგიენა!“

— დედა ნახე, მამა ნახეო... აბა რა შვილი უნდა ჰყოლოდა იმ... — ვაგულისებით წაიდუღუნა მოხუცმა.

მოხუცი ცდილობდა ხიკას საქმეებში არ ჩარეულიყო. როგორც ჩანს, ახლა უამისობა არ იქნებოდა... სისას იმასთან არაფერი არ უნდა გამოუვიდეს, თორემ მორჩა, სამუდამოდ გაუბედურდება... თვითონ მოხუციც ვერ გადაიტანდა ამას... მართალია, აქამდე კი ღუმედა, მავრამა მისი საბაბიც ჰქონდა...

— ღმერთო. ღმერთო! — დაიყენესა მოხუცმა, — რა მოგონებები ამეკვიატა ერთი! მეხსიერება ნაინც არ იყოს ასე უღმობელი ჩემს მიმართ. რაღაი ასე წავიდა საქმე, ვერც ვერაფერს შეცვლი. რაღა დამრჩენია, მორჩა, მეტს არ ვიფიქრებ,

არაფერს გავიხსენებ და დავმშვიდდები.

რამდენ რამეს იგიწყებს ზოგიერთი, ისეთ რამეებს ივიწყებენ... მოხუცს კი ყველაფერი ახსოვდა. ახსოვდა რომელია — მთელი ამ წლების მანძილზე სინდისი ქეჯნიდა და არათუ მშვიდდებოდა, სულ უფრო და უფრო უფორიაქდებოდა სული... გასახსენებელი რა ჰქონდა — უბრალოდ, არც არასოდეს დავიწყნია რაიმე. მას შემდეგ, რაც გაუსწორებელი რამ დაატყდა თავზე, სირცხვილი წვაავდა. ის ბიჭი შვილივით უყვარდა, პატივს სცემდა მის პატიოსნებასა და გულკეთილობას. იმ დაწყევლილ დღეს კი პირველად შეიტყო, რომ მის გოგოს და იმ ბიჭს ერთმანეთი ჰყვარებიათ. როგორი პატიოსანი ბიჭიც იყო, ისევე გულწრფელი და ღრმა სიყვარულით ჰყვარებია. ამას ვერავინ ხვდებოდა ვერც ადრე და ვერც მერმე... მერე ხიკა, ხიკა? მაშინ, აბა, მაშინ ისეთი ქალი კი არ იყო, რომ სისას თუნდაც სათოფეზე გაჰკარებოდა, სამჯერ უფრო ლამაზი ვაჟკაციც რომ ყოფილიყო.

ის ყმაწვილი მოხუცს რაღაც განსაკუთრებული, ყველასგან განსხვავებული მოკრძალებით ეკიდებოდა: რჩევას ეკითხებოდა და ბოლომდე ყველაფერს უჯერებდა. როგორ სიამოვნებდა ეს ამბავი მოხუცს, ვინც დანატრებული იყო ადამიანურ ურთიერთობას, თანაგრძნობას. მოხუცმა არ იცოდა, რატომ მაინცდამაინც იგი გამოარჩია ყმაწვილმა. მაგრამ ეს რომ მართო ხიკას სიყვარულის გამო არ მომხდარა, ესმოდა. არა, კი არ ესმოდა, გულით გრძნობდა... გულს კი იგი არასოდეს მოუტყუებია...

...და თავისი ცხოვრების უსაშინელებს, უმძიმეს დღეს ყმაწვილი

მოხუცთან მოვიდა. მოვიდა და მას ერთადერთს, ერთადერთს უამბო, რა დღეშიც ჩავარდნილიყო...

„ნეტა არაფერი მცოდნოდა, ნეტა არაფერი გამეგო, არაფერი“...

...ლევარსანი (ბიჭს ასე ერქვა) მთლად ბალანა წაიყვანეს ჯარში. ომი იყო. ასე, ნახევარი წელი ასწავლიდნენ სადღაც ახლოს სამხედრო საქმეს. ფრონტიდან მისი ნაწილი აფხაზეთის გავლით მიდიოდა. და როგორღაც სალამოს, როცა ეშელონი ერთ-ერთ სადგურზე გაჩერდა, ვიღაცამ გვერდზე გაიხმო, თავში რაღაც მძიმე ჩაართვა და დაარტყიანა... გონს ტყეშიდა მოვიდა... ვიღაც უცნობ ხალხს მისთვის გულზე ავტომატი დაეხინა. — უბრძანეს, მთაში აგვიყვანე, აქაური ხარ და გზა-ბილიკები კარგად გეცოდინებაო.

ლევარსანი: ყველაფერს აჯობებდა იმდენი მექნა, რომ შუბლში ან ჭიპში ტყვიის ჯერი მოეშვათ და მორჩა, მოვისვენებდი. მაგრამ ვერავინ ვერაფერს გაიგებდა და ჩემი სახელი საწარამარაო გახდებოდა — ეგ ხომ დეზერტირი და დედალი იყო. ყბად ამიღებდნენ... ამაზე მეტი თავის მოჭრა იქნებოდა?!

ლევარსანმა ისინი ტყე-ტყე თავისი სოფლისკენ წამოიყვანა. ალიონზე ბავშვობიდან ნატანტალებ გამოქვაბულს მოადგნენ. როცა შიგ შეყუყუნენ, მისთვისლა ნაცნობი გასავლელით დაუძვრა ხელიდან იმათ.

... და მოხუცთან მოვიდა, სხვასთან არავისთან.

იმ დღეს ბადრაკთან გამანადგურებელი რაზმის ხალხი სტუმრობდა. ბადრაკი ამ რაზმში მსახურობდა. ათეული ებარა. მოხუცმა ეს ამბავი უთხრა ყმაწვილს, მაგრამ ურჩია

ბადრაკს ნურაფერს ეტყვიო. ტანი უგრძნობდა, ბადრაკმა რომ ლევარსანის გასაჭირი გაიგოს, საქმე ცუდად დატრიალდებაო. მოხუცს უნდოდა სხვა რაღაც მოეფიქრებინა...

ლევარსანი: კი, ბატონო, მაგრამ დრო არ ითმენს. უნდა ვიჩქაროთ შეიძლება ეგენი მიიმალონ. რაც მართალია, მართალია, ბადრაკი კარგი თვალით არასოდეს მიყურებდა... ალბათ იმიტომ, რომ სულ პირში ვეუბნებოდი, ნუ თვალთმაქცობ, ვიცი, ვინცა ხარ-მეთქი... მჯეროდა, რომ ეს ხმამალა უნდა მეთქვა, ხმამალა, ყველას გასაგონად და ვამბობდი კიდევ, როცა საერთო საქმე იყო. ბადრაკს ჭირის დღესავით ვძულდი, თუმცა აშკარად არასოდეს გამოუმყლავნებია ეს. ყოველ შემთხვევაში, ჩემთვის პირდაპირ არასოდეს უთქვამს. მე კი გულში მას ვამართლებდი ხოლმე, ვფიქრობდი, ყველაფერში სცოდავენ-მეთქი ლაჩრები და შემგუებელნი. სადმე არც კარგს დაგიდევინ და არც ცუდს, პირში წყალჩაგუბებულებით არიან-მეთქი.

— ღმერთო, შენი სახელის ჭირიმე! — ამოიოხრა მოხუცმა. — რა წმინდა ბიჭი იყო, წმინდა და მერე როგორი... იმას ეგონა, ყველა ჩემსავით ალალიაო...

იმ დღეს სხვა გამოსავალი მართლაც არ იყო... ბადრაკმა ლევარსანი იქვე, ადგილზევე დააპატიმრა და გამოქვაბულისკენ წაიგდო. მოხუციც მიჰყვა.

გამოქვაბულს ალყა შემოართყეს და რაიონში კაცი ვაგზავნეს მაშველი რაზმისთვის.

ბადრაკმა და მისმა ჯგუფებმა ხელსაყრელი ადგილი დაიჭირეს და უიარაღო ლევარსანი გამოქვაბულში ვაგზავნეს: აბა, ჰე, დეზერტირებს უთხარი, ნუ სულელობენ მანდ და

დაგვნებდნენო (ცოტანილა იყვნენ—
ექვსი შეიარაღებული დეზერტირი,
მეტი არა).

— მიდი, მიდი, რადაც არ უნდა და-
გიჯდეს, გამოიტყუე ეგენი მანდე-
დან! ოღონდ, იცოდე, მიზანში მყავ-
ხარ ამოღებული. როგორც კი გაქ-
ცევას განიზრახავ, შენს თავს დააბ-
რალებ!.. — გამოსცრა კბილებში ბად-
რაკმა.

ეტყობა, მოხუცსა და ლევარსანს
შეუძლებლის იმედი ჰქონდათ...
ომის დროს ლევარსანის დღეში ჩა-
ვარდნილ კაცს არავინ დაენდობო-
და...

ლევარსანს სიკვდილისა არ ეში-
ნოდა, თავზარს ის სცემდა, ჩემი
სოფლები სიმართლეს ვერასო-
დეს გაიგებენო. მოხუცსდა ეცოდინ-
ება სიმართლე, სხვები, სხვები მი-
ატყებებენ სამარცხვინო დამდას —
„დეზერტირის“ დამდას. არა, ლე-
ვარსანს ასეთი სიკვდილით არ უნ-
დოდა მომკვდარიყო.

ჩუმად მისვლა არც უფიქრია.
წელში გამართული უიარაღო ლე-
ვარსანი პირდაპირ გამოქვაბულის-
კენ წავიდა. მოხუცი ყველასგან გა-
მოცალკეებულად იჯდა სამალავში
და, ვაიმე, ყვირილი არ მოვრთოო,
ტუჩზე ისე იკბინა, სისხლი დასდინ-
და. ყველა მიყუჩდა და მუხთალ
სიჩუმეში გაისმოდა ქვიან ბილიკზე
მიმავალი ლევარსანის ფეხის კაკუ-
ნი. გამოქვაბულის შესასვლელს რომ
მიუახლოვდა, მან რაღაც დაიძახა,
მაგრამ მოხუცმა სიტყვები ვერ გა-
არკვია, რადგან მღელვარებისგან
ყურები უგუგუნებდა და არც გუ-
ლისწამლები სიჩუმის დამფლეთი
სროლის ხმა გაუგონია. მაგრამ უცებ
დაინახა, რომ იმ ქვიანზე ლევარსანი
მოცელილივით დაეცა პირქვე. მა-
შინ მოხუცმა იყვირა, მაგრამ მისი
მისუსტებული ხმა არავის გაუგო-

ნია, რადგან ორივე მხარეს გახუ-
რებული სროლა იყო.

სროლა დიდხანს არ გაგრძელე-
ბულა. ორი დეზერტირი მოკლეს,
სხვებმა მეთაურს ტყვიები დაახა-
ლეს და გაიქცნენ.

მოხუცი მივიდა ლევარსანთან,
გადმოაბრუნა, ჩაიჩოქა და გაყინუ-
ლი თვალები დაუხუჭა. გულზე ერ-
თი, ერთადერთი ნატყვიარი აჩნდა
შავად. იმ ერთ, ერთადერთ ტყვიას
შიგ გულში გაეგლო....

მოხუცი რომ ცხედართან ნახა
ბადრაკმა, არც აცია და არც აცხე-
ლა და, მოაშორეთ გვამი აქაურობა-
სო, ბრძანა.

— სანამ რაიონიდან არ ჩამოვ-
ლენ, ხელი არ ახლოთ, — ყალყზე
შედგა მოხუცი.

— შენ აქ რა ეშმაკი გინდა! —
თვალები გადმოუკარკლა ბადრაკ-
მა, — აქ სეირი კი არა გვაქვს?!
შუბლში რომ ტყვიას ჩაგისვამენ, მა-
შინ გაიგებ... ცხედარი გააცალეთ
აქაურობას!

მოხუცს რაღა უნდა ექნა...

რაიონიდან რომ მაშველი მოვი-
და, ყველაფერი გათავებული დახვ-
დათ.

იმ დღეს ბადრაკი ვისაც არ უნა-
ხავს!... როგორი გაყინილი დააბო-
ტებდა!

მოხუცი მივიდა რაისაბჭოდან
მოსულ უფროსთან, სთხოვა, ნახეთ
ერთი, ლევარსანს ის ტყვია რომელი
მხრიდან მოხვდა და გაარკვიეთ, რა-
ტომო...

შემდეგ ის რამდენჯერმე გამო-
იძახეს, მაგრამ ვერაფრის დამტკი-
ცება ვერ შესძლო, დაიბნა... მერე
სულაც ხელი ჩაიქნია...

ცოლი ის-ის იყო მოუკვდა, ბიჭი
მთლად პატარა ჰყავდა, ხიკაც ციცქ-
ნა გოგო იყო...

— ღმერთო, ღმერთო, — დაიკუნესა მოხუცმა.

... და ხიკა ცოცხალ-მკვდარივით დადიოდა... მოხუცს კი უსაშველო მარტოსულობამ დარია ხელი. ყველა თავის ნიჟარაში ჩამალულიყო და მოხუცი გამოერიყათ. თითქოს სულ სხვაგვარი ცხოვრებით ცხოვრობდნენ და სულ სხვა რამეს გამოელოდნენ ამ წუთისოფლისგან, სულ სხვა რამეს, ვიდრე მოხუცი გამოელოდა. თითქოს ომს მისთვის რაღაც განსაკუთრებული, სხვების დარდისგან განსხვავებული სადარდო მოეტანოს...

ახლა იგი უკვე აღარ ელოდა მარჯვე შემთხვევას, იმ წუთებს, როცა ადამიანებისგან გამმიჯნავ კედელში ღიობი გაჩნდებოდა, რათა „წრის შიგნით“ აღმოჩენილიყო და საკუთარ თავთან გულისდამთუთქველი ბრძოლის აუცილებლობისგან დაესვენა. იმიტომ რომ, რაც მოხდა, ყველაფერში მხოლოდ თავის თავს ადანაშაულებდა: „იმ ერთხელ სულმოკლეობა ხომ გამოვიჩინე... საქმემ რომ მოიტანა, თავი არ გავწირე... შური არ ვიძიე, როცა საბაბი გამიჩნდა... შემეძლო კია საბოლოოდ მომეთავებინა მისთვის ხელი და განვიწმინდებოდი კაცი...“ ცხადია, სახელის მოსახვეჭად კი არ გააკეთებდა ამას, ვერც მკვდარს გააცოცხლებდა ამით, იქნებ მისთვის ვერც შებღალული სახელი აღედგინა, მაგრამ ხომ არსებობს გრძნობა ადამიანური მოვალეობისა, საკუთარი თავის, საკუთარი სინდისის წინაშე მოვალეობისა.

... ბადრაკი ხომ მთლად ცხვირ-აბზეკილი დადიოდა, თითქოს ხალხს ეუბნებოდა: „ნახეთ, ნახეთ, ვინცა ვარო“.

„მე კი, მე, ზღაპარში რომაა, იმ უხეირო კაცს ვგავდი, ვინც ჭრილო-

ბაზე მოსაყრელად ნაცარი ვერ იშოვა და დევი ვერ მოკლა... და წაჭრილი თავის ადგილზე დევს სხვა თავი ამოუვიდა...“

— ურჩხულია! — თქვა მოხუცმა, — ურჩხულია, აბა რაა!

ბადრაკივით ამქვეყნად არავინ ეჯავრებოდა.

მზე თითქმის სულ გადავიდა. აგრილდა. მიწა უფრო გულუხვად, ბარაქიანად ღვრიდა თავის წვეს, დედურ რძეს თავისას.

მოხუცსაც მოეჩვენა, დედამიწა ახლა უფრო ძლიერად მაწვება ფეხისგულზე და იგი აგერ ახლა, აგერ ახლა გააღებს პირს და კაცის ხმით რაღაც მნიშვნელოვანს, სასიკეთოს იტყვისო...

გრილმა სიომ რომ დაუბერა, მოხუცმა შვება იგრძნო. თავი მაინც უბჟუოდა და დიდხანს იჯდა ასე, თავდახრილი და ბალახს მისციებოდა.

ფეხთან ხოჭო დაფართიფურტობდა. ცხენის ჩონჩორიკის ბურთს მიაგორებდა საითკენღაც, უკანა თითებით აწვებოდა, ძალიან ჩქარობდა. რაღაც აწრიალებდა. ერთი-ორჯერ წაუჭიკავებდა, გაირინდებოდა, თითქოს რაღაცას აყურადებსო, მერე ისევ და ისევ აწვებოდა ბურთს. მოხუცი მიხვდა, რომ ხოჭო თავის თავის ტვირთს ხვლიკის ტყავივით გაძარცვულქერქიანი თუთის ფესვისკენ მიაგორებდა. ამ ფესვის ირგვლივ ბალახი თითქმის არ იყო და ხოჭო იქითკენ თავის ბურთს ალბათ იმიტომ მიაგორებდა, რომ ფხვიერ, ფაფუკ მიწაში ჩაემალა.

მოხუცმა გაიღიმა.

ამ დროს კუტიკარმა გაიჭრიალა. მოხუცს ყველა ფიქრი გაუწყდა და გაილურსა — ნეტა ვინ არისო. ხიკა და შვილიშვილი მოსულიყვნენ.

— თვითმფრინავი, თვითმფრინავი! — იძახოდა ადგური. ბაბუასთან მიიღბინა. ხელში ლითონის რაგინდარა სათამაშოები მოეჭუჩებინა.

ბიჭმა თავისი განძი ბალახზე ჩამოაწყო და ბაბუას მიეკრა. ბაბუა ნეტარებით მოეხვია შვილიშვილს.

— ვინ მოგცა, ბაბუ, ეგენი?

— მამა, მამა... — იმეორებდა ზალდი და ბაბუას პირსახესთან ხან ერთი სათამაშო მიჰქონდა ალტაცებულს და ხან — მეორე.

— სუნარმა ვერ შესძლო ჩამოსვლა, მაგრამ ვილაცას გამოატანა ეს სათამაშოები. ფოსტალიონმა ამოგვიტანა, — თქვა ახლოს მოსულმა ბიჭამ, — იქ მოვიდა...

მოხუცმა შეატყო, რომ ბიჭა რაღაცით შეფიქრიანებულიყო.

— რაკეტა, თვითმფრინავი, მანქანა! — გახარებული ბავშვი ხან ერთს აიტაცებდა, ხან მეორეს.

— ვერ შესძლო, აბა... — წყენით თქვა მოხუცმა.

— მოგკალი შიმშილით... წყურვილმაც გაგაწამა ალბათ, — უთხრა ბიჭამ. მობოდიშებას ჰგავდა.

— არა უშავს, ქვეყანა არ დაქცეულა, — გულმობრუნებულად მიუგო მოხუცმა, — შევჭამ რამეს, თუ არ შევჭამ, სულ ერთი არაა? ერთ-ბაშად არ გამოვკეთდე. წყურვილით კი მწყურია, ხომ იცი...

— ახლავე ცივ მაწონს მოგიტან.

— სტუმრები წავიდნენ თუ ისევ იქ არიან?

— სტუმრებიო... ეჰ, რომ მცოდნოდა, რა ხალხი იყო... რაღა მასპინძლები და რაღა მათი სტუმრები. ქეციან ცხვარს ქეციანი ცხვარი ფხანს.

მოხუცს ესიამოვნა, რომ ბიჭამ ასე გულლიად გამოხატა მეზობლების ზიზღი.

ბიჭა მაწონის გამოსატანად შევიდა.

— აბა, მამიკომ კიდევ გამოგიგზავნა საჩუქრები... — მოხუცმა შვილიშვილი მკერდთან მიიკრა, თავზე მოეფერა. და ისევ ისე კარგად იგრძნო თავი, თითქოს კარგ ხიმღურას ისმენსო...

— მამა... მამა... — ტიტინებდა ბავშვი. — რაკეტა. თვითმფრინავი.

— ხომ ხედავ, არ ჩამოვიდა მამაშენი, არ ჩამოვიდა...

სუნარი: კარგა ხანს ვეწვალე, რომ გამომედწია გარუჯულ, ოფლიან, საითკენღაც თითქმის ბრმად მისწრაფებულ აჩქარებულ ბრბოში. ბოლოს, როგორც იყო, სკვერში შევრგე თავი და ახალტანაყრილ ფიჭვნარს გავყევი. იქ ხალხი ნაკლები იყო. ზოგი ნება-ნება მისეირნობდა ბილიკ-ბილიკ, სხვები პირდაპირ ხეების ქვეშ მიწოლილიყვნენ ნებიერად. რაღა გამომძღარ-შეზარხოშებული ვიყავი, კაი გვარიანად ვბანცალებდი, საცა ფეხი უნდა დამენელებინა, იქ ვჩქარობდი, არადა პირიქით, საცა გაცლა იყო საჭირო, იქიდან ფეხს ვითრევდი... ჰოდა, ვიჯანჯალე და ვიჯანჯალე... მაგრამ უგონოდ არ ვყოფილვარ, ყველაფრის აზრზე ვიყავი, ვერა და ვერ მეპატიებინა თავისთვის, რომ ის ახალგამომცხვარი კანდიდატი და მედღეს არაფრით ვსხვადასხვაობდით... ამის გაფიქრებამ გულღვიძლი დამიმდურა...

გამახარა ჩემი მეგობრების, კარგ გზაზე შემდგარი მეგობრების გახსენებამ, რომლებთანაც ერთად ოდესღაც ვსწავლობდი. ცოტა მომეშვა გულზე. — ჩანს, არც მთლად ისე წავმხდარვარ, რაღა მათი გახსენება მიხარია და არ მინდა, რომ ისინიც მე დამემგვანონ... ისე კი დიდი ვერაფერი ნუგეშია...

...შინ არავინ დამიხვდა. ცოლს

წერილი დაუტოვებია: გელოდი, შენ-
თან ერთად სოფელში წასვლა მინ-
დოდა, მაგრამ გულმა არ მომიტმინა
და ბავშვს სათამაშოები გავუგზავ-
ნეო...

ჯერ არც ისე გვიანაა, იქნება მო-
ვასწრო კიდევ, იქნებ მოვასწრო
სოფელში ჩასვლა...

მოხუცი ერთხანს ისევ ისე
იჯდა, შვილიშვილი მკერდზე მიეკრა
და ფუნაგორია ხოჭოს უთვალთვა-
ლებდა. ხოჭოს თავისი ბურთი მი-
წიდან ამოხხვერილ ფესვამდე მი-
ეგორებინა. ახლა ისვენებდა. გარინ-
დულიყო, რაღაცას აყურადებდა და
უცბად თავისი ყველა თათით ფხვი-
ერი მიწის ჩიჩქნას მოჰყვა.

ადამიანის თვალისჩინისა და
ყურთასმენისთვის მიუწვდომელი
იყო ის, რაც წამგაუშვებლად აწრი-
ალებდა მოხუცს.

— შეხე! შეხე, რა ხოჭოა...

ბიჭი გულისყურით დააცქერდა
ხოჭოს და წაქანდა, რომ დაეჭირა
იგი, მაგრამ მოხუცმა შეაჩერა:

— აცალე, ხომ ხედავ, მუშაობს,
ცოდოა, არ შეაშინო, თორემ გაიქ-
ცევა და რაც გააკეთა, ისიც ოხრად
დარჩება...

მაგრამ ბიჭმა ამ დროისთვის უკ-
ვე ყოველგვარი ინტერესი დაკარგა
ხოჭოსადმი, რადგან მისი დაჭერის
ნება აღუკვეთეს, მოხუცის მკლავ-
თავან თავი გაინთავისუფლა, ჩაიმუხ-
ლა და სათამაშოებს მიეფართიფურ-
თა; ჯერ ერთი, მეორე, მეორე აიტაცა
და ასე მიმოიბრბინა ეზო-კარი.

— რაკეტა, რაკეტა, თვითმფრი-
ნავი! — წკრიალებდა მისი ხმა.

მოხუცი მოიღუშა.

— აი, რა გითხრა, დად, რა უნდა
გითხრა, — ხმამალლა, ფიქრში შე-
ეხმიანა იგი თავის შვილს სუნარს, —
რატომ ვერა ხედავ, შენი ბიჭი რო-

გორ სხვაფერდება... ეტყობა, რაღა-
ცა სჭრის ნამდვილად... აბა, ეს-რკი-
ნა და ჯართი ასე რამ შეაყვარა...
ასე ადამიანის სული გამოიფიტება-
გეუბნები... მე ამას ვერ დავუშვებ,
ვერ დავუშვებ, ვიდრე პირში სული
მიდგას და არც შენ მოგცემ ნებას,
რომ...

მოხუცი იჯდა ასე ცხვირჩამოშ-
ვებული, ვიდრე ისევ არ ჰქიდა თვა-
ლი მაშვრალ ხოჭოს. ხოჭო მუშა-
ობით თავს იკლავდა, ოღონდ ჟამი-
ჟამ კი ისვენებდა, რაღაცას გარინ-
დებული აყურადებდა. უცბად, სად
იყო და სად არა, ორი ხოჭოც გა-
მოჩნდა, ესენი უფრო ტანდილნი
იყვნენ და აგორებულ ბურთს დააცხ-
რნენ. იმ ფუნაგორია ხოჭოს, ბურ-
თის პატრონს, ტანმა უგრძნო, ფხიზ-
ლად ყოფილა და ეცა მომხვდურთ
(მუქთახორები, არამზადები, გარე-
წრები... შენ თავს იკლავ, შრომობ,
ფეხზე ძლივს დგახარ, ამისთანა
კობტა, მრგვალი ბურთულა გამოგი-
ვიდა, ისეთია, ისეთია, რომ ავ თვალს
არ დაენახვება... ამ დროს გამოტყ-
ვრებიან ძალღი-მამაძაღლები და პი-
რი დაუბჩენიათ, რა ენაღვლებათ რა,
მზამზარეული ვის აწყენს?!. ისემც
იმათ დაუდგეთ გვერდები!!) და და-
იწყო ომი, მაგრამ რა ომი, — სამ-
კვდრო-სასიცოცხლო ომი. უთანას-
წორო ძალები შეიბნენ. მაგრამ ფუ-
ნაგორიის მძვინვარებამ ორივე თავ-
დამსხმელი დააფრთხო. ორმა ერთი
მაინც დაიჯახნა და სულ მალე
ფუნაგორია იწვა ზურგზე, იწვა და
ამობრუნების თავი არა ჰქონდა.
იმათ, იმ ორმა, ბურთი წაიგდეს.
ნამეტანი სულსწრაფობდნენ. ამი-
ტომ უფრო არაფერი გამოსდი-
ოდათ: ხან გზად რაღაც ეღობებო-
დათ, ხანაც, ერთი რომ ალთას მი-
დიოდა, მეორე — ბალთას... და გაწა-
მაწია ჰქონდათ. ამ დროს, როგორც

იყო, ბურთის პატრონი გულზე ამობრუნდა, არაფერი შეშლია, ისე გასდია კვალში მომხვდურთ. გასდია და მიეწია. მიეწია და პირგამეხებულად უთაქა და უთაქა. ის ორნი კი ისე დაღლილან, ისე დაქანცულან, რომ საცა არა სჯობდა, გაცლა ამჯობინეს და აქეთ-იქით მოუსვეს. გამარჯვებულმა სულმოუთქმელად მიმოუარა ბურთს და, როცა დარწმუნდა, მრთელიაო, ჯიკავ-ჯიკავით გააგორა იგი იქითკენ, სადაც ორმოს თხრიდა. მიაგორა და ისევ ორმოს ღრუნტვა განაგრძო...

მოხუცს გულზე მოეშვა. თავისი-ანივით შეჰკლიმა ნათათერაკალს.

ცივი მაწვნით გაიგრილა ყელი, ცოტა ლუკმაც შეაყოლა და გუნება გამოუკეთდა. თითქმის არცა სწყუროდა.

— დღეს კრუხს ძერა დაეცა, ვინ იცის, იქნებ სადღაც გდია მიქანცული...

— ეგ საწყალი, ეგა... წიწილებიც რომ მთელი დღე დაიმშენ.. — ხიკამ აიღო მოხუცის თეფში. შინ შევიდა.

იგი მალე გამოვიდა, წიწილებს საჭმელი გამოუტანა და წივ-წივ, წივ-წივო, უხმო. ჭრელა განზე იდგა, მაგრამ ხიკას ხელით მიმოპნეულ საკენკს სხვები რომ კინწისტეხით მიახტნენ, იმარჯვა და თავისიანების შუაგულში ამოჰყო თავი.

კრუხი არ ჩანდა. ხიკამ დაუძახა.

— ეჰ, ალბათ მოკვდა, ბეჩავი...

— არა, არა, აგერაა, აგერ, ის კი არადა, რის ვაი-ვაგლახით მაინც მორბის, ცდილობს, აბა!

— თუ იმას აქამდე პირში სული უდგას, გადარჩება, ეტყოფა, — გულზე მოეშვა მოხუცს.

ცხადზე ცხადი იყო, რომ სუნარი ახლა უკვე ვერ ჩამოვიდოდა, მაგ-

რამ მოხუცის სხეულში მაინც კრთოდა იმედის ჩაუცხრომელი, ჩაუქრობი ნაპერწკალი.

სუნარს უყვარდა ზღაპრები, მოხუცმა კი აუარება ზღაპარი იცოდა. როცა ატყობ, რომ გულისყურით გისმენენ, წყალივით ჰყვები ზღაპარს, ჰყვები და გიხარია. მოხუცი ასეთ წუთებში დაჭიმული მშვილდით იყო და მისი „ისრები“ კაკალ გულში ხვდებოდა მიზანს... როცა ხედავდა, რომ მისი ნაუბარი მსმენელს იტაცებდა, ისე შედიოდა ეშხში, მთელი არსებით, თხემით ტერფამდე, ისე შედიოდა ზღაპრის სამყაროში, რომ, ნეტარებით შემსჭვალულს, ეგონა, მსხმოიარე ხე ვარ, რომლიდანაც ეს-ესაა ხილი ფრთხილად ჩამოკრიფესო...

მაგრამ სუნარი ახლა შინ უქმე დღეებშიც არ ჩამოდიოდა.

და მოხუცს ეჩვენება რახანია, უკვე რახანია სუნარი არ ყოფილაო. რახანია შვილისთვის ზღაპარი არ მიაძინაო... იქნებ მოყირჭდა, ა? მაგრამ ზღაპრები შეიძლება კაცს მოყირჭდეს? ცხოვრება ხომ გრძელდება და ზღაპრებს რა დაღევს...

მოხუცს შვილისა სჯეროდა და თავის თავსაც კი არ აძლევდა უფლებას რაიმე შეეჭვებოდა...

მწუხრი ჩამოწვა. საგრძნობლად აგრილდა. საგვიანო ვაშლების ყვავილების სურნელმა სხვა ყველა სურნელი დაჯახნა და გარეშემო გაჟლინთა. მოხუცს უყვარდა ეს მომჟაო სურნელი — ამოდ ისუნთქავდა ახლა მას.

— ხიკა, — უხმო მოხუცმა, — ი ალაბაშა მომაწოდე, კრუხს ვესროლე და ქე გდია იქ. გამაბრაზა კრუხმა მაშინ, მაგრამ მერე... ვინანე, აბა, განა რალა დროსი იყო...

— გინდა ფეხს შეგიხსნი? — უთხრა ხიკამ და ხელჯოხი მიაწო-

და. — ნაჭრილობევზე ახალ ფურცელს დაგაფენ...

ხიკამ მტკივანი ფეხი შეუხსნა და მოხუცმა უვება იგრძნო. სიმსივნეს დაეკლო და ძველი ფურცელი იოლად აძვრა ნაჭრილობევს.

— ხორცდება, — თქვა ხიკამ და ფრთხილად მოუსვა ხელი ნაჭრილობევს ირგვლივ.

მოხუცს გული გაულაღდა, — რა ზანია შვილი ასე არ შემოვლებია.

— სანამ ეგ ფერშალი ჩვენამდე მოაღწევს... დღეს იმათთან შემოუხვია, სუნი ეცა...

— დაიკარგოს ერთი! ვის რაში სჭირდება...

— რამდენი წელია ხალხის მონაგარი ფული ეძლევა ჯამაგირად და ნეტაი რისთვის.....

— ეგრეა. იცოდე, ერთხელაც იქნება წაიტეხავს ფეხს...

— როდისღა, როდის?!

— იცი, რა გითხრა, ბოროტებას ზოგჯერ იქ ეძებენ, სადაც იგი არაა... რატომღა და სიმართლის გვერდითაა იგი, და იმიტომ...

ხიკამ თავი დახარა.

— დღეს ფინია ძალი მოკლეს, არაფერი ბრალი იმას არა ჰქონია. ერთი უპატრონო, გზას გადმოცდენილი ფინია იყო...

— თვითონ არიან ცოფიანები...

ხიკამ ნაჭრილობევზე ქორფა ფურცელი დაადო და შეუხვია. მოხუცს ფეხი თითქმის არ სტკიოდა.

— სახლამდე ალბათ ჩემით მივალ.

— არ გინდა, იქნება არ სჯობდეს.

ხიკა არ სტოვებდა მოხუცს.

ქალი დაბნეული ჩანდა, თითქოს თვითონაც ვერ გაეგო თავისი ასეთი უჩვეულოდ მოღობობის მიზეზი...

— ჩვენ იმასთან არ შეიძლება რაიმე საერთო გვქონდეს... და სა-

ერთოდ არავინ, ვისაც კი შუბლის ძარღვი მრთელი აქვს, იმათთან არაფერ საერთოს არ დაიჭერს, — თქვა მოხუცმა.

მამა-შვილმა უსიტყვოდ შეხედეს ერთმანეთს თვალებში. წამით ისეთი სიჩუმე ჩამოვარდა, გეგონებოდა, აგერ, ა, აგერ ბალახის ტანაყრის ხმასაც გავიგონებო...

— იმათთვის ფინია რაა, რომ... ხელი ექავებათ, თუკი მიზანში არ ისვრიან და რამეს არ კლავენ... იმათთვის ეს გართობა და სეირია, — თქვა ცოტა ხნის სიჩუმის შემდეგ მოხუცმა.

— იცი, დღეს რა სადღეგრძელო დალიეს იმათ?!

ხიკა ქანცგამოცლით დაეშვა მამის გვერდით, ეტყობოდა, ფეხზე უკვე ვეღარ დგებოდა.

— ყველა ტყვია დალოცეს, ყველა, ლულიდან რომელიც კი გამოვარდნილა...

— გარეწარი ევა!

— არც არაფერს მალავენ, მთლად თავს გავიდნენ, გათავხედდნენ...

— ეს მარტო იმათი ბრალი როდია...

— ხომ ყველამ იცის, რომ მან მაშინ შემთხვევით ისარგებლა და ანგარიში გაუსწორა იმას... რატომ იმცირებენ თავს ადამიანები ასე, რატომ აქელინებენ ვილაც-ვილაცეებს თავიანთ ღირსებას...

ხიკას ცრემლი მოაწვა. მამისთვის არ უნდოდა გულის აჩუყება ეჩვენებინა. ამიტომ ადგა და სახლისაკენ წავიდა, ნელა, ნელა მიდიოდა და მოხუცს მოეჩვენა, რომ ხიკას შესუქებულმა ტანმა კვლავ დაიბრუნა ქალწულური მოქნილობა. და მის სიარულშიც ამაყი, მბრძანებლური ნება გამოსჭვიოდა — თითქოს იმის კვლავ მწვავედ განცდას, რაც ადრე დაკარგა, ქალისთვის რაღაცნაირი

შინაგანი თავისუფლება და სილადე დაებრუნებინოს.

მოხუცი ერთხანს ჩუმად იჯდა. შემდეგ შეირხა, წელში გაიმართა და იგრძნო, რომ თანდათან უბრუნდებოდა ის დაკარგული სულიერი წონასწორობა... თავი ასწია, ეზოს მიმოავლო მზერა და მოეჩვენა, რომ ეზომ მის ცხოვრებაში კვლავ დაიბრუნა კუთვნილი ადგილი... იმ ხანებში, როცა ცხოვრება დაგვალულ ხრიოკ უდაბნოდ მიაჩნდა, ეს ეზო, უსაშველოდ ლურჯი უზარმაზარი ცის ქვეშ მოჭუჭკული ეს პატარა ეზო წალკოტად ესახებოდა.

ეს ეზო — ზეცის პირისპირ დარჩენილი ეს მწვანე მდელო...

ეზოს ქათმები მოეფინენ. ჭრელი პრანჭიკელა საქათმეთის ბატონის — ბებერი მამლის გვერდით ტრიალებდა. ის ახალგაზრდა ლამაზი მამალი კი ვითომ ვერაფერს ამჩნევდა: ხან ცას აჰხედავდა და გაოცებული აჰყვილებდა, თითქოს ზადი რამ უნახაო, ხანაც ბალახებში რაღაცას იკენკებოდა და სხვებსაც უხმობდა, აქაოდა, სასწაული ვიპოვეო, სასწაული. მაგრამ მისთვის არავის სცხელოდა, ყველას თავისი საზრუნავი ჰქონდა, თანაც მათი ატამანი — ბებერი მამალი ცხრა მთას იქით კი არ იყო და არასამდროო გმირი მათ არ აინტერესებდათ. ჭრელი პრანჭიკელა თვითონ არაფერს ეძებდა, ოღონდ ბებერ მამალს ევლებოდა თავზე და ბებერიც თავს არ იზოგავდა, ეძებდა და ეძებდა საკენკს, და როცა კი რამე პირის ჩასატკბარუნებელს იხელთებდა, ზარზეიმით, ყველას გასაგონად უხმობდა ლამაზმანს... მაგრამ ლამაზმანი ზოგჯერ შეფიქრიანებით ააღერდა თავს, ჩუმად გამოერიდებოდა თავის ბებერ კუროს,

თავს იკატუნებდა, ვითომ ფიქრმა დამრია ხელი და ამდენზე გამომიყოლაო, სინამდვილეში კი იმ ჯეელ მამალს გაჰხედავდა ხოლმე (აქა ვარ, აქაო, და თუ ლაჩარი არა ხარ, იღონე რამეო). მამალიც ააღერდა თავს და თვალს არ აცილებდა. კარგად იცოდა, ბებერი ატამანიც რომ თავს იკატუნებდა, ვითომ ვერაფერს ხედავდა, და ამიტომ ყვინჩილა უგანებდა, ვითომ, ნახეთ, ნახეთ ჩემთვისა ვარ, ჩემთვისო.

მაშვრალ, კვერცხისმდებელ ქათმებს სხვებისაგან ყოველთვის გამოარჩევს თვალი. თავიანთი მალალი, ვარდისფერი ფეხებით არცთუ ჩქარა და არცთუ ნელა დაგოგავენ, ეძებენ, ეძებენ და აუცილებლად პოულობენ საკბილოს, ძალზე მარჯვედ და თადარიგიანად ხმარობენ ნისკარტს: ჩაუნისკარტებენ და პირს ჩაიგემრიელებენ, — კიდევ და კიდევ, კიდევ და კიდევ — და ნისკარტი სულ გამწადებული აქვთ სანადავლოდ. პრანჭიკელები კი, ამ ჭრელასნაირნი, ნარნარად დადიან, ფეხს არ აუჩქარებენ, ხანდახან შედგებიან, თითქოს თავში რაღაც მშვენიერი აზრი დაებადათო, შემდეგ ისევ ისეთი ყელმოღერებით განაგრძობენ გზას, თან მამლებს ზემოდან უყურებენ, ვითომ ვინა ხართ, ვის დაჰკარგვიხართ. ლამაზმანები არაფრის ძებნით არ იწუხებენ თავს, ოღონდ გზად სწრაფ-სწრაფად წიწკნიან ნაზ, რბილ ბალახს. სხვა ქათმები ყველა ერთმანეთს ჰგავს. ყველა ჯუფთად მირბის ხან ერთი მხრით, ხან — მეორე მხრით. რომელიმე იპოვის მარცვალს რასმე, რომლის გადაყლაპვა მაშინვე არ შეუძლია, ნისკარტში იგდებს და გარბის, სხვები გამოენთებიან და იმდენს დასდევენ, ვიდრე არ წაართმევენ, თუკი, ცხადია, ის, მპოვნელი, სირბილშივე ლამის დახ-

რჩობის ფასად არ გადაყლაპავს ნადავლს.

კრუხს სხვა ქათმებზე მეტი საზრუნავი ჰქონდა, — თავისი წიწილებისთვის უნდა მიეხედა. დანაყრებულის წიწილები ძალზე თვინიერად დაცაცუნობდნენ დედის ირგვლივ და ხმაშეწყობით გამოსცემდნენ ნეტარების ჩუმ, აუმიღვრეველ მელოდიას... მათ ჭრელაც ხმას აყოლებდა, მაგრამ მაინც განდევნილად იყო.

გზა კვლავ გაცოცხლდა, იმატა და იმატა ხმაურმა. ვიღაცეები მოსაუბრობდნენ, ზოგიც საქონელს შეუძახებდა ხანდახან. უშველებელი მატარებელივით მთელი სოფლის სიგრძეზე გაწოლილ გზას ხალხი მიჰყავდა თავთავიანთი სახლებისაკენ.

საღამოს ყველაფერი სულს ითქვამდა, ცოცხლდებოდა. მყინვარებისა და მარადი თოვლის ძლივს-ძლივს ნაღნობი წყალიც კი, როგორც იყო, ამ დროისთვის მოატანდა მდინარემდე, ჩაედინებოდა მასში და ვაკის მდინარეც აჩქამდებოდა, ფეხს უჩქარებდა და ხმას უწევდა.

მოხუცმა ეს იცოდა და ალბათ ეჩვენებოდა, მდინარის საღამოური მუსიკაიფი მესმისო, ან იქნებ მართლაც ესმოდა. ისიც კი ეჩვენებოდა, გამდნარი თოვლის წყლის ხმას მდინარის ჩვეულებრივი წყლის ჩქამისგან ვარჩევო, რადგან ნალხობი წყალი კი არ ხმაურობს, რაკრაკებს, რეკავს, და ეს რეკვის ხმა მყინვარული წყლის სიგრილეს მიდამოზე განაფენს...

... შორეული მთებიდან ყველაფერი ჩამოაქვს მყინვარებისა და თოვლის ნამდნარ წყალს, მაგრამ იქაური, მთის წყაროების წყლის, აციხა-ძის გემო ვერ ჩამოაქვს. ამიტომაცაა, რომ ახლაც უეჭველად ვიღაც დაფოფხავს იმ ლაღე-ლუღეებ-

ში, მიუყვება ზიგზაგ ბაწარა ქვის ბილიკებს, კლდოვან ქარაფებს რომ შემოსალტვიან — ჩიტსაც კი გული უფანცქალებს ამ კლდეების თავზე. ჰოდა, ვიღაც მაინც მიდის ახლა იმ ჩქერალებისკენ, რომელთა გარშემო ყველაფერი პირველქმნილად ცინცხალია.

... მზე ბოლოს და ბოლოს გადავიდა გორს იქით და ჩაეშვა ხრამში, — ბალღობაში ეგონა, ღამე იქ იმალებაო. მიწა მაშინვე გრილი ნიავით ახვნეშდა, თითქოს ენანება, რომ მზეს დილამდე ვეღარ ნახავსო. ირგვლივ ყველაფერი გადასხვაფერდა. ყველაფერი ღამის წყვდიადმა შთანთქა, ყველაფერი — ყვავილებიც, ბალახბუღაჩიც, მთებიც... მაგრამ ღამეც დუღდა სიცოცხლე — აკვნებში იზრდებოდნენ ბალღები, ხილი მწიფდებოდა, წვენი ივსებოდა. რაც სიცოცხლეს დღისით ვერ მოესწრო, ღამე უნდა გაესრულებინა. სიცოცხლე, სიცოცხლე, სიცოცხლე... სიცოცხლე დღისით და ღამით. დაუსაბამო, მშფოთვარე სიცოცხლე...


— მე დღეს ტრაქტორისტი ვნახე, — უთხრა მოხუცს ხიკამ, სახლიდან რომ გამოსულიყო და ისევ ახლოს დაუდგა, — შემპირდა, ხვალ წყაროდან შლამს ამოგიწმენდო...

მოხუცი სიხარულს შეემსჭვალა, ნეტარებდა, ბედნიერი კაცის თვალით შესცქეროდა შვილს.

— გმადლობთ, — უთხრა მან, — გმადლობთ, დად...

კარგა ხანია ხიკასთან ასე არ ულაპარაკნია, კარგა ხანია მასთან საუბარში არ უგრძვნია სიტყვების გემო...

— სუნარი დღესაც არ ჩამოვიდარატომღაც... — შეშფოთებით თქვა ხიკამ, — რა დაემართა ნეტა... ერთი უნდა წავიდე, ვნახო...



სუნარი: დიახ. დამემართა... რა-
 ლაც დამემართა... მე, როგორც ჩანს,
 ძილი მომერია და თავი მიწაზე ჩა-
 მოვდე. როცა გამეღვიძა, თავი გასკ-
 დომაზე მქონდა. ერთთავად ოფლში
 ვიწურებოდი, ყელი გამშრობოდა...
 მაგრამ სინდისის ქენჯნამ გამიარა.
 რალაცნაირი გაორება მითავებს
 ხელს: ჩემს არსებაში თითქოს ორი
 ადამიანია ჩაბუდებული. ერთი მე-
 უბნება: „ფეხებზე დაიკიდე ყველა-
 ფერი, დარდი არ გაიკარო. შენი
 სინდისის ქენჯნა დონკიხოტობაა და
 მეტი არაფერი.“ მეორე კი დუმს, არ
 ედავება. „დონკიხოტობაა და თა-
 ნაც როგორი, უმარტივესი“, — თა-
 მამდება პირველი. „უკვე საშიში
 ხდება“, — ამბობს მეორე, კი ამ-
 ბობს, მაგრამ ძალზე ჩუმად და
 ყრულ ამბობს და უცბად მე ვფხიზ-
 ლდები. „აქ უნდა გამოჩნდეს მესა-
 მე — ყველაზე მთავარი — მსაჯი,
 ვინაც ერთხელ და სამუდამოდ გა-
 დაწყვეტს დავას. ყველაფერი რომ
 ასევე დარჩეს, შემდეგ უკვე გვიანი
 იქნება!“ — ვთქვი მე და წამოვდექი.

გადმოვიღე სუფთად გადაბეჭდი-
 ლი, გულდასმით ჩასწორებული
 ხელნაწერი (დამოწმებული ლიტე-
 რატურის ვრცელზე ვრცელი სიით-
 ურთ), მაგრამ რომ დავხედე ცა-
 რიელ ყუთს, რაზედაც აქამდე მედო
 თავი, შევტოკდი. იმან, იმ პირველმა,
 ჩემს სულში რომ იჯდა, გამქირდა-
 ვად გაიციანა. მეორე კი დუმდა.
 ხელნაწერი გადავფურცლე. რამდე-
 ნიმე უწყინარი წინადადება—კბილ-
 მოცვეთილი, საწარამარაო სიტყვე-
 ბისაგან აგებული წინადადებები—
 წავიკითხე და „დღეს ან არასოდეს-
 მეთქი,“ ვუთხარი თავს.

ხელნაწერიანად უაზროდ დავ-
 ბორიალებდი ოთახში. „ძველად ლი-

ტერატორებს ბუხრები ჰქონდათ, —
 აბუჩად ამიგდო პირველმა, — „შეაგ-
 დებდნენ შიგ ხელნაწერს და ჰაი-
 და...“ — „შენ ჯერ ისევ მთვრალი
 ხარ“, — მითხრა მეორემ, — „შემ-
 დეგ არ ინანო, იცოდე...“

„ეგრეა, მშვიდ გუნებაზე უნდა
 გავაკეთო ეგ ამბავი... წყალი არ უნ-
 და გაუვიდეს, რასაც გადავწყვეტ,
 ის იქნება!“ — ვთქვი მე და ხელნა-
 წერი მაგიდაზე მოვისროლე.

ვფიქრობ, რომ უკან არ დავიხვევ,
 თორემ მართლაც რომ საშიში ვითა-
 რება შეიქმნება, ეგრეა...

სადამოა. ცაზე ღრუბლის ნასა-
 ხიც არა ჩანს. ღრუბლის უწყვიმო
 ფთილები, ამდენ ხანს რომ ეჯარე-
 ბოდნენ მწვერვალს, დაიფანტნენ.
 მხოლოდ ძალზე მახვილი თვალი თუ
 შეამჩნევდა ცარიელა კლდეების
 თხემებზე მკვდრის მზის მცხრალი,
 მინავლული სხივებით შეფერილ,
 სუნთქვასავით მსუბუქ ციციქნა ხუ-
 ჭუჭა ფთილებს.

მოხუცმა თავი ასწია და მძიმედ
 ამოიოხრა.

— და ერთხელ იმას მშვენიერი
 სიზმარი ესიზმრა: თითქოს თავით
 მზე დაჰხაროდა, ფერხით მთვარე
 ანათებდა, ვარსკვლავი კი, კაშკაშა
 ვარსკვლავი, გულზე ესვენა... —
 ბუბუნებდა მოხუცი და უცებ მთე-
 ლი გარე სამყარო თითქოს კამკამა,
 მჭვირვალე წყალში ჩაყურყუმალავ-
 და და აძაგძაგდა... მან კი, მოხუც-
 მა, იგრძნო, რომ აქამომდე გამომშ-
 რალი ქუთუთოები დაელამა... —
 და რა იხილა ის სიზმარი, ჰაბუკმა
 ფიცი დადო, რომ სიზმარს მხოლოდ
 იმას მოუყვებოდა, ვინც, მოისმენდა
 თუ არა, ეტყოდა: „ავიხდინოს ღმერ-
 თმა ეგ შენი სიზმარი, ავიხდინოს!“.

სომხურიდან

თარგმნა ბივი შაჰნაზარმა

ციკლიდან — „ნობელები“

სათამაშოების ამწყობი

შემეძლო, ყველგან ვყოფილიყავი...
და ყველგან ასე მეყვირა: „მინდა!“
ანდა — „არ მინდა!“
მაგრამ მე ყველგან
არც დავდივარ და ვერც ვიქნებოდი,
ხოლო სადაც ვარ,
ფიქრში საკუთარ თავს ვეუბნები —
„არ თქვა!“ „არა თქვა!“
და მერე ართქმულს ყველას ვუტოვებ,
რათა უჩემოდ გაჩხრიკონ იგი.
და როცა ყველა გულდაგულ ნახავს
ჩემს დანატოვარს,
აი, მაშინ კი
არ შემეძლია არ ვთქვა და ვიტყვი:
— იცით? ხელობის სწავლა ვისურვე —
სათამაშოთა აწყობას ვსწავლობ,
და დამერწმუნეთ, ვისწავლი კიდევ!



...შემოდგომაა. სუსხიან ქარში
 ხეები იძვრის,
 ვით კაცის თავში ტოტებგაშლილი
 ფიქრი და... ვხედავ:
 დღისით ღრუბლიან ციდან ვარსკვლავთა
 ცივ მოდულების გუნდები ცვივა,
 უფრო მოკლედ რომ ფოთლები ჰქვია...
 ამ მოდულებით სათამაშოებს
 ჩამოვასხამ და თუ ვინმე მკითხავს —
 „რა ღირს“? მე ჩემ თავს უჩუმრად ვურჩევ —
 „არა თქვა“, ხოლო მისი შეკითხვის
 პასუხად ასე ვიტყვი — „სალამი“!
 არ ვიცი, ჩემზე ის რას იფიქრებს,
 მე კი, იმავე წამს, არ შემიძლია
 არ გავიხსენო: იყო ამქვეყნად
 ერთი გოგონა... რომლის სახელი,
 კიდევ რომ გითხრათ, დამავიწყდაო,
 ჩემი იმდენად გჯეროდეთ, როგორც
 თვითეულ თქვენგანს ნამდვილად სჯერა
 ცნობები ქვეყნის გაზეთებისა.
 და მუდამ, როცა მომესურვება,
 ვამცნო ქვეყანას მისი სახელი,
 კვლავ თავს საკუთარს ვაფრთხილებ —
 „არ თქვა“!

იცით? ის გოგო ამბობდა: „როცა
 ბეთჰოვენს ვისმენ, ასე მგონია
 ზღვის ზედაპირზე დავიარები“...
 მე იმ გოგონას მოდელიცა მაქვს,
 სწორედ იმ გოგოს თბილი მოდელი!
 და ახლა მისი თბილი მოდელით
 სათამაშოთა აწყობას ვიწყებ.

ჩამოვასხამ და თუ ვინმე მკითხავს —
 „რა ღირს“? — მე ჩემს თავს უჩუმრად ვურჩევ:
 „უთხარ“! და ვეტყვი, — „გროშის ფასია,
 ერთი... ჩავლილი მთელი ცხოვრება“...

და ვაწყობ ასე, რასაც ინებებთ!
 სწორედ ჩემნაირ კაცზე ამბობენ —
 ღმერთმანი, დასტურ ოქროს ხელი აქვს...
 და მუდამ,
 როცა ხელებს დავყურებ,
 ეს ჩემი ოქროს ხელები მუდამ
 შეკითხებიან: „ჰა?“ რაც შეკითხვა

არ გახლავთ სულაც! — არამედ, არის
 პასუხი ჩემივე ჩუმი შეკითხვის.
 და მეც, ყოველთვის, ისე დავყურებ
 ჩემს ხელებს, თითქოს გამოუცდელი
 არქეოლოგი ვინმე დაჰყურებს
 ნივთს მოძიებულს მის მიერ ახლად
 და ვეუბნები: „ჰო“! რაც პასუხი
 არ გახლავთ სულაც, არამედ — ჩემივე
 შებრუნებული არის შეკითხვა.
 და თავს იქნევენ ჩემი ხელები,
 ჩემი თავი კი — ხელებს იქნევს და...
 და... კარგად ვხვდები: არ შემიძლია
 (და ქვეყანაზე ვერც ვერვინ შესძლო!)
 შევქმნა ერთი რამ, რაიც ქვეყანამ
 ჭეშმარიტებად მონათლა. მხოლოდ
 ის არ იქმნება!
 თუმცა არასდროს
 ცდას არ აკლებენ და დიდხანს ქმნიან,
 ქმნიდნენ და ქმნიან, ქმნიან და ქმნიდნენ,
 საუკუნეთა მანძილზე ქმნიან
 უფლის სახელით!
 მბრძანებელთ ნებით!
 თუ გნებავთ, — თოკით, თავის სიმაგრეს
 ადამიანთა კისრებზე რომ ცდის!
 და იარადით! — ადამიანებს
 მათსავე მკერდზე პუნქტუაციის...
 გაკვეთილებს რომ უტარებს... ასე,
 საუკუნეთა მანძილზე ქმნიან
 იმას, საერთოდ რაც არ იქმნება!
 და, რა თქმა უნდა, რაც არც იშლებია!
 თუკი ასეა, სხვაზე ნაკლები
 ვითომ რითა ვარ? ამიერიდან...
 მეც ვიწყებ შექმნას ჭეშმარიტების!
 თითო-ოროლას არ დავჯერდები!

შევქმნი და შექმნილს
 ყველგან გავყიდი —
 სადაც უნდათ და სადაც არც უნდათ —
 გზაჯვარედინზე,
 დუქნის წინ თუნდაც
 ქვაფენილზე და
 ძეგლის კვარცხლბეკზე,
 კათედრაზე და,
 თუ გნებავთ, — წიგნში...



და როცა ხალხი მკითხავს, თუ —
 „რა ღირს“?
 მე აღარ გავცემ პასუხს, ჩემს ნაცვლად
 ის სათამაშო გოგონა ეტყვის,
 და ეტყვის იმდენს,
 რამდენიც თვით ღირს,
 არც მეტს, არც ნაკლებს: — „გროშის ფასია...
 ერთი... ჩავლილი მთელი ცხოვრება“...

...ამგვარ ვაჭრობამ, მოგეხსენებათ,
 დიდი ქონება უნდა შემძინოს,
 ისეთი დიდი ქონება, მერე...
 ერთი ბილეთის ყიდვა რომ შევძლო —
 და... საკონცერტო დარბაზში სადმე
 მეც მოვუსმინო ბეთჰოვენს, რათა
 მეც სწორედ ისე მეგონოს, თითქოს
 ზღვის ზედაპირზე დავიარები...
 და მაშინ, გარეთ ბუნების ჭკნობის
 თუ დაბადების ჟამი იქნება,
 აბა, რას ვაქნევ! ხომ სულერთია?!
 ხომ სულერთია?! აბა, რას ვაქნევ,
 ქარი არხევს თუ არ არხევს ხეებს? —
 ვით კაცის თავში ტოტებგაშლილი,
 ტოტებგაშლილი ფიქრი ირხევა.
 ან — ღრუბლიან თუ უღრუბლო დღეში
 არის თუ არა ფერმკრთალ ვარსკვლავთა
 ცივ მოდელების ცვენა ზეციდან,
 უფრო მოკლედ რომ „ფოთლები“ ჰქვია?!.

და შინ მიმავალს
 უცებ თუ ვინმე
 მეტყვის: „სალამი“, პასუხის ნაცვლად
 შევეკითხები: „რა ღირს“? და... თუკი
 ამგვარ პასუხზე ვიღაც გოგონებს
 გაეცინებათ, — ვიღაც გოგონებს,
 სახელითაც კი რომ ვერ ვცნობ ვერცერთს,
 პასუხის ნაცვლად მათ ასე ვეტყვი:
 „არ გამაჩნია თქვენი მოდელი“.

მაშინვე ირგვლივ შემომერტყმიან
 (ხალხის წესია: ვისაც გიჟად თვლის,
 ხშირად სწორედ მას ალაპარაკებს!..)
 ჩემი არსების ანის და ბანის
 მოესურვებათ გაგება, მაგრამ

ხელები ისევ მეტყვიან: „არ თქვა“!
და თავს საკუთარს მეც ვეტყვი: „არ თქვა“!
მე გავჩუმდები. მაგრამ შენ ის თქვი,
სათამაშოთა იმ ამწყობ ოსტატს
რა გააჩუმებს, ახლა რომ ჩემში
ველარ ისვენებს და ჰა, საცაა
ჩემივე პირით წამოიყვირებს,
ვით მეძველმანე ვაჭარი ყვირის —
„ჭეშმარიტებას ვყიდი, ხელოვნურს“!..

ციკლიდან — „სიყვარული“⁶

ნაკოვნი ერთეული

გკითხე: ჩემი ხარ?
მითხარ: შენი ვარ!
და ვდუმვართ ახლა...

ახლა თითებით თმას მივარცხნი (თუ უნებლიედ,
ჩემი სიბერის გსურს ნათელი ანბანის კითხვაც? —
რაიც თავს ჩემსას დასდებია უკვე ჭირხლივით...)

და ვდუმვართ ისევ...
მე ფიქრებში გხდი ჩემს მევალედ —
გამოცდილებას გაძლევ სესხად, მაგრამ... შენ შესძლებ
ამ სესხის ნაცვლად დამიბრუნო ფამი?... რამეთუ
ცხოვრება ესე — დიდი ექსპერიმენტატორი —
ერთი ახალი მაგალითით
კიდევ განმტკიცდეს,
რაც ცხოვრებაშიც ხშირად სწორედ ამგვარად ხდება,
შეყვარებულნი როს ჯერ კიდევ ცინცხლად არიან,
ოდეს იქცევა სიყვარული მათი ლეგენდად
და... როს ცხოვრობენ მირიადგზის ცხოვრებით ისევ...

და ვდუმვართ ჯერაც...
ხოლო გარეთ, — გთხოვ, თუნდაც წამით,
უსმინე, — რაღაც ფრინველები (თითოეული
თითქოს ზამბარით სამართავი რამ სათამაშო)
იმავე სიმღერას იმღერიან, მათი ზამბარა...
ეშვება, ისევ იმართება და თითქოს ისევ
იმავე სიმღერას იმეორებს მხოლოდ იმიტომ,
ნადუდღუნარი რომ უარპყოს სევდიან ქარის



(ამ ძველთაძველი სკეპტიკოსის), რომელიც ახლაც
ასე დუდლუნებს: „ყოველივე წარმავალი“.

და „ჭეშმარიტად“ — თუნდ იმ ერთი მიზეზის გამო,
რომ 1×1 არის 1 და არა 2!..

რა კარგი არის,
ქარის ენა შენ რომ არ გესმის,
ქვეყნად შენ ახლა ხარ ყველაზე დიდი მორწმუნე
და აჰა, რწმენას მეც ვიცვლი და შენსკენ მოვილტვი
და მეც შენსავით შენი სავსე რწმენით ვივსები.

რა კარგი არის,
„შენი ვარო“ რომ მეუბნები
და არც კი გესმის,
მხოლოდ „ჩემი“ რომ არ ხარ სულაც,
არამედ კიდევ...

ერთეული არის საჭირო!

არამედ კიდევ... ერთეული არის საჭირო,
ბედნიერებით თუ სისუსტით მარად შობადი
თავბრუდახვევის ნულისათვის! ნულისებური
ჩვენი თავისთვის!
ნულის მსგავსი
ჩვენი გულისთვის!
იმ ცხოვრებისთვის, ნულისაკენ რომ მიიქცევა
და მთლად გაძაგრულს თავი მაინც ყინჩად უჭირავს!

ერთეულია,
ერთეული კიდევ საჭირო,
იმ ვებერთელა ნულისათვის, ეს დედამიწა
ბრუნვით რომ ხაზავს...

ხოლო ახლა, — რა კარგი არის, —
თავს მხოლოდ „ჩემად“ რომ აცხადებ!
და არც კი ხვდები
მხოლოდ „ჩემი“ რომ არ ხარ სულაც,
„ჩემი“ კი არ ხარ,
არამედ თავათ, თავათ შენც ხარ ის... ერთეული!



თარგმნა ნოდარ ღუმბაძემ

მოქმედი პირნი:

- | | |
|--------------------------|-----------------------|
| ალა — მედიცინის და | ლორა — სერგეის მეუღლე |
| მუსა — ალას მამა | რაუფ შაბანოვი — ექიმი |
| მარიამი — ალას დედა | ვულამი |
| ნარმინა — ალას ქალიშვილი | პირველი მეზობელი |
| ჯაური — ნარმინას მეუღლე | მეორე მეზობელი |
| სერგეი უგოლკოვი — ექიმი | |

მოქმედების ადგილი — ბ ა ქ ა

პირველი მოქმედება

დაბალჭერიანი ბინა ბაქოს ერთ-ერთ მიკრორაიონში. ფანჯრიდან გაჩირაღდებული ღამის ქალაქი და ზღვის ყურე მოჩანს.

ხანში შესული, ჩასუქებული მოხუცი ალა-ხანუმ, ავადმყოფობისაგან დახუთულ ფეხებს ძლივს რომ ამოძრავებს, სავარძელში ჩამჯდარა და ტელეფონით საუბრობს.

ალა — მადლობელი ვარ, გენაცვალე, მადლობელი, თუ გინდა დამალაპარაკე... გმადლობთ, დიდი მადლობა, აჰ, იმასაც უნდა რამე მითხრას? აბა დამალაპარაკე... როგორ ხარ, შვილო? შენც მილოცავ?

(კარებზე ზარი ირეკება)

(ფოსტალიონის ხმა — ალა ხანუმ! კიდევ სამი დეპეშაა!)

ალა — რა ამბავია?

(ფოსტალიონის ხმა — აბა როგორ გინდა, ალა-ხანუმ, ასეთ დროს დეპეშა მოვა, მაშ?!..)

(მეორე ხმა ქუჩის მხრიდან — ალა, ალა!)

ალა — რომელი ხარ?

(ხმა — გულამი ვარ, ნახევარი საათია აივანზე გადმომდგარი ვლრიალებ. მოდი ერთი, თუ ქალი ხარ, ფანჯარასთან. ალა ფანჯარასთან მიდის — მოგილოცავ, ჩემო ალა, მთელი ჩვენი მეზობლების, სახლის და მთელი უბნის სახელით).

ალა — მთელი ქალაქის სახელით მომილოცე ბარემ და დაამთავრე. დიდი მადლობა. (ტელეფონთან მიდის) ალო... (ყურმილს დებს) საწყალი ბიჭი! წესიერად ვერც კი დაველაპარაკე (დებეშებს არჩევს). „სულითა და გულით გილოცავთ ძვირფასო ალა-ხანუმ და მხურვალედ მოგესალმებით სპირიდონოვების ოჯახი“. ნეტავი ვინ არიან? რა მახსოვს, ალბათ ან ქმარს ვწამლობდი ან ცოლს, რა მნიშვნელობა აქვს. კიდევ ერთი დებეშა: „თქვენთან ერთად ვზეიმობთ თქვენს ჯილდოს ალა-ხანუმ“. — ვზეიმობ მართალია, ამქვეყნად კი რაღაც დათვლილი დღეებიღა დამრჩენია. მერე რა, რომ მხოლოდ ექთანი ვარ, განა ვერ ვხედავ რაცა მჭირს. ამაზე საშინელება არაფერია, როცა ადამიანმა თვითონ იცის, რაცა სჭირს. ნეტავი ნარმინა მაინც არ მიხვდებოდეს (სავარძელში ჯდება, მაგიდის ნათურას ანთებს). შრომის წითელი დროშის ორდენი... მაშინ კი, ომიდან რომ დავბრუნდი შინ სრულიად ახალგაზრდა, მხოლოდ ერთი მედალი მქონდა „საბრძოლო დამსახურებისათვის“. მთელი ოცდახუთი წელი გავიდა მას შემდეგ და მაინც ყველაფერი გუშინდელივით მახსოვს (დგება, სამზარეულოს კართან მიდის). მახსოვს, დიდხანს ვიდებქი ჩვენი სახლის კართან, შემდეგ კარს მხარი ვკარი და შინ შევედი. ისე ჩუმად შევედი, ჩვენებს არც კი შევუმჩინევივარ... (კარს აღებს და სამზარეულოში გადის).

სამზარეულოს ნაცვლად სცენაზე იატფასიანი ავეჯით გაწყობილ დიდ ოთახს ვხედავთ ბაქოს ერთ-ერთ ძველ უბანში ბაილოვზე. ოთახში სხედან ალას მამა მუსა და დედა მარიამი. შემოდის სამხედრო ტანსაცმელში გამოწყობილი და მხრებზე ზურგჩანთამოკიდებული გამხდარი გოგონა.

მარიამი — (მაგიდას ალაგებს) — უგემური იყო არა? ამ ბოლო ხანებში სულ ვეღარ ვაშუადებ გემრიელ კერძებს.

მუსა — საიდან დაამზადებ, დალოცვილო, დასამზადებელი არაფერი იშოვება და... მაგრამ არა უშავს, ხომ ხედავ, ომს როგორც იქნა ბოლო მოეღო და ალბათ საჭმელიც გამოჩნდება.

მარიამი — საწარმოს მაინც არ დავტოვებ.

მუსა — რას ქვია არ დავტოვებ, გაზანფარი ხომ დაბრუნდა, შენ კი მის ადგილს იკავებ.

მარიამი — იმხელა საწარმოში ჩემთვის ადგილი ყოველთვის მოიძებნება (სდუმს). სხვანაირად არ შემიძლია, მივეჩვიე. ცოცხისა და ჭურჭლის გარდა სხვა რამეც ხომ მინდა.

მუსა — მალე გოგო დავგიბრუნდება ფრონტიდან, შვილიშვილები გვეყოლება და საქმეც გაგიჩნდება.

მარიამი — ნუ გეშინია, შვილიშვილებსაც მოგუვლი, დღედაღამე ხომ არ ვიმუშავებთ.

მუსა — მართალი ხარ, ბევრი ბრუნდება. გუშინ გაზანფარი ჩამოვიდა, ჩვენი მეზობლის სერიოჟაც დაბრუნდა უკვე სამი დღეა.

მარიამი — ამბობენ, სერიოჟა და ალა ერთ დივიზიაში მსახურობდნენო, მხოლოდ სხვადასხვა პოლკში. თავისთან უნდოდა სერიოჟას ალას წაყვანა, ის კი თურმე არ წაყოლია.

მუსა — ყოჩაღ, გოგო! ეგრეც უნდა, აბა ყუდროში თავის შესაფარებლად ხომ არ წასულა ფრონტზე. სხვასავით წინა ხაზზე უნდა გოგოს ყოფნა. ომში პროტექცია მე არ გამიგია.

მარიამი — შენ, კაცო, ქვისაგან ხომ არა ხარ გამოთლილი, ხუთი წელია ერთი ცრემლი არ მინახავს შენს თვალზე.

მუსა — სამაგიეროდ შენი დაღვრილი ცრემლებისაგან კასპიის ზღვა ნაპირზე გადმოვიდა. გამოგიტყდები და ცნობა რომ მოვიდა ალასაგან, „ცოცხალი ვარ და მალე დავბრუნდებიო“, სახლში რომ არ იყავი, ვისარგებლე და ერთი ჭიგრიანად შეც ვიტირე. წასული ამბავია და იმიტომ გიყვები.

მარიამი — „ცოცხალი ვარ, ჯანმრთელი და მალე დავბრუნდები“, ათი დღეა, რაც გვაცნობა, თვითონ კი არა ჩანს.



ალა — აქა ვარ, დედა!

მარიამი — (თეფშები ხელიდან უცვივია) შვილო!

მუსა — ალა?

(ერთმანეთს ეხვევიან)

მარიამი — სიზმარია თუ ცხადი?

მუსა — (ყვირის) ცხადია, მარიამ, ცხადი!

მარიამი — მიჩქმიტეთ, დამარტყით, გამომაფხიზლეთ, ვერაფერი მიგრძნია.

მუსა — შენ როგორ იგრძნობ, დალოცვილო, როცა მომდგარხარ და მე მიჩქმეტ ერთი საათია, წადი, მეზობლებს დაუძახე, ყველას გააგებინე, გოგო დაგვიბრუნდა-თქო.

მარიამი — მოდი, შვილო, კარგად დამენახე, ხომ არ მომატყუე წერილში, არც ერთი ჭრილობა არა მაქვსო?

ალა — არც ერთი, არა გჯერა?

მარიამი — წარმოუდგენელია, სასწაული, სულ ჩემი ლოცვების წყალობით.

ალა — მე, დედა, სანიტარულ რაზმში ვიყავი. სანიტარული რაზმი კი წინა ხაზიდან მოშორებულია. ჭრილობა არც ერთი არა მაქვს, მედელი კი მხოლოდ ერთი.

მარიამი — მკერდზე უფრო მეტს ვხედავ.

ალა — ეს ჭილდოებია ქალაქების აღებისათვის: კენიგსბერგი, ბერლინი, ბრადა.

მარიამი — არა, სიზმარში ვარ, შემანჯღრიეთ, გამომაფხიზლეთ!

მუსა — გაგიჟდა დედაკაცი. (ალას) შენ რაღა მოგივიდა, რა კუთხეში მიყუყულხარ?

ალა — თქვენ გათვალისწინებთ.

მუსა — სინათლეზე გამოდი, კარგად შეგხედოთ.

(ალა ყოყმანობს, მერე შუა ოთახში გამოდის. მშობლებისაკენ მიბრუნდება.)

მარიამი — როგორ გასუქებულხარ... თუ მეჩვენება?

ალა — არა, დედა, სულაც არ გავსუქებულვარ.

მუსა — რას ამბობ, ძალიან გასუქებულხარ!

(პაუზა)

ალა — (გამომწვევად) არ გავსუქებულვარ... აი, მხოლოდ მუცელი...

მარიამი — (ხელებს შლის დაბნეულობისაგან) ბა... ბა... ბავშვი?

(ხანგრძლივი პაუზა.)

მუსა — დაიცადე, მარიამ, მამა ვინ არის? (ალა სდუმს)

მუსა — კანონიერია? (ალა სდუმს).

მუსა — მიპასუხე, კანონიერია? (ალა ისევ დუმს). ხმა ამოიღე! მსმენია შენისთანებზეც, მაგრამ რას წარმოვიდგენდი, ჩემი შვილიც... (კიდევ უფრო ხმამაღლა) მარიამ, ქული და ქურქი გამომიტანე!

მარიამი — ვერ... ვერ გავიგე?

მუსა — (ყვირის) ქული და ქურქი-მეთქი!

მარიამი — სად მიდიხარ, შენი ცვლის დრო უკვე დამთავრდა...

მუსა — კიდევ გაგიმეორო?

(დაბნეულ მარიამს ქული და ქურქი შემოაქვს)

მარიამი — სად მიდიხარ, კაცო, ამ შუალამისას?!

მუსა — (გაყინული ხმით) ფრონტიდან დაბრუნებულ ჯარისკაცს, ისიც მედლებიანს, ქუჩაში ვერ გავაგდე. ჯობს თვითონ წავიდე (მიდის. ალა ხმას არ იღებს).

მარიამი — (ტახტზე ეშვება) ეს რა დღე გამითენდა, ნეტავი მიწა გამსკდომოდა და... ხმა ამოიღე, ალა, თქვი, რა ამბავია ჩვენს თავს.

ალა — (გაბზარული ხმით) რა უნდა ვთქვა, დედა!

მარიამი — მაშ მე რაღა ვთქვა, რა ვუთხრა მეზობლებს, ნათესავებს, სამსახურში რა ვთქვა, პა?


ალა — რაც გინდა თქვი, ჩემთვის სულ ერთია.

მარიამი — შენთვის თუ სულ ერთია, ბავშვმა რა დააშავა?! იმას რას ეტყვი?

ალა — ვეტყვი რამეს, მესმის, დედა, ყველაფერი კარგად მესმის.

(სკამზე ჯდება და პირისახეს ხელებით იფარავს)

მარიამი — მე მაინც მითხარი, ალა, სიმართლე, არაფერი დამიმალე (დგება, წელში სწორდება)



ბა). ახლა ჩემი ცვლა იწყება, დამავიანდა კიდეც, წავალ, შემცვლელს ვთხოვ, დღეს ჩემ მაგივრად იმუშაოს (გაღის).

ცოტა ხნის შემდეგ კარს მიღმა რაღაც ხმაური ისმის.

სერბი — (ჯერ მხოლოდ იმისი ხმა ისმის) მასპინძელო, სტუმარს არ მიიღებ? უყურე, კარიც კი გაუღიათ ჩემს შესახვედრად. დეიდა მარიამ, ძია მუსა, სად ხართ? (პასუხს არ უცდის ისე შემოდის ოთახში, ტანთ სამხედრო ფორმა აცვია). ვერავის ვხედავ. ეს სამხედრო ვინლაა, ამ შუა ზეიმის დროს მაგიდას რომ მიჯდომია და ცხვირ-პირი ჩამოსტირის?

ალა — მე ვარ, სერიოჟკა.

სერბი — ალკა! შენი ჭირიმე! მოდი გაკოცო კიდეც ერთხელ (კოცნის). ყოჩაღ, როდის ჩამოხვედი?

ალა — ორი საათის წინ.

სერბი — თქვენები არ ვინახავს?

ალა — ვნახე, ცვლა დაეწყოთ და საწარმოში გაცვივდნენ.

სერბი — იცოცხლე, ეგენი მუშაობენ, მუხლი არ ჩაუხრიათ ხუთი წელია. შენ კი ისევ ის ალკა ხარ, წინა მერსზე რომ იჯექი, სულ არ შეცვლილხარ.

ალა — შენ კი ისევ ისეთი გატლექილი ხარ, თანაც სულ სიგანეში წასულხარ.

სერბი — რომ მიუბრუნებ, სულ ჯარისკაცის ულუფით ვარ გასუქებული. შევიდოდი თუ არა ახალ ჰოსპიტალში, უპირველეს ყოვლისა კვებით მომარაგების მუშაკებთან ვამყარებდი ურთიერთობას. მზარეულიდან დაწყებული ჭურჭლის მრეცხავებით დამთავრებული ყველა ჩემი უახლოესი მეგობარი ხდებოდა. ჩემსას ხომ მივირთმევდი და მივირთმევდი, შემდეგ სხვა ბიჭებსაც ვეცილებოდი ულუფაში. რას იზამ, ჭამა ყოველთვის მიყვარდა და ჩვეულება, ხომ იცი, რჯულზე უმტკიცესიაო. შენ ის მითხარი, ბოლო დროს სად იბრძოდი?

ალა — უკრაინის პირველ ფრონტზე, შემდეგ ჩეხოსლოვაკიის გავლით ბერლინში და ბოლოს რიბალკოს სატანკო არმიასთან ერთად პრაღაში.

სერბი — მე კი უკანასკნელად მესამე ეშელონში გამამწესეს, იქაურ ჰოსპიტალში ვმუშაობდი. რომ იცოდე, რამდენისთვის ხელ-ფეხი მომიჭრია, რამდენი სულ ნაწილ-ნაწილ ამიკრეფია. ხანდახან სამ მაგიდაზე მეწვნიენ ერთად დაჭრილები და ვიდრე იმ სამს მოვრჩებოდი, ახლები მოჰყავდათ, ოფლი ღვარად ჩამომდიოდა. შენ კი, ჩემო ალკა, დამჯდარხარ და არ ინძრევი, ღვინო თუ არ გემეტება, ჩაი მაინც დამალევიანე.

ალა — ეგ მეც ვიფიქრე, სერიოჟკა, მაგრამ ჯობია ისევ ასე ვიჯდე მაგიდასთან და არ გავინძრე, მეც მშვიდად ვიქნები და შენც ისე წახვალ აქედან, არაფერი გეცოდინება (დგება).

პაუზა

სერბი — გათხოვდი?

ალა — არა.

სერბი — მამა ვინ არის?

ალა — არ არის.

სერბი — შენ ისე ლაპარაკობ, კაცი თუ არ გიცნობს, იფიქრებს, ამას იმდენი ყოლია, არც კი ახსოვს ბავშვს ვისგან ელოდებაო.

ალა — (აწყვეტინებს) ჩათვალე, რომ მიუხედავად შენი ჩინისა, ერთი სილა უკვე მიიღე ჩემგან მაგისათვის.

სერბი — ჩავთვალე. აბა ერთი დაჯექი და მომიყევი რაშია საქმე.

ალა — იმ ბიჭს რაუფი ერქვა. ბაქოელი იყო, მაგრამ მოსკოვში სწავლობდა, ფრონტზეც იქიდან გაიწვიეს. შენსავით მესამე რანგის ექიმად ითვლებოდა. მე და კიდეც ერთი ფერშალი მის განკარგულებაში ვიყავით.

სერბი — ჰოდა, ერთი ნახვით შეგიყვარდათ არა ერთმანეთი?

ალა — შენ წარმოიდგინე, არა. დიდხანს გვიახლოვდებოდა, ჩუმად გვეპარებოდა და მერე უცბად ერთბაშად იფეთქა... ერთი ღამე გავათიეთ მხოლოდ ერთად ჩებეთში, მდინარის პირას პატარა ქოხში, დილით კი მოწინავეზე გაიწვიეს, მდინარე უნდა

გადაელახათ. ორი დღის შემდეგ ცნობა მოვიდა, რომ თურმე ნაპირი დანადგომი ყოფილა და ბორანი მთელი რაზმიანად აფეთქებულა. დაღუპულთა გვამები დინებას წაუღია.

სერბი — ჰო... ექიმი ხარ და არ მოგერიდები. მუცელი ვერ მოიშალე?

ალბ — ამის მეტი რაუფისაგან რა დამრჩენია, რომ ისიც მომეშალა, მოვიდა, წავიდა, თავისი კვალი კი ჩემს ცხოვრებაში სამუდამოდ დასტოვა (ჩანთიდან საერთო რვეულს იღებს). აი კიდევ რა დამრჩა მისგან. ეს ჭგუფური სურათი და რვეული მისი ჩანაწერებით, ადიუვანტებით იყო გატაცებული.

სერბი — რითი?

ალბ — ათასნაირი მცენარეულით, ბალახებით, ფესვებით, მისი აზრით სიცოცხლეს რომ უხანგრძლივებს ცოცხალ ორგანიზმს. იგი მათ სტიმულიატორებს ეძახდა.

სერბი — იქნებ მაინც დამალევიყო ჩაი, ყელი გამიშრა (ალა დგება და ჩაის ასხამს). ახლა რას ფიქრობ, რას აპირებ, ვთქვათ და შენი პირქუში მშობლები ბოლოს, როგორც იქნა, შეგირიგდნენ.

ალბ — ეს არ მოხდება. მამაჩემი ყოველ შემთხვევაში არასდროს არ შემირიგდება, ამას სიკვდილამდე არ მიაპატიებს.

სერბი — კარგი, ვთქვათ, შენ დარჩი შერისხული და განკიცხული, იმას რაღა ეშველება?

ალბ — ვის?

სერბი — ვის და შენს შვილს, გოგო იქნება თუ ბიჭი. ბაგაში, ბაღში, სკოლაში ყველგან თავდაპირველად იმას კითხავენ, ვისი ძე თუ ასული ხარო.

ალბ — ამას ბავშვზე აღრე. ალბათ, მე მკითხავენ სამშობლიაროში, როდესაც ბავშვის დაბადების მოწმობის შევსებას დაიწყებენ. არის იქ ასეთი კითხვა: ბავშვის მამის სახელი და გვარი?

სერბი — ჰო... (ჩაის სვამს ბოლომდე) რა ჩაია, ბიჭო! არც კი გრცხვენია ამას რომ მასმევე, სად შოულობთ, თუ იცი? (ბოლთას სცემს) ისე კი კარგად უღერს, არა, „მარტონელა დედა“, შეშურდება კაცს, რამე რომ იყოს.

ალბ — შენზე უფრო ეგ მე მაწუხებს, ჩემო სეროიუა, მაგრამ გამოსავალი რომ არ არის, რა ვქნა?

სერბი — კიდევ დამისხნი ერთი ჭიქა (რამდენიმე ყლუპით სვამს მთელ ჩაის, უცებ ჭიქას ფინჯანზე დებს). არის გამოსავალი (გვერდით უჯდება). მე ვარ შენი ქმარი.

ალბ — შენ თავში ხომ არ ყოფილხარ დაჭრილი?

სერბი — არა, ფეხში, ეს კი აზროვნებაზე, როგორც იცი, არ მოქმედებს. მივიღეთ შენს მშობლებთან და ვუთხრათ, რომ ჭერ კიდევ ომამდე გვიყვარდა ერთმანეთი. მერე ფრონტზე შევხვდით და, ერთმანეთს მონატრებულებმა, ფრონტზე ახალგაზრდულ ცდუნებას ვერ გავუძელით, შევცდით და დიდსულოვნად გვაპატიეთ-თქო. ახლა მამის ბიუროში მივდივართ, რათა კანონიერი ხელმოწერით დავადასტუროთ ჩვენი სიყვარული-თქო. ხვალ კი ავდგეთ, წავიდეთ მამის ბიუროში და მართლა მოვაწეროთ ხელი.

ალბ — მერე?

სერბი — რა მერე, მერე გაჩნდება ბავშვი და სწორედ იქ, სადაც შენ ბავშვის მამის ვინაობა უნდა ჩაგეწერა, ჩაწერ: რენა სერგეი ვაზი ან რუფატ სერგეი ოღლის, უგაღკოვა ან უგაღკოვს.

ალბ — კი მაგრამ, რომ არ მიყვარხარ?

სერბი — სამაგიეროდ მე ვგოყდები შენი სიყვარულით, რომეო ვარ, მაჯუნსი, ტახირი, მეფეთედორე და არ მახსოვს, კიდევ ვინ. იყავი შენ შენთვის აქ და მე წავალ სუმჰაიტში, ახალი ქალაქი შენდება ოცდაათ კილომეტრზე აქედან. იქ მთავაზობენ ექიმის ადგილს.


ალბ — მერე, მერე რა იქნება?

სერბი — რით ველარ გაგაგებინე, ქალო, რა იქნება და არაფერი. გავიცნობ იქ ვინმე ჯულიეტას, გაგეყრები შენ და იმას შევირთავ ცოლად, ბავშვისთვის კი ყოველთვის ნამდვილი მამა ვიქნები.

ალბ — იქნები, თუ დაგთანხმდა შენი ჯულიეტა.

სერბი — არ დამთანხმდება და მე მისი რომეო აღარ ვიქნები. რა დაგემართა?

ალბ — ყელი გამიშრა, მოულოდნელობისაგან ლამის დავიხრჩო.



სერბი — დალიე ეს საშინელება და გაგივლის.

ალა — არ მშველის. საოცარია, ასე თუ ისე მაინც უცხო ადამიანი...

სერბი — ეს მე ვარ უცხო ადამიანი? (ორივე ხელით ალას პირისახეს თავისკენ შემოუტრიალებს) არა გრცხვენია? განა მე და შენ ერთად არ გამოვიარეთ ომის ქარტეხილი, ცრემლისა და სისხლის ნიაღვრები? განა ერთნაირად არ გვშიოდა, გვციოდა და გვწყუროდა? აი ხედავ, ძმისშვილს საყვირი ჩამოვუტანე. ამას ჩვენი შვილისათვის შევინახავ, დაე, ჩაჰბეროს შიგ და შეატყობინოს ქვეყანას, რომ არსებობს (საყვირზე უკრავს).

ალა — (ჩუმად) სერიოჟა, გაკოცებ რა?

სერბი — მეც გაკოცებ! (კოცნიან ერთმანეთს). კარგი გეყოფა, ნუ თხლიპინებ. აბა, ასწი თავი (მარიამი შემოდის.)

მარიამი — ძლივს არ დავითანხმე შემცვლელი, დღეს ჩემ მაგივრად იმუშაოს (თავსაფარს იხდის). სერიოჟა?

სერბი — გამარჯობა, დეიდა მარიამ!

მარიამი — გამარჯობა, შვილო. შინ მშვიდობით დაბრუნებას და გამარჯვებას მოგილოცავ.

სერბი — თქვენთვისაც მომილოცნია, დეიდა მარიამ. ამ გამარჯვებაში ჩვენზე ნაკლები წვლილი არც თქვენ მიგიძღვით. ბევრი მსმენია თქვენს შემართებაზე. იქ, ფრონტზე საკუთარი თვალთ ვხედავდი, რომ ათიდან შვიდი ტანკი ჩვენებური ბაქოს საწვავით მიდიოდა შეტევაზე. ეს კი. აბა. ვისი დამსახურებაა, თუ არა თქვენი?!

მარიამი — გაიხარე, შვილო! (მაგიდასთან მიდის) ეს საყვირი რად გინდა, ბავშვი ხომ არა ხარ?

სერბი — საჩუქარია.

მარიამი — ვისი, ჩემი თუ მუსასი?

სერბი — ჩემი მომავალი შვილის.

მარიამი — ცოლი შეირთე? გუშინწინ დედაშენი შემხვდა, არაფერი უთქვამს.

სერბი — იმან ჯერ არ იცის. აბა, დაბრძანდით, დეიდა მარიამ, და მაჯა მაჩვენეთ.

მარიამი — ვითომ რატომ, რა მჭირს შენი სამკურნალო.

სერბი — მაჯისცემა მშვენიერი გაქვთ, ოღონდ ბევრი არ უნდა ინერვიულოთ. ნუ გაიკვირებთ, დეიდა მარიამ, რასაც ახლა გეტყვით: მე თქვენს ქალიშვილზე ვქორწინდები.

მარიამი — ალაზე? ალა ხომ...

სერბი — რა ვუყოთ. მერე, ცოტა ავჩქარდით, უნდა გვაპატიოთ. მთელი ომი ერთად გამოვიარეთ, ვიცადეთ, ვიცადეთ, მალე დამთავრდება-თქო ეს ოხერი ომი და... მოკლედ, ველარ მოვითმინეთ. ახლა რამდენიც არ უნდა ატრიალოთ, ამ საქმეს მაინც აღარაფერი ეშველება. ცუდად ხომ არ ხართ, დეიდა მარიამ?...

მარიამი — განაგრძე...

სერბი — უკვე დავამთავრე, თქვენ კი ცუდად ხართ, დეიდა მარიამ, ალა, ნემსი!

მარიამი — თავი დამანებე, რად მინდა ნემსი. ჩვენებურებს გული ან მაგრად უცემთ ან სამუდამოდ აქვთ გაჩერებული.

სერბი — თქვენს გულს გაჩერების არავითარი საბაბი არ გააჩნია. ჩვენ. ჩვენი ცოდვები ვალდარეთ, შეცდომების გამოსწორების დრო დადგა.

მარიამი — როგორ?

სერბი — ჩვეულებრივად, იურისპრუდენციაში ასეთ შემთხვევას „დე'ფაქტოს“ უწოდებენ. ხვალვე გავაფრთხილებთ დედაჩემს და ძია მუსას და მამის ბიუროში წავალთ ხელის მოსაწერად. ქორწილის გადახდა ახლა ცოტა უხერხულია. ამიტომ ჩვენ ხუთნი მოვუსხდებით მაგიდას და დავლოცავთ ერთმანეთს.

მარიამი — (ალას) შენ რაღას გაჩუმებულხარ?

ალა — დუმილი თანხმობის ნიშანია.

მარიამი — თვითონ რატომ არ მითხარი ყველაფერი.

ალა — რა ვიცი, ვიფიქრე, ჯობია სერიოჟამ უთხრას-მეთქი.

მარიამი — ცხოვრებას სად აპირებთ, ჩვენთან თუ თქვენთან?

სერბი — ჯერ სუმშაიტში წავალ, იქ ბინას მივიღებ და მერე ჩამოვალ. დეიდა მარიამ, თქვენ მართლა ცუდად ხომ არა ხართ? ხელები გიკანკალებთ, სახეზეც გაფითრდით.

მარიამი — მართლა? (მწარედ) ამაზე ვოცნებობდი? მალე თქვენი შვილის ქორწილში გვექეფოსო, ხალხი შეუბნებოდა. მეც სულ თვალწინ მედგა ალას ნიშნობის დღე აი, მოვლენ ვაჟის მშობლები, ქალის ხელს გვთხოვენ, მერე ჩვენ მივალთ მათთან და...

სერგეი — ეჰ, დეიდა მარიამ, ეგეთი ოცნებები დაუმსხვრევია ომს ხალხისათვის? რა მნიშვნელობა აქვს, ხალხი რას იტყვის, მთავარია მე და ალას ერთმანეთი გვიყვარს და სულ მალე, აი, ამ ოთახში პატარა ჩაპუნტულეებული გოგონა ან ბიჭი იბაჯბაჯებს საყვირით ხელში და ყურებს გამოგიყრუებთ (საყვირზე უკრავს). მერე ბებია მოჰყვება ყვირილს: „კარგი, გააჩუმე ეგ ოხერი, გეყო“.

მარიამი — კარგი, სერგეი, გვეყო ლაზღანდარობა. შენ რა იცი, რა საუბარი მეღის მუსასთან.

სერგეი — კარგი, ბატონო, მე წავალ, (ალას) შენ კი ეგ რვეული მომეცი, თვალს გადავაფლავებ. (რვეულს იღებს, ქუდს იხურავს) ნება მომეცით გამოგეთხოვოთ. როდის მიბრძანებთ, რომ კვლავ გეახლოთ?

მარიამი — ხვალ საღამოს, დედაშენის წამოყვანა არ დაგავიწყდეს.

სერგეი — არა, ბატონო, კარგად ბრძანდებოდეთ. ალა, არ მოიწყინო.

ალა — ნახვამდის, სერგეი.

სერგეი მარიამს და ალას ემშვიდობება და გადის. სინათლე ქრება, შემდეგ ისევ ინთება, სცენაზე ვხედავთ, ბაილოვზე კულტურის ბაღის წინ პატარა სკვერში ზის ლორა, შემოდის ორი ნასვამი ახალგაზრდა: პირველი — ერთი ახმახი ვინმე გიტარით და მეორე — მიღეული ბიჭი მანდოლინით ხელში. აქეთ-იქეთ მოუსხდებიან.

პირველი — რაზედ მოგიწყენია, გენაცვალე, გინდა ახლავე გაგამხიარულო?

მეორე — მარტო რაზედ მოსულხარ, ამხანაგი ვერ წამოიყვანე, ახლა ჩვენ შორის ერთ-ერთი ზედმეტია.

პირველი — ზედმეტი სწორედ შენა ხარ და ეგ არის. ხომ წამოხვალ ჩემთან ერთად, გენაცვალე? გინდა გიმღერო?

მეორე — (მანდოლინას სიმებს ჩამოჰკრავს) „Темная ночь“...

პირველი — გაჩუმდი! (ლორა ფეხზე წამოდგომას ცდილობს) აბა, აბა, ადგილიდან ფეხი არ მოიცვალათ! ეგ ახლა აქედან მოუსვამს და ჩვენ მარტო დავრჩებით. შენგან, გენაცვალე, ყველანაირ შეკვეთას ვიღებ, რა გინდა, ბერნესი? ახლავე... (შემოდის სერგეი).

სერგეი — აბა! სმენა! (ახალგაზრდები დგებიან) მომიახლოვდი! ზურგისაკენ, მწყობრი ნაბიჯით იარ! (ახალგაზრდები უხმოდ გადიან). ლორა, მაპატიე. ტრამვაის გაჩერებიდან გიჟივით მოვრბივარ, სულს ძლივს ვითქვამ.

ლორა — მე კი ნახევარი საათია სკამზე ვზივარ და სუფთა ჰაერით ვტკბები.

სერგეი — კიდევ ერთხელ გთხოვ პატიებას.

ლორა — რას ამბობ, რა გაქვს ჩემი საპატიებელი, პირიქით, დიდი მადლობა, რომ ამ სახელდახელო კონცერტს გადამარჩინე.

სერგეი — კარგი ახლა, ლორა, ნუ მომღეჭი (კოცნის). საყვარელო, ჩემო ერთადერთო.

ლორა — ხელში რა გიჭირავს?

სერგეი — ერთი დაღუპული ექიმის ჩანაწერებია. ტრამვაიში დავიწყე კითხვა და ველარ მოვწყდი.

ლორა — მოგონებებია?


სერგეი — არა, ჩანაწერები ადიუვანტების შესახებ. დიდი ხანია ასეთი რამე მეც მაინტერესებს.

ლორა — ადიუტანტები?!

სერგეი — ადიუვანტები. ამ სიტყვაში მხოლოდ ერთი ბგერაა შეცვლილი, ამ ცვლილებას კი სულ სხვა სამყაროში გადავყავართ. იმ სამყაროში, რომელიც საოცრად შორსაა შენგან, მომავალ სამთო ქიმიკოსისაგან, და ამ სამყაროს მედიცინა ჰქვია.

ლორა — მართალი ხარ, მედიცინაში არაფერი გამეგება იმის გარდა, რომ გაციების შემთხვევაში ასპირინი უნდა დალიო.

სერგეი — უახლოეს მომავალში კი ასპირინი შესაძლოა სრულიადაც აღარ იყოს საჭირო. მალე დაავადებებთან ბრძოლის ნაცვლად ორგანიზმის სასიცოცხლო ძალთა შე-



მაფერხებელ პირველად მიწეზებს დაუწყებენ მკურნალობას. ამისათვის მთელი პოლკებია საჭირო, დივიზიები, ამ დივიზიებს კი — სტიმულიატორები ეწოდება.

ლორა — დაღუპული ექიმი ყველაფერ ამას იკვლევდა?

სერბი — მას მხოლოდ დაუწყია გამოკვლევა, მე გავაგრძელებ. აქ შესანიშნავი საძიარველია ჩაყრილი, გესმის?

ლორა — მესმის ის, რაც მედიცინაში ჩემი შეზღუდული ცოდნის ფარგლებში ეტევა.

სერბი — უკვე გაგაღიზიანე, არა?

ლორა — რა გასაკვირია. (გამომწვევად) ამდენი ხანია ერთმანეთი არ გვინახავს და იმის ნაცვლად კინოში მაინც წამიყვანოს, საათნახევარი მალოდინებს ბაღში, ხოლო შემდეგ სამეცნიერო-პოპულარულ ლექციას მიკითხავს სამედიცინო თემაზე.

სერბი — თანაც მოსაწყენ ლექციას, არა?

ლორა — რატომ მოსაწყენს, საკმაოდ საინტერესოსაც, მაგრამ ამ შემთხვევაში სრულიად უადგილოს. ჩემთვის უფრო საინტერესო იქნებოდა დღეს სიყვარულზე გელაპარაკა, გეკოცნა თუნდაც, მაგრამ ჩირვით ხარ გამომხმარი და მეტს შენგან რას უნდა ველოდე.

სერბი — ჩირიცა ხარ და მეტიც, მე არ ვიცი? გაკოცო კი არა და თითი რომ დაგაკარო, კივილით დააქცევ აქაურობას.

ლორა — ეს ყოველი შემთხვევისათვის, სინამდვილეში კი, როცა ვკივი, გულში ვფიქრობ, ნეტავი ისე მაგრად მომიჭერდეს ხელს, მერე მთელი დღე ძვლებს ტკაცატკუცი გაჭქონდეთ-მეთქი.

სერბი — უყურე, თურმე ბიოქიმიკოსები რა მგრძნობიარენი ყოფილან?

ლორა — ექიმები კი ცივი რაციონალისტები.

სერბი — ახლავე გიჩვენებ ჩემს ცივ რაციონალიზმს (წელზე ეხვევა, სკამზე გადააწვენს და დიდხანს კოცნის).

ლორა — დავიხრჩვი!

სერბი — უნდა დაგახრჩო!

ლორა — ტუჩები მეტკინა, გამიშვი!

სერბი — (ხელს უშეებს) ძალიან მიყვარხარ, ლორა, ამ ტორებით ვერც კი მიგახვედრებ, როგორ მიყვარხარ. მიყვარხარ და მჭერა შენი.

ლორა — მეც მჭერა.

სერბი — ვიცი, რომ გჭერა და სწორედ ამან გამაბედინა ის, რასაც რწმენის გარეშე ვერასოდეს გავბედავდი... ცოლი შევირთე...

ლორა — (მოულოდნელობისაგან შეხტება) შენ ხომ არ...

სერბი — ალა შევირთე, მეზობლის გოგონა.

ლორა — სერგეი, შენ მთვრალი ხომ არა ხარ?!

სერბი — წვეთი არ დამიღევია.

ლორა — აბა მაშ გაგიჟდი?

სერბი — სრულ ჭკუაზე ვარ.

ლორა — მაშინ მე ავურიე?!

სერბი — ნუ გეშინია, არც შენ აგირევია და არც მე ვარ მთვრალი, აი, ის ორი, აქეთ რომ მოხანცალდებენ, მთვრალები არიან, ახლა მაგათთან საუბრის თავი არა მაქვს, წამო, ხეივანში გავისეირნოთ (დაბნეულ ლორას ხელკავს უკეთებს და მიდიან. შემოდის ის ორი მთვრალი ახალგაზრდა გიტარით და მანდოლინით).

პირველი — წახულან, ბიჭო, თორემ მაგას ვაჩვენებდი, როგორ უნდა „ზურგისაკენ! ნაბიჯით იარ!“ მეორე ბოთლის შემდეგ მაიორი და გენერალი აღარ ვიცი მე, ყველა ფეხებზე ბჟილია.

მეორე — (მისავათებული ხმით) მეორე ბოთლის მერე ძილია კარგი.

პირველი — ხომ არ გაგიჟდი, კაცს ფული დამიხარჯავს, დავმთვრალვარ და ლოგინში ჩავწვე? ახლა მე სიმღერა მინდა, ხალხი უნდა გავამხიარულო.

მეორე — წამო რა, სახლში წავიდეთ.

პირველი — იმდერე! (გიტარას ჩამოჰკრავს).

მანდოლინაც სუსტად წაიწრიპინებს, რასაც ორი მთვრალი კაცის საშინელი ბლავილი მოჰყვება.

მეორე — არავინ მოდის მოსასმენად.

პირველი — იმღერე და მოვლენ!

(ისევ მღერიან. სცენის იქით მილიციელის სასტვენის ხმა მოისმის. მთვრალეები თავქუდმოგლეჯილი გარბიან, აკაციის ხესთან სერგეი და ლორა გამოჩნდებიან, სერგეი გაქცეულებს კედლის კიდევ სტვენას ადევნებს.)

სერბეი — ლაწირაკები!

ლორა — ლაწირაკი არა ხარ, ჩაგიდვია პირში თითები ამ გაჭალარავებულ კაცს და უსტვენ-ამდენი მოულოდნელი სიაშოვნებისაგან შეიძლება გული გამისკდეს.

სერბეი — რა მოხდა, ლორა, ბოლოს და ბოლოს?

ლორა — რა მოხდა და ჩვენ ხომ ჩვენი შვილები გვეყოლება?

სერბეი — ესე იგი, მათ კიდევ ერთი და ან ძმა ეყოლებათ, განა რა არის ამაში ცუდი? წარმოიდგინე, ლორა, დიდ ოთახში დიდ ხალიჩაზე სამი მატრაკვეცა ყირაზე გადადის. ჩვენ ყველა ერთნაირად გვეყვარება. ალასა და ჩვენს შვილებს ერთმანეთში არ გავარჩევთ.

ლორა — კარგი, ვთქვათ, დაგიჯერე, რომ ფრონტზე შენ და ალას სხვა თუ არაფერი, რამდენიმე ათასი კილომეტრი მაინც გაშორებდათ და მის დაფხმძიმებაში არავითარი წვლილი არ მიგიძღვის, მაგრამ...

სერბეი — რა მაგრამ?

ლორა — განა ჩვენი მშობლები დაიჯერებენ ამას?

სერბეი — ეს უკვე სხვა საკითხია. მშობლებს როგორმე ავუხსნით, რომ მთავარი სიყვარულია, სიყვარულისას კი აბა რას გაიგებ.

ლორა — კიდევ ერთი...

სერბეი — კიდევ რა?

ლორა — გავა ხანი და შესაძლოა ალას ვინმე შეუყვარდეს...

სერბეი — გამორიცხებულია. ალას ერთხელ უკვე უყვარდა და უკანასკნელად. მისი სიყვარული ბლესტიკის ფსკერზე განისვენებს, ჩეხოსლოვაკიისა და გერმანიის საზღვარზე.

ლორა — ვთქვათ, მოხდა სასწაული და...

სერბეი — მაშინ გამოვა, რომ მე ალა არ მცნობია და მისი ბავშვი სამუდამოდ უნდა აღმოვიყვანოთ ჩვენთან.

ლორა — შენ დარწმუნებული ხარ, რომ მე ამდენს მოგიტმენ?

სერბეი — ფრონტზე წასვლის წინ ისეთი თვალებით შემომცქეროდი, თითქოს მევედრებოდი: უფეხო, უხელო, ბრმა, ყრუ, დაჩეხილი, დამწვარი, გაუბედურებული, სულ ერთია როგორი იქნები, ოღონდ დამიბრუნდიო.

ლორა — მაშინ შენ არ ცდებოდი, სერგეი (ჯდება, მკერდზე მიეკრობა). შენს გულისცემას როცა ვისმენ, ვმშვიდდები. ყველაფერი წარმომედგინა, ყველანაირი მოულოდნელობისათვის ვიყავი მზად, მაგრამ რაც დღეს მითხარი, იმას ვერასოდეს წარმოვიდგენდი. ასეთი რამ მხოლოდ შენ თუ მოგივიდოდა აზრად, თორემ...

სერბეი — ალკა ჩემი ბავშვობის მეგობარია. იმისი უბედურების ამბავს რომ ვისმენდი, თვალწინ სულ ერთი დაუვიწყარი შემთხვევა მედგა: პრუსიაში ჩვენი რაზმი ერთ საკონცენტრაციო ბანაკთან გაჩერდა. ბანაკში მხოლოდ ბავშვები და დარჩენილიყვნენ, უფროსები გერმანელებს აღრე ამოეხოცათ, ესენი კი რაღაც ექსპერიმენტისათვის დაეტოვებინათ. როდესაც ყველაფერი გაირკვა, ჩვენი რაზმის ყოველმა ჯარისკაცმა თვითნებურ ბავშვს გამოუცხადა, რომ დღეიდან იგი მისი მამა იქნებოდა.

ლორა — შესანიშნავი მაგალითია, მაგრამ იმ ჯარისკაცებს შინ აღბათ ლორა არ ელოდათ.

სერბეი — მართალია, ზოგს საერთოდ არ ელოდა არავინ, მაგრამ ბოლოს ხომ მაინც გამოჩნდება ვიღაც...

ლორა — და შენ გგონია, დაუჯერებს...

სერბეი — შენ ხომ დაიჯერე, შენ ხომ გჯერა ჩემი, მე კიდევ შენი?

(სცენაზე ისევ ის ორი მთვრალი შემოდის გიტარით და მანდოლინით)

პირველი — Была бы только ночька, да ночька потемней.

მეორე — Была бы только тройка, да тройка порезвей.

სერგეი ფეხზე დგება, თითებს პირში იწყობს და გრძლად უსტვენს. მთვრალეები გარბიან. სინათლე ქრება.

სერგეის სტვენას ზარის მელოდიური წკარუნი ცვლის. სინათლე ინთება და ჩვენ ისევ მოხუცებული ალას ბინაში ვიმყოფებით. ალა სამზარეულოს კარს აღებს და მისაღებ ოთახში გამოდის.

ბლა — ვინ არის?

(ფოსტალიონის ხმა — ისევ მე ვარ, ალა-ხანუმი!)

ბლა — დებეშაა? (კარს აღებს და ფოსტალიონს დებეშას ართმევს) მადლობელი ვარ, გენაცვალე. (კითხულობს) — „ჩემო ალა, სულითა და გულით გილოცავ ჭილდოს გმირობისათვის“. სერიოჟა, სერიოჟა, აბა რომელი გმირობისათვის? ნარმინასაგან კი ჭერ არაფერი ისმის, თუმცა შესაძლოა ჭერ არც კი იცის: (ზუსტად ნარმინას სურათის წინ ჯდება). ამის შემდეგ კიდევ რამდენი სურათი აქვს გადაღებული, პალტოში, უბალტოოდ, სტადიონზე, ქუჩაში, ზღვის სანაპიროზე, მე კი ამაზე უფრო არც ერთი არ მიყვარს, არც კი ვიცი რატომ, განა ადამიანი ყველა კითხვაზე გაცემს პასუხს, ასე რომ იყოს, სიცოცხლეს აზრი დაეკარგებოდა, მგონი, ისევ ცუდად ვარ... (ტელეფონი რეკავს). ახლავე... (მძიმედ წამოდგება, ისევ სავარძელში ეშვება) ძალიან ცუდად ვარ. (კარებზე რეკავენ) უნდა გავადო. (სინათლე ქრება)

მეორე მოქმედება

მისაღები ოთახი სერგეის ბინაში. თანამედროვე ავეჯის, ტელევიზორის, ტრანზისტორის, მაგნიტოფონისა და სხვა რადიომოწყობილობათა მიხედვით თუ ვიმსჯელებთ, აშკარაა დიდმა დრომ განვლო. ბინას მოუვლელობა ეტყობა: ავეჯი არეულ-დარეულია, კედელზე მუქი ლაქა მოჩანს; ვილაცას სურათი ჩამოუხსნია. ჩანს, აქაურობა დიდი ხანია არავის დაულაგებია. კარის ჭრიალი ისმის. ოთახში ჩემოდნით ხელში შემოდის მხარზე ზურგჩანთამოკიდებული, უკვე სრულიად გაჭაღარავებული სერგეი: ყავისფერი ტყავის მოკლე კურტაკი, სპორტული შარვალი და დასვრილი რეზინის ჩექმები აცვია.

ბარბეი — ლორა, სადა ხარ? (საძინებელში იხედება) არ არის. (სამუშაო ოთახში იხედება) არც აქ. (ტელეფონის ზარის ხმა) ალო! გაგიმარჯოს. ამ წუთას შემოვედი. ჭერ ჩექმებიც არ გამიძვრია. ჩამოგიტანე, აბა სხვა რა მინდოდა იმ ოხერ კოპეტის ქედზე, მისი ხათრით მწვერვალი არ დამიტოვებია ახლომახლო დაუბყრობელი... მუშეც და კიდევ იმდენი სხვა რამ, ჩემოდანი ძლივს დავკეტე... აბა რა, უეჭველად. (ყურმილს დებს) სად დაიკარგა ეს ქალი. რაღა მაინცდამაინც დღეს... (შემოსასვლელში გადის და მალე ისევ უკან ბრუნდება დებეშით ხელში) „9-ში ჩამოვდივარ 19 30 216 რეისით, გკოცნი. სერიოჟა“. ეს დებეშა ლორას არ წაუკითხავს. რადგან კარებში იყო დატოვებული, გუშინწინ გამოვგზავნე, ესე იგი უკვე ორი დღეა შინ არ მოსულა. შეუძლებელია, აშხაბადიდან გუშინწინ დილით თუ გაიგზავნა, სადამოს უკვე ფოსტაში იქნებოდა, ვთქვათ იქ რაღაც გაუგებრობა მოხდა და ერთი დღით შეეკონდა, მაინც, გამოდის, რომ მეორე დღეა სახლში არ არის. ეგებ სამსახურში დამერეკა? (საათზე იყურება) იქ ახლა ადარავინ იქნება (სიგარეტს უკიდებს და ბოლთას სცემს). ალბათ მამამისთანაა ან ალასთან? ახლავე დავრეკავ. (ნომერს კრეფს, ალას ტელეფონი არ პასუხობს)

აღბათ მორიგეობს ამ საღამოს. მამამისთან იქნება, ცუდად გახდებოდა ბერიკაცი და მის მოსაველელად წავიდოდა. დავიბან, გავიბარსავ და იქ მივაკითხავ. (სააბაზანოში შედის).

შემოდის ლორა. საწვიმარს არ იხდის, ისე ჯდება სავარძლის კიდეზე. ბრუნდება სერგეი პირსახოციით ხელში, თმა ჯერ კიდევ სველი აქვს.

სერგეი — ლორა!

ლორა — ჰო, მე ვარ.

სერგეი — სად დაიკარგე? (კოცნის) ლოყა დაგისველე თმით (პირსახოციტ წმენდს ლოყას) მთელი აეროდრომი შემოვირბინე და ვერსად გნახე, მერე მანქანების სადგომთანაც გეძებე, ეგებ იქ იცდის-მეთქი მანქანით, მაგრამ იქაც არ იყავი.

ლორა — (ჯიბიდან მანქანის გასაღებს იღებს და მაგიდაზე დებს) მანქანა გარაჟშია, მთელი და უფნებელი, აი, ჩაიბარე გასაღები.

სერგეი — მანქანაზე არ გელაპარაკები, დღეს პირველად არ დამხვდი ამ ხნის განმავლობაში და შევშინდი, რამე ხომ არ შეემთხვა-მეთქი. მამა როგორ არის, ალა, ნარმინა, ხომ კარგად არიან ყველანი?

ლორა — მამას არა უშავს, ალა ავადმყოფობს, მაგრამ მაინც ფეხზეა, ნარმინა ამას წინათ ვნახე.

სერგეი — ორი დღე სახლში რატომ არ იყავი?

ლორა — რატომ მაინცდამაინც ორი?

სერგეი — გუშინწინ ნამდვილად არ ყოფილხარ, ეს დებეზა კარებში დამხვდა. საწვიმარს რატომ არ იხდი?

ლორა — მალაზიაში ვარ წასასვლელი.

სერგეი — არავითარი მალაზია დღეს არ გამაგონო. ორი თვეა სახლში არ ვყოფილვარ, ძლივს ჩამოვადწიე და მოდი დღეს ნურსად ნუ წახვალ, სულ ჩემთან იყავი. ტელეფონიც კი გამოვრთოთ (ეხვევა). ძალიან მომენატრე, ლორა, ვერც კი წარმოიღვენ, ისე მომენატრე.

ლორა — ისევ დამისველე ლოყები.

სერგეი — მაპატიე, გაიხადე და ახლავე ხალათს და ფოსტლებს მოგიტან.

ლორა — ნუ წუხდები. (დგება). სერგეი, შენ... ვერაფერს ამჩნევ?

სერგეი — რას უნდა ვამჩნევდე? (გარშემო იყურება) მოდილიანის „გოგონას პორტრეტი“ გაქრა კედლიდან. პიანინოზე მამაშენის ნაჩუქარი შანდლები აღარ დევს, არც მაგნიტოფონი ჩანს, კიდეც, კიდეც... რაც წავედი, მას შემდეგ, ეტყობა, ეს ბინა აღარ დალაგებულა.

ლორა — მართალია, ერთი თვეა ამ ბინაში აღარ შემოვსულვარ, თან რამდენიმე საყვარელი ნივთი წავიდე.

სერგეი — (შეცბუნებული დიდხანს ვერ ბრუნდება მისკენ, ბოლოს მოუტრიალდება და შეხედავს) რა თქვი, ლორა?

ლორა — ვერ მიხვდი? (წინ და უკან დადის) ჩემ გარშემო ჩემ გარდა ყველას ნორმალური ქმარი ყავს, ყველას ნორმალურად აქვს ეს ცხოვრება აწყობილი და ნორმალურად აკეთებს საქმეს.

სერგეი — მე რა საქმეს არ ვაკეთებ?

ლორა — მე არ ვიცი, შენ რას აკეთებ. დაძვრები ალბინისტებთან ერთად გაუთავებელ ლაშქრობებში, მწვერვალი აღარ დაგრჩა დაუპყრობელი, ლამეებს სადღაც მიწურებში ათევ, გამოყრუებულ ექიმბაშებთან, რაღაც მცენარეთა ფესვებს ჩიჩქნი დაუსრულებლად და შედეგი არ იქნა და არა ჩანს. ჭირდებოდეს მაინც ვინმეს ეგ შენი უაზრო თავდადება.

სერგეი — ჯერ კიდევ არავინ იცის, რა არის უაზრო და რაა აზრიანი.

ლორა — მე ზუსტად არ მახსოვს, როგორი ეპითეტებით ამკობდა შენს აღმოჩენებს პროფესორი კვანციცი, მაგრამ ის ამბავი, რომ მთელ შენს მოღვაწეობას უბრალოდ „თვალთმაქცობა“ უწოდა, არასოდეს დამავიწყდება.

სერგეი — დადგება დრო და მაგ სახელგანთქმულ ორთოდოქსს შერცხვება თავისივე სიტყვების.

ლორა — თითქმის ყველა შენი თაობის ექიმი უკვე მეცნიერებათა დოქტორი გახდა, ზოგი უკვე პროფესორია.

სერბი — მერე რა, ზოგს უყვარს „ვოლგით“ სრიალი მოსფალტებულ ავტოსტრადებზე, ზოგს კი კლდე-ღრეში ურჩევნია ბორიალი.

ლორა — მერე შედეგი? შედეგი რომ არ არის?

სერბი — ჯერ ეს ერთი, რომ შედეგი აუცილებლად იქნება, მოწინააღმდეგეთა გარდა ამ ბოლო ხანებში მომხრეებიც გაგვიჩნდა. მეორეც — მსხვერპლის გარეშე შედეგს მაინც ვერ მივიღებთ. იმ ხალხთა თავგანწირვა რომ არა, ვინც ერთ ღროს მხრებზე ფრთებს იბამდა და სამრეკლოდან ძირს ეშვებოდა, დღეს ტუ-104-ით ადღერიდან ბაქოში საათნახევარში ვერ ჩამოვფრინდებოდი.

ლორა — მერედა შენ დარწმუნებული ხარ, რომ იმ თავდადებულ მფრინავთა ცოლები ბედნიერები იყვნენ. მოკლედ, სერგეი, მე დავილაღე, საშინლად დავილაღე (იხდის).

სერბი — რატომ გაიხადე?

ლორა — დამცხა. კიდევ ერთი, გახსოვს, დიდი ხნის წინ ბაილოვზე, ბალში, მეუბნებოდი, ჩვენ სამი შვილი გვეყოლებოდა; ერთი სხვისი და ორი ჩვენი, დასხდებიან დიდ ხალიჩაზე ოთახის შუაგულში და ყირაზე გადავლენო, საყვირზე დაუკრავენო. ბოლოს ისე გამოვიდა, რომ ნარმინას გარდა ჩვენ არავინ გვეყოლია არასოდეს და ეს ბედნიერებაც წილად მხოლოდ მასა ხვდა.

სერბი — ამაზე მეც ბევრს ვფიქრობდი ყოველთვის, მერე და რამდენჯერ გთხოვე, ბავშვი ავიყვანოთ-მეთქი.

ლორა — კიდევ ერთი სხვისი ბავშვი?!

სერბი — სხვისი ბავშვი ჩვენი გახდებოდა.

ლორა — ოღონდაც ნუ დაიწყებ ახლა იმის მტკიცებას, რომ მართალი ხარ და...

სერბი — არაფრის მტკიცებას მე არ ვაპირებ.

ლორა — და შენთან დარჩენასაც ნუ მთხოვ.

სერბი — არა გთხოვ.

ლორა — საძინებელში ჩემოდანი მიღვეს, ჩემი ტანსაცმელი მინდა წავიღო.

სერბი — წაიღე, რაც გინდა, აქ ყველაფერი შენ გეკუთვნის.

ლორა — გმადლობთ, არაფერი არ მჭირდება.

სერბი — არც მე მჭირდება არაფერი. ყველაფერს კარგად შევაფუთინებ, საბარგო მანქანას დავიჭირავებ და...

ლორა — არაფერი არ მჭირდება, სერგეი.

სერბი — მას ყველაფერი აქვს?

ლორა — (საქციელწამხდარი) საიდან იცო მის შესახებ?

სერბი — დაგინახეთ რამდენჯერმე ერთად.

ლორა — და არაფერი არა თქვი?

სერბი — მე შენი მჯეროდა, ლორა.

ლორა — (საძინებელში გადის და ჩემოდანი გამოაქვს) მშვიდობით, სერიოზა, ნუ გამამტყუნებ.

სერბი — არ გამტყუნებ.

ლორა — აქეთ როცა მოვდიოდი, მეგონა, მძიმე საუბარი მელოდა შენთან.

სერბი — ის კი ძალზე გულთბილი აღმოჩნდა, თითქმის სულ ღიმილში და სიცილში ჩატარდა არა?

(იცინის, ლორა სწრაფად გადის ოთახიდან. სერგეი ერთს გაიქნევს თავს და მძიმედ ეშვება სავარძელში. ზარის ხმა ისმის. სერგეი ადგილიდან არ იძვრის. ზარი კიდევ რამდენჯერმე რეკავს. სერგეი ზანტად დგება და გადის. მალე უკან ბრუნდება ვიღაც მამაკაცთან ერთად. ეს სწორედ ის ახალგაზრდა კაცია, რომელსაც პირველ მოქმედებაში „მეორე“ შევარქვით.)

მეორე — ეჭიმი უგოლკოვი ბრძანდებით?


სერბი — დიახ.

მეორე — ეს რასა ჰგავს, ეჭიმო! დღისით, მზისით გინდათ მომატყუოთ, დანაკარგს ვინ ამინაზლაურებს?

სერბი — რა მოხდა, ვინ გატყუებთ? რა დაკარგეთ?

მეორე — ალაბაშზე მოგახსენებთ. ჩემი საწყალი ალაბაში, ვინ გამიცოცხლებს ახლა?

სერბი — მოკვდა?



მეორე — დღეში ათ შაურად მაგისტვის მოგელაპარაკეთ? ძალღი როგორ მოგანდეთ, თქვენ კი....

სერბეი — კი მაგრამ უკეთ რომ იყო?

მეორე — უკეთ იყო და უცებ მოგჭამა ჭირი.

სერბეი — რამდენი გნებავთ?

მეორე — ხუთ თუმნად ასეთი ძალღი მუქთია, მაგრამ რას იზამ, ამაზეც თანახმა ვარ.

სერბეი — თქვენი ძალღი, მართალია, თუმანიც არ ღირდა, მაგრამ ახლა თქვენთან ვაჭრობის თავი არა მაქვს, გამომართვით ფული და ახლავე მოუსვით აქედან (ფულს აძლევს და დაუბატოებელ სტუმარს კარებამდე აცილებს). მაინც რა უნდა მომხდარიყო? მაინც რა? (ისევ სავარძელზე ემხობა).

შემოდის ალა

ალა — ნარმინას გასაღებით გავაღე, ხომ არ გეძინა?

სერბეი — არა, ისე წამოვწეჭი.

ალა — ღორა სად არის?

სერბეი — წავიდა.

ალა — რას გავხართ, სახლს აღარ ალაგებთ? ჭუჭყს მიაქვს აქაურობა, ვერ იქნა და ველარ ისწავლა შენმა ღორამ დიასახლისობა, სადა გაქვთ ტილოები, მითხარი, და მე დავალაგებ სახლს.

სერბეი — არ გინდა, ღორა წავიდა.

ალა — ჰოდა, მით უკეთესი, მოვა და ბინა დაწკრიანებული დახვდება და ისწავლის, როგორ უნდა სახლის დალაგება. მერე და რა ბინაა? მარტო ფანჯრიდან რომ ხედი მოჩანს, ის რად ღირს, სართულიც რა კარგია! მოკლედ, ღირსი არა ხართ, ნამდვილად ბედმა გაგიღიმათ.

სერბეი — გაგიღიმა არა...

ალა — რა მოხდა, ისევ უსიამოვნება ხომ არ შეგხვდა კლინიკაში.

სერბეი — ამჯერად სახლში. აკი გითხარი, ღორა წავიდა-მეთქი.

ალა — (გაოცებული) წავიდა? სად? ვისთან, როდის?

სერბეი — ეგ უკვე წვრილმანებია, მთავარი ისაა, რომ მას მობეზრდა უბერსპექტივო, გზაბნეულ ექიმთან ცხოვრება, რომლისგანაც, ყველა ბედნიერებასთან ერთად, ბავშვიც არ უჩნდებოდა.

ალა — მერე და მაგას ჰგონია ამ სიბერის დროს გაუჩნდება მაინცდამაინც ბავშვი?

სერბეი — არა მგონია, ვფიქრობ, უბრალოდ მშვიდი ცხოვრება მოენატრა. ჩაჯდება რბილ, თბილ და მოხერხებულ ავტომანქანაში და ისრიალებს მოასფალტებულ გზებზე აღმა-დაღმა.

ალა — მართალი მითხარი, ნარმინა ხომ არ არის რაიმეს მიზეზი?

სერბეი — რას ამბობ, პირიქით, თავისი გულუბრყვილობით და სიმხიარულით სიცოცხლე შემოჰქონდა ჩვენს ცხოვრებაში და უკვე საკმაოდ დაძაბულ ურთიერთობას გვიადვილებდა.

ალა — და მიუხედავად ამისა, ალბათ ნარმინა თავისი გულუბრყვილობით მუდამ ახსენებდა ღორას, რომ საკუთარი შვილები არ ჰყავდა.

სერბეი — არ ვიცი და რომც ვიცოდე, ამას აზრი აღარ აქვს, მე მისი აღარ მჭერა.

ალა — სერგეი, ღორა ჩვენს საიდუმლოს ხომ არ...

სერბეი — არა, არავითარ შემთხვევაში არ იტყვის. ცუდი ქალი არ არის. ეს ჩემთან ცხოვრებაა, ალა, ძნელი, განა ყველაფერში ღორაა დამნაშავე?

ალა — კარგი, სერიოზუა, გეყოფა, გულს ნუ გაიტეხ, რა მოხდა მერე. ეგეთები მომხდარა (გადის და მტერის ტილოები შემოაქვს). უბედურების დროს თურმე, როგორც ვერესაევი ამბობს, პასიურობა და უმოძრაობა ყველაზე მავნებელია. აიღე ახლა ეს ტილოები და მთელი მონღოლებით წმინდე აქაურობა. მიდი, მეც მოგეხმარები.

სერბეი — რა სასაცილო ვინმე ხარ, ალკა.

ალა — მიდი, მიდი, აბა ახლა ეს კარადა გამოვწიოთ.

სერბეი — მძიმეა.

ალა — ნუ გეშინია, არ მოკვდები, მამაკაცი არა ხარ?

სერბეი — (კარადას ექაჩება) აუჰ, ამისი...



ალბ — ახლა აი, ის ჯაგრისი აიღე.

სერბი — დასველება არ უნდა?

ალბ — უკვე დავასველე, ხეხე.

სერბი — ვხეხავ, ეყოფა, თორემ მოვკვდი.

ალბ — არაფერი გიჭირს (უეცრად მაგიდის კიდეც ებჯინება მთელი ძალით).

სერბი — რა მოგდის?

ალბ — ჩქარა სკამი, თორემ დავვარდები.

სერბი — (სასწრაფოდ სკამზე სვამს) თავბრუ ხომ არ დაგეხვა?

ალბ — თავბრუ არა, ამ ბოლო დროს უეცრად რაღაც საშინელი სისუსტე დამივლის ხოლმე ტანში, ხელ-ფეხი მერთმევა და ისეთი გრძნობა მაქვს, თითქოს გულიც უნდა ამერიოსო.

სერბი — ხშირად გემართება ასე?

ალბ — ამ კვირაში უკვე მეორედ მომდის.

სერბი — ანალიზები თუ აიღე?

ალბ — ავიღე და ყველაფერი წესრიგში მაქვს, მხოლოდ ამ სისხლს ვერ გავუგე ვერაფერი, ხან ნორმალურია, ხან არა. აი თუ გინდა ნახე უკანასკნელი პასუხი (ანალიზების პასუხის ფურცელს აწვდის).

სერბი — (გულისყურით კითხულობს) მადა როგორი გაქვს?

ალბ — ცუდი.

სერბი — გულიც გერევა ხოლმე?

ალბ — კი, ხანდახან.

სერბი — დღეიდან ყოველ ხუთ დღეში ერთხელ სისხლის ანალიზს აიღებ და პასუხს მომიტან. ახლა კი ისეთ წამალს დაგაღვევინებ, სულ რომ ქვეყანა შესძრა, ვერსად ვერ იშოვნე. ერთგვარი ფისოვანი ნივთიერებაა, მხოლოდ კლდოვანი მწვერვალების ნაპრაღთა შორის მოუონავს. საუკუნეების განმავლობაში ასეთი ფისოვანი ნივთიერებებით ადამიანები სისუსტეს კურნავდნენ. რა, არ გჯერა? ავიცენას დროს ვერცხლისწყლის ორთქლით მრავალ დაავადებას მკურნალობდნენ, შემდეგ კი ეს ხერხი დავიწყებას მიეცა და მხოლოდ რვა საუკუნის შემდეგ გამოჩნდა ევროპის აფთიაქებში საღვარსენი, რომელიც ძირითადად ვერცხლისწყლის შემცველ ნივთიერებებისაგან შედგებოდა. მედიცინის გზები, მართალია, დიდი და შეუცნობელი, მაგრამ ზოგიერთი საშუალება სულ აქვეა ხოლმე, გვერდით, მხოლოდ თვალის გახელაა საჭირო.

ალბ — მართალი ხარ, სერიოზუა, ადამიანმა რას არ მიაღწია, კოსმოსში გავიდა, მარსისა და ვენერას საიდუმლოებანი ახსნა, ადამიანის ფაქიზ კანქვეშ კი რა ხდება, ჯერაც გამოუცნობია მისთვის. მომეცი ერთი ეგ შენი უკვდავების წამალი, ვნახოთ, რა არის.

სერბი — ახლავე (ჩანთაში იქექება). სულ ახლა ჩამოვიტანე მთებიდან. ძია მუსა ვნახე მართლა ნაბიტდაგში. კაცი ვარო მაგან უნდა თქვას, სამოცდაათს გადააცილა და ჭაბურღილს ვერ მოაცილებ.

ალბ — რას იზამ, დედაჩემის სიკვდილის შემდეგ ეგაა მისთვის სახლიც და კარიც, რამდენს არ ვეძახი, არ ჩამოდის. შენ ისევ ისე მკვახედ გელაპარაკება?

სერბი — მე ვერ გამოვუცვლიდი მაგას ხასიათს, ისევ ისეთი აუღებელი ციხე-სიმაგრეა. არც კი დაინტერესებულა, რა მინდოდა თურქმენეთში, მხოლოდ ნარმინაზე მეკითხებოდა დიდხანს და დაწვრილებით.

ალბ — ნარმინას წერილებსაც წერს ხშირად. ამ ზაფხულს სტუმრად ჩამოვალო შენთან დაპირებია.

სერბი — (ბოლოს და ბოლოს მონახა ჩანთაში, რასაც ეძებდა) დაამრგვალე ბრინჯის ტოლა მარცვლებად და მიიღე სამჯერ დღეში ჭამის შემდეგ.

ალბ — კარგი, ჯანდაბას ჩემი თავი, შეგეწირები შენს ექსპერიმენტებს.

სერბი — ექსპერიმენტისათვის უკეთეს ობიექტს ვიშოვნე როგორმე, ეს წამალი კი სიკეთეს თუ არა, ზიანს მაინც არ მოგიტანს.

ალბ — ზიანს ვინ ჩივის, მიშველიდეს ნეტავ რამეს! აი, უკვე გამიარა, აბა, მაგრა მოუსვი მაგ ტილოს.

სერბი — ვუსვამ, ნარმინა სად არის, ჩემთან არ შემივივლის?

ალბ — როგორ არა, ჯერ არ ჩამოსულა თბილისიდან. სხვათა შორის, ამიერკავკასიის რესპუბლიკების სპარტაკიადაზე მეორე ადგილი აიღო.

სერბეი — ყოჩაღ, როგორც ჩანს, სწორად მირჩევია თავის დროზე, ფიზკულტურას გაჰყვეთ მეთქი. თვითონ ხომ მშვენიერი სპორტსმენია, მალე სხვებს გადასცემს გამოცდილებას. ეჰ, ჩემო ალა, რა სჯობია მთელი ცხოვრება ლამაზი და ჯანმრთელი ხალხის ყურებას.

ალბ — მაგდენ ლაპარაკს გირჩევნია ინსტრუმენტიდან მტვერი გადაწმინდო.

სერბეი — ახლავე.

ალბ — ტელევიზორი ჩართე!

სერბეი — არის.

ალბ — შენ განაგრძე მუშაობა, მე კი ნელ-ნელა სახლისაკენ გავუყვები.

სერბეი — დაიცადე, მანქანას გამოვიყვან გარაჟიდან და წაგიყვან.

ალბ — მეტი საქმე არა მაქვს სწორედ. იცი, კიდევ რამდენ ოჯახში ვარ მისასვლელი? ჯერ ერთ ოჯახში ბავშვს კოტონები უნდა დავაყარო, მერე სხვაგან მოხუცი ქალი მყავს ფილტვების ანთებით დაავადებული და პენიცილინის გაკეთება სჭირდება (დგება). საქმეები კიდევ ბევრი მაქვს, სერგეი. აბა განაგრძე, ცხვირი ნუ ჩამოგიშვია!

სერბეი — როდი ჩამომიშვია.

ალბ — დალახვროს ეშმაკმა, რა ოჯახს შევქმნიდით, ერთმანეთი რომ გვყვარებოდა?

სერბეი — შენ ეგა თქვი, ჩემო ალა.

ალბ — (ამოიოხრებს) ეჰ, ნეტავ ნარმინას მაინც გაუმართლებდეს ცხოვრებაში.

სერბეი — გაუმართლებს.

ალბ — წავედი, კარს ღიად დავტოვებ, ცოტა განიავდეს აქაურობა.

სერბეი — (სავარძელს კედლისაკენ მისწევს) კარგი, დატოვე. (ალა გადის. სერგეი ტილოს მოისვრის, მაგიდიდან თასს აიღებს და იატაკზე დაანარცხებს, შემდეგ სუფრას ჩამოგლეჯს, სავარძელს წიხლს კრავს და ბარბაცით გადის საძინებელში. შემოდის ნარმინა და ზაური).

ნარმინა — რა ამბავია, რა ხდება, კარი ღიაა, გეგონება, ქურდების შემოსევა იყო ახლახან.

ზაური — (ენის ბორძიკით) კი, მაგრამ ტელევიზორიც ქურდებმა ჩართეს?

ნარმინა — ალბათ არა, აბა რაშია საქმე, დეიდა ლორა! მამა!

(სერბეის ხმა — აქ ვარ, საძინებელში, ახლავე გადავიცვამ რამეს და გამოვალ).

ნარმინა — როდის ჩამოხვედი?

სერბეი — ამ დილით.

ნარმინა — სადგურიდან მოვდივარ პირდაპირ. აქ რა ხდება?

სერბეი — არაფერი, დამლაგებელმა დაიწყო დალაგება და უეცრად სახლში გამოუძახეს.

ნარმინა — თასიც იმან გატეხა?

სერბეი — ეშმაკსაც წაუღია ეგ თასი.

ზაური — მე წავალ, შემოსასვლელში დაგელოდები ანდა სამზარეულოში.

ნარმინა — რაო, შეშინდი, ჩემპიონო? მამაკაცობისა და ვაჟკაცობის სიმბოლოვ! კარგი, წადი.

(ზაური გადის. შემოდის სერგეი.)

სერბეი — გამარჯობა, შვილო, მოგილოცავ გამარჯვებას.

ნარმინა — დედამ უკვე გითხრა? მხოლოდ და მხოლოდ მეორე ადგილი ავიღე, დიდი არაფერია.

სერბეი — დედაშენმა სულ ერთი ნაბიჯით გაგასწრო.

ნარმინა — მოხდა რამე?

სერბეი — არა, ისე საქორაოდ შემოირბინა.

ნარმინა — ჩემზე გეჭორავა, არა?


სერბეი — ჰო, შენზე!

ნარმინა — რაო მერე, რა გითხრა?

სერბეი — შენ რატომ აღელდი?

ნარმინა — შენ თვითონ ჩემზე უფრო აღელვებული და დაბნეული ჩანხარ.

სერბეი — შეიძლება, ნამგზავრი ვარ და მეპატიება, ახლავე ყვავს მოვალულებ.



ნარმინა — არა, არა, მერე მე თვითონ მოვალულებ, ახლა... ახლა უნდა მოგელაპარაკო...

სერბი — რაზე უნდა მომელაპარაკო? (თავისაზე ფიქრობს) მომისმინე...

ნარმინა — არა, ჯერ შენ მომისმინე.

სერბი — კარგი, მაშინ ჩამოვსხდეთ გისმენ.

ნარმინა — იცი, მამა... არც კი ვიცი, როგორ დავიწყო... მოკლედ, დგება ხოლმე ღრო... უფ-
რო სწორად, ასაკი, როდესაც...

სერბი — როდესაც ნებით თუ უნებლიეთ შეიღებები დაქორწინებაზე იწყებენ ფიქრს.

ნარმინა — საიდან მიხვდი?

სერბი — არსაიდან, ბიჭი ვინ არის?

ნარმინა — ზაურ გაჩივი. ერთი წლით ჩემზე უფროსი, ჩემპიონი სპორტულ ტანვარჯიშში.

სერბი — გამიგია გაზეთებიდან, სურათიც მინახავს მისი: გრძელთმიანია და წვერმოშვებული...

ნარმინა — არა, წვერი არა, მხოლოდ თმა აქვს ოდნავ გრძელი და ქიღვაშები.

სერბი — ტანზე გამოწკებილი ჭრელი პერანგიც აცვია ალბათ, არა?

ნარმინა — ჰო, მთელ აზერბაიჯანში მაგაზე ჭრელი პერანგი არავის აცვია.

სერბი — კარგი, ნუ გწყინს. მე რა, კი არ ვამტყუნებ. ამ ხნის კაცი ვარ და მაინც მიყვარს უკანასკნელ მოდაზე სიარული. იმსიფართე ყელსახვევი ჩამოვიტანე თურქმენეთიდან, გული გაგისკდება (თავზე ხელს უსვამს). თმის სიგრძეს და პერანგის ფერს რა ჭკუა აქვს, შვილო, მთავარია, ჯანსაღი ტვინი ჰქონდეს და მკერდში კეთილი გული უცემდეს.

ნარმინა — ძალიან კეთილია, მამა, და ჭკვიანიც... საერთოდ მე მგონი, ეგეთი ადამიანი დედამისის ზურგზე არ არის.

სერბი — ღმერთმა ქნას, სულ ასე ფიქრობდეთ ერთმანეთზე.

ნარმინა — სულ ასე ვიფიქრებთ, მამა, სულ ასე. დედასა და დეიდა ლორას შენ უთხარი. კარგი?

სერბი — დედას ვეტყვი, დეიდა ლორას კი ალბათ ვერა. (დუმბილის შემდეგ) წავიდა დეიდა ლორა.

ნარმინა — სად?

სერბი — რა ვიცი, აბა სად მიდიან ქმრებისაგან, მე ხომ წავედი დედაშენისგან, ლორა — ჩემგან...

ნარმინა — ასეც მოვიხდება. (დაბნეული) რა გეშველება ახლა?

სერბი — მთავარია, ნარმინა, გაუძლო ცხოვრების დარტყმებს და არ წაიქცე, ფეხზე წამოდგე და წელში გასწორდე. შემდეგ ყველაფერი თავისით იპოვნის ადგილს.

ნარმინა — იქნებ...

სერბი — რა, დაბრუნდეს?

ნარმინა — იქნებ შენ თვითონ დაბრუნდე დედაჩემთან?

სერბი — არა, შვილო, აი, ხედავ, თასი დამტვრეულია და რამდენიც არ უნდა აწებო, ძველებურ იერს მაინც ვერ დაუბრუნებ. მე და დედაშენმა ბევრი ვიფიქრეთ, სანამ დავშორდებოდით ერთმანეთს და მივხვდით, რომ ჩვენი ერთად ცხოვრება შეუძლებელი იყო.

ნარმინა — ჩემდამი სიყვარულმაც კი არ შეცვალა თქვენი გადაწყვეტილება?

სერბი — შენ, ჩემო ნარმინა, სასაყვედურო არაფერი გაქვს, არც დედის სიყვარული მოგკლებია და არც მამის, მე მგონი, ორივე კარგად გექცეოდით.

ნარმინა — კარგად რომელია, საუკეთესოდ, მე უბრალოდ ყოველთვის მეგონა, რომ დედა და მამა ერთად უნდა ცხოვრობდნენ... მაპატიე, ასე უღროოდ რომ მოგადექი. ზაურთან ერთად.

სერბი — ზაურიც აქ არის?

ნარმინა — კი, სამზარეულოში ზის.

სერბი — მერე და რატომ არ ეძახი?

ნარმინა — ეგებ სხვა ღროს შემოგვევლო, უკეთეს გუნებაზე რომ იქნები.

სერბი — რა გინდა, მშვენიერ გუნებაზე ვარ! დაუძახე.

ნარმინა — ზაურ!

(ზაური შემოდის.)

ზაური — გა... გამარჯობა.

ნარმინა — კუთხეში ნუ იყუხები, აქეთ მოდი. ეს მამაჩემია, ეს ზაური.

სერბი — სასიამოვნოა. (პაუზის შემდეგ) არაყს სვამ?

ზაური — არა, სპორტსმენი ვარ.

სერბი — მერე რა. ერთი ავადმყოფი მყავს, ფეხბურთელია, ყოველი თამაშის შემდეგ როგორც წესი, ქეიფობს ხოლმე. ეწევი?

ზაური — არა, არც ვეწევი, არ შეიძლება.

სერბი — ჰოდა, ახლა გამონაკლისის სახით... სადღაც ერთი ბოთლი „ჰეკ-ჰელი“ უნდა მქონდეს... აი, კონიაკი, ფრანგებმაც კი თქვენს, ასეთი არაფერი დაგვიღვიაო... (ქიქებში ასხამს) ჩემგან თანხმობას ელით? ჰოდა, თანახმა ვარ, ჯანმრთელად იყავით და ბედნიერად, რაც მთავარია.

ნარმინა — ვეცდებით, მამა.

ზაური — გმა... გმადლობთ.

სერბი — ახლა მოვწიოთ!

ზაური — მე არ ვეწევი!

სერბი — გამონაკლისის სახით. უფრო თავისუფლად რომ იგრძნო თავი (სიგარეტს უკიდებს). ალას თვითონ ავუხსნი ყველაფერს, თქვენ მერე მოდით. თქვენთან საკითხავი მეტი არაფერი მაქვს, თუ გინდათ დარჩით, თუ არ გეჩქარებათ სადმე...

ნარმინა — ჰო, კიდევ თეატრში გვინდა მოვასწროთ წასვლა.

სერბი — აბა, გაიქეცით.

ზაური — ნახვამდის, ძია სერგეი.

ნარმინა — ჩემისთან მამა ამქვეყნად არავის არა ჰყავს, ზაურს ენაც კი აღარ ებმის (ნარმინა და ზაური გადიან).

სერგეი მაგიდიდან ბოთლს იღებს. რეკავს კედლის საათი.


სერბი — დრო გადის. ნარმინა თხოვდება... (მაგიდაზე წერილებს არჩევს. ერთ-ერთს ხმამაღლა კითხულობს) „ძვირფასო კოლეგა, ამ რამდენიმე თვის წინ შემთხვევით გავცანი თქვენს ბროშურას აღიუფანტების შესახებ. პირადად მე ამ სფეროში მუშაობას შევადიე ჩემი ახალგაზრდობის საუკეთესო წლები. გამოკვლევათა და ცდათა მეშვეობით, ვფიქრობ, საინტერესო შედეგებსაც მივალწიე და უკვე მიღებული მაქვს გარკვეული კლინიკური სურათი. აშკარაა, ჩვენი აზრთა გაზიარებისა და ძალების გაერთიანების შემთხვევაში მეცნიერება, რომელსაც ვემსახურებით, არაფერს წააგებს. ამასთან ერთად მინდა გეკამათოთ რიგი საკითხების თაობაზე. სწორედ ამ მიზნით, მომავალ შემოდგომაზე შევებულებით ჩამოვდივარ ბაქოში და იმედი მაქვს პირადად შეგხვდებით. დიდი პატივისცემით, ექიმი შაბანოვი. მინსკი, ექსპერიმენტული ჰერონტოლოგიის ინსტიტუტი“. ვაშა, ექიმო შაბანოვ. ვიკამათოთ, ძალიან კარგი, ჩვენს ლაშქარს კიდევ ერთი ჯარისკაცი შემოემატა. დიახაც ლაშქარს. დაე, ნუ გვალაირებს კვანციკი, სტიმულატორების მომხრეთა რიცხვი კი დღითიდღე მატულობს (საძინებელში გადის).

სინათლე ქრება. ინთება. ალას ოთახი. ალა კვლავ საგარძელში ზის. ისმის ტელეფონის გაბმული ზარი. საქალაქთაშორისოა.

ალა — (ძღვეს სისუსტეს) ალო! პრალა? გისმენთ! (მთელ ძალებს იკრებს) ნარმინა, შენ გენაცვალე, რამდენი ხანია გელოდები, ტელეფონს არ მოვცილებივარ... როგორ უნდა ვიყო? ზაური ხომ კარგად არის? ბევრი ისეირნე, დრო ატარე, საჩუქრები არ დამანახო, მაგ კაპიკებით გაერთეთ და დრო ატარეთ. ჩეხეთში რომ იმოგზაურებ, ბლესტიკაში წადი, პატარა სოფელია მდინარის პირას... მდინარესაც ბლესტიკა ჰქვია... ძალიან ლამაზია... ზაურს აკოცე, გელოდებით! (ყურმილს დებს). ბლესტიკა, ბლესტიკა, — სოფელი და მდინარე, რომლის ფსკერზეც ნარმინას მამის ცხედარი ასვენია.

სინათლე ქრება.

მისამე მოქმედება



ქვეყნის
ბიბლიოთეკა

მოქმედება ისევ ალას ბინაში ხდება. ბაქოში ოქტომბერია, წლის ყველაზე ღამაში თვე-
ირგვლივ სიჩუმეა.

ალა ნელა და უხმაუროდ ალაგებს ოთახს. მოძრაობაზე ეტყობა. ძალზე ცუდად გრძნობს
თავს, მაგრამ მაინც ჭიუტად განაგრძობს საქმეს.

(ხმა ფანჯრის იქით — ალა!)

ალბ — ვინ არის?

(ხმა — გულამი ვარ, ერთი ფანჯარასთან მოდი, თუ ქალი ხარ.)

ალბ — მოვდივარ.

(ხმა — ბავშვი გამიხდა, ალა, ცუდად, გული ერევა წამდაუწუმ, ალბათ მოიწამლა, სასწრაფო
გამოვუძახო?)

ალბ — სასწრაფო არა ვარ? ახლავე მოვდივარ.

(ხმა — შენზე მითხრეს, ავად არისო და...)

ალბ — მერე რა, როგორც არ უნდა ვიყო მაინც სასწრაფო დახმარება ვარ... წადი ახლა და
ჩემს მოხვლამდე წყალი გაათბე (გადის).

სანათლე ქრება. ალას პატარა ოთახს სერგეის სასტუმრო ოთახი ცვლის. სერგეი ვიღაც
საშუალო ტანის სათვალეებიან ჩაფსკენილ მამაკაცს მოუძღვება წინ. ეს ექიმი შაბანოვია.

სერგეი — მობრძანდით!

შაბანოვი — გმადლობთ. ვიცნობდეთ ერთმანეთს, ექიმი შაბანოვი.

სერგეი — სერგეი ალექსის ძე უგოლკოვი.

შაბანოვი — ჩემი სახელი რა უფი გახლავთ. თქვენს ბინას გემოვნება, სიმყუდროვე, სისუფ-
თავე და შესანიშნავი დიასახლისის ხელი ემჩნევა.

სერგეი — გმადლობთ ქათინაურისათვის, მე ცოლი არა მყავს.

შაბანოვი — არა გყავთ? თუ დაქვრივდით?

სერგეი — არც ერთი და არც მეორე, გავეყარე. წმენდას და სესხას კი სულ სხვა ქალმა მი-
მჩვია, ჩემი ბავშვობის მეგობარმა. ეს ჩვევა გაჭირვების დროს ძალიან გამო-
მაღვა, ბინის დალაგება ყოველდღიურ მოთხოვნილებად გადამქცა.

შაბანოვი — მეცა მაქვს ჩემი გატაცება — მივუჭლები ხოლმე საკერავ მანქანას და ვკერავ.

სერგეი — კერავთ?

შაბანოვი — ჩემი უმცროსი ვაჟი დღესაც ჩემი შეკერილი პერანგებით დადის.

სერგეი — სულ რამდენი გყავთ?

შაბანოვი — ბევრი, ოთხი, უფროსი უკვე ცოლიანია, დედებზე შვილიშვილს ველოდები.

სერგეი — კარგია ბევრი შვილი.

შაბანოვი — თქვენ რამდენი გყავთ?

სერგეი — ერთი, პირველი ცოლისაგან. ისიც მალე ალბათ ბიჭით ან გოგოთი გაგვახარებს.
ჩაის მიირთმევთ თუ ყავას?

შაბანოვი — აი, იმ ვაზაში შემწვარ ნუშს ვხედავ და ძალაუნებურად კონიაკის ხასიათზე
დავდგე.

სერგეი — აი, ნამდვილი კაცური საუბარი (იღებს კონიაკის ბოთლს). ამ დალოცვილზე უკე-
თესს აბა, რას დავლევთ?

შაბანოვი — ოღონდ ზომიერება ნუ დაგვაფიქვდება. ექიმები არა ვართ?

სერგეი — ზომიერება ყველაზე უსაზღვრო და ინდივიდუალური მოვლენაა ამ შემთხვევაში.
პატარა ჭიქებით ინებებთ თუ ფუფუნებით?

შაბანოვი — აი, ამ პატარა ღიბიანი ჭიქებით დავლიოთ, თუმცა ჩვენი შეხვედრა უფრო
დიდ სახმისს იმსახურებს.

სერგეი — თქვენი გამარჯვებისა იყოს!

შაბანოვი — გაგიმარჯოს, ექიმო. ვიდრე კანათზე გადავიდოდეთ, გამოვიტყდებით, თქვენი
წიგნი ძლიერ მომეწონა. იგი ჩემი აზრით არა მხოლოდ მდიდარი ფაქტობრივი

მასალით არის საინტერესო, აგრეთვე იმ საოცრად დამაჯერებელი დასკვნებითაც, რომელთაც საბოლოოდ გვთავაზობთ.

სმრბპი — ალბაში სიკვდილის შემდეგ, გამოგიტყდებით, ჩემს დასკვნებში ცოტა არ იყოს ეჭვი შემებარა.

რაუზი — ალბაში ძალი იყო?

სმრბპი — დიახ, უზარმაზარი, აშკარად გამოხატული სარკმით. HPB-თი ემკურნალობდი — ხომ გაგიგონიათ?

რაუზი — როგორ არა, ნავთობისაგან მიღებული ნივთიერებაა, რომელმაც არნახული სისწრაფით გაითქვა სახელი მსოფლიო მედიცინაში და შემდეგ იმავე სისწრაფით დავიწყებას მიეცა.

სმრბპი — დიახ, სწორედ მაგაზე ვლაპარაკობ. ძალიან ძლიერი პრეპარატია. სიმსივნე დღითიდღე იკლებდა, ბოლოს ძლივსღა შესამჩნევი გახდა, თითქმის ხელითაც აღარ ისინჯებოდა და ძალი უეცრად მიოკარდის ინფარქტით არ მომიკვდა?

რაუზი — არც არის გასაკვირი, რადგან ოქრომჭედლის ფაქიზი ხელსაწყოების ნაცვლად ნაჯახი გიხმარიათ.

სმრბპი — ამდენი წარუმატებლობის შემდეგ თანამშრომლების თითქმის ერთი მესამედი გამეჭვა.

რაუზი — ეგ არაფერი, ერთნი წავლენ და სხვანი მოვლენ.

სმრბპი — ჩვენ კი გვეგონა, უკვე მოთუხთუხე ჩაიდანთან ვიდრეც და სიამოვნებით ველოდით, როგორ აუთამაშდებოდა ჩაიდანს სახურავი.

შაბანოვი — მოთუხთუხე ჩაიდანის სახურავიდან ორთქლმავლის ძრავამდე სტივენსონს ცოტადრო როდი დასჭირდა.

სმრბპი — იაბლოჩკოვის ნათურიდან ტელევიზორის ცისფერ ეკრანამდე კიდევ უფრო მეტი დრო გახდა საჭირო.

შაბანოვი — ჰოდა, ასეა მედიცინაშიც. მძიმე დაავადებებს ალბათ არც თქვენი HPB უშველის ჯერჯერობით და არც ჩემი ციმბირული მუაუნა, სიმსივნის განსაკურნავი საშუალება სულ სხვა აღმოჩნდება. მაგრამ ვიდრე ამ საშუალებას მივაგნებდეთ, ბრძოლაა საჭირო, შეურიგებელი ბრძოლა. ეს ერთადერთი ომია, რომელსაც დასასრული არა აქვს.

სმრბპი — „ბრძოლა ადამიანის ჯანმრთელობისათვის“ — გასაკვირია, ზუსტად ამ სიტყვებით იწყება ჩანაწერები, რომელთაც მიზიძგეს სტიმულიატორთა ძიებისაკენ (უჯრისა და რაუფის რვეულს იღებს).

შაბანოვი — (გაოგნებული) საიდან გაქვთ ეს რვეული?

სმრბპი — კითხვაზე კითხვითვე მოგიგებთ, რატომ აღელდით?

შაბანოვი — მე... ეს... ჩემი...

სმრბპი — თქვენი რვეულია? თქვენა ხართ რაუფი?

შაბანოვი — აკი შემოსვლისთანავე გითხარით, რაუფი მქვია-მეთქი.

სმრბპი — თქვენ ხომ ბლესტიკასთან დაიღუპეთ, ჩეხეთისა და გერმანიის საზღვარზე?

შაბანოვი — თქვენ საიდან იცით? დიახ, ნაპირი დანადგული აღმოჩნდა, სამი დღე და ღამე შლამში ვეგდე უგონოდ, შემდეგ რომელიღაც მოწინავე რაზმის სანიტრებმა მომნახეს და ჰოსპიტალში ვადამგზავნეს. ენა წამერთვა, მხოლოდ ომის შემდგომ წლებში დავიწყე ნელ-ნელა გამოჯანსაღება.

სმრბპი — ის, ვისაც ეგ რვეული ჩააბარეთ, აღარ მოგიკითხავთ?

შაბანოვი — როგორ არა, როგორც კი ენა ამოვიდგი და ფეხზე დავდექი, მაშინვე დავიწყე მისი ძებნა, რამდენი არ ვეძებე, სად არ მოვიკითხე, არსად ჩანდა მისი სახელი. ბოლოს შემატყობანეს, ბერლინის დაბომბვის დროს ნანგრევებში მოჰყვა და ვეღარ უპოვნიათო.


სმრბპი — მან კი თურმე გათხარა მიწა და კვლავ დაუბრუნდა ამ ღვთისაგან ნაკურთხ ქვეყანას.

შაბანოვი — (ძლივს ამოილულულებს). ერთიც დამისხით, თუ ღმერთი გწამთ.

სმრბპი — დასამშვიდებელი წვეთები ხომ არ გირჩევნიათ?

შაბანოვი — არა, კონიაკი დამისხით (ერთი მოსმით სვამს). სად ცხოვრობს?

სმრბპი — აქვე ახლოს. (კარებზე რეკავენ). ერთი წუთით (შემოდის და თან ნამტირალევი ნარმინა შემოჰყავს.)



ნარმინა — ეს რა მომივიდა, მამიკო! მიშველე რამე!

სერბი — რა მოხდა, ნორმალურად მითხარი...

ნარმინა — (ტირილით) ზაური რგოლებიდან მოწყდა და ხელი მოიტეხა, საავადმყოფოში წაიყვანეს.

სერბი — შენ რა გითხარი, გული არ გამიხეტქე, რა მოხდა მერე, შეუხორცდება და სხვა აძვრება იმ თავის რგოლებზე, შენ რამ შეგაშინა?

ნარმინა — რამ შემაშინა და პირდაპირ იდაყვში აქვს გადატენილი. კონსილიუმი მოიწვიეს და ექიმებმა ასე თქვეს, რგოლებზე ვარჯიში კი არა, ტანვარჯიშს საერთოდ უნდა დაემშვიდობოსო. დავიღუბეთ...

სერბი — და შენ ისტერიკა ატეხე და აქ გამოიქეცი?

ნარმინა — მაშ სად უნდა წავსულიყავი?

სერბი — რა თქმა უნდა, აქ, მაგრამ ტყუილად იცრემლები, ეს ჯერ კიდევ არ არის უბედურება.

ნარმინა — დამცინი, მამა? არ იცი, ტანვარჯიში მაგისათვის რას ნიშნავს, ეს ხომ ყველაფერია მისთვის: პროფესია, მოწოდება, საქმე და ბოლოს და ბოლოს სახელი.

სერბი — ცხვირსახოცი გამომართვი და ცრემლი მოიწმინდე. რა მოხდა მერე, მწვრთნელი არ არის? მორჩება და სხვას ავარჯიშებს.

ნარმინა — მეც მაგას არ ვეუბნები?

სერბი — შენც ადექი და ცოტა უფრო დამაჯერებლად უთხარი. მალე ვაჟი გეყოლებათ, მამასთან ერთად ივარჯიშებს, გაიზრდება და მამის გვარს ასახელებს! უმცროსი ვაჟივე — კარგად უღერს, არა?

ნარმინა — (ოღნავ დამშვიდებით) ეჰ, ნეტავ ყველა შენსავით იოლად ეგუებოდეს გასაჭირს.

სერბი — ნამდვილი გასაჭირი შენ ჯერ არ გინახავს, შვილო, აი, რომ ნახავ, მაშინ კარგად გაარჩევ იოლს და ძნელს, ახლა წადი და შენს ქმარს დაუჩქეპი სასთუმალთან, დაამშვიდე და უთხარი, ნუ წუწუნებს, საქმე არც ისე ცუდაა, თვითონ რომ ჰგონია. მე მალე მოვალ.

ნარმინა — კარგად, მამა, აბა, მე წავედი. (დგება, რაუფს მიმართავს) მაპატიეთ (გაღის).

ზაბანოვი — ეს გოგონა ალას მაგონებს საოცრად.

სერბი — ალას შვილია და იმიტომ.

ზაბანოვი — მერე თქვენ... ის თქვენ მამას გეძახდათ.

სერბი — მამა ვარ და იმიტომ.

ზაბანოვი — ალა თქვენ გამოგყვით ცოლად? ის... ის... ის...

სერბი — ბავშვს ელოდა, ბავშვს მამა სჭირდებოდა, ამიტომაც დავიყოლიე ლორა და....

ზაბანოვი — რა თქვით, ლორაო?

სერბი — ჰო, ჩემი საცოლდე ლორა. დავარწმუნე, რომ ალას ჩემი დახმარება ესაჭიროებოდა და ბავშვის მამობა ვიკისრე.

ზაბანოვი — ნულარ გააგრძელებთ, ყველაფერი გასაგებია.

სერბი — წვეთები ხომ არ დაგისხათ?

ზაბანოვი — ღმერთო ჩემო, ყველაფერს ველოდი ცხოვრებაში, ამას კი... ოცდახუთი წელი გავიდა და ომში მოყენებული ტკივილები ჯერაც არ დაგვყუჩებია.

სერბი — საუკუნის მესამედი გავიდა... ტანჯვამ და ტკივილმა გაიარა, დავიწყებას მიეცათ თითქოს ყველაფერი, შიმშილიც და ტკივილიც, მაგრამ ჩვენი მეგობრობა დარჩა.

ზაბანოვი — მეც ხომ თქვენი მესამე მეგობარი ვარ. მირჩიეთ, რა ვქნა. ამ ამბავს თინას მოვუყვები, ის გამიგებს და მერე ჩვენ ერთად ავუხსნით ყველაფერს ნარმინას.

სერბი — არა, რაუფ, ჩვენი მოვალეობა ჭრილობის მოშუშებაა და არა მათი გაღვიძება. ნარმინას ხელის ხლება არ შეიძლება.

ზაბანოვი — მაშ რა ვქნა? როგორ მოვიქცე?

სერბი — რა უნდა ქნათ, თქვენ მეოთხე კაცი ხართ, ვისთვისაც ეს ჩვენი საიდუმლო ცნობილია. ახლა როგორც დიპლომატები იტყვიან თავიანთ ენაზე, უნდა დავიცვათ „სტატუს-კვო“ — ანუ ენას კბილი დავაჭიროთ.

ზაბანოვი — ალას ნახვა თუ შეიძლება?

სერბი — შეიძლება კი არა, აუცილებელია. ჩვენ ორნი მას ერთად უკეთესად ვუმკურნალებთ, თუმცა მე თუ მკითხავთ, მკურნალობას აზრი აღარა აქვს.

ზაბანოვი — (ჩურჩულით) კიბოა?



სერბი — ლეიკემიის მძიმე ფორმა.

შაბანოვი — თვითონ თუ იცის?

სერბი — მე მგონი, რალაცას ხვდება.

შაბანოვი — ახლა ჩვენ უნდა ვიბრძოლოთ მისი სიცოცხლისათვის, აღიუვანტებით შევუტიოთ მის ავადმყოფობას.

სერბი — უკვე ერთი წელია მაგით ვაცოცხლებ. ორთოდოქსებმა რომ გამიგონ, შუაში გამგლეჯენ, მაგრამ განა ერთი წელი ცოტაა, განა ეს არაფერს ნიშნავს?

შაბანოვი — გაერთიანებული ძალებით ეგებ კიდევ ვაცოცხლოთ ცოტა. ხომ გახსოვთ, როგორ ებრძოდნენ ბერნარდს, როდესაც გულის გადანერგვაზე დაიწყო მუშაობა, ხალხს ასეთი ოპერაციები წლებს მატებდა, ზოგს ერთს, ზოგს ორს. ერთ-ერთმა პაციენტმა რვა წელი იცოცხლა. მარკუს ავრელიუსი კი ამბობდა, ყოველი განვლილი დღე მოულოდნელი საჩუქარია ადამიანის ცხოვრებაში. ფეხზე თუ დადის კიდევ?

სერბი — დადის, საცაა მოვა.

შაბანოვი — აქ?

სერბი — ჰო, აქვე ცხოვრობს და ხშირად მოდის ხოლმე ჩემთან. წამალი აქვს წასაღები. რალაც მაქვს მისთვის ჩაფიქრებული, მაგრამ ჯერ არ გეტყვით.

შაბანოვი — როგორ უნდა შევხვდე?

სერბი — როგორ და ჩვეულებრივად, ადამიანურად. ადამიანურად-მეთქი, რომ ვამბობ — შინაარს ვგულისხმობ, რა თქმა უნდა. ფორმას, ფორმას კი თქვენ თვითონ მოუნახავთ თქვენს შეხვედრას. ისე მოიქეცით, როგორც საკუთარი სახლში. მე ზაურის სანახავად წავალ, ძალზე არასასიამოვნო ამბავი შეგვემთხვა, მაგრამ რას ვიზამთ, როგორც იტყვიან, ცხვირს ნუ ჩამოვუშვებთ (გაღის).

შაბანოვი — ცხვირი ნუ ჩამოგიშვია, თავი ასწი და კრიჭაშეკრულმა პირდაპირ იყურე, ეს არც ისე ძნელია (ბოლთას სცემს). წინ კი? როგორ შევხვდებით ერთმანეთს? (შეხვედრას გაითამაშებს) შემოდის, აი, იქიდან, ჯერ ვერა მცნობს, შემდეგ ტუჩებს მოკუმავს და ისე აიბუზება, მუჭისოდენა გახდება, მეც იგივე მემართება... „ალა, ეს მე ვარ“, — ვეუბნები და ვუწვდი ხელს. „გიცანი“, — მპასუხობს ის გაბზარული ხმით. მეც მებზარება ხმა. „გეფიცები, ალა, ჩემი ბრალი არ არის, რომ ასე მოხდა“. — ვიმართლებ მე თავს. არა, ეგრე არ ვარგა; მე ოთახში დავდივარ, ის სავარძელში ზის და მელოდება. „გამოდის, ცუდად ვექებლით ერთმანეთს“, — ამბობს ის. „ცუდად“, — ვუტყდები მეც, თუმცა გულის სიღრმეში არ ვეთანხმები, რადგან ორივეს დაღუპვის საბუთი სავსებით დამაჯერებლად მიმაჩნია. შემდეგ მაგიდასთან ვსხდებით ერთმანეთის პირდაპირ, ვიწყებთ საუბარს არა ჩვენი განუმეორებელი სიყვარულის და იმ დაუბრუნებელი დღეების შესახებ ბლესტიკაზე, არამედ ისე... „თავს როგორ გრძნობთ“, — ექიმისათვის დამახასიათებელი კილოთი ვეკითხები. (ფანჯრის გასწვრივ დადის) „როგორ ვიქნები, ვერი ფარ-ხმალს ნელ-ნელა, პატარა ხომ არა ვარ, ორმოცდაათს გადავაბიჯე უკვე“. „კარგი ერთი, რა დროს თქვენი ფარ-ხმალის დაყრაა, ჯერ სულ ახალგაზრდა ხართ“, — ვპასუხობ მე, ფეხზე ვდგები, მაგიდას ვუვლი და ვუახლოვდები მას. „ვიმედოვნებ, საშიში არაფერი გაქვთ. მე და სერგეი... მამის სახელი დამავიწყდა, კარგი, მე და კოლეგა უგოლკოვი მალე მოგარჩენთ“. „გმადლობთ“, — მპასუხობს, დგება, იღებს წამალს, მემშვიდობება და მიდის. მე შუა ოთახში ვდგავარ და ადგილიდან ვერ ვიძვრი... თავი მისკდება, მაჩისცემა აჩქარებული მაქვს, ვისხამ კიდევ ერთ ჭიქა კონიაკს და სულმოუთქმელად ვსვამ...

მის უკანასკნელ სიტყვებთან ერთად ქრება სინათლე. შემდეგ ისევ ინთება. ოთახში სავარძელზე ზის ხელიხელჩაკიდებული, უშფოთველი და უზომოდ ბედნიერი ორი ადამიანი: ალა და რაუფი.

შაბანოვი — გახსოვს, ბლესტიკის ნაპირას რომ გელოდებოდი ერთხელ ნავით, შენ ფეხშიშველი მოდიოდი ნამიან ბალახზე, ჩექმები მხარზე გქონდა გადაკიდებული.

ალა — „გაგიჟდი, გაცივდები!“ — იყვირე შენ, ხელში ამიტაცე და ნავში ჩამსვი, მერე ჩვენ მეორე ნაპირზე გადავცურეთ ჩვენი ქოხისაკენ.



შაბანოვი — ძალიან დავბერდი?

ალა — ხანი შეგპარვია ოდნავ. თმა კი ისევ შავი გაქვს, მოგიზრდია უფრო, ადრე მოკლედ ატარებდი. მახსოვს, მიყვარდა ხოლმე შენს თმაზე ზელის აყოლება კეფიდან შუბლამდე.

შაბანოვი — მეც მახსოვს, ნელ-ნელა მისვამდი ხოლმე ზელს ქვევიდან ზევით.

ალა — შემდეგ შუბლიდან ცხვირის და ტუჩების გაყოლებით ჩამოვაცურებდი თითს ნიკაპამდე, კატასავით გაიტრუნებოდი ხოლმე.

შაბანოვი — ალენკა, რა ბედნიერებაა, რომ ასეთი ზღაპრული მოსაგონარი დავგრჩა.

ალა — ჩემი დაღუპვის ამბავი როგორ გადაიტანე?

შაბანოვი — დიდხანს არ მჭეროდა, მაინც გეძებდი, საბოლოოდ კი შენი დაღუპვის ცნობაზე ხელმეორედ დადასტურება რომ მივიღე, გონება დავკარგე, თავის დახრჩობაც ვცადე.

ალა — მე სულ წინა ხაზზე ვაგრბოდი. ტყვიებს ვუშვერდი მკერდს, რამდენჯერ გადავდგომივარ წინ ავტომატის ტყვიების ჯერს, მაინც არც ერთი ტყვია არ გამეკარა, ბედი მქონია ასეთი. ჩანს, ღმერთს ჩემი სიკვდილი არ სდომებია.

შაბანოვი — ჩემი ბედიც ეგ ყოფილა. არ იქნა და სიკვდილი არასგზით არ გამეკარა.

ალა — ცოლი როდის შეირთე?

შაბანოვი — თინა? ომის დამთავრებიდან ოთხი წლის შემდეგ, ძალიან კარგი ცოლი მყავს, ჭკვიანი, ნამდვილი მეგობარია და კარგი დედა, მაგრამ შენ მაინც სულ სხვა იყავი, მე და შენ სულ სხვა რამ გვაკავშირებდა, ხომ გესმის ჩემი.

ალა — მესმის, რაუფ, ძალიან კარგად მესმის, ამიტომაც დავრჩი ვაუთხოვარი.

შაბანოვი — ძალიან გაგიჭირდა?

ალა — იოლი ცხოვრება არც მიცდია. ყოველთვის მახსოვდა, რომ ვილატას ვჭირდებოდი. დღესაც მოსვენებას არ მაძლევს ტელეფონის გაუთავებელი ზარი. გვერდზე ქალიშვილი მწერდებოდა, თვალწინ კი მუდამ მშვიდად მიედინებოდა ჩვენი დაუვიწყარი ბლესტიკა.

შაბანოვი — განა ბევრს მქონია ცხოვრებაში ისეთი ბედნიერი წუთები, ჩვენ რომ გვქონდა ბლესტიკაზე, ალა?

ალა — მოდი, კიდევ ერთხელ ჩამოგისვამ თითს ხახვზე. „გიყვარვარ?“ — გეკითხებოდი. „რა სულელი ვოგო ხარ, შენი სიყვარული ძილშიაც კი არ მახვენებს“, — მპასუხობდი.

შაბანოვი — ჩემო საყვარელო, ჩემო ალა!

ალა — სერგეისთან საიდან მოხვდი?

შაბანოვი — შენი წყალობით. იგი თურმე ჩემმა ჩანაწერებმა დააინტერესა, მე მისმა წიგნმა, საერთო საქმემ და მოსაზრებამ კი ერთმანეთს დაგვაკავშირა.

ალა — სერგეი ნამდვილი ვაჟკაცია, ერთგული, ძლიერი და თავდადებული, მისი ნდობა შეიძლება.

შაბანოვი — მითომაც მიჭირს ასეთ კაცს ტყვილი მივაყენო, იგი ხომ უკვე მიეჩვია ნარმინას მამობას.

ალა — სერგეი ნარმინას მამაა და იქნება კიდევ ყოველთვის.

შაბანოვი — შენც ასე ფიქრობ? მაშინ...

ალა — შენ გყავს თინა, ოთხი შვილი, ნარმინასათვის კი მამის მეგობარი იქნები ყოველთვის, სხვა არაფერი.

შაბანოვი — და მე მას „შვილოს“ ვერასდროს ვეტყვი?

ალა — ვერა, ნარმინასათვის ასე აჯობებს.

შაბანოვი — სერგეიმაც ასე მითხრა.

ალა — მეც ასე გეუბნები, ეს ჩემი ანდერძია.

შაბანოვი — მოიცადე, ანდერძის დატოვებას ყოველთვის მოასწრებ. ჩვენ კიდევ ბევრს ვიბრძოლებთ ერთად და მოვერევით შენს ავადმყოფობას.

ალა — (ღიმილით) აბა თქვენ იცით. აი, ჩემი უკანასკნელი ანალიზის პასუხი, სერგეის მოვუტანე. მიქსტურა მომეცა, სადღაც აქ უნდა მქონდეს დატოვებული.

შაბანოვი — აი, პატარა მაგიდაზე დგას.

ალა — (წამალს იღებს) მშვიდობით, რაუფ.

შაბანოვი — ნახვამდის, ალა, მომავალ შეხვედრამდე.

ალა — მომავალ შეხვედრამდე, თუ გინდა (გაღის).

შაბანოვი — (შუბლზე თმას გადაიწევეს, აკანკალებული ხელით კონიაკს ისხამს და სულმოუთქმელად სვამს). ბრძოლა, ბრძოლა, შეუპოვარი ბრძოლაა საჭირო... (სამუშაო ოთახში შედის, უკან ბრუნდება, მაგიდიდან ჭიქებს, ბოთლს და თასს ალავებს. დაბნეული კითხულობს ანალიზების პასუხის ფურცელს, შემდეგ გვერდზე გადადებს, მაგიდის წმენდას და სკამების დალაგებას იწყებს.)

სერბი — (შემოდის) „გაჭირვებულ კაცს ქვა აღმართში მიეწიაო“ — ზაურომ ტანვარჯიშს თავი უნდა დაანებოს.

შაბანოვი — ადრე ყრი ფარ-ხმალს, ნუ გეშინია, კურგანში წავიყვანთ ელიზაროვთან, ეგეთები მოურჩენია?

სერბი — ვსინჯოთ, ყველაფერი ვსინჯოთ, ალასაც უნდა ვუშველოთ როგორმე.

შაბანოვი — ალა ძალზე ცუდადაა.

სერბი — იყო?

შაბანოვი — მიკვირს, ფეხზე როგორ დგას (ანალიზების ფურცელს აწვდის. ირონიულად) უენშენი, მუმიე, HPB?

სერბი — HPB აღარ გამოდგება. რამე ახალი საშუალება უნდა ვეძიოთ, (დიდხანს სდუმს) აბა გულზე ხელებს ხომ არ დავიკრებთ და დასასრულს ხომ არ დაველოდებით. ერთი წელი, ნახევარი თუ გინდა, ერთი თვე მაინც ვაცოცხლოთ. საღამოსათვის ლენინგრადადთან ლაპარაკი მაქვს შეკვეთილი. იქ სამხედრო აკადემიის საავადმყოფოში ერთი ექსპერიმენტი ჩაატარებს, დადებითი პასუხის იმედი არავის არა აქვს, თუ ღმერთმა ქნა და რამე გამოვიდა... მოკლედ, პასუხი უნდა გამაგებინონ.

შაბანოვი — ხომ იცით, როგორ რისკზე მივდივართ? მოწინააღმდეგენი ქვეყანას შეგვიყრია.

სერბი — ვიცი, მაგრამ დრო აღარ იცდის, სხვა გამოსავალი მაინც არ არის, ყოველი განვლილი დღე მოულოდნელი საჩუქარიაო, ვინა თქვა? (დუმის შემდეგ) ჩვენ ჰიპოკრატეს ფიცს ვასრულებთ, ფიცს, ხელობის არჩევსას რომ დავდეთ.

შაბანოვი — ბედნიერი კაცი ხართ, სერგეი.

სერბი — მე? უიღბლო ექიმი, სხვისი შვილის მამა და მიტოვებული ქმარი? მე ვარ ბედნიერი?

შაბანოვი — თქვენი გულის პატრონი...

სერბი — გული ჩვეულებრივი ტუმბოა და წმინდა მექანიკური ფუნქცია აკისრია.

სინათლე ქრება, ინთება. ალას პატარა ოთახი. ალა წევს, სამზარეულოდან ნარმინა გამოდის.

ნარმინა — უკვე დამაგვიანდა, ორ საათზე ზაური საავადმყოფოს შესახველთან მელოდება.

ალა — წადი და არ დაიგვიანო.

ნარმინა — არა, ერთი საქმე გვაქვს შენთან, ვიცი, გაგიხარდება, თვითონ გეტყობი, მაგრამ...

ალა — ერთად მეტყვით. წასვლამდე კი ჩემი სამხედრო ფორმა გადმომიღე, ზედ ეს ორდენი მიამაგრე და აქ მომეცი.

ნარმინა — რაში დაგჭირდა ახლა სამხედრო ფორმა?

ალა — რაუფი და სერგეი მოვლენ, წარსულს გავიხსენებთ.

ნარმინა — ეს გამოსუნებული პერანგი თუ არ ჩაიცვი, ისე ვერ გაიხსენებ?

ალა — მომეცი, გენაცვალე!

ნარმინა — (კარადიდან ფუთას იღებს) აჰა, გამომართვი, მე კი მამის მანქანით ხელად მივირბენ და მოვირბენ (გარბის).

ალა — (ძლივძლივობით დგება, იღებს ფორმას, სავარძელში ჯდება, ხაკის პერანგზე ორდენს და მედლებს ამაგრებს). ამ მედლიდან შრომის წითელი დროშის ორდენამდე ერთი დიდი ამოსუნთქვაა თითქოს, ერთი მოკლე მარში... საყვარელ თანამებრძოლებთან ერთად განვლილი. დაჩაჩანაკდი, ფეხზე ძლივს დგახარ და მაინც არ გინდა მუხლის მოდრეკა, აბა, სწორება მარჯვნივ! სწორება მარცხნივ! სტიმულატორებო, ზურგისაკენ! აბა განი, და რაც შეიძლება ფართე წრე! დიდი არე! (ტელეფონი რეკავს) აბა, აბა, ჯერ ნუ შეიცხადებთ, ექიმმა რა თქვა? ჰოდა, დავიწყეთ დიბაზოლის და პაპავერინის კეთება, ახლავე მოვდივარ... (ყურმილი ხელიდან უვარდება, გაუნძრევლად ზის სავარძელში. შემოდის კაცი, რომელსაც პირველ მოქმედებაში პირველი ვუწოდებთ და თან შემოჰყვება მეორე — ალაბაშის პატრონი.)



იბრან კასუმოვი

პირველი — ალა ხანუმ, ჩემს ქალს გვერდში ჰვალა აქვს, ტკივილისაგან ლოგინში იკრუნ-ჩხება.

მეორე — ვიფიქრეთ, ტკბილად დავსხდებით-მეთქი კვირა დღეს, ის კი ისე გაჰკივის, სახლში ვერ გაჩერდება (უახლოვდებიან ალას, გაოგნებულები ერთმანეთს შეჰყურებენ, შემდეგ შეშინებულები უკან იხევენ. შემოდის მეზობელი გულამი, ხელში რაღაც ფუთა უჭირავს).

მესამე — ალა, ბიჭი ისე კარგად არის, დღეს სკოლაში გავუშვით. საჩუქარი უნდა მოგართვა, თუ მიიღებ... სუნამოა, მეტი არაფერი (ისიც უახლოვდება, დაბნეულობისაგან სად წავიდეს, აღარ იცის, ძღვენს უნებლიეთ უკან ჯიბეში იღებს, ადგილიდან არ იძვრის).

შემოდინა ნარმინა და ხელშეხვეული ზაური.

ნარმინა — აი, ჩვენც მოვედით.

ზაური — თანაც ორი კაცი კი არა ვართ უკვე, შეიძლება ითქვას ორნახევარი, ორნახევარი თუ არა, ორი და მეოთხედი მაინც. ან ბიჭი იქნება ან გოგო.

ნარმინა — (უახლოვდება ალას, კარგად დახედავს, უეცრად კივის) დედა!

ზაური წამოაყენებს, შემოდინა სერგეი და რაუფი.

სერგეი — ალკა, ორი ექიმი მიიღე.

რაუფი — ორი კბილებამდე შეიარაღებული ექიმი.

შეშფოთებული შესცქერიან იქ მდგომთ. თავებს ხრიან დაბლა. ამ სამარისებურ სიჩუმეში სავარძელზე ხაკის პერანგით ხელში მშვიდადაა მიწოლილი მკვდარი ალა.

სინათლე ქრება.




აზერბაიჯანული და
თარგმნა ზეზვა მელულაშვილმა

ვაგიზ ნასიბი

ქართული ჰანგი

აღარც კი მახსოვს,
ვის მოვტაცე, რომელ ბაღადას,
მაგრამ ეს ჰანგი
მე თან მომყვა საქართველოდან.
იქნებ შემიყვა კახურ ღვინოს
ერთ მხიარულ ქართულ სუფრაზე,
ანდა მოვთიბე
ბაგეთაგან მთიბელ ხევსურის;
ან არა, იქნებ გვერდით ჩაქროლილ
მანქანაში მსხდომარ ქალწულთა
ნაზ ბაგეთაგან გადმომესხურა.
ეგეც არ ვიცი,
იქნებ ყაზბეგის
მდელოთა შორის — ვითა ფუტკარმა —
შევსრუტე ნექტარის დარად;
იქნებ და, სულაც, სულს შეენივთა
მესხეთის ძეგლებს ავარდნილი უხმო ყიჟინა.
ვეღარ ვიხსენებ,
მაგრამ ეს ჰანგი
ქართულია და მოვიყოლე საქართველოდან.



აზერბაიჯანული
ბიზნეს-სკოლა

(«თ ვ მ მ ბ ი ს» ციკლიდან)

აბას აბდულა

თ ე ბ ე რ ვ ა ლ ი

ჰაი, როდის-როდის
 თვალსაწიერზე
 ამოდიმლამდება მზე;
 ზამთარს აჩნდება
 თეთრ გულმკერდზე შავი ხალები
 და ქურუხდება
 და რუხდება ზეცის თავანი.
 ცეტი ბუნების ამ უსაზმნო ჭირვეულობას
 თოვლის ქვეშ მორცხვად ემალებიან
 და თეთრს
 აღისფრად იუნჯებენ ენძელები.
 ქარი,
 ორპირ და ორგულ კაცივით,
 ზამთარს ეუბნება:
 — დარჩი, ნუ წახვალ!
 გაზაფხულს კი:
 — მობრძანდი, გელი!
 კიდევ სწყურია ჯერ სიცოცხლე
 ფერწასულ ზამთარს,
 გაზაფხული კი
 საცა არის მოცქრიალდება.
 წერტილად მოჩანს
 შორს
 ტალღებში ჩამჯდარი გემი
 და იჭვით გასცქერს ზღვას დედაბერი:
 — ეს გაზაფხული
 ნეტავ ასე რად იგვიანებს?
 წლის ამ დროს, ო, რა ბუზღუნანი
 და ჭირვეულნი
 არიან ხოლმე დედაკაცები!
 ზღვას გრიგალი გლეჯს,
 მთაში ნისლია;
 არც ზამთარივით ზამთარია და
 არც გაზაფხული — გაზაფხულივით, —
 დღეა ნაცარა,
 ენძელა კი თეთრ-ლურჯ-ყირმიში.



ეროვნული

ბიბლიოთეკა

...და ენძელებით მეზობლის გოგოს
 პაემანზე მიეჩქარება.
 ეპ, ამ გოგოებს რა ენაღვლებათ,
 საწყალი დედები ჰგვანან თებურვალს..

ნოემბერი

საშინლად მზარავს ფოთოლცვენა,
 ჩემო ძვირფასო!
 ოღონდ — შენც თუ გძრავს,
 შენც თუ გაკრთობს,
 შენც თუ გაფიქრებს?
 ყოველ ცისმარე
 გზას გაჰყურებს ჩემი თვალები
 და ყოველღამე მესიზმრები,
 მაგრამ
 არ ვიცი:
 ფოთოლი არის მოლაღატე,
 ტოტი
 თუ მიწა;
 მიწა, რომელიც თავის მოცემულს,
 ვითა ყმაწვილი ჭირვეული,
 უკანვე გვართმევს.

ჩვენთან, ძვირფასო,
 ფოთოლცვენის ჟამია უკვე.
 თქვენთან?
 თქვენთანაც თუ ჩამოდგა ჟამი იგივე?
 წუხელდამ ჩვენსას მოპარულიყავ,
 თუმც ვერავინ დაგადგა თვალი.
 შენ კი ყველანი მოინახულე,
 შეისაყვარლე თოთო ბაღლები.
 შენთვის მაძღრისად რომ მემზირა,
 დილა გავქურდე,
 ორი თვალისთვის
 მზენათელი მოვპარე დილას
 და მაინც მშია შენი ნახვა,
 ო, ახლაც მშია!..
 ის ფოთოლცვენა
 ათას ცხრაას მავანი წლისა
 თუ გახსოვს, კარგო:



ფოთლები გულმკერდგამოღადრული
 და წანაგლეჯი გაზაფხულიდან;
 ანდა ხეები —
 გარდავლილი სიმწვანის დღეებს
 უკანვე რომ ივედრებოდნენ?
 ეს დღეც იქნება,
 ალბათ ერთი ფოთოლცვენისას,
 მეც გავეხვევი მოსასხამში ბედისწერისა;
 დამაზრობს იგი თუ დამბუგავს,
 ვის რა დარდი აქვს!
 დავტოვებ ქალაქს,
 სადაც ვცხოვრობდი,
 თავს დავადირებ
 და გავყვები ჩემს გზას შორეულს.
 შენ კი მელოდე იმ ადგილას,
 პარალელური
 იკვეთებიან სადაც ხაზები.

მამულ არაზი

ტყვია

ტყვია, რომელიც ილია ჭავჭავაძეს ესროლეს,
 ახლა მის სახლ-მუზეუმში ინახება.

თოფის ქუხილმა ხეობაზე გადაიგრგვინა,
 გაიპო მკერდი, გადაიხსნა დიდი იარა;
 მწვერვალს კლდე მოსწყდა, უფსკრულები გადაირბინა,
 თითქოსდა ტყვია მას ესროლეს, პოეტს კი არა.

ღერძი გამრუდდა და ფაიტონს დასძვრა ბორბლები,
 ცხენებმა ზეცა ჩამოღადრეს ბრაზით უჩვევით.
 არ შემიკრთესო საქართველო დანაობლები —
 ყელში დაძრული ხმა მოგუდა მთრთოლვარ ტუჩებით.

ამოაფრქვია მეწამული ვულკანმა მკერდმა
 და მეწამულად გაიფოთლა ტყე-ღრე მდუმარი.
 მკერდგაბასრული შინ წაიდეს და მასთან ერთად
 მივიდა ტყვიაც, ბოროტი და ავი სტუმარი.

არ დარჩენილა ის სტუმარი მის მკერდში დიდხანს,
აწ სახლის პატრონს თავზე მცველად ადგას ისევ.
რუხფერი ღვარძლი სტენდში თვლემს და ჩუმად
ფრთებს ისხამს
და ეშინია, რომ ხელახლა გაადვიძებენ.

აქ, ერთ ოთახში ორსავე ერთად დაუდევს ბინა:
ქიმერაცა და შთაგონებაც ერთად არიან
და ვერაგობა, დამწყვდეული ამ სახლსა შინა,
სირცხვილისაგან ვით არ დნება, საოცარია.

მაგრამ, დაიცა! მგონი ვიცან ძველი ნაცნობი, —
ამ ტყვიამ ბევრი ასწლეული გადინადირა.
ჩვენი ნასიმის ალექოში ტყავის გამძრობი
ჯალათის დანის ანაგლეჯი არის ნამდვილად!

იქნებ, ბედითად რომ ისროლა ერთხელ დანტესმა,
ეს ის ტყვიაა, ახალ მსხვერპლის ვერმომპოვები, —
ჩვენს გზებს გამოჰყვა და ვერაგულ ბევრჯერ
დაჰკვესა,
კავკასიელი რომ მოესპო ლერმონტოვები!

ვუმზერ და მიკვირს: ტყვია თითქოს მარცვალი
ხურმის,
დროის კვალდაკვალ რაოდენგზის პერანგებს
იცვლის, —
ზოგჯერ ქორწილში გავარდება, მოიკლავს სურვილს
და გზას გაჰყვება, რომ ხელახლა დაღვაროს სისხლი.

იგი დიდებას კუდში მისდევს, კუსებრ მიცოცავს,
საცა კი დროა, გადუსწრებს და წინ გადუდგება.
კაცო, თუ ძმა ხარ, მოშორებით დადექი ცოტა,
თორემ პოეტის დანახვაზე სისხლი უნდება!

□



მ ლ თ ხ რ ლ ბ ა

სომხურიდან თარგმნა მკრანე რობაქიძემ

სე უღონოდ ჰაჯი აღა არასდროს წალასლა-სებულა დუქნისაკენ — ის ჰაჯი აღა, ვინც ქუჩაში მედიდურად, ბატონ-კაცურად მიაბიჯებდა ხოლმე. სამოცდაათ წელს მიღწეული მოხუცი აღა კუზს ზემოთ, კისერზე სქელ შალს მოიხვევდა, თავზე ფესს დაიხურავდა, მაღალ ტანს წინ წახრიდა, თითქოს მძიმე ტვირთი ჰკიდიაო, აქლემის კისერს წაიგრძელებდა, წამოშვერილ ცხვირზედ რომ შავი სათვალე დაესკუპებინა, ჰაერში გაიშვერდა, თვალებით ერთ შორეულ წერტილს მიაჩერდებოდა და ისე მიდიოდა, როგორც ადათ-წესების დამცველს შეშვენის. ზეპირად იცოდა ყველა ოღროჩოღრო ადგილი, იცოდა სად უნდა დაედგა ფეხი, მაგრამ თუ ურმის, კაცის ფეხით ან ბუნების წყალობით რომელიმე ქვა გადაადგილდებოდა, ჰაჯი აღა შეჩერდებოდა, კარგად ასწონ-დასწონიდა, ხიფათი როგორ ავიცდინოთ,

გაყვითლებული ჯოხის წვერით შეამოწმებდა, ქვა სანდო არის თუ არა, ფეხი რომ დავადგაო, მერე ჯოხს დაეყრდნობოდა, მამალივით ფრთხილად მოსწყვეტდა ფეხს მიწას და ისე გადალახავდა ხოლმე სახიფათო ადგილს.

მხოლოდ ერთხელ, ათი წლის წინათ თავის პირმშოს მიწას რომ აბარებდა, უღალატა ჰაჯი აღამ თავის წესს და ცისფერი მაუდის შარვლის ტოტები ტალახში ამოისვარა, მეორედ კი — დღეს, როდესაც შეიტყო, რომ თურქის ჯარმა რუსი შეავიწროვა და ძლევით უახლოვდება მათ პატარა, სასაზღვრო ქალაქს.

ხატზე დავიფიცებთ, რომ დეკემბრის ამგვარ ყინვაში ჰაჯი აღა გარეთ გამომსვლელი არ იყო, ისიც მაშინ, როცა უკვე მოყინული მიწა ურემთა თვლებსა და ჯარისკაცთა ჩექმებს აეზილა და ტალახად ექცია.

გამოცდილმა, ცხოვრების ავ-კარ-გის მცოდნე ჰაჯი აღამ, ვისაც საკუთარი თვალთ ენახა 1877 წლის რუსეთ-თურქეთის ომი, როდესაც თურქი თითქოს ბუნებრივად მარცხდებოდა, იმ ჰაჯი აღამ, ვინც „ქუთთისტანსა და თურქისტანში“ გაკაჟებულყო, ვაჭრობდა და ავაზაკებს მელასავით ბევრჯერ დასძვრომოდა ხელიდან, კარგად უწყობდა, რომ სჯობდა წამი არ დაეკარგა და თვითონ ღროზე გასცლოდა მტერს, ვიდრე ელოდნა, როდის დაატყდებოდა განსაცდელი და მარწუხებში როდის მოაქცევდნენ.

მაგრამ ამჯერად შეცდა... და სასტიკადაც შეცდა.

ბაზარში შესვლისთანავე გამოცდილი მზერით მოათვალიერა მოედანი და მედუქნეთა ჩოჩქოლი ცუდად ენიშნა. მერე ჰაჯი აღამ თავისი დუქნისაკენ გასწია. დუქნის კარი ღრიჭოდ იყო მიხურული. შიგ შეაბიჯა და ნერწყვი გადაყლაბა. მისი ჩასუქებული ვაჟიშვილი საქონელს გამალებით ჰყრიდა ტომარაში, თან ტაყ-ტორასავით ქსუტუნებდა. ნაყვავილარ ღაჟლაჟა პირისახეზე ოფლი დასხმოდა.

ჰაჯის თვალთ დაუბნელდა, გაპარსული ნიკაბი აუკანკალდა და ბორძიკით ამოილულულა:

— შმაგონ, რას სჩადიხარ?

შმაგონმა მამა რომ დაინახა, უფრო მოიღუშა, თითქოს თვითონ ყოფილიყოს უბედურების მომტანი. დამნაშავესავით დადუმდა და თვლები ძირს დახარა, თითქოს მიანიშნა: „აჰა, შეიტყე, მოკვდაო“.

და მართლაც თითქოს ვიღაც მომკვდარიყო. კოჭლმა საქმის აღმასრულებელმა სკამი მიუდგა ჰაჯი აღას და უთხრა:

— არაფერია, ჰაჯი აღამ, დაჯექი.

— კარგი ერთი, როგორ თუ „არაფერია“, ფორანი დაიჭირეთ?

— მისაკი წავიდა დასაჭერად, — მიუგო შმაგონმა.

ჰაჯი აღამ არ დამჯდარა. ხაფანგში გაბმული თავგვიტ აწრიალდა, გარეთ გავიდა და მიმოიხედა. მედუქნეები აულელვებლივ ვაჭრობდნენ. მათი მეზობელი, კორკოტაანთ ელიშე, რვა შვილის მამა, ნიჩაბივით წვერი და საცრისოდენა თვალები რომ ჰქონდა, მშვიდად ჰყიდდა საქონელს. საქმე გასაქცევად რომ ჰქონოდათ, პირველად ის უნდა შეშფოთებულყო.

ჰაჯი აღამ მიუახლოვდა მას და ჰკითხა:

— ელიშე, ამას რას ამბობენ, თურქი გვავიწროვებსო.

— მართლა? არაფერი გამიგია... ჩვენი ეზოს ფელდფებელმა თქვა, შიშიანობა არ არისო, — უბასუხა ელიშემ და ეპისკოპოსის ღირსებით განაგრძო ვაჭრობა. ჰაჯი აღამ გაქცევებულებით იდგა მისი დუქნის წინ — არ იცოდა, რა მოემოქმედა. მას გვერდით ჩაუარა დურგალმა პოლოსამ, იგი ვიღაცას ელაზღანდარაგებოდა.

— აღამიანის შვილო, სადაც სხვა, ჩვენც იქ. რაც მოსავალია მოვიდეს.

— მისმინე, — შეეხმიანა ლაზღანდარა, — მოემზადე, კომენდანტმა გასაქცევად ეტლი უნდა გამოგიგზავნოს.

— ეტლი მდიდრებისთვის დამითმია, მე რად მინდა, ოღონდ საკუთარმა ფეხებმა არ მიღალატოს, — მშვიდად მიუგო ხელოსანმა და სხვა მხარეს გაუხვია.

ჰაჯი აღამ ააფორიაქა ამ ავისმო-

მასწავებელმა ოხუნჯობამ და ის იყო უნდა გასცლოდა ელიშეს ღუქანს, რომ ამ დროს შეგირდი მოვარდა და ქლოშინით მიაძახა:

— ბატონო, რაც ფორნები იყო, თითო ას, ას ორმოცდაათ მანეთად დაუქირავებიათ.

— რაო? დაუქირავებიათ?... ჩვენი მისაკა სადღა იყო?

— იქ იყო, მაგრამ ვერას გახდა, — ლაღად და უღარდელად მიუგო შეგირდმა და მკვირცხლად შეუდგა ღუქნის დაგვას.

ჰაჯი ალა სწრაფად გაეშურა თავისი ღუქნისაკენ. და, აცახცახებული. შვილს დააცხრა:

— რა ჰქენი? ფორნები ხელიდან გაუშვი! ხომ დარჩა ჩვენი ოჯახი...

შმაგონი წინსაფარში საქონელს ილაგებდა. მამის სიტყვებზე მოკლევ და მრგვალი ტანით გაიჭიმა, ოფლიანი, ნაყვავილარი პირისაზე ასწია და მამას შეხედა. მათ თვალებით ერთმანეთს კარგად გაუგეს. ჰაჯი ალამ ავისმომასწავებელი ღიმილით გადააქნია თავი:

— ფორანი იშოვნე!.. თორემ შვილებს ხელიდან წამგლეჯენ... სახლსაც...

შმაგონს პირისაზე შეეჭმუხნა.

— რას ამბობ? ფორანიც აღარ იშოვება? — შეშფოთდა იგი, საქონელი დაყარა და გაქონილი წინსაფრით ოფლი მოიწმინდა. შემდეგ დაგორებული კასრივით აქეთ-იქით მიაწყდა და გარეთ გავარდა.

ჰაჯი ალა დიდხანს უყურებდა შვილის ქეჩის ჩექმებს, ბრტყელ ფაფახსა და წითელ ყელსაწვევს. იგი ხან გამოჩნდებოდა, ხან ჩაყურყურ-მალავდებოდა ბაზარში მორიალე ჯარისკაცთა ბრბოში, ვიდრე თვალს არ მიეფარა.

ჰაჯი ალა ღუქნიდან გავიდა და სახლის გზას დაადგა.

შინ რომ მივიდა, რკინის პალაზზე ფეხები არ გაუწმენდია, რაც ურყევ წესად ჰქონდა ჰაჯის მთელ ჯალაბობას, ისე შეაბოტა. უფროსმა ოძალმა, დერეფანში მატყლს რომ ჩეჩავდა, ქალბატონით, როგორც ზოგიერთგან წესად აქვთ, ხმამაღლა დაიძახა:

— შოლო, ჰაჯი ალა მობრძანდა, ლაიფა¹ მიაართვი.

მაგრამ როდესაც ჰაჯი ალამ წაიბურღლუნა: „ჯანდაბას ყავაო“, ოძალმა იფიქრა. ან სიზმარში ვარ, ანდა ჩვენს ოჯახს თავზე დიდი უბედურება დაატყდაო; ჰაჯის ფეხებში ჩაუვარდა, ტყავის წულეები გააძრო და, რომ დაინახა ჰაჯის შარვლის გატალახიანებული ტოტები, ელდანაცემი სამზარეულოში შეტრიალდა, რათა ოჯახის წევრთათვის ეს ამბავი შეეტყობინებინა.

ჰაჯი ალამ დიდ „ოღაში“² შეაბიჯა და მის შუაგულში ქანდაკებასავით გაშეშდა.

შემოვიდა ჰაჯი ალას ცოლი ჰაჯი მარი, — მკვირცხლი და გამხდარი ქალი.

— რა მოხდა, ჰაჯი ალა? — ჰკითხა.

— რა უნდა მომხდარიყო? თურქი მოდის, მოემზადეთ!

— ოჰ, ამან³, რას აგიჩემებია „თურქი, თურქიო“, როცა ქალაქი სავსეა სალდათებით.

— ბევრს ნუ მიედ-მოედები, მოემზადე-მეთქი, — მოუჭრა ჰაჯი ალამ.

— არ არის თურქი, არა, ლაიფა ლალიე, — სხაპასხუპით შეესიტყვა მკვირცხლი დედაკაცი და გარეთ გავიდა.

¹ ლაიფა — ყავა (თურქ.)
² ოღა — ოთახი (თურქ.)
³ ამან — მწუხარების, უკმაყოფილების გამოხატველი შორისდებული (თურქ.).

ამ დროს ჰაჯი აღას შეილიშვილ-
მა, ლოყებლაყლაჟა გოგონამ, სავსე
მკლავები რომ ჰქონდა, რძიანი ყავა
მიართვა.

ჰაჯი აღას უფროსმა რძალმა
ლურჯი გასაფენი შემოიტანა, მუ-
თაქის წინ გაავო, გოგონას ყავა ჩა-
მოართვა და გასაფენზე შედვა. მაგ-
რამ ჰაჯი აღამ უნებისყოფო, აფო-
რიაქებული გამომეტყველებით ხე-
ლი უღონოდ აიქნია—ყავა გაიტანე-
თო.

ქალებმა გაოცებით შეხედეს
ერთმანეთს, ქვეყანა ხომ არ იქცევა.
ჰაჯი აღამ ყავაზე უარი რომ თქვაო!

ჰაჯი აღა ტახტზე ჩამოჯდა და გა-
ოგნებული მზერა მოატარა ირგვ-
ლივ. ოთახში სიწყნარე სუფევდა.
ფანჯრის რაფაზე ხშირი რეცხვისა-
გან გათეთრებული ყვავილის ხას
ქოთანი, ოთახის კედლებთან გაშლი-
ლი ლეიბები და ბალიშები თითქოს
აუღელვებლად უყვებოდნენ მშვი-
დი ნადიმების, მხიარული ქორწი-
ლების ამბავს.

ყოველივე ამას კი დღეს ნიადაგი
ეცლებოდა. შეიძლება დღესვე მო-
უხდეს მთელ თავის ავლადიდებაზე
ხელის აღება. ჯერ კიდევ ათი წლის
ასაკიდან, მამასთან ერთად რომ და-
იწყო მოგზაურობა და „ქურთებსა
და თურქებთან“ ვაჭრობა—მას აქეთ
სამოცი წელი გავიდა — აშენებს ამ
ოჯახს ჰაჯი აღა. ორმოცდაათი წე-
ლია ზუსტი საათივით მშვიდად წიკ-
წიკებს მისი ბედნიერი ოჯახი და აი,
დღეს უნდა დაინგრეს! ახსენდება
ანაზდეული სისწრაფით გარდასული
ცხოვრების წვრილმანები, მეხსი-
ერებიდან ამოტივტივდა ჰაჯი აღას
წარსულის სურათები: როგორ და-
აძინა და დამარხა განსვენებული მა-
მის გვერდით თავისი დედა, გაახსენ-
და 1877 წლის ომი, ქარიშხალივით
რომ ჩაუქროლა გვერდით, და ოღნა-

ვადაც არ შეხებია... გაახსენდა, ოც-
დაათი წლის ახალგაზრდამ როგორ
წაიყვანა ცოლი იერუსალიმს, თვალ-
წინ წარმოუდვა საკუთარ სახლში
გადახდილი ქორწილები და წვეუ-
ლებანი... მთელი ცხოვრება ვაჭრო-
ბასა და სიმდიდრის შეძენას შეაღია.
შვილები წამოეზარდნენ, მოესწრნენ,
დაქორწინდნენ. ყველაფერი ჩინე-
ბულად აეწყო — თითქოს ასედაც
უნდა მომხდარიყო — მისი ოჯახი
ვანქს¹ დაემსგავსა და დღეს კი
უნდა დანგრეულიყო.


მისი ოჯახი, მისი ძველი სახლი!
სისხლი თავში აუვარდა ჰაჯი აღას.
ვანა ოჯახი და სიმდიდრე ისევე
მტკიცე არაა, როგორც თავად სამყა-
როს მტკიცე?

და ჰაჯი აღამ, ვითარცა გამო-
ბრძმედილმა კაცმა, ცხოვრებისეული
გამოცდილება მოიშველია: გადა-
წყვიტა, გადაერჩინა ყველაფერი,
რაც სჭირდებოდა, ხოლო თუ ეს არ
მოხერხდა, ის ნივთები მაინც, ყვე-
ლაზე საჭირო რომ იყო. გადაწყვიტა
ყველაფერზე წასულიყო, გულქვა-
ობა გამოეჩინა, დამდაბლებულიყო
კიდევ. ოღონდ ეხსნა ყველაზე
აუცილებელი რამ და თუ ამასაც ვერ
შეძლებდა, თავი მაინც გადაერჩინა.

გვერდით, პატარა „ოდაში“, თუ-
ნუქის ღუმელზე, შორეული ზღურნის
მსგავსად, უსტვენდა და შიშინებდა
ჩაიდან და ოთახის ცხელ, მშრალ
ჰაერს სასიამოვნო სინოტივით აზა-
ვებდა.

სწორედ ამ პატარა ოთახში,
ერთმანეთზე აკოკოლავებულ ლეი-
ბებთან. იჯდა ერთი ხანშიშესული
ქალი. ეს ჰაჯი აღას დამბლადაცე-
მული და სრბუნე იყო. იგი მეუღ-
ლის გარდაცვალების შემდეგ, რე-
ცხვის დროს, სასტიკად გაციებული-

1. ვანქი — მონასტერი (სომხ.).



ყო, ტიფი შეჰყროდა და დამბლა დასცემოდა. არავინ უწყოდა — ტიფმა უყო თუ ნიადაგი უკვე მომზადებული ჰქონდა საამისოდ. ამასთანავე ყურსაც აკლდა. ჰაჯი აღამ თავის თავს არ აკადრა, რომ სნეული და სხვის ანაბარად დაეტოვებინა და ხალხი აელაპარაკებინა. ავადმყოფი თავის სახლში გადმოიყვანა და კუთხე მიუჩინა. საბრალო ქალმა, ბუნებით გამრჯემ და თავმოყვარემ, ძმისთვის სიკეთე რომ გადაეხადა, ოჯახში ჭრა-კერვა და ქსოვა თავის თავზე აიღო და თუმცა მისთვის ეს სამუშაოც მძიმე იყო, გულხელდაკრეფილი მაინც ვერ ძლებდა. მსუქანი იყო, მძიმე, ძალიან უჭირდა წამოდგომა, გარეთ კი დიდი გაჭირვებით, ფორთხვით გადიოდა.

ჰაჯი აღა ახლა კარგად ხედავდა, მისი და დასიებული თითებით როგორ ჭრიდა მუხლებზე გაშლილ ნაჭერს, ხელში ატრიალებდა, კვლავ ჭრიდა და ზომავდა რაღაცის მისადგმელად.

ჰაჯიმ შეხედა დამბლადაცემულს, მაგრამ ვერ დაინახა იგი, რადგან ფიქრით ოთახის ნივთები ფორანში გადაჰქონდა, არჩევდა ყველაზე ძვირფასს.

შემდეგ ათჯერ მაინც წამოდგა, ფანჯრიდან გადაიხედა, ეგების ქუჩიდან რაიმე შევიტყო, მაგრამ გარეთ ჩამიჩუმიც არ ისმოდა. ყველაფერი ისე გამოიყურებოდა, როგორც მშვიდობიან დროს.

მაგრამ აი, შებინდებისას არეული ხმები მოისმა. ჰაჯი წამოხტა და ფანჯარას მივარდა, ფანჯარას რამდენიმე კაცმა ჩაუარა — დუქნის საქონელი წამოეკიდებინათ და შინ ეზიდებოდნენ. მარხილს უკან მამაკაცები მისდევდნენ ფეხით. ესენი მეზობლები იყვნენ. პირველმა მარხილმა

თავზარი დასცა ჰაჯის. და მაშინ, როდესაც ჰაჯი აღამ გარეთ გასვლა დააპირა, რათა ლტოლვილთაგან სიმართლე შეეტყო, ანაზღად სახლის კარმა დაიხრიალა. შემოვარდა ჰაჯი აღას უმცროსი ვაჟი აკოფი და ტალანიდან აღელვებულმა ხმამაღლა დაიძახა:

— მამა!

ჰაჯი აღა გავარდა.

— აკოფ, რა მოხდა?

აკოფმა ტალახიანი ფეხები სასწრაფოდ გაიწმინდა და იყვირა:

— თურქები მოვიდნენ, უნდა გავიქცეთ!

შემდეგ სულმოუთქმელად შევარდა ოთახში, კუთხეებში მიდგმულ სკივრებს დააცხრა და მთელი ძალით გამოსწია.

ჰაჯი ვაჟს მიუახლოვდა.

— ფორანი დაიჭირეთ?

— ფორანი ვერ ვიშოვეთ, მარხილი დავიჭირეთ.

ჰაჯი აღასთვის ეს პირველი საშინელი ლახვარი იყო, მაგრამ, როგორც ცხოვრებაში გამობრძმედილმა კაცმა, გუნებაში მყისვე გაივლო, დახანების დრო არ არისო. უბედურებასაც უნდა შეურიგდეს და ავლადიდებაც უნდა გადაარჩინოს.

მაგრამ რა დაეტევა ერთ მარხილზე?.. ჰაჯი აღა უფრო გაშმაგდა:

— გადასარჩენი გადაარჩინეთ... ყველაზე საჭირო და აუცილებელი...

აკოფმა ნაცრისფერი ყაბალახი შეიხსნა, გაყვითლებული, სქელი პალტო გაიძრო და კვლავ სკივრებს დააცხრა.

რიგრიგობით შემოვარდნენ და კართან გახედნენ შოლო, შმაგონის ცოლი, უმცროსი რძალი და მეზობლის ქალი.

ჰაჯი მიუახლოვდა აკოფს და ხელი მოჰკიდა:

— გონს მოდი, — დინჯად უთხრა, — რაც საჭიროა, ის გაიტანე.

შემდეგ ოჯახის წევრები დამოძღვრა:

— რაც დაგჭირდებათ, იმას მოუყარეთ თავი, იცოდეთ, გზაში დავრჩებით.

მეზობლის ქალმა, აქამდე რომ ჩუმად უსმენდა მათ, რა დაინახა, ოჯახის ყველა წევრი მზადებას შეუდგაო, ჰაჯი ალას მიმართა:

— ჰაჯი ალა, შემოგვევლე, თქვენ მიდიხართ, მე რაღა მეშველება?

— აბა რა ვიცი? — მოუჭრა ჰაჯი ალამ, — მე რა შემიძლია?

მეზობლის ქალს თავზარი დაეცა. მას ჰაჯი ალას ოჯახში მუშაობით გაჰქონდა თავი და პურის ერთი ნაჭრისა და ნასუფრალის იმედზე იყო. იგი ფიქრობდა — ქვეყანა ისეა მოწყობილი, რომ არასოდეს დაირღვევაო. ხოლო თუ დაირღვევა, ჰაჯი ალა ალბათ რაიმეს მოიფიქრებს და ჩემსავით გაჭირვებულს არ გასწირავსო.

მაგრამ ჰაჯი ალას გულქვა პასუხმა იმედი გაუცრუა საცოდავ ქალს. რა დაინახა, ჩემი შემწე არავინ არისო, ამოიოხრა და გარეთ გავიდა.

ვიდრე ოჯახის წევრები ბარგს თავს მოუყრიდნენ, ჰაჯი ალა ბოლოს ცემას მოჰყვა ოთახში, სწორედ ისე, როგორც დანადგლიანებული აქლემი. უმზერდა აწეწილ ოთახს, სადაც ერთმანეთზე ახუხულავებულიყო „გამოუსადეგარი“ და „ზედმეტი“ ბარგი, უყურებდა თავისი ოჯახის ნგრევას. მაგრამ, სასოწარკვეთილებაში ჩავარდნილი, ტკივილს ვეღარ გრძნობდა. უდიდესი უბედურებისაგან თვალთ უბნელდებოდა. იგი სანთელივით გაყვითლდა. ოჯახის წევრები ტანსაცმელს კრავდნენ, ისევ ხსნიდნენ, კვლავ არჩევდნენ.

განუწყვეტლივ ისმოდა: „ჰაჯი ალას წინდები“, „ჰაჯი ალას ლეიბი“, „ჰაჯი ალას ქურქი“ არ დაგორჩეთო. შმაგონის ცოლი კუთხიდან უთვალთვალდებდა ჰაჯი ალას და, რა შემჩნია, მკვდრისფერი ედო, ჰკითხა:

— ჰაჯი ალა, კონიაკს დალევე?

ჰაჯი ალა დუმდა, ვითარცა მწუხარების გამომხატველი ქანდაკი. მღელვარებისაგან პირი გაუმწარდა და ნერწყვის ყლაპვისას სახე ემანჭებოდა.

შინაგანად კი ჩქარობდა და ოჯახის წევრთა მუშაობას უმზერდა. მოღუშული, გამეხებულ მეციხოვნესავით დროდადრო თავისი ციხას, ამა თუ იმ ნივთის ღირებულებას გადაათვასებდა ხოლმე და ბრძანებდა: „ღვთის გულისათვის, შეიგნეთ, ეგ კი არ არის საჭირო, არამედ აი ის“. ბოლოს კი, თითქოს მოჩხუბართ აქეზებსო, გამხნევება დაიწყო: „ეგრე, ეგრე, ეგრე, აი ეგრე... აუცილებელი, აუცილებელი-მეთქი“... ასე იმეორებდა დიაკვანივით „აუცილებელს“ და მიაჩნდა, რომ დიდ საქმეს აკეთებდა, ოჯახს შველოდა.

ჰაჯი ალას და ამ დროს პატარა „ოღაში“ იჯდა და წყნარად უმზერდა თავის ძმას. უაღრესი სიმშვიდით სავსე იყო მისი დიდრონი, ჩამქრალი თვალები. თვალების ქვემოთ მოცისფრო პარკები გასჩენოდა, პირისახე დასიებული, ავადმყოფურად თეთრი ჰქონდა.

მას ვერავინ ამჩნევდა.

ოჯახის წევრები უკვე მზად იყვნენ, როდესაც კართან შუილითა და დგაფუნით მოსრიალდა დიდი, მძიმე მარხილი. საქონლით დატენილ ტომრებზე აჭარხლებული და აღელვებული შმაგონი იჯდა. მან, მარხილი ჯალაბის წასაყვანად მოიყვანა. ჩამრგვალებული შმაგონი ტომრებიდან ჩამოცურდა, სახლში

შევარდა და სულმოუთქმელად დაიღმუვლა:

— ხედავთ, ჩვენს უბედურებას?.. დუქანში საქონელი დარჩა... ფორანი არ არის...

— ვუუშ!..¹ — დაიცეს რძლებმა მუხლებზე ხელები და ჰაჯი აღას შეხედეს.

ჰაჯი აღამ აქლემის ნაღვლიანი მზერა შმაგონს მიაპყრო, ხმა კი არ გაუღია.

— აბა, ჰაჯი აღა, ჩაიცვი, წავადეთ, — უთხრა შმაგონმა და გავიდა.

შმაგონის ცოლმა სკამი მიუდგა ჰაჯი აღას. შემდეგ უმცროსი რძლის დახმარებით მას მეორე შარვალიც ჩააცვა.

ამ დროს პატარა „ოდიდან“ ყრუ ქვითინი მოისმა.

— ეს ვინ ტირის? — იკითხა ჰაჯი აღას ცოლმა და შიგნით შევიდა.

რძლები უკან მიჰყვნენ მას. ოთახში რაღაც ლაპარაკი შეიქნა. ჰაჯი აღამ მხოლოდ ცოლის სიტყვები გაიგონა:

— ჰაჯი აღა არ გაიყინება გზაში, ნუ დარდობ.

შემდეგ ისევ ლაპარაკი გააბეს.

გაბრუებულ ჰაჯი აღას მხოლოდ ახლა მოაგონდა, რომ მთელი დღის განმავლობაში არც კი გახსენებია თავისი დამბლადაცემული და. ამ ფიქრმა გული დაუმძიმა. ბოლოს ფეხი შარვალში გაუყარა და წარმოთქვა:

— რაშია საქმე, რა მოხდა?

— არაფერი, — მიუგო უმცროსმა რძალმა, — სრბუნე ტირის.

— ეს რა ალიაქოთი ატყდა, ეგ სად უნდა წავიდეს? — დაიგრგვინა

ჰაჯი აღამ რისხვით და ბრაზი მოეწია, რომ მოსმა დამ თავისი პირით არ განაცხადა თანხმობა, მე დაუბრჩებო.

უმცროსმა რძალმა გაცემული თვალეები მიაპყრო ჰაჯი აღას:

— სრბუნს ვტოვებთ?

ჰაჯი აღამ დამცინავად ჩაიქიჩილა:

— ეეჰ, ჩემო ხანუნ, ნეტა მე და შენ კი წავალთ?!

ჰაჯი მარი ამ დროს სრბუნის ოთახიდან გამოდიოდა და ქმრის სიტყვებს რომ მოჰკრა ყური, თავზარი დაეცა:

— ღმერთო, შენ დაგვიფარე! სრბუნს ვტოვებთ?

— მე ვტოვებ? — იფეთქა ჰაჯი აღამ, — ჯერ ვნახოთ, მარხილზე ადგილი დარჩება?!

— „ადგილი დარჩებაო“, რას მიქვია, ჰაჯი აღა, ამდენი ხალხი როცა მივდივართ!..

ჰაჯი აღას ცოლმა ყური აღარ ათხოვა ქმრის ლაპარაკს, უმცროს რძალს უხმო და მასთან ერთად პატარა ოთახისკენ გაემართა:

— ესთერ, შვილო, სრბუნს ჩააცვი.

ჰაჯი აღას და კუთხეში, მინდარზე იჯდა, მუხლებისკენ დაეხარა თავი და ცრემლებს იწმენდდა.

ჰაჯი მარი მულისკენ დაიხარა:

— სრბუნ, დაიკო, რა გატირებს?

დამბლიანმა ქალმა არ უპასუხა.

შმაგონის ვაჟმა — რვა წლის კარომ, ოთახში რომ შესულიყო და მათ ლაპარაკს ყურს უგდებდა, ბეზიას განუბარტა:

— თურქებისა ეშინია.

სიჩუმე ჩამოვარდა.

— როგორ არ ვიტყვო, — სწეულ სრბუნს გული ამოუჯდა, — ჰა-

¹ მწუხარების გამოხატველი შორისდებული (სომხ.).

გი ალა ძალიან დელავს, მეშინია, გზაში ავად არ გახდეს.

— მაგისტვის ტირისარ? — გაოცდა ჰაჯი მარი, — ჩვენზე ნუ დარდობ, მოემზადე!..

— მე? — სევდანარევი ღიმილით შეხედა სრბუნმა ჰაჯი მარსა და უმცროს რძალს, — მე არ წამოვალ.

— რატომ?

— თქვენი თავი გადაიბრინეთ, მე დამბლიანი ვარ, დღეს არა, ხვალ მოვკვდები, — მიუგო სრბუნმა ნალვლიანი ხმით.

— დამბლიანი რას მიქვია? — შეეკამათა ჰაჯის ცოლი, — სული ტკბილია, მოემზადე!

ჰაჯი დიდ ოთახში ბოლთასა სცემდა და ამ ლაპარაკს ისმენდა. ცოლის დაჟინებამ მოთმინება დაუუკარგა და ჰაჯი მარს გასძახა:

— იჩქარე, დრო აღარ იცდის!

ჰაჯი მარი მულის ოთახიდან გამოვიდა და თვალები ჰაჯი ალას მიაშტერა.

— ადგილი არ არის, გესმის! — დაიგრგვინა ჰაჯი ალამ და სიტყვაზე „გესმის“ უფრო აუმაღლა ხმას.

— ბარგი მოაკელი და ადგილიც იქნება, — არ ცხრებოდა ჰაჯი მარი.

— ეეჰ, — აათვალერა ჰაჯი ალამ ცოლი, — ბარგი რომ მოაკლო, შვილებს რაღას აჭმევ? ქვეყნის აღსასრული ხომ არ დამდგარა!

ჰაჯი ალამ ყაბალახი გაიკრა.

— ჩემ გამო ნუ იგვიანებთ, წადით, ჰაჯი ალა ცოდოა, — გამოსძახა სრბუნმა.

— ასე არ გამოვა, შენ ჩვენთან ერთად წამოხვალ, — დაბეჯითებით თქვა ჰაჯი მარმა და გარეთ გავიდა მემარხილეს სანახავად.

პატარა ოთახში შევიდნენ, ბავშვებიც შემოეხვივნენ სწულს. მან

კი, რა დაინახა, ყველა მე მიყურებს და მელოდებო, თავი აიღო, მშვიდი, კეთილი თვალებით შეხედა მათ და წარმოთქვა:

— წადით, მე ნუ მიყურობთ, მე არავისთვის საჭირო არა ვარ.

ამ დროს ოთახში აკოფი და შმაგონი შევიდნენ და ოთხივე კუთხე მოათვალიერეს — ხომ არაფერი გვრჩებაო.

რძლები ემუდარებოდნენ ქმრებს, მამიდა დაეყოლიებინათ წამოსვლაზე და ადგილი გამოეძებნათ მისთვის მარხილზე.

საგონებელში ჩავარდნილმა ძმებმა ერთმანეთს უხმოდ შეხედეს, შემდეგ ჰაჯი ალასკენ გაიხედეს. რძლების მუდარა მან კარგად გაიგო.

აკოფმა თვალთმაქცურად ჰკითხა ძმას:

— ჰა, შმაგონ, რას იტყვი, ბარგი შევამსუბუქეთ?

შმაგონს შუბლი შეეჭმუნა იმ ძუნწივით, ვისაც ფული სთხოვს.

— არ ვიცი, აბა რა გითხრა?

და გარეთ გავიდა.

ბაღლებმა ტირილი მორთეს:

— ბებია სრბუნს თურქები მოკლავენ.

მისცვივდნენ დამბლიან ქალს, მოეხვივნენ და კოცნა დაუწყეს.

სრბუნმა გულში ჩაიკრა ისინი და აქვითინდა:

— ღმერთი იყოს თქვენი მფარველი, ჩემო მიტრედებო, წადით, მე ნუ მიყურებთ.

რძლებმა წაიცრემლეს და ბავშვები განზე გაიყვანეს.

ჰაჯიმ ერთი-ორჯერ გაიარ-გამოიარა დიდ ოთახში, შემდეგ ქუჩაში გაეხვია და პატარა ოლაში შევიდა. თავის დას მიუახლოვდა.

— აბა, სრბუნ, — უხალისოდ ამოღერდა, — კარგად იყავი. — და

ხელი ხელზე დაადო. — არ შეშინდე, თურქები ხელსაც არ იგახლებენ. როცა მოვლენ, უთხარი: სახლი თქვენია, მე ხელს ნუ მახლებთ-თქო.

შმაგონმა, მამას რომ შეჰყვია, დასძინა:

— უთხარი, სიზინ ოჯახა დუშმინშიმ — თქვენს ოჯახში მოვხვდი-თქო.

სარბუნმა ათრთოლებული ხელები მოჰკიდა ჰაჯი აღას ხელს, ტუჩებთან მიიტანა და ეამბორა. ცრემლის ერთი წვეთი ჩამოუგორდა თვალისგან და ჰაჯი აღას ხელზე დაეცა. დამბლიანმა ქალმა უბიდან ცხვირსახოცი ამოიღო და ძმას ხელი გაუშუმშრალა, შემდეგ ერთი წყვილი შაუცხორო ხელთათმანი გამოაძვრინა მინდარს ქვემოდან და ჰაჯი აღას გაუწოდა:

— ხელებზე ჩაიცვი, გზაზე არ შეგცივდეს.

მერე სლუკუნით დასძინა:

— თვალი დამიდგეს... ბავშვებს ვეღარ მოვუქსოვე.

— არაფერია, არაფერია, — გულგრილად დააშოშმინა ჰაჯი აღამ და ოჯახის წევრებს მიუბრუნდა:

— აბა! — შესძახა მათ.

თვითონ კი გავიდა. ჰაჯი მარბიქ არ იყო. როგორც ჩანს, მეზობლებში გასულიყო სნეული მულისთვის ადგილის გამოსაძებნად.

ჰაჯი აღამ ყველაზე მოხერხებული ადგილი აირჩია მარხილზე, დაჯდა, საბანში გაეხვია და გაირინდა.

რადგან ოჯახის წევრები იგვიანებდნენ — უეჭველია, მის დამბლიან დას არწმუნებდნენ, რომ წამოსულიყო, — ჰაჯი აღა გაბრაზდა, თავი საბანიდან გამოყო და დაიძახა:

— იჩქარეთ, დრო აღარ ითმენს... ისინი სადაცაა მოვლენ...

და სასწრაფოდ ჩამალა თავი საბანში, რომ არ გაცვიებულიყო.

მაგრამ მისი ოჯახი გამოსვლას აგვიანებდა. შმაგონსა და აკოფს ეს მოდათ, ჰაჯი აღამ რისთვისაც გაიქვავა გული.

ალბათ ცხოვრების სიბრძნე სწორედ ამას ითხოვდა, რომ მამის მტკიცე გადაწყვეტილების მაღლით თვითონაც აღწევდნენ თავს განსაცდელს და საკმაო ქონებაც მიჰქონდათ. მამის საქციელი მათ თავიანთ გულში გაამართლეს. უნდა დააფასო მისი სიბრძნე, უნდა გაითვალისწინო, რომ მთელი სიმდიდრიდან ისღა შეგვრჩება, რის წაღებასაც მოახერხებ. მამა ჭკვიანურად სჯის, დამბლიან დას რომ ტოვებს და ბარგი მოაქვს. ვინ იცის, რა ელით მათ უცხოობაში, თავი გასატანი ექნებათ, ახალი სახლის აშენებაც მოუწევთ. ქვეყნის აღსასრული ხომ არ დამდგარა!

და როგორც ჩვეულებრივ ხდება ხოლმე ასეთ დროს, ისინი ადვილად შეურიგდნენ იმ აზრს, რომ დამბლიანი მამიდა ზედმეტი ბარგია მათთვის. ხოლო რადგანაც გაქცევამ და სიკვდილის კლანჭებიდან შედარებით „იღბლიანმა“ დასხლტომამ, განსაცდელიდან თავის დაღწევამ ცოტა-ოდნავ გამოუკეთა ორივეს გუნება, ხუმრობასაც კი მოჰყვნენ:

— ჩვენ ქორწილში მივდივართ, მამიდა კი სახლის საყარაულოდ რჩება.

— ორ დღეში უკან დავბრუნდებით.

— თურქები ხანუმ-ხათუნით გაუფრთხილდებიან მამიდას.

— დამბლიანს ხელს ვინ ახლებს?

რძლებმა კი, ვინც კარგად უწყობდნენ ჰაჯი აღას გაუტეხელი ხასიათი, რომ დაინახეს, მათი ქმრები არ წუხდნენ, ქათმებივით იოლად შეეგუენ ამ ამბავს და მიყუჩდნენ...

მათ ტირილით შემოსეს ბაღლები. შემდეგ სნეულ სრბუნთან მივიდნენ, გადაკოცნეს, მიუტანეს რამდენიმე სანთელი, ერთი დიდი შეკვრა პური, წყალი, ასანთი, წინ დაუდგეს ეს ყველაფერი და ოხვრაკვნესით გარეთ გავიდნენ.

გარეთ კი დიდი ჩოჩქოლი იყო. სარკმლებისა და ღია კართავან გამომჭვირვალე სინათლეში ჯგუფ-ჯგუფად მოჩანდა ხალხი.

თავზე სქელი შალით მობურთული ქალები, ყაბალახიანი მამაკაცები, შარფმოხვეული გოგო-ბიჭები შემფოთებულნი ირეოდნენ სახლების წინ, მარხილებისა და ფორნების ირგვლივ. ისმოდა ხმაური და ვიშვიში.

აი, მოხუცი დიაკვანი, გამხმარი, გაპარსული ნიკაპი რომ უკანკალებს, თავისი ოჯახით უმარხილოდ დარჩენილა, საკუთარ ფეხებზე დაუწყარებია იმედი; მოხუცი მთლად მოშვებულა — ბაღლად ქცეულა. ცოლი კი წინ მიერეკება. აჰა, დაადგნენ კიდევ გზას უბარგოდ და უტანისამოსოდ. აგერ, ერთი დროული კაცი თავის მეზობელს წაჰკიდებია, ვისაც სურს ზედმეტი აჩუქოს მის მეეტლეს და მარხილი თვითონ დაინარჩუნოს, ერთიც და მეორეც ცხენებს აღვირებით აქეთ-იქით ექაჩებიან.

— ღმერთო, შენ მიშველე... დავრჩით! — გაჰყვირის ერთი ქალი, მაგრამ ამ აურზაურში მას არავინ ეხმარება.

ერთი ფორანი, ხარახურითა და ადამიანებით გაჭედილი, მიადგა და ზედ მიეზჩინა ჰაჯიანთ მარხილს.

— ხაბარდა! — დაიგრგვინა მეეტლემ.

ფორნიდან ვიდაცის უღალ წვერულვაშიანმა და ხმელ-ხმელმა პირისახემ გამოიხედა.

ეს სასამართლოს მწერალი იყო. — რას უდგახართ? — დაიყვირა მან.

კიდევ ორი ფორანი მოადგათ უკან, აჩქარებდნენ. მწერალმა იღრიალა. მას აუხსნეს, ჰაჯიანნი დამბლიან დას ელოდებიანო.

— რას დამდგარხართ, გარეკეთ, — დაიყვირა მწერალმა, — დამბლიანის წაყვანის დროა ახლა? ჯანდაბას მისი თავი.

— ქალი დატოვონ და წავიდნენ? რას ამბობ? — შეედავნენ ფორნიდან.

— გაქცევის დროს ხეიბარა ზედმეტი ბარგია.

— იჩქარეთ-მეთქი, დავგვიანდით, — გახელდა ჰაჯი ალა და ადგილიდან წამოდგომა დააპირა, რომ წასულიყო და გაეგო, მისი ოჯახი შინ რას იქმოდა.

სწორედ ამ დროს შმაგონმა და სომეხმა მემარხილემ, ჰაჯი მარს რომ აქეთ-იქით ამოსდგომოდნენ, იგი გარეთ გამოიყვანეს. გაკაბასებული ქალი კი მკლავების განთავისუფლებას და კვლავ შინ შესვლას ლამობდა, რათა სნეული მული გამოეყვანა.

— გამიშვით, უნდა წამოვიყვანო. — წიოდა იგი.

— ადგილი არ არის, დედი, ადგილი არ არის, — არწმუნებდა მემარხილე.

მაგრამ ქალი მაინც წინააღმდეგობას უწევდა. რძლები და ბავშვები ტიროდნენ. ფორნებში კი დრტვინავდნენ და ჰაჯი ალას მარხილს აჩქარებდნენ.

ისინი სასწრაფოდ შესხეს მარხილზე. ჰაჯის ცოლი ძალით მოიყვანეს და მარხილზე შეაგდეს.

როგორც კი ქალები და ბაღლები მარხილში დაიგულა, მემარხილემ

გამეტებით გადაუჭირა მათრახი ცხენებს. მარხილი მოსწყდა ადგილს და მემარხილე ცხენებს გვერდით აედევნა.

შმაგონი და აკოფი კართან დარჩნენ. წასვლის წინ ერთი წამით დაყოვნდნენ და ერთმანეთს შეხედეს. უნდა შესულიყვნენ, უკანასკნელად ენახათ დამბლიანი მამიდა. ფანჯრიდან შუქი გამოკრთოდა. ძმები შიგნით შევიდნენ, მამიდას მიუახლოვდნენ. იგი მშვიდად იჯდა და ეს სიმშვიდე სრულიად არ ეხამებოდა იმ საერთო შფოტსა და შიშინობას, მთელი ქალაქი რომ მოეცვა.

— მამიდა!.. შეცოდება შეგვი... — და აქვითინებული აკოფი დამბლიანს ხელზე ეამბორა.

— ღმერთიმც შეგეწევათ, ჩემო მტრედებო. წადით... ჰაჯი აღას ბალებს კარგად მიხედეთ, არ გაცივდნენ... — წარმოთქვა სნეულმა მზრუნველი ხმით.

შმაგონმა ფარისევლურად აიჩუყა გული, თვალთმაქცურად მოიქცია ყბა. ისიც მიუახლოვდა, ხელზე ეამბორა ქალს, უცრემლო თვალები მოიწმინდა და გარეთ გავიდა. მას აკოფიც მიჰყვა, რომელიც ისე ჩქარობდა გასვლას, რომ ლამის შმაგონს შეასკდა.

ორივე გაიქცა, რათა თავიანთ მარხილს დასწეოდნენ.

მთელი ქალაქი ამლილიყო. მიდიოდა ფორნები, მარხილები, მათ გვერდით კი ფეხით მიმავალნი მიაბიჯებდნენ შფოტით და ხმაურით, როდესაც შმაგონი და აკოფი თავიანთ მარხილს დაეწივნენ. უკან დარჩენილი ქალაქი ხანძრის ანარეკლმა გაანათა.

— ჰოოოფ, — დასძახა მათ წინ მიმავალმა მეფორნემ და ფორანი გააჩერა. მას სხვებმაც მიჰბაძეს და ყველანი გაჩერდნენ.

— რისთვის გავჩერდით? — გაისნა შემკრთალი და უკმაყოფილო ხმები.

მაგრამ არავინ უწყობდა, რა მოხდა, მხოლოდ ბალებს ტირილი და დედაკაცთა მოთქმა მოისმა გნიასში. სიბნელეში ჩანთქმულ ქალაქის დასავლეთი მხრიდან ზარბაზნის ყრუ გრუხუნი მოდიოდა.

ქარავანში ჩოჩქოლმა იმატა. ჰაჯის შვილიშვილებმა ტირილი მორთეს:

— ბებია სრბუნს მოკლავენ?..

ჰაჯი მარს, მანამდე კუმტად და მწყრალად რომ იყურებოდა აქეთიქით, ბავშვების ტირილის გაგონებაზე ცრემლით აევსო თვალები და აქვითინდა.

— არ მოკლავენ, ნუ ტირიხართ, — თქვა და ცრემლი შეიშშრალა.

ბავშვებმა რომ დაინახეს, ბებია ტირისო, თვითონაც უმატეს ქვითინს.

ზარბაზნის ხმამ ჰაჯი აღა უფრო დააშინა, უფრო გარკვევით დაანახა სიკვდილის აჩრდილი და ცეცხლში მოქცეული კაცივით იგრძნო, რომ რაღაც ძალა მხოლოდ ერთს უკარნახებდა: იაქცეულიყო, ჩქარა დასხლტომოდა სიკვდილის ბრჭყალებს. დანარჩენი — ცოლი, შვილი, ამხანაგი, მეგობარი—ყველაფერი უნებლიეთ დაპატარავდა მას თვალში. იგი გრძნობდა, თუ რაოდენ საშინელი იყო ეს ამბავი, მაგრამ იმასაც იგრძნობდა, რომ ეს ასეა.

გაოგნებული აღა თვალებს აქეთიქით აცეცებდა. ყოველ საგანზე მცირე ხანს აჩერებდა მზერას, მეორე წაშში კი ივიწყებდა. თითქოს სიზმარში ხედავდა მის გვერდით, გზის პირზე მომავალ მეწაღე პოლოსას. ამ ბრგე ახალგაზრდას, ვინც მათ მეზობლად ცხოვრობდა, ლაბა-

დაზე დაესხა ორი ბავშვი და თოვლზე მისრიალებდა. უკან ბარბაციით მოჰყვებოდა სულშეხუთული, მოხუცი მამა. აი, დაიღალა იგი, გაჩერდა, გზიდან გადაუხვია, წაბარბაცდა, თოვლში ჩაეფლო და გაიბინდა.

— აღარ შემიძლია... იარეთ...

უყურებს მას ჰაჯი აღა და ველარ უძლებს ამ საცოდაობას.

აი, ქარავანი კვლავ დაიძრა. მთის ყინვა თავის მსუსხავ თითებს უჭერს ჰაჯი აღას წვერზე და ისიც პირისაზხეს საბანში მალავს.

მთის ქარი უბერავს და თოვლის ნამქერს, ჯერ გველივით მოსრიალეს, შემდეგ კი ვეშაპივით აზვირთებულს, ჰაერში მოაფრენს, აკვნესებს, აქვითინებს...

— ღმერთო, შენ მიშველე, — ჩურჩულებს ჰაჯი აღას უმცროსი რძალი.

უფროსმა რძალმა პირჯვარი გადაისახა და წამამალა და გრძნობით დაიწყო ლოცვა.

შალში გახვეული ჰაჯი მარი კი დამბლიან მულზე ფიქრობს და მიმედ ოხრავს.

* *


სასტიკმა განსაცდელმა და მღელვარებამ გაიარა და დადგა მშვიდი. გაჭირვებული დღეები ლტოლვილებისთვის ახალ სამხარეო ქალაქში. მოულოდნელად გადატაკებულებმა, ერთ საათში უსახლკაროდ დარჩენილმა მდიდრებმა დაბადებით უპოვართა ბედი გაიზიარეს და ქველმოქმედებაზე დაამყარეს იმედი. არც გაჭირვებაზე რომ არ ზრუნავს და არც არავითარ თავმოყვარეობას არ უწევს ანგარიშს. მოვიდნენ, რათა მიხედობოდნენ ყო-

ველგვარი გასაჭირის მიმართ გულგრილ, ყოველგვარი თავმოყვარეობის მიმართ ანგარიშგაუწეველ ქველმოქმედებას და მის მულამ დაგვიანებულ შემწეობას დაეყრდნენ. ისინი საქველმოქმედო სკოლასა და კერძო, დაუსახლებელ შენობებში მოათავსეს. მიუტანეს პური, სამოსი, ფული, სანუგეშო სიტყვებიც მიაყოლეს, მაგრამ გულმოწყალების ტალღა რა სიმძლავრითაც მოიქცა, იმავე სისწრაფით უკუიქცა და გაჭირვებამ ამყამად უკვე დაუბრკოლებლად და მტკიცედ მოიკიდა ფეხი.

ჰაჯიანთ ქალაქი ჩქარა უკან დაიბრუნეს. მამაკაცები, მათ რიცხვში აკოფი და შმავონი, დაბრუნდნენ მათ საკუთარ გადაბუგულ და გაძარცვულ სახლში. ხმები გავრცელდა, რომ იმას, ვინც დაბრუნდა, ბედმა ზოგი რამის პოვნაც კი არ იტუნაო. ერთხელ მათი ქალაქის ხუმარა გარანი ჩამოვიდა და ლტოლვილთ სასაცილო ამბები უამბო, რაც მომხდარიყო როგორც გაქცევის, ისე თურქების შესვლის დროს. წარმოადგინა, თუ როგორ იხუტებდა დაბნეული ვაჭარი მუთაქას იმ დროს, როდესაც ბავშვი იქვე იდგა და ტიროდა. შემდეგ ჰაჯი აღას დამბლიანი დის ამბავიც მოჰყვა, ვინც უგზოუკვლოდ გამქრალიყო და ვისზედაც ოჯახის წევრები ცდილობდნენ ან კრინტი არ დაეძრათ, ან თავი იმით ენუგეშებინათ, რომ წამოსულიყო, გზაში მაინც დაიღუპებოდაო. ჰაჯი აღა უფრო მოიღუშა. ეს რომ შეამჩნია, გარანმა თამამად და მხიარულად შეუტია:

— ნეტავი შენ, მოგცლია! რძლები, ვაჟები, შვილიშვილები გყავდეთ ჯანმრთელად შენ და შენს ცოლს!

მაგრამ ჰაჯი აღა განადგურებული იყო.



ამიერიდან მისგან სიტყვას იშვიათად თუ გაიგონებდით. კუთხეში მიჯდებოდა, ხან აბოლებდა, ხან საანგარიშოს აჩხაკუნებდა, დროდადრო კი გადააქნევდა თავს და აღმოხდებოდა:

— ეჰ, ეჰ, ეჰ!...

რაც ჩანოვიდა, ერთხელაც არ გასულა ქალაქში.

ნაცნობ-მეგობრები მოდიოდნენ, ეპატიუებოდნენ, მაგრამ ჰაჯი ალა ყველას უარით ისტუმრებდა.

ოჯახის წევრები შეფიქრიანდნენ. ჰაჯი ალას ეს უჩვეულო საქციელი დაკარგულ სიმდიდრეზე დარდს მიაწერეს და იფიქრეს, მოხუცი ალბათ ჭკუიდან შეცდაო. შმაგონს შეუთვალეს, ან შენ, ან აკოფი ჩამოდითო.

* *

იანვრის სუსხიანი და ნათელი დილა თენდებოდა, როცა ჰაჯი ალა საწოლზე წამოჯდა. ჰაჯი მარსა და რძლებს, ბავშვებით მკერდზე მიხუტებულებს, ეძინათ იმ პატარა და ვიწრო ოთახში, ჰაჯიმ განგებ რომ დაიქირავა და უარი თქვა უფასო თავშესაფარზე.

— ჰაჯი ალა, ასე ადრე რამ აგაყენა? — ჰკითხა შეშფოთებულმა ცოლმა და ისიც წამოჯდა თავის საწოლზე.

— დამავიანდა, — წაიბურტყუნა ჰაჯი ალამ და ჩაცმა დაიწყო.

ჰაჯი მარმა წარბებს ქვემოდან ყურადღებით შეათვალიერა ქმარი და მის თვალებში განურჩეველი ნაღველი შეამჩნია. ადგა, ჩაცმაში დაეხმარა, წყალი მოუტანა, პირი დააბანინა. ჯოხი რომ აიღო ჰაჯი ალამ და წასვლა დააპირა, ცოტა არ იყოს შემკრთალმა ცოლმა ჰკითხა:

— საით?

— ეკლესიაში წავალ. ჰაჯი მარს გაუკვირდა, მაგრამ ტუჩზე იკბინა, რძლები შეათუცხუნა:

— ჩქარა წამოდექით, ჩვენ ეკლესიაში მივდივართ.

რძლებმა გაკვირვებით შეხედეს ჰაჯის, მაგრამ ჰაჯი მარმა ტუჩებთან თითი მიიტანა, დაჩუმდითო.

ქუჩაში გამოვიდნენ და თოვლიანი, მოყინული გზით უსიტყვოდ გაემართნენ ეკლესიისაკენ.

ეკლესიის ეზოში რომ შევიდნენ, ჰაჯის მშვიდ პირისახეზე კუნთები შეუტოკდა. იგი ათრთოლებული ტუჩებით შეეხო ეკლესიის ქვის კარს, ეამბორა, პირჯვარი გადაიწერა და ნიკაპაკანკალებული შევიდა შიგნით.

დილის უამი იყო. მლოცველები ჯერ არ ჩანდნენ. ჰაჯი ალა ლოცვას რომ მორჩა, ცოლმა უთხრა, შინ წავიდეთო, მაგრამ ჰაჯი არც განძრეულა. იგი თავის ადგილზე დაჩოქილი დარჩა. წირვას დაელოდნენ. ჩქარა უფროსი რძალიც მოვიდა. რძალ-დედამთილი კუთხისკენ განაპირდნენ და ჩურჩული დაიწყეს. ჰაჯი მარისთვის ცხადი შეიქნა, რომ ჰაჯი ალა სულიერად დაავადებულიყო.

ჰაჯი დაჩოქილი იყო და უფრო ფიქრობდა, ვიდრე ლოცულობდა.

ჰაჯი მარმა შეხედა მის ჩამომხმარ ტანს, მოხრილ ზურგს, გაყვითლებულ პირისახეს, ბოლისაგან შეტრუსულ უღვაშებს და თეთრ გაბურძღნულ წვერს, ლტოლვის შემდეგ სამართებელი რომ არ დაჰკარებოდა, შეხედა და იგრძნო, რომ მის ქმარს ნაღველი მეტისმეტად მორეოდა.

ცოლმა მუთაქა მიუჩოჩა მოხუცს, მაგრამ მან უარი თქვა დაჯ-

დომაზე. ეკლესიაში სიჩუმე იყო და ციოდა. საკმევლის სასიამოვნო სურნელი ჯერ კიდევ ჰაერში ტრიალებდა. აი მზის მეწამული სხივები სარკმელთაგან გადმოიღვარა. მოვიდა მნათე, მერე მღვდელი, სამლოცველოში თანდათან იმატეს მლოცველებმა.

დაიწყო წირვა. ჰაჯი უძრავად იდგა და აუღელვებლად დასცქეროდა ცივ ფილაქანს. მხოლოდ დროდადრო, როდესაც თმაშევერცხლი ტერტერა ხალხს მიუბრუნდებოდა და თავისი გულიდან ამომავალი ხმით იტყოდა: „მშვიდობა ყოველთა“, — ჰაჯი თავს ჩაჰკიდებდა და, შემკრთალი, პირჯვარს იწერდა.

შინ რომ მივიდნენ, ყველანი სუფრას შემოუსხდნენ და ჩაის სმა დაიწყეს. უფროსი რძალი ჰაჯი მარისკენ დაიხარა და წასჩურჩულა:

— იცი, ჰაჯი ალამ ტერტერასა და დიაკვანს ხელისგულზე თითო ოქრო დაუდო.

ჰაჯი მარმა დაფეთებით შეხვდა რძალს, წამოიჭრა, გარეთ გავიდა და იქიდან ანიშნა, გამოდიო.

— როდის, გოგო?

— შენ რომ სამსხვერპლოსთან მიხვედი და ლოცვა დაიწყე, მათხოვრებსაც თითო ოქრო ჩამოურიგა.

— არა, შეუძლებელია... — მღელვარებისაგან სული შეეხუთა ჰაჯი მარს.

— ჩემი თვალით დავინახე.

— ჰა?...—აიმღვრა ჰაჯი მარი,— აკი გეუბნებით და არ გესმით! ჩემი ჰაჯი ალა დაიღუპა, სახლსა და კერას მოწყვეტილი. მიშველეთ, ღვთის გულისათვის...

ჰაჯი მარმა მუხლებზე დაიცა ხელები. რძალმა დაწვრილებით მო-

უთხრო, რაც თავისი თვალთ ნახა. ჰაჯი მარი ისევ შინ შებრუნდა და რძლებს თვალთ ანიშნა, ყურადღებას ნუ მიაქცევთო, თავად კი ქმარს დაუწყო თვალთვალი.

ბავშვები გარეთ გავიდნენ თოვლში სათამაშოდ. რძლებმა აალაგეს, დილით გამოსუფთავებული ოთახი კვლავ გამოგავეს, ღუმელს შეშა შეუკეთეს და სამზარეულოში გავიდნენ სადილის მოსამზადებლად. ჰაჯი მარი ქმრის პირდაპირ დაჯდა და მის ყველა მოძრაობას თვალის დევნება დაუწყო. ელოდა, ერთი სიტყვა მაინც დასცდებო.

მაგრამ ჰაჯი ალა ხმას არ იღებდა. მისი ღუმილი იმის მაუწყებელი იყო, რომ უძირო სევდა, რასაც მთელი არსება მოეცვა, ერთგვარ სიამოვნებასაც კი ჰგვრიდა.

მისი წარმოდგენა მხოლოდ ერთ სახებას დაეპყრო. ეს სახება აძრწუნებდა და ახარებდა კიდევც. მას თვალწინ ედგა თავისი დამბლიანი დის გვამი და მის უსიცოცხლო, ღიად დარჩენილ თვალებში ლამობდა ჩახედვას. იგი ეჭიდებოდა ამ სახებას და ცდილობდა ერთი წამოთაც კი არ დაეკარგა თვალთაგან. თავად და მხოლოდ თავად იყო დამნაშავე ამ ამბავში, ეს მისი ცოდვა იყო, მისი სიმდაბლისა და გულქვაობის შედეგი. და რაც უფრო ხანგრძლივად ჰვრეტდა ამ გვამს, რაც უფრო ეკუმშებოდა გული, იმდენად მეტი კმაყოფილება და სიმშვიდე ეუფლებოდა. დამბლიანი და წმიდათაწმიდა, სალოცავ ხატად ექცა მას. მისი გვამი უმსუბუქებდა მოხუცს ცოდვილიან გულს.

მაგრამ შემსუბუქების ეს გრძნობა მხოლოდ დროგამოშვებით ეუფლებოდა. იყო ისეთი წუთები, როდესაც გრძნობდა — ჭკუიდან ვცდებო. ეს მაშინ ხდებოდა, როდესაც

მკაფიოდ, ნათლად წარმოიდგენდა თავისი სიკვდილის დღეს, ან როდესაც ახსენდებოდა თავისი შიშისზარი გაქცევის დამეს. სწორედ იგივე შიშისზარი დაეუფლა ალბათ მის დას, იმ ყველასაგან მიტოვებულ არსებას, ვისი სიკვდილიც ასე არაფრად მიიჩნია გაქცევის დღეს. როგორ შეიძლებოდა მისი დატოვება სიკვდილთან პირისპირ! და განა არსებობს სადმე ისეთი არსება, ვისაც არ დატანჯავს ხორციელი ტკივილი, ვინც სიკვდილს არ შეუდრკება ან ვისაც გადარჩენის უფლება არა აქვს? რა სიმშვიდით შეხვდა სრბუნი თავის ხვედრს და როგორი უანგარო მზრუნველობით ფიქრობდა გაქცეულთა უშიშროებაზე. ეს მოგონებები გულს უწიწკნიდა ჰაჯის. ხოლო როდესაც იხსენებდა, რაოდენ უძლური აღმოჩნდა, რომ თავის თავში სიცოცხლის სიყვარული ჩაეხშო და დალოდებოდა მოახლოებულ სიკვდილს, მაშინ როცა ეს უბრალო, შეუმჩნეველი არსება ესოდენ მხნედ შეეგუა თავის ხვედრს, ჰაჯი ალა დასუსხულივით აიღებდა ხოლმე თავს მალლა და შეშლილივით შეხედავდა თავის ცოლს.

— ჰაჯი ალა!—გამოათხიზლა იგი ცოლმა.

ჰაჯი ალამ გაფანტული მზერა მიაპყრო ცოლს, კრინტი არ დაუძრავს.

— ხმა ამოიღე, კაცო, რაზე ფიქრობ? — უსაყვედურა ჰაჯი მარმა.

ჰაჯი დუმდა.

— თუ დაკარგულს დარდობ, ბიჭები კარგად გყავდეს და ეგ ნუ გაფიქრებს. თუ სრბუნზე ფიქრობ, განა ღირს ფიქრი? იმდენი ხალხი დაიხოცა, უფრო ძვირფასნი... შენ სწორად თქვი მაშინ, „ზ ე დ მ ე ტ ი“ ბარგიაო.

ჰაჯიმ მწყრალად შეხედა ცოლს და თავი გააქნია, მკაცრი მზერა არ მოუშორებია, ისე მოუჭრა:

— გაჩუმდი, ხელმეტი აღამიანი არ არსებობს. აბა, წადი და ჰკითხე იმ ძაღლს, სულს რომ დაფავს, ადვილია-თქო სიკვდილი?

პირისახეზე ღრმა კაეშანი აღბეჭდოდა ჰაჯი ალას, თვალები ღრმად ჩასცვენოდა, ხოლო ვაუპარსავ ნიკაპსა და ლოყებზე მოდებული თეთრი ეკლები განდევილის გამომეტყველებას ანიჭებდა.

* *

ერთი კვირის შემდეგ ჰაჯი ალა ლოკინად ჩავარდა. როგორც ჩანს, ეკლესიაში გაცივდა. ოფლი მოადენინეს, ფერშალი მოუყვანეს, ვერაფერმა უშველა. ერთ საღამოს კი, ჭრაქის ანთების ჟამს, ჰაჯიმ მღვდელი მოითხოვა. ჰაჯი მარი მუხლებზე ხელებს იცემდა და მალულად აპარებდა მზერას ჰაჯი ალასაკენ, რაათა დაენახა, განსაცდელმა გაიარა თუ არა.

ჰოდა, როცა ოჯახის წევრებმა ერთხანს შეიცადეს, ეგების ჰაჯი ალას თვითონვე დაავიწყდეს და აღარ მოითხოვოს მღვდელიო, ჰაჯიმ წყნარად და გარკვევით გაიმეორა— მღვდელი მომიყვანეთო. დაუძახეს მღვდელს. ისიც მოვიდა ვერცხლისფერი შესამოსელით, რადგან გუმანით მიმხვდარიყო, ავადმყოფი სიკვდილის პირას არისო, და მის საზიარებლად გამზადებულიყო.

ოჯახის წევრები ავადმყოფის გარშემო შეეგროვდნენ. მღვდელმა ხელით ანიშნა — შორს დადექითო, მიახვედრა: ავადმყოფმა აღსარება უნდა გამანდოსო.

მაგრამ ჰაჯი ალამ სთხოვა, დარ-

ჩნენო. და ხმამაღლა, ადგუნებული მღელვარებით გაანდო აღსარება. მოუყვა, თუ როგორ მიატოვა თავისი დამბლიანი და.

— შევცოდე, შევცოდე!—ატირდა იგი და სახარებას ეამბორა.

მღვდელმა დაამშვიდა და აზიარა.

ზიარების შემდეგ ავადმყოფმა ათრთოლებული ხელი ბალიშქვეშ შეაბარა, გამოაძვრინა ქაღალდში გახვეული რამდენიმე ოქროს ფული და მღვდელს მისცა.

— ეს შენ, — წაიჩურჩულა მან, შემდეგ კვლავ გამოაცურა ქისა, ხელის კანკალით გაუწოდა ისიც მღვდელს და ბავშვური გამომეტყ-

ველებით მიაჩერდა. რაღაცის თქმას ლამობდა, ვერ კი ახერხებდა: სუნთქვა ეკვროდა, ღრმა ფთრიაქს მოეცვა მისი არსება.

— ეს ვიღას? — ჩაეკითხა მისკენ დახრილი მღვდელი.

— ვისაც მისცემ, — წაიღუღუნა ავადმყოფმა და გაირინდა, ცრემლი ახრჩობდა. მერე სული მოითქვა და ამოიგმინა:

— ეგ მათხოვრების გასაკითხავად იყოს.

შემდეგ მღვდლის სამოსის კალთა მიიზიდა, ეამბორა და ნაღვლიანად აღმოთქვა:

— ზ ე დ მ ე ტ ი ს სულის საცხონებლად.

□

კიტი მაჩაბელი

კვლ ხელოვანთა მემკვიდრე

„მოიჭედა ხატი ესე... ხელითა ასან ოქრო-მჭედლისათა...“, „მოიჭედა ხელითა ბეშქენ ოპიზარისათა...“, „ხელითა მოიჭედა გიორგი გვაზავასათა...“, „სახელითა ღმრთისათა შეიქმნეს მამასახლისობასა ეფთიმისა ხელითა ივანე მონისძისათა...“, „შეწევნითა ღვთისათა სრულ იქმნა საუფლო ხელითა ოქრომჭედლის მამნესით, შეუნდნეს ღმერთმან მამნეს და მისსა მეუღლეს...“

— ლაღაღებდა წარწერები ხატებსა და ჯვრებზე; ოსტატის მოკრძალებული ლოცვა ხან ქართული ასოების მწყობრად ასხმულ მწკრივებად მიუყვებოდა ხატის ჩარჩოებს, ხან ლაბირინთისებურ ორნამენტში მიიკვლევდა გზას. ნატიფი ქარაგმებით დაგვირგვინებული, იღუმალი აზრის შემცველი სიტყვები რაღაც შეუცნობი ძალით შეიჭრებოდა პლასტიკურ გამოსახულებებში და ქართული მთავრული ასოების მოხდენილი ჯგუფები ჭედურ გამოსახულებებში იკავებდა თითქოს საგანგებოდ მათთვის განკუთვნილ ადგილს.

მთიელი გოგონასთვის, საათობით რომ იდგა ოქრომჭედლობის გასაოცარი ნიმუშების წინ, ძველ ქართველ ოსტატთა მიერ შესრულებული ამ წარწერების შინაარსი გაუგებარი იყო, მასზე მოქმედებდა ასომთავრულ წარწერათა საოცარი ესთეტიკური ძალა. გოგონა მათ აღიქვამდა ლამაზ,

უსასრულო ვარიაციებად აუღერებულ ორნამენტული დეკორის მსგავსად. შემდეგშიც ბევრჯერ განუცდია მხატვარს ხელოვნების ჭეშმარიტ ნაწარმოებებთან შესვედრით გამოწვეული სიხარული, მაგრამ ქართველი ხალხის ნიჭით შექმნილ ოქრომჭედლურ საგანძურთან პირველი შესვედრა დაუვიწყარი დარჩა.

მაშინ რა იცოდა დადესტნის შორეული აულიდან ჩამოსულმა გოგონამ, რომ გავიდოდა წლები და მის სახელსაც ოქრომჭედლის ეპითეტი დაემატებოდა. არც ის იცოდა მაშინ მანაბა მაჭონედოვამ, ისეთ მიწაზე თუ მოხვდა, ოდითგანვე რომ მოხდგამდა სამშობლოდ ქცეულიყო მასთან ღია გულით და სიკეთით მისული ყოველი ადამიანისთვის.

შორეულ ბავშვობაში დარჩა მშობლიური აული კუბაჩი — ოქრომჭედელთა, მელითონეთა კერა, მხატვრული ხელოსნობის მნიშვნელოვანი ცენტრი. თითქოს საგანგებოდ იყო გაჩენილი კუბაჩი ხელოვნების სავანედ. კავკასიონის კალთასთან შეზრდილი სოფელი — ხალხური ხუროთმოძღვრების თავისებური ძეგლია. ხეობას თითქოს გულში ჩაუკრავს ეს ცხოველსაბუნური არქიტექტურული ანსამბლი ბანიანი სახლებით, ვიწრო, ლაბირინთის მსგავსი შუკებით. ხის ღერეფნებითა და კოშკებით. მთის ხუროთ-

მოძღვრების ლაკონიზმი და სპეციფიკური მკაცრი ფერადოვნება განაპირობებს ამ უაღრესად თავისთავადი კუთხის მშვენიერებას.

მოვუსმინოთ კუბაჩის მკვიდრს: „...გაივლით აულის ქუჩებში და წააწყდებით ხან მრგვალ კოშკს, თაღიანი შესასვლელით, გვერდს ლომის ქანდაკება რომ უმშვენიერებს, ხან მაღალ, ოთხკუთხა კოშკს, რომლის ზემო სართული შემდგომში მიზგითად გამოიყენეს, ხან შამბნარით დაფარულ, გამოშვერილ კედლის ნაპირს. კუბაჩის ქუჩები ციცაბო და დაკლაკნილია. მომწყვდეულია მასიურ შენობებს შუა, ფლეთილი და ნაწილობრივ თლილი ქვისაგან ნაგები კედლები ცისკენ მიიწევს. აქ მზე ცოტა ხნით თუ შემოიჭრება ხოლმე... ეზოს ფუნქციებს „ასრულებს“ ბრტყელი სახურავები, რომლის სამხრეთით გამოდის სახლის ზემო სართულის ლოჯია“.

დადიოდა თბილისის ქუჩებში დაღესტნელი გოგონა, ფართოდ გახელილი, გაცეხული თვალებით შესცქეროდა მტკვრის ციცაბო კლდეზე მიკრულ სახლებს, ცადაზიდულ მეტეხის ტაძრის სილუეტს, ამომავალი მზის სხივებით ოქროსფრად შეფერილ ნარიყალას ბურჯებს, აკვირდებოდა თბილისური სახლების მოჩუქურთმებულ აივნებს, რომელთა ჩრდილი გამჭვირვალე არშიებად ეფინებოდა ქვაფენილს. უსმენდა თბილისის ქუჩების მრავალენოვან ყრამულს. გულში კი ისევ მშობლიური სოფლის სურათები ცოცხლდებოდა.

„...გზადაგზა ფლეთილი ქვით ნაგები სახლების კედლებზე გვხვდება მრავალსაუკუნოვანი რელიეფები ნატიფი, მტკიცე ხაზით გამოყვანილი ხვეული ორნამენტებით, ზღაპრული ნადირის გამოსახულებებით, ფოთოლივით ლამაზად მოღუნული კუდიით“.

ასე იყო თბილისში ჩამოსვლის პირველ დღეებში, ასე იქნება შემდეგშიც, როცა იგი თბილისის მკვიდრი გახდება. მის გულში ყოველთვის ერთმანეთის გვერდით ბუდობს ორი სამშობლოს—დაღესტნისა და საქართველოს სიყვარული. მტკვრის სანაპიროზე ყოფნისას მხატვარს კუბაჩის ანკარა წყარო აგონდება, კუბაჩის ტალანებში გავლისას კი ზაფხულის მცხუნვარე შუადღით მოთენთილი ძველი თბილისის შუკები.

ბავშვობაში მიღებულ შთაბეჭდილებებს, კუბაჩურ ატმოსფეროს, სადაც ხელოვნებით სუნთქავდა ყველაფერი, უკვალოდ არ ჩაუვლია. განა შეიძლება არ აღბეჭდილი-

ყო მგრძობიარე გოგონას მეხსიერებაში კუბაჩის სახლებში შექმნილი პატარა მუზეუმები — სხვა რა შეიძლება ვუწოდოთ დაღესტნურ ოჯახებში თაობათა მიერ შეგროვილ და სათუთად შემონახულ ხელოვნების ნაწარმოებებს, კუბაჩელთა სახლებში ასე საპატიო ადგილი რომ უჭირავს.

„ხუტნალია ბია — თეფშების კედელი — ბუხრის ოთახის სხვა კედლებთან შედარებით უფრო განათებულია, რადგან ყოველთვის კარისა და ფანჯრების მოპირდაპირე მხარესაა. ეს კედელი შეძლებულ ოჯახებში მთლიანად დაფარულია თეფშებით, ფოთლებით, ლანგრებით. ბევრი ოჯახი ახლაც თავს იწონებს მამა-პაპის დანატოვარი ანტიკვარული ნივთებით“.

ლითონის მხატვრული დამუშავების უძველეს ტრადიციებზე აღზრდილი კუბაჩელები შესანიშნავად გრძობდნენ ხელოვნების ნაწარმოების ღირსებას. ამის წყალობით შემორჩა კუბაჩის სახლებს ევროპულითუ აღმოსავლური ხელოვნების არაერთი პირველხარისხოვანი ძეგლი: შუასაუკუნეების ევროპული ქაშანურის ნიმუშები, ძველი ქართული მოჭიქული კერამიკა, სპილენძისა და ბრინჯაოს ნაირგვარი ლანგრები სპარსეთიდან, ფაიფური ჩინეთიდან. ყველაფერი უდიდესი ოსტატობით იყო გამოფენილი ბუხრიან ოთახში და ეს თავისებური საგვარეულო „მუზეუმები“ შესანიშნავ სკოლას წარმოადგენდა მომავალი მხატვრისათვის.

მაგრამ გაცილებით უფრო მნიშვნელოვანი აღმოჩნდა ოჯახური ტრადიცია, რაც კარგა ხნის მანძილზე არსებობდა და ვითარდებოდა. მანაბას მამა, ისევე როგორც ბევრი მისი წინაპარი, ოქრომჭედელი იყო. ოქრომჭედლობა ოდითგანვე მამაკაცის საქმიანობად იყო მიჩნეული, ამიტომ განსაკუთრებით საყურადღებოა, რომ ოქრომჭედლის იარაღს პატარა გოგონა იღებს ხელში.

„ათი წლის ვიყავი, როდესაც საჭრისი პირველად ავიღე ხელში. ჩემი პირველი მასწავლებელი იყო აბდულჯალილ იბრაჰიმოვი... მან მაჩვენა სპილენძის ლანგარზე ორნამენტის ამოჭრის ტექნიკა, ამიხსნა ვრავირების პროცესი და საჭრისებით დამასაჩუქრა. მისმა მითითებებმა და რჩევა-დარიგებებმა ბევრი რამ შემიძინა“.

აქედან დაიწყო მანაბა მაჭომედოვას შემოქმედებითი შრომის წლები — არც ერთი

წუთი შემოქმედების გარეშე! არც ერთი წუთი სრულყოფის გარეშე! იწყება ორნამენტის დაუფლება, ტექნიკის ათვისება. ტექნიკური სრულყოფის კვალდაკვალ იზრდება ოსტატის მხატვრული სრულყოფაც. მხატვარზე ორი მძლავრი ფაქტორი მოქმედებს — ქართული ხელოვნების ძეგლთა მშვენიერება, თბილისის ქართველ მხატვართა გარემოცვა და მეორე მხრივ — დაღესტნური ტრადიციების ძალა, დაღესტნური ოქრომჭედლობის ტექნიკური აღჭურვილობა. ეს ორი საწყისი ერთობლივად განაპირობებს მანაბა მაჭომედოვას, როგორც შემოქმედის, ჩამოყალიბებას.

ქართული ხელოვნების ორგანულ ათვისებასთან ერთად მანაბა მაჭომედოვა ხარბად ეწაფება თავისი შემოქმედების პირველწყაროს — დაღესტნურ ტრადიციას. დროდადრო ჩასვლა მშობლიურ სოფელში თითქოს ძალას მატებს ახალგაზრდა შემოქმედს, არწმუნებს არჩევანის სისწორეში.

„თითქოს ხელახლა გავეცანი მის წარსულსა და აწმყოს, ახლებურად აღვიქვი მისი ბუნება, კოლორიტი, ხალხის ზნე-ჩვეულებანი, გავიცანი აულის ოსტატები“.

საქართველო — მანაბა მაჭომედოვას მეორე სამშობლოა. ეს მხოლოდ ლამაზი სიტყვები როდია. ქართულ ნიადაგზე განსაკუთრებული ძალით, ლალად განვითარდა მისი ბუნებრივი ნიჭი. მაგრამ ისიც უდავოა, რომ მხოლოდ ბუნებით მომადლებულმა ნიჭმა, მშვენიერებისთვის გახსნილმა გულმა, უდიდესმა სწრაფვამ სრულყოფისაკენ განაპირობა მანაბა მაჭომედოვას ოსტატობის ასეთი ზრდა.

ძნელია იმის თქმა, რომელი უფრო მეტს ნიშნავდა ახალგაზრდა მხატვრის ჩამოყალიბებისათვის — დაღესტანი თუ საქართველო. ამ შემთხვევაში საუკეთესოდ შეერწყა ერთმანეთს ორი ქვეყნის კულტურათა კეთილისმყოფელი გავლენა. მანაბა ერთნაირად ემადლიერება დაღესტნელ და ქართველ ოქრომჭედლებს, გულუხვად რომ უზიარებდნენ მას ცოდნას და ოსტატობის საიდუმლოებას. ცნობილი კუბაჩელი ოსტატები: აბდულჩალილ იბრაჰიმოვი, შაჰი კიშევი, შაბიბ-ალისხან აჰმედოვი, სახელგანთქმული ქართველი ოქრომჭედლები: ამბროსი ჭიქია, მისეილ იმედაძე. — ამ ბრწყინვალე ხელოსანთა გვერდით, მათი მზრუნველობით იზრდებოდა და იხვეწებოდა მანაბა მაჭომედოვას ხელოვნება. თავის ნაწარმოებებზე მუშაობისას, ამა თუ იმ

ტექნიკური თუ მხატვრული ხერხის გამოყენებისას ხელოვანი ქალი დიდი სითბოთი იგონებს იმ მასწავლებლებს, ვისი დახმარებით და რჩევით დაძლია ოქრომჭედლის უაღრესად რთული და ძნელი საქმე.

სიძნელები კი ბევრი დახვდა მანაბას არჩეულ გზაზე. იოლი როდი იყო წმინდა ფსიქოლოგიური ზღურბლის გადალახვა, უკუგდება იმ ტრადიციული წარმოდგენისა, საუკუნეთა მანძილზე რომ შემუშავდა ოქრომჭედლის ხელობაზე. ქალი და ოქრომჭედლის საქმიანობა... ეს გაუგონარი ამბავი იყო და ადვილი წარმოსადგენია, რა მტკიცე ნებისყოფა უნდა ჰქონოდა მთიელ ქალიშვილს, მიზნისთვის რომ მიედწია; სწორედ გაბედულ გადაწყვეტილებაში და მიზანდასახულ შრომაში გამოჩნდა მანაბას ხასიათის მთავარი ღირსებები: ძლიერი ნებისყოფა, სულის სიმტკიცე, თავდაუზოგავი შრომის უნარი.

„ჩემი უაღრესად ნიჭიერი და მრავლისმცოდნე მასწავლებლის გულთბილი ყურადღების დახმარებით მივიკვლევდი ჩემს ბილიკს ოქრომჭედლობის ხელოვნებაში.“

ოქრომჭედლობა გამოყენებითი ხელოვნების ძალზე რთული სახეა, იგი მოითხოვს დაუცხრომელ შრომას. მასწავლებლები ამჩნევდნენ ჩემს უდიდეს სურვილს, დავუფლებოდი ოქრომჭედლის ოსტატობას და ვულისტკივილით ამბობდნენ — „კაცად უნდა დაბადებულიყავიო“. მე ქალად დავიბადე, მაგრამ ამან არ შემიშალა ხელი მამაჩემის ხელობა მიმელო მემკვიდრეობად“.

მხოლოდ საყვარელი საქმისადმი ფანატიკური თავდადების წყალობით შეძლო მანაბამ გადაელახა სერიოზული დაბრკოლებები. ოსტატობის სრულყოფისათვის იყენებდა ყველა შესაძლებლობას — თბილისში, კუბაჩსა და მოსკოვში მიმდინარეობდა მისი მხატვარ-ოქრომჭედლად ჩამოყალიბების პროცესი: თბილისში — არტელი „მხატვარი“, სადაც მანაბა სახელგანთქმულ ქართველ ოქრომჭედლებთან ერთად მივიწყებული ხალხური ხელოვნების აღდგენაზე მუშაობდა, მოსკოვში — აბრეშუმდამმუშავებელ ფაბრიკაში ფოლადზე გრავირების ოსტატობას ეუფლებოდა, ზოლო კუბაჩში — მშობლიური სოფლის საუკეთესო ოქრომჭედლების მხარდამხარ მუშაობდა.

წმინდა ტექნიკური ოსტატობის დაუფლებასთან ერთად მანაბა მაჭომედოვა მდიდრდება სულიერად, თბილისში: საქართველოს ხელოვნების სახელმწიფო მუზე-

უმის უმდიდრეს ფონდებში და ს. ჯანაშიას სახელობის საქართველოს სახელმწიფო მუზეუმში დაცული ყოველი ნივთი, ძველ ოსტატთა ნიჭიერებით აღბეჭდილი ყოველი ნაწარმოები ნიადაგ მატებს რაღაცას ახალ-გაზრდა მხატვარს, წინაპართა ნაოსტატარის შესწავლა თავისებური სკოლაა, სადაც მასწავლებლად ანონიმ ხელოვანთა უკვლავი ნაწარმოებები გამოდიან. ხახულის კარედი ხატის შემქმნელთა სრულიად განსაკუთრებული, ვირტუოზული ოსტატობა, მისი მინანქრებისა და ჭედური ორნამენტების თვალისმომჭრელი ბრწყინვალეობა — მხატვრის წინაშე ოქრომჭედლობის ხელოვნების უბადლო ენციკლოპედიად იშლება. ძველ ქართველ ოსტატთა მიერ მოხვედრებული ვერცხლის სამკაული ქართველი ხალხის ორნამენტული საგანძურის წიაღში ჩაახედებს. მაგრამ მანაბა მაჰომედოვას ძველი ქართული ოქრომჭედლობის ძეგლებთან კიდევ სხვაგვარი დამოკიდებულებაც აკავშირებს. მის მიერ გამაგრებული და აღდგენილია ლითონის პლასტიკის რამდენიმე მნიშვნელოვანი ნიმუში.

არანაკლებ მნიშვნელოვანი იყო მანაბა მაჰომედოვასთვის რუსული ხელოვნების ძეგლთა გაცნობა: მოსკოვის სახელმწიფო ისტორიული მუზეუმის ძვირფას ლითონთა განყოფილებისა და კრემლის „საჭურჭლის პალატაში“ მას ოქრომჭედლობისა და საიუველირო ხელოვნების იშვიათ ნაწარმოებთა უმდიდრესი განძი გადაეშალა თვალწინ. რუსი სპეციალისტების მეგობრული, კეთილი რჩევა-დარიგება გზას უკვალავდა მანაბას შემოქმედებით მუშაობაში.

მანაბა მაჰომედოვას დამოუკიდებელი ნაწარმოები, რომელმაც პირველი წარმატება მოუპოვა მას, ვერცხლის სამაჯური იყო.

„ვერცხლი სხვა ლითონებზე მეტად მელოდიურია“, — არაერთხელ უთქვამს მხატვარს. ამ სიტყვებით იგი გამოხატავს განსაკუთრებულ დამოკიდებულებას ამ ლითონისადმი, შემდეგ მთავარ ადგილს რომ იჭერს მის შემოქმედებაში. ეს არ არის შემთხვევითი, რადგან ძვირფას ლითონთაგან ვერცხლი დიდი პოპულარობით სარგებლობს კავკასიისა და მახლობელი აღმოსავლეთის ხელოვნებაში. ძველი ოსტატები მთვარის შუქს აღარებდნენ ვერცხლის ზედაპირის ელვარებას და მას განსაკუთრებულ თვისებებს მიაწერდნენ. ვერცხლზე მუშაობა რთული ტექნიკური ხერხების გამოყენებით საშუალებას აძლევდა ოსტატს გამოეთქვა ნაფიქრი და განცდილი. ეს ლითონი,

თავისი სპეციფიკური თვისებებით, ფართო ასპარეზს გადაუშლიდა მხატვრის ფანტაზიას.

დიდმა ოსტატობამ გაუხსნა მანაბას გზა ლითონის დამუშავების სხვადასხვა სფეროსაკენ. მრავალფეროვანია მის მიერ ლითონის გამოყენება: ნაირგვარი სამკაული (სამაჯურები, ბეჭდები, გულსაკიდები, ყელსაბამები, საკინძეები), მრავალფეროვანი ჭურჭელი (სურები, ლანგრები, ფიალები, ყანწების მოჭედილობა). ასევე მრავალგვარია ის მხატვრული და ტექნიკური ხერხები, ამ ნაწარმოებთა შესაქმნელად და შესამკობად რომ იყენებს მხატვარი: ჩამოსხმა, გამოყვანა, გრავირება, ჭედვა, მოხვეადება, ზარნიში, ფილიგრანი, მინანქარი. ტექნიკური და მხატვრული ხერხების ამ მდიდარი არსენალიდან მხატვარი ოსტატურად იყენებს სწორედ იმას, რაც უფრო სრულად დაეხმარება ჩანაფიქრის ხორცშესხმაში. ქართული ხელოვნების ყველა გამოფენას ამშვენებს მანაბა მაჰომედოვას ოსტატურად შესრულებული ნაწარმოებები. მათი ჩამოთვლა შეუძლებელია, მაგრამ ყველა ნაწარმოებს, რაც მხატვარ ქალს გამოჰქონდა საზოგადოების სამსჯავროზე, აერთიანებდა უდიდესი პროფესიული ოსტატობა, დახვეწილი ტექნიკა, მასალის კარგი ცოდნა, სამკაულისა და ნივთის ღრმად მოფიქრებული კომპოზიცია. ყველა, სულ უმნიშვნელო ნაწარმოებსაც კი მანაბა არაჩვეულებრივი პასუხისმგებლობით ეკიდება. ყველასათვის ცნობილია, რა მძიმე და შრომატევადია ოქრომჭედლის საქმიანობა, რა დიდ ღროსა და ძალახ მოითხოვს ხელოვნების ნამდვილი ნაწარმოების შექმნა. მაგრამ გაცილებით მეტი ღრო მანაბას სჭირდება მოსამზადებელი სამუშაოსთვის, ნაწარმოების ფორმის მონახვისათვის...

ერთი საერთო თვისება აქვს მანაბა მაჰომედოვას ნამუშევრებს — მხატვარი დიდ ხანს ატარებს გულსა და ფიქრში ჩანაფიქრს და მხოლოდ შემდეგ იწყებს მათ განხორციელებას. ამასთანავე მანაბას ნაწარმოებთა უმეტესობა შექმნილია რაღაც გარკვეული განწყობილების ზეგავლენით, ბუნებს სურათისა. თუ რაიმე მოვლენის შთაბეჭდილებით. ამიტომ, რომ მის სამკაულებსაც კი საკუთარი სახელები აქვს.

მხატვარი ქალის მუშაობის პროცესის გაგებისათვის საინტერესოა თუნდაც ერთი მაგალითის მოყვანა: მას განზრახული ჰქონდა მიეძღვნა ნაწარმოები თბილისის 1500

წლისთავისათვის. შთაგონებისათვის მანაბა ყოველთვის ძველი თბილისის ქუჩებს მიმართავს. მაშინაც ასე მოხდა. მაღალი ოსტატობით შესრულებული, ნატიფად შემკული ხანჯალი და ლანგარი, მხატვარმა იუბილეს რომ უძღვნა, ნარიყალას კედლების ძირში იყო მოფიქრებული.

„კომპოზიციები მონახული იყო ნარიყალას ციხის კედლებთან და გრავირებული ზაფხულის ერთ მცხუნვარე დღეს, როდესაც შორიდან ვისმენდი მტკვრის იდუმალ ჩურჩულს, ქალაქის ხალისიან გუგუნს, და ვტკბებოდი ჭაღარა თბილისის პანორამით...“

მანაბა მაჭომელოვას შემოქმედებაში მნიშვნელოვანი ადგილი უკავია ქალის სამკაულებს. აქ თავი იჩინა დაღესტანში გავრცელებულმა სამკაულების კულტმა. დაღესტნურ სამაჯურებს, ბეჭდებს, გულსაკიდებს თითქმის სიმბოლური დანიშნულება ჰქონდათ. ისინი აუცილებელ ნაწილს წარმოადგენდნენ სხვადასხვა ტრადიციული რიტუალების შესრულების დროს (ნიშნობა, ქორწილი). ამიტომაც არ არის გასაკვირი, მანაბა ასეთი სიყვარულით რომ ასრულებს ვერცხლის მრავალფეროვან სამკაულებს. მაგრამ მის მიერ შექმნილი სამკაულები ძველის განმეორება კი არ არის, არამედ ხალხური ტრადიციის შემოქმედებითი თავისებების ნიმუშებს წარმოადგენენ. კუბაჩური ტრადიციული სამკაული, ხალხური ორნამენტი გამდიდრებულია ქართული დეკორატიული ხელოვნების ელემენტებით და ეს ორივე სახეცვლილია ოსტატის თავისებური მხატვრული ხედვით.

მანაბა მაჭომელოვას საიუველირო ნამუშევარი უკვე კარგა ხანია განსაკუთრებული წარმატებით სარგებლობს რესპუბლიკურ, საკავშირო და საერთაშორისო გამოფენებზე. ორი ათეული წელია ოქრომჭედელი ქალი ანცვიფრებს მაყურებელს თავისი საჭრისის ძალით, ორიგინალური მხატვრული მეტყველებით. ბევრი ნამუშევარი აღნიშნულია დიპლომებითა და საპატიო სიგელებით. ხელოვნების მოყვარულთათვის კარგად არის ცნობილი უფაქიზესი ოსტატობით შესრულებული გულსაკიდები და სამაჯურები, ბეჭდები და გულსაბნევეები. შევჩერდებით ბოლო დროის ზოგიერთ ნამუშევარზე, სადაც კარგად ჩანს მხატვრის ინტერესებისა და ძიებების თავისებური სურათი. ტექნიკური სრულყოფა მას საშუალებას აძლევს მთელი სისავსით გამოიყენოს

ვერცხლისა და პათოსანი თვლების შესაძლებლობანი.

სამაჯური და ბეჭედი „ბებელა“ — ამ სამკაულებში, განსაკუთრებით სამაჯურში, ფორმის ძიების საინტერესო შედეგია წარმოდგენილი. აქ კარგად ჩანს ტრადიციული მასიური სამაჯურის თავისებური სახეცვლილება. კონუსისებური მოხაზულობის, ხელის ფორმის მიხედვით კონსტრუირებული სამაჯური რთული ტექნიკით არის დამუშავებული. სამაჯურის ჭვირულ ელემენტებში ოსტატურადაა ჩართული ფერადი თვლების ლაქები. აყურულობამ და სიმსუბუქემ შეცვალა ძველებურ სამაჯურთა მძიმე და მასიური ფორმები.

ტრადიციული დაღესტნური სამკაულის ორიგინალური გადამღერებაა სამაჯური „ობობა“, რომელშიც ძველი სამკაულის ფორმები სრულიად ახლებურადაა გაცოცხლებული. ოქრომჭედლური ხერხების ოსტატური გამოყენება (მინანქარი, სევალი) ამ სამაჯურს განსაკუთრებულ ფერადოვნებასა და დეკორატიულ ხასიათს აძლევს.

მანაბა მაჭომელოვა ხშირად იყენებს ძველ სიმბოლურ სახეებს, ორნამენტულ მოტივებს, ადებულს ხალხური ხელოვნების უმდიდრესი საგანძურადან. მის სამკაულებში ჩნდება ისეთი მოტივები, როგორცაა ნაირგვარი პალმეტები, სიცოცხლის ხე, ფარშევანგი. ხალხური ხელოვნების ეს უძველესი სახეები ბიძგს აძლევს მანაბას შემოქმედებით ფანტაზიას. დახვეწილი კომპოზიციური ოსტატობით, თავისებური კოლორიტით და მხატვრისთვის ჩვეული უზადო ხელწერით გამოირჩევა „ყელსაბამი ფარშევანგებით“. იგი თითქოს ნაკარნახევია უძველესი ჰერალდიკური გამოსახულებებით. მაგრამ ამ ყელსაბამში ყველაფერი ახალია, მანაბასეულია — მინანქრის თავისებური ფაქტურა, ამოცანის შესატყვისი ტექნიკურ ხერხთა შერჩევა, ზურმუხტოვანი და კობალტის ფერების უცნაური უღერადობა, მშობლიური აულის წარუშლელი ფერადოვნებით რომ არის შთაგონებული.

„ზემო სართულების (კუბაჩში) ღრმა, ღია ლოჯიების კედლები შედებილია ლილით. მსუყე, კაშკაშა ლილისფერი თავისებურად უღერს გარე კედლებისა და ბრტყელი სახურავების მოყვითალო-ნაცრისფერთან, სახლებს შუა მუქ გასასვლელებთან და ტყიანი მთების მომწვანო-მოცისფრო ნაზ გრადაციებთან, რომლის ფონზეც ისახება ნაკადი“.

ამიტომაც ალბათ, რომ მწვანისა და ლურჯის ერთგვარად დისონირებული, მაგრამ ძალზე მეტყველი აკორდი არაერთხელ ახმიანდება მანაბას ნაწარმოებებში და ვერცხლის მქრქალ ელვარებასთან ერთად ქმნის მხატვრისთვის დამახასიათებელ ჭარბ ფერადოვნებას. ფერთა იგივე ჰარმონიაა მედალიონში „ზღაპრული ფრინველი“, ბევრ სამკაულში მინანქარს განსაკუთრებული მხატვრული ელფერი შეაქვს, პატიოსან თვალთა ფერადოვნებასთან ერთად ქმნის შთამბეჭდავ ფერწერულ ეფექტებს (გარნიტური „გაზაფხული“, კომპლექტი „წელიწადის დრონი“, ყელსაბამი „კოსმოსი“, მედალიონი „ზამთრის გზა“).

ძალზე ფართოა მანაბა მაჰომედოვას შემოქმედების დიაპაზონი.

უდიდესი ადგილი უკავია მის შემოქმედებაში მინანქარს. ამ ურთულესმა ოქრომჭედლოურმა ტექნიკამ მხატვარი გაიტაცა ქართული მინანქრების გაცნობისთანავე. წლების მანძილზე ეუფლებოდა იგი მინანქრის უძნელეს ტექნიკას, ათვისა მინანქრის სხვადასხვა სახეობა და უკვე მარჯვედ იყენებს მას, როგორც სამკაულებში, ფერადოვან აქცენტებად, ძვირფასი ქვების გვერდით, ასევე დამოუკიდებელ მხატვრულ საშუალებად. ხელოვანი განსაკუთრებულ სიძნელეს წააწყდა ტიხრული მინანქრის ტექნიკის ათვისებისას, აქ ბევრი რამ იყო მისაღწევი — ტიხართა სინატიფე, ფერთა სიწმინდე, ნახატის აგების თავისებურება.

ტიხრული მინანქრის ტექნოლოგიის ათვისებამ მისცა მხატვარს საშუალება გაეფართოებინა თავისი შემოქმედების სფერო. აქ იჩინა თავი მანაბა მაჰომედოვას განსაკუთრებულმა მიდრეკილებამ ლიტერატურისადმი. მან გადაწყვიტა მინანქრის გამოყენება ისე, როგორც ძველი ქართველი ოსტატები იყენებდნენ — მხატვრულ სახეთა შესაქმნელად. მინანქრის ფერადოვანი საშუალებებით სურდა მას ფერწერული მინიატურების შექმნა. მინანქრის შექმნის პირველი ექსპერიმენტების შემდეგ უკვე საკმაო დრო გავიდა და მანაბა მაჰომედოვას შემოქმედებაში მინანქრის მინიატურულმა პორტრეტებმა მნიშვნელოვანი ადგილი დაიკავა.

ტიხრული მინანქრით შესრულებული პირველი ნამუშევარი შთაგონებული იყო პალესტინაში აღმოჩენილი შოთა რუსთაველის ფრესკული პორტრეტით... ამ მინანქრულ მინიატურას დიდი წარმატება ხვდა წილად, წარმატებამ ძალა შემატა მხატვარს

და დაარწმუნა თავის ძიებათა ნაყოფიერებაში. ამ მინანქარში ჩანდა ძველ ქართულ მინანქართა გარკვეული გამოძახილი: ფონის დამუშავებაში მცენარეული მოტივების ფაქიზი გამოყენება, ფერადოვან ლაქათა სპეციფიკური შეხამება, სილუეტის ხაზის განსაკუთრებული მნიშვნელობა. ამის შემდეგ მანაბამ არაერთხელ შექმნა რუსთაველის სახე მინანქრისაგან და ყოველი ახალი პორტრეტი წარმოადგენდა ხელოვანთათვის მარად უკვდავი თემის ახლებურ გადაწყვეტას.

მინანქრისვე ტექნიკით შეასრულა მანაბა მაჰომედოვამ თამარ მეფის სახე, ვაჟა-ფშაველასა და გალაკტიონ ტაბიძის პორტრეტები. საყურადღებოა, რომ მხატვარი თავის მინიატურულ პორტრეტებს განსაკუთრებული განწყობილებით ქმნის. ჩანაფიქრი დიდი ხნის განმავლობაში ყალიბდება, იხვეწება. მანაბა გატაცებით კითხულობს მწერლის ნაწარმოებებს, ეძებს მათში ისეთ ნიუანსებს, შემოქმედის ხასიათს უფრო გასაგებს რომ გახდის მისთვის. ამას ემატება ხელოვნების ამ დარგის სპეციფიკით გამოწვეული ტექნიკური სირთულეები (გასათვალისწინებელია ტიხროვანი მინანქრის თავისებურებანი). მწერლის ნაწარმოების კვალს ხშირად პირდაპირ ნახავთ პორტრეტში — მხატვარი, აღმოსავლური ჩვეულებით სამებრ, მწერლის ნაწარმოების ფრაგმენტს ჩართავს ხოლმე კომპოზიციაში. ასეა გალაკტიონის პორტრეტში („დროშები, ჩქარა!“), ასევეა ლევ ტოლსტოის პორტრეტში, რომელიც სევადით არის შესრულებული. ეს პორტრეტი მწერლის წიგნის ყდაზეა მოთავსებული.

არ შეიძლება საგანგებოდ არ შევჩერდეთ ოქრომჭედლობის ამ ძველთაძველ ფორმაზე — წიგნის ყდის მოჭედილობაზე, რაც განსაკუთრებულად აინტერესებს და იტაცებს მანაბა მაჰომედოვას.

მანაბა მხოლოდ ისეთ ავტორთა წიგნებს არჩევს შესამკობად, რომელნიც ახლოს დგანან მის სულთან, ვისაც გულწრფელად ეთაყვანება. ამიტომაც, რომ იგი გულმოდგინედ იმეორებს „ვეფხისტყაოსნის“ მოჭედილობას, სრულყოფს მას, იყენებს მრავალგვარ ტექნიკურ ხერხს, ცვლის და სხვადასხვაგვარად აგებს კომპოზიციას. ყდას ხან რუსთაველის მინანქრის პორტრეტი ამკობს, ხან კი ძველი ქართული ორნამენტის ნატიფი გრეჭილი ნახატი ამშვენებს. მხოლოდ შოთა რუსთაველის 800 წლისთავისადმი მიძღვნილ საიუბილეო გამოფენაზე

პოემის ყდის მოჭედულობის შვიდი სხვა-
დასხვა ნიმუში იყო წარმოდგენილი,
მათი შესრულებისათვის ოქრომჭედლობაში
არსებული ყველა ხერხი იყო გამოყენებუ-
ლი, მათ შორის — ტიხრული მინანქარი,
ზარნიში, ამოკვეთილი მინანქარი, ჭედვა,
ხევალი, გრავირება.

მხატვრის მიერ არჩეულ ნაწარმოებებს
შორის არის ნიკოლოზ ბარათაშვილის, რა-
სულ გამზათოვის, ლევ ტოლსტოის ქმნი-
ლებები. იგი ცდილობს ყოველი მათგანისა-
თვის შეარჩიოს საგანგებო მხატვრული სა-
ხე, შექმნას ამ ნაწარმოების დედააზრის
საკუთარი ინტერპრეტაცია. ყოველი პორ-
ტრეტის შექმნას წინ უძღვის გატაცება
მწერლის ლიტერატურულ გმირთა სამყა-
როთი. სავსებით ბუნებრივია, რომ ბარათა-
შვილის პოეზიით აღტაცება მანამამ თავი-
სებურად, ჭედური ხელოვნების ენით გა-
მოხატა. ეს იყო ბარათაშვილის „მერანის“
იშვიათი ვერცხლის წიგნი, ლექსის
სტრიქონები ვერცხლის ფურცლებზე იყო
ამოჭედვით. ყდაზე მინანქრით შესრულე-
ბული კომპოზიცია წიგნის იდეას განასახი-
ერებდა.

სიყვარულითა და განსაკუთრებული გან-
წყობით მუშაობდა ოქრომჭედელი ქალი
რასულ გამზათოვის წიგნების ყდის მოჭე-
დილობაზე. ამ შემთხვევაში მხატვარმა გა-
მოიყენა თავისი ხელოვნების ტექნიკურ
საშუალებათა მთელი მრავალფეროვნება.
ნამუშევრებში წმინდა დეკორატიულ გა-
დაწყვეტასთან ერთად მხატვარი უდი-
დეს ყურადღებას აქცევს ნაწარმოების აზ-
რობრივ მხარეს. ამიტომაც, რომ იგი ხშირად
მიმართავს სიმბოლოებსა და განზოგადებულ
მხატვრულ სახეებს (მერანი — როგორც ბა-
რათაშვილის რომანტიკული სულის განსა-
ხიერება, ჭიხვი — მშობლიური დაღესტნის
ბუნების სიმბოლო).

ამჟამად მანაბა მაჰომედოვა დიდი რუსი
მწერლის ლევ ტოლსტოის სახით არის გა-
ტაცებული. იგი ტოლსტოის შემოქმედების
უშუალო განცდით ქმნის მწერლის რამდე-
ნამე პორტრეტს, ეძებს მწერლისადმი და-
მოკიდებულების შესატყვის მხატვრულ
ფორმას. ცდილობს მიაგნოს უდიდესი
მოაზროვნის ხასიათის არსებით ნიშნებს.
ასე იქმნება ლევ ტოლსტოის პორტრეტი,
შესრულებული სევადის ტექნიკით, რომელ-
შიც მხატვარი ცდილობს მიაღწიოს ფსიქო-
ლოგიურ სიღრმეს.

ამგვარ ძიებათა შედეგია ტოლსტოის „ჰა-
ჯი მურატის“ ყდის მოჭედულობა, სადაც

მხატვარი ქალი ამ ნაწარმოების დედააზრის
მისეულ გაგებას გვთავაზობს.

ოქრომჭედელი ქალი მიისწრაფვის ხე-
ლოვნების ენით ილაპარაკოს, ოქრომჭედ-
ლობის სპეციფიკური საშუალებებით გამო-
ეხმაუროს ჩვენი ხალხის ცხოვრების მნიშ-
ვნელოვან მოვლენებს. მხატვრის ამგვარი
მოქალაქეობრივი მისწრაფებები საფუძვლად
დაედო დიდ სამუშაოს, რომელიც მან მი-
უძღვნა სამამულო ომში საბჭოთა ხალხის
ბრწყინვალე გამარჯვების 30-ე წლისთავს.
ეს იყო თავისებური მემორიალი, შთაგო-
ნებული ლენინგრადის გმირული დაცვის
ლეგენდარული სასწაულით — ექვსი ვერ-
ცხლის ფურცლისაგან შედგენილი წიგნი,
რომლის ყოველი ფურცელი წარმოადგენდა
ფაშისტურ ბოროტებაზე გმირი ქალაქის გა-
მარჯვების სადიდებელ ჰიმნს. ლაკონური
კომპოზიციები, წარწერათა გრავირებული
სტრიქონები, ლენინგრადის არქიტექტურის
სევადით შესრულებული შავი სილუეტები
ფურცელთა ვერცხლის ფონზე უაღრესად
შთამბეჭდავ მხატვრულ სახეებს ქმნიან.
ვერცხლის წიგნისთვის საგანგებოდ შექმნი-
ლი კოლოფი ორიგინალური დეკორატიული
გადაწყვეტით გამოირჩევა. წიგნის მკაცრი,
ასკეტური მონოქრომულობა, რაც კარგად
გაღმოსცემს მის იდეას, იცვლება კოლო-
ფის ფერადოვნებით. აღმოსავლური ხალი-
ჩის მსგავსად ფარავს კოლოფის სახურავს
ოთხფურცლა ყვავილების ორნამენტული
არშია. ტიხრული მინანქრით შესრულებულ
სიცოცხლით აღსავსე ფერადოვნებას ერ-
თვის დეკორატიულ კომპოზიციაში ოსტა-
ტურად ჩართული მარადიული ცეცხლის
ალი.

შესანიშნავი ოქრომჭედელი ცდილობს
გაუზიაროს გამოცდილება და ცოდნა ახალ-
გაზრდობას. წლების მანძილზე მანაბა მაჰო-
მედოვა პედაგოგად მუშაობდა თბილისის
სამხატვრო აკადემიაში დეკორატიულ-გამო-
ყენებითი ხელოვნების ფაკულტეტზე, სადაც
ხელმძღვანელობდა ოქრომჭედლობის პრაქ-
ტიკულ კურსს. ახალგაზრდებს ასწავლიდა
ლითონის მხატვრული დამუშავების რთულ
ხელოვნებას, ცდილობდა, მომავალი მხატ-
ვრები სრულყოფილად დაუფლებოდნენ
ლითონის დამუშავების ყველა საშუალებას,
ასწავლიდა გრავირების ხერხებს, სევადის
ოსტატობას, სხვადასხვა სახის მინანქრის
საიდუმლოებას, გრეხილისა და ჭედურობის
ხერხებს. პარალელურად თვითონაც განუ-
წყვეტლივ მუშაობდა თავისი ოსტატობის
სრულყოფაზე და ეს მუდმივი პროფესიუ-

ლი ზრდა საშუალებას აძლევდა დიდი წარმატებით გამოსულიყო მრავალრიცხოვან გამოფენებზე ჩვენთან და ჩვენს საზღვრებს გარეთაც. იგი წარმატებით მონაწილეობდა ოქრომჭედელთა პირველ საერთაშორისო სიმპოზიუმში ჩეხოსლოვაკიაში (1968 წ.), აქტიური მონაწილე იყო უნგრეთისა და საბჭოთა კავშირის მინანქრის ოსტატთა პირველი შეხვედრისა თბილისში (1973 წ.).

დაღესტნის გამოყენებითი ხელოვნების დამსახურებულ მოღვაწეს და საქართველოს სსრ დამსახურებულ მხატვარს მანაბა მაჭომელოვას ოქრომჭედლობასთან ერთად სხვა რამეც იტაცებს. თავისი ფიქრები, თავისი განცდები მას შეუძლია გაუზიაროს ყველას არა მარტო მხატვრული ნაკეთობების ენით, არამედ კალმითაც. მანაბა მაჭომელოვა რამდენიმე წიგნის ავტორია: „მეკუბაჩიდან ვარ“ (მანაჩკალა), „ტრადიციების კვალდაკვალ (თბილისი), „ცხოვრების სურათები“ (მოსკოვი), „ოქრომჭედლის საქარისი“ (მანაჩკალა) ¹.

ამ წიგნებში თქვენ დაინახავთ დაღესტნის მთის აულების განსაცვიფრებელ სურათებს, თბილისის ძველი უბნების ხატოვანებას, ეზიარებით ამაყ მთიელთა თავისუფლებისმოყვარე სულსა და ქართველი ხალხის სტუმართმოყვარეობის მაღლს. ოქრომჭედელი ქალის გულწრფელ სტრიქონებში თქვენ იგრძნობთ უდიდეს სიყვარულს თავისი ხელოვნებისადმი, თავისი მამულისადმი, მშობლიური საქართველოსადმი. წიგნების კომპოზიციასაც მანაბა ისეთივე ოსტატობითა და სიმართლით აგებს,

¹ ჩვენს მიერ ზემოთ მოყვანილი ციტატები ამ წიგნებიდან არის ამოღებული.

როგორც თავის ჭედურ ნამუშევრებზე მუშაობს იგი. საოცარი სიბოლოთი და მაღლიერებით მოგვითხრობს მხატვარი იმ ადამიანებზეც, ცხოვრების გზაზე რომ შეხვედრიან მას.

არაერთხელ უთქვამს მანაბას, რომ იგი ბედნიერ ვარსკვლავზეა დაბადებული, რადგან ცხოვრების გზაზე მხოლოდ კარგი, სიკეთით სავსე ადამიანები ხვდებოდნენ. ასეთი რამ მისი პიროვნების განსაკუთრებულობაზე მიგვანიშნებს უპირველეს ყოვლისა, რადგან მხოლოდ გულწრფელ, სპექტაკ და ღირსეულ ადამიანს შეუძლია ასეთი გრძნობით და მაღლიერებით მოიგონოს თავისი მასწავლებლები და კოლეგები. იგი მართლაც ბედნიერია იმიტომ, რომ დაბადებითვე თან დაჰყვა იშვიათი თვისება — დასწაფებოდა და შეეთვისებინა ყოველივე კარგი, რაც კი მის გარშემო არსებობდა. იგი ბედნიერია იმიტაც, რომ შემოქმედებითი ცხოვრების პირველივე დღეებიდან მის მასწავლებელთა და უფროს მეგობართა შორის იყვნენ ლაღო გუდიაშვილი, ქართული ხელოვნების გამოჩენილი მკვლევარი რენე შმერლინგი, ქართული ხალხური და დეკორატიულ-გამოყენებითი ხელოვნების შესანიშნავი მცოდნე პროფესორი დავით ციციშვილი, რომელთა მეგობრული დახმარება და მხარდაჭერა ასე ბევრს ნიშნავდა ახალგაზრდა შემოქმედისათვის.

მაგრამ მხატვრის მთავარი ბედნიერება ისაა, რომ მან ღირსეულად გააგრძელა კავკასიელთა უძველესი ხელოვნების — მელითონეობის — ტრადიციები, დაიმკვიდრა თავალსაჩინო ადგილი ქართულ ხელოვნებაში, მოიპოვა ფართო აღიარება და სიყვარული.



პირველი ნაწილი

თანამედროვეობა, როგორც შეფასების საზომი

ჯერ კიდევ სომეხ მწერალთა მე-19 ყრილობაზე აღინიშნა, რომ თანამედროვე საბჭოთა სომხური პროზა ხასიათდება მხატვრული ხერხების სიუხვით, რაც დიდი ლიტერატურის შარავნაზე გამოსვლის თავდებად შეგვიძლია მივიჩნიოთ.

დღეს ეს ნიშანი უფრო გამოკვეთილ სახეს ღებულობს და დიდი ლიტერატურისაკენ მიმავალი ბილიკი მოკლდება.

მაგრამ „საერთო ძვრა“ ჯერ კიდევ არ ჩანს. ეს არ არის საყვედური საბჭოთა სომხური პროზის მიმართ, რადგან მხატვრულ ხერხთა სიუხვე თავისთავად მცირე ღირებულებისა როდი გახლავთ რომელიმე ეროვნული პროზის შესახებ მსჯელობისას.

გამოქომაგება თვითდამშვიდებლად რომ არ მოგვეჩვენოს, ერთ მეტად არსებით გარემოებაზე მივანიშნებთ: საგრძნობი ცვლილებები განიცადა სწორედ მხატვრული ხერხების სტრუქტურამ, რაც დღეს უკვე კრიტიკურიუმების ამაღლებით, საკითხის აქტუალობითა და სიღრმით, თანამედროვე თემებისადმი მიძღვნილი ნაწარმოებების სიმრავლით, ლიტერატურული ოსტატობის მომწიფებით გამოიხატება. მაგრამ, ყოველივე ამასთან ერთად, რატომ არ შეგვიძლია ასეთივე დარწმუნებით ვამტკიცოთ, რომ თანამედროვე სომხურმა პროზამ დიდი გავრცე-

ლება ჰპოვა საკავშირო ლიტერატურულ რუკაზე? ხომ არ არის აქ წინააღმდეგობა? ჩვენი აზრით, არა. სრულიად უეჭველად მიგვაჩნია რა პროზის თვალსაჩინო წარმატება, ამასთანავე აღვნიშნავთ, რომ ყოველი ეროვნული პროზის განვითარების მთავარი ძარღვი იყო და არის ეპიკურობა, ცხოვრების ფართო, მასშტაბური, მრავალფეროვანი და მრავალმხრივი ასახვა, საზოგადოებრივი ცხოვრებისა და მოვლენების ფართო მომცველობა, მშვიდი და ობიექტური თხრობა. ურყევია აზრი, რომ უბრალო შემთხვევასა და კერძო ბიოგრაფიაშიც კია შესაძლებელი მიღწეულ იქნას დიდი განზოგადება, მაგრამ არ შეგვიძლია ასეთივე კატეგორიულობით არ ვამტკიცოთ აგრეთვე საპირისპირო კანონზომიერება. ეპოქის შესახებ უნდა ვილაპარაკოთ ეპოქის მასშტაბებით, დიდი ფუნჯის მოხმით, არა მხოლოდ კერძოში ზოგადის ძიებით, მცირეში — დიდის ან ეპიზოდში — მთლიანისა, არამედ უშუალოდ მივმართოთ სწორედ ამ ზოგადს, დიდს, მთლიანს, მათი პოზიციებიდან შევხედოთ ცალკეულ ადამიანთა ბედს.

ალბათ, არ შევცდებით, თუ ვიტყვით, რომ ლიტერატურის სახეს განსაზღვრავს, უპირველეს ყოვლისა, ლიტერატურის ამ პრინციპის არსებობა, ესე იგი, ძველი ტრა-



დიდი უფრო რომანის არსებობა. ამიტომ უცნაურად ნუ მოგვეჩვენება, თუ ვიტყვი, რომ ამ ლიტერატურული პრინციპის უქონლობით უნდა აიხსნას ნაწილობრივ ის ფაქტი, სათანადოდ რომ არ უღერს თანამედროვე სომხური პროზის საყურადღებო მოთხრობები და რომანები. ეგების ლიტერატურის მძიმე არტილერიის—პროზის დარგში „მოწინავე“ და „ხელმძღვანელი“ როლის შემსრულებელი — ეპიკურობის ნაკლია, რომ ლიტერატურის შიგნით არ იქმნება ის ატმოსფერო, ის მუდმივი „კაპიტალი“, რის წყალობითაც ამ თხზულებებს შეეძლოთ წარმოჩენილიყვნენ სხვაგვარად.

აქ შეიძლება შემოგვედაონ და ჩვენც ვიზიარებთ იმ აზრს, რომ დროს ერთგვარი კორექტივი შეაქვს ეპიკურის გაგებაში, ზოგჯერ კითხვის ნიშნის ქვეშაც კი აყენებს მის აუცილებლობას, რამეთუ თანდათან ისპობა ეპიკურობის წინაპირობა — ობიექტური თხრობის პრინციპი, საგნის გარედან მოხილვის ტრადიციულ კანონს ცვლის საგნის შიგნიდან დანახვის აუცილებლობა, ესე იგი სუბიექტური ქვრეტა, ვინაიდან, თუ მიქელანჯელოს ნიჭი საფუძვლად დაედო „დავითის“ შექმნას, ხოლო თავად მიქელანჯელოს პიროვნება „დაიკარგა“ თავის ქმნილებაში. შეერწყა მას, პიკასოსთან, პირუკუ, ობიექტი განდა საშუალება თვითწარმოჩენის, საკუთარი „მეს“ დამტკიცებისა და, ბოლოს, ჩვენს დროში შეიცვალა თვით ეპოქის ცნებაც. თუკი იმ პერიოდს, როცა, ვთქვათ, ცხოვრობდა ბალზაკი, შეიძლება ვუწოდოთ მთელი ეპოქა, დღევანდელი ადამიანი ერთდროულად რამდენიმე ეპოქაში ცხოვრობს; თუ ბალზაკის დროს თაობები იცვლებოდნენ რამდენიმე ათწლეულში ერთხელ, დღეს უოველი ათწლეული წარმოშობს ახალ თაობას, ბადებს ახალ მსოფლშეგრძნებას. უფრო მეტიც, ათწლეულის ლიტერატურის ცნებაც კი გაჩნდა. აი რატომ ხელეწიფებოდა ბალზაკს აესახა მთელი სინამდვილე, მოეცა თავისი დროის „ენციკლოპედია“, ჩვენს რთულსა და დაძაბულ დროში კი ვერც ერთი მწერალი ვერ შეძლებს მოგვცეს ამგვარი „ენციკლოპედია“.

ამ შემოდავების უგულებელყოფა არ შეიძლება, მას ანგარიში უნდა გავუწიოთ. მაგრამ, ამასთანავე, უნდა ვიკითხოთ — ეპიკურობის აუცილებლობის „უარყოფელი“ ეს მტკიცებანი თავისთავად ეპიზმისთვის შლიდარ მასალასა და შესაძლებლობას ხომ არ გვაძლევს? საბჭოთა და მსოფლიო ლიტერატურის გამოცდილება, ამ თვალსაზრისს

რომ ამტკიცებს, იმავე ზომით ხომ არ უარყოფს კიდევ?


უკანასკნელ ათწლეულში სომხურ მწერლობაში დაიწერა ფართო ტილოები, ეპიკური სუნთქვით გაუღნთილი რომანები, როგორც მაგალითად, პ. სირასის „მშობლიური ქვეყანა“, ზ. დარჩიანის „ეს ძველი ქვეყანა“, კ. მკრტირიანის „უცნობი ჯარისკაცის მოსახსენებელი“, ვ. გრიგორიანის „თანავარსკვლავედი“, ვ. ჰარუთუნიანის „ვაიოცის ბევი“, პ. ხაჩატურიანის „არტავაზდი“.

მაგრამ, რაოდენობის მხრივაც კი, სასურველი სურათი არა გვაქვს. იმასაც ნუ დავივიწყებთ, რომ აქამდე ვლამარაკობდით ეპიკური პრინციპის გამოყენებისკენ მისწრაფებასა და არა იმაზე, თუ როგორ არის ეს პრინციპი ხორცშესხმული.

მაგალითად, ჩვენი პროზის ერთ-ერთ მონაპოვარს, მუშელ გალშიონის რომანს „ბოვტუნს“, სრულიად სამართლიანად რომ დავიმსახურა სომხეთის მწერალთა კავშირის პირველი პრემია, არსებითად ნოველისებური აღნაგობა აქვს. გმირების ბედს ერთმანეთთან შეხების წერტილები აქვთ, მაგრამ მათი ცხოვრება მაინც ერთმანეთის პარალელურად უფრო ვითარდება; ეს პარალელური ხაზები ვერ მთლიანდება, და რაც უფრო არსებითია, სამყაროს ვხედავთ გმირების თვალთ, თუმცა რომანი მოთხრობილია არა გმირების, არამედ ავტორის მიერ. საქმე კი ისაა, რომ რომანში სინამდვილეს ჰყოფს ავტორისა და გმირების სუბიექტური შეხედულება და ეპიკური მთლიანობის ილუზია ისპობა.

ეპიზმიდან გადაბვევის ეს რამდენიმე მიზეზი ჯერ კიდევ არ არის რომანის ნაკლი, — არამედ, უბრალოდ, თავისებურებაა. აქ სხვათა შორის უნდა აღინიშნოს, რომ ჩვენს კრიტიკაში ზოგჯერ შეინიშნება მანკიერი პრაქტიკა, როცა განსახილველი მხატვრული ქმნილების თავისებურება განიხილება როგორც ნაკლი. სწორედ ამით ეხსნება გზა არამეცნიერულ საუბარს, რაც სამართლიანად იმსახურებს საყოველთაო უკმაყოფილებას.

უკანასკნელი წლების საყურადღებო რომანებიდან ცალკე უნდა გამოიყოს ანაპიტ საპინიანის „სევდა“, ვგონებ, ყველაზე მეტად რომ უახლოვდება ეპიკური თხრობის ტრადიციულ მოთხოვნებს. მაგრამ ტრადიციული არ არის ავტორის მიდგომა საბჭოთა ლიტერატურაში მრავალგზის ასახული კოლექტივიზაციის თემისადმი. ავტორი უკუაგდება იმ თვალსაზრისს, რომ კოლექტივი-



ხატიის პირველი წლების სიძნელეები შედეგად მხოლოდდამხოლოდ ისტორიულ გარემოებათა გარდუვალობისა, თვალსაზრისს, რომლის ცალმხრივობა ჩანს თუნდაც იქიდან, რომ აქ მთლიანად გამოორიციხულია ადამიანთა ზნეობრივი ფაქტორი, ადამიანის პასუხისმგებლობა საკუთარი ქცევის, აგრეთვე გარემოს მიმართაც, ადამიანის მოქალაქეობრივი მოვალეობანი. მაგრამ ავტორი შემცდარი იქნებოდა, თუ მოვლენას ახსნიდა მხოლოდ წმინდა ეთიკური თვალთახედვით. საპინიანმა შეძლო დაეკავშირებინა ეს ორი მნიშვნელოვანი გარემოება, განეხილა ისინი მჭიდრო ურთიერთკავშირში, ეჩვენებინა, თუ რას ნიშნავს ადამიანისა და დროის „დამთხვევა“.

როგორც ცნობილია, ცნებები „პირი“ და „პიროვნება“ ძლიერ განსხვავდებიან ერთმანეთისაგან. პირიდან პიროვნებამდე დიდი მანძილია. ადამიანისათვის უდიდესი ბედნიერებაა ამ სივრცის დაძლევა, პიროვნულბამდე ამაღლება. ლიტერატურისათვის კი ერთ-ერთი ყველაზე უფრო საპატიო მისია პიროვნების ფორმირების მხატვრული გამოკვლევაა.

პირიდან პიროვნებამდე მდებარე სივრცის „შევსებისა“ და დაძლევის წინაპირობა მოქალაქეობრივი პასუხისმგებლობაა, ადამიანის საზოგადოებრივი აქტივობა, კოლექტივიზმის გრძნობა, ერთი სიტყვით, ის ზნეობრივი ნორმები, კომუნიზმის მშენებელ საბჭოთა ადამიანის აზროვნებისა და ცხოვრების წესს რომ ახასიათებს. აი რატომაა, რომ პიროვნების ჩამოყალიბების კვლევისას მწერალს ფაქტიურად ფართო შესაძლებლობა ეძლევა შექმნას დიდი საზოგადოებრივი და პოლიტიკური უღერადობის ნაწარმოებები.

პიროვნების ფორმირების რთული და წინააღმდეგობრივი პროცესი უცილობლად გულისხმობს გამოცდას. ჩვენი ქვეყნისათვის საყოველთაო გამოცდა იყო დიდი სამამულო ომი, რომლის დიდებული სამხედრო და პოლიტიკური გამარჯვების ოცდაათი წლისთავი საბჭოთა ხალხმა დიდი სიამაყის გრძნობით აღნიშნა 1975 წელს.

სერო ხანზადიანის „სამი წლის 291 დღე“, დოკუმენტური რომანი, საფრონტო დღიური რომ უწოდა ავტორმა, დიდი სამამულო ომისადმი მიძღვნილი საუკეთესო ქმნილებათაგანია სომხურ საბჭოთა პროზაში. საიდუმლო არ არის, რომ ხანზადიანის ნაწარმოებები მკითხველთა დიდი მოწონებით სარგებლობს; ამ გარემოებაში მცირე როლს

როდი ასრულებს ავტორის ენაწყლიანობა და მიმზიდველი თხრობა. მთავარი მაინც სხვა არის. ამ დოკუმენტურ რომანში ვერ ვხვდებით ვერც ეგრეთ წოდებულ, მდიდარ ენას, ვერც სიუჟეტის მკაფიო და დამაბულ განვითარებას, ვერც თხრობის გარეგნულ ბრწყინვალეობას. ყოველივე ამის ნაცვლად ჩვენ ვხედავთ ძუნწ და ასკეტურ თხრობას, დაწვრილებით და საფუძვლიან დახასიათებათა ნაცვლად — შტრიხულ, ლაკონურ განმარტებებს. საყურადღებოა, რომ ამ ხერხებისადმი მიმართვით ხანზადიანი აღწევს იმავე მხატვრულ შემოქმედებას, რაც დამახასიათებელია მისი სხვა საუკეთესო ქმნილებებისთვის.

მოთხრობის უმნიშვნელოვანესი ღირსება ის არის, რომ ავტორი არა თუ აღწერს, არა თუ აღბეჭდავს ომის დიდსა და პატარა შემთხვევებს, არამედ თავიდანვე მიზანსწრაფულად მიჰყვება ყრმა ჯარისკაცის პიროვნების ფორმირებას და ამ ერთი პიროვნების ჩამოყალიბების გზით გვიჩვენებს იმ საზოგადოებრივ საწყისებს, რომელთა მადლით ჩვენმა ხალხმა დიდი ისტორიული გამარჯვება მოიპოვა ფაშიზმზე; ეს არის — საბჭოთა პატრიოტიზმი, საბჭოთა ხალხების მეგობრობა, ინტერნაციონალიზმი, სოციალიზმის იდეების ღრმა რწმენა.

ისტორიულ თემაზე დაწერილ ნაწარმოებთაგან უნდა გამოვყოთ ჰოვანეს მელქონიანის „ქვეები“, მნაცაკანიანის „ნაკიანი წელიწადი“, რაფაელ არამიანის ციკლი „მოთხრობები თქვენი უბნის შესახებ“, რამდენიმე ზოთხრობა ს. აივაზიანის კრებულიდან — „სიცოცხლე სიკვდილის შემდეგაც გრძელდება“, გ. ბესის „მოკლული სიცილი“. თუმცა ეს ნაწარმოებები არ ეხებიან იმ კონკრეტულ პრობლემას, ზემოთ რომ ვისაუბრეთ. მაგრამ, უეჭველია, ღირსი არიან ცალკე განხილვისა; ყოველ შემთხვევაში ის მაინც უნდა აღინიშნოს, რომ ნაცნობი და გაცვეთილი სიტუაციები ახალი თვალსაზრისით წარმოგვიდგინეს ავტორებმა. პურის რიგში ადამიანთა შემცვლელი ქვეები ტრაგედიას, თუ შეიძლება ითქვას, აქცევენ მონუმენტურად და გვაიძულებენ სიბრალულის ნაცვლად ვიამაყოთ იმით, თუ როგორ შეინარჩუნეს ჩვენმა მამებმა და დედებმა მძიმე გასაჭირის უამს ზნეობრივი სიმტკიცე.

პიროვნების ჩამოყალიბების ან, რაც იგივეა, ახალი ადამიანის ფორმირების ერთი დიდი თანამედროვე სტიმულია შრომა, თემა, რომლის მნიშვნელობასაც შემთხვევით როდი გაესვა ხაზი პარტიის XXV ყრილობის სა-



ანგარიშო მოხსენებაში, სადაც სრულიად სამართლიანად აღინიშნა, რომ „დღეს ამ თემამ მოიპოვა ჭეშმარიტი მხატვრული ფორმა“.

მუშელ გალშოიანის „ბოვტუნი“, რომლის შესახებ ცოტა ზემოთ გაკვრით ვილაპარაკეთ, შრომის თემისადმი მიძღვნილი ერთი უმნიშვნელოვანესი თხზულებაა ჩვენში. მუშელ გალშოიანის მიერ შემოტანილი სიახლეის განხილვით, რომ შრომა მის რომანში გამოდის არა როგორც ფონი, არამედ როგორც ადამიანის სულიერი და ზნეობრივი ყოფაცხოვრების საზომი. შრომა ქმნის ადამიანისა და დროის ჰარმონიას, აზრს ანიჭებს ადამიანის სიყვარულსა და სიძულვილს, სიმპათიებსა და ანტიპათიებს, მის „ჰო“-სა და „არა“-ს და, საზოგადოდ, არსებობას. ავტორი გვიმტკიცებს იმ ჭეშმარიტებას, რომ პიროვნებას მაშინ შეუძლია გადალახოს დაბრკოლება, თუკი აქვს სამშობლო. ადამიანი — მამული — დრო, ეს სამეული განსაზღვრავს პიროვნულის ჭეშმარიტ საზომს. ვ. გრიგორიანის მოთხრობაში „წითელი თოვლი“, ფართო მსჯელობის საგნად რომ იქცა „ლიტერატურნაია გაზეტას“ ფურცლებზე, გმირს სურს იპოვოს საგანთა პირველადი აზრი, ეძებს მის ფესვებს, ე. ი. პიროვნულთან, თვითშემეცნებისკენ მიმავალ გზას.

შაჰენ თათიკიანის მოთხრობაში „ოქრო და მიწა“ ნაჩვენებია ერთი ეზოს მცხოვრებთა ჯგუფური პორტრეტი რევოლუციის წინა დღეებიდან დღის სამამულო ომის დამთავრებამდე. სამაგალითო მხატვრული კომპაქტურობით დაწერილ ამ ნაწარმოებში წინააღმდეგობაში მოდიან ავტორის, ჩვენ ვიტყვით, რბილი ინტონაცია და გმირების მძიმე და ნათელი ბედისწერა. იგივე წინააღმდეგობაა აგრეთვე რ. არამიანის „მოთხრობებში თქვენი უბნის შესახებ“. ამ გარეგნულ შეუსაბამობაში გამოსჭვივის ავტორთა ჭეშმარიტად სტილური და თანამედროვე აზროვნება, რაც მათ საშუალებას აძლევს ბოლომდე არ განხილონ ფრჩხილები, მრავალწერტილით დაასრულონ სხვადასხვა მოქმედი პირისადმი მიძღვნილი თავიანთი სიტყვა და მოგვცენ არა ცალკეულ გმირთა პიროვნების ფორმირება, არამედ მთლიანი უბნის ადამიანთა პატარა კოლექტივის განზოგადებული სახე.

პიროვნულის ჩამოყალიბების თემა, პირსა და პიროვნებას შორის სივრცის დაძლევის, ისე როგორც პიროვნულის რღვევის ისტორია ძველია და მარადიული. ეს ისტორია, ვიმეორებთ, საყურადღებოა იმიტომ, რომ ასახავს დროსა და მოცემული საზოგადოების


სახეს. ასე რომ, პიროვნულის ჩამოყალიბების, ახალი ადამიანის დაბადების მხატვრული კვლევის ყურადღების ცენტრში მოქცევით სომხურმა საბჭოთა პროზამ შეძლო დაეჭირა ლიტერატურის ერთი ძირითადი ძარღვი.

პიროვნების ფორმირების თემა თავისთავად გულისხმობს ერთი სხვა ლიტერატურული საკითხის კვლევასაც — გმირის არჩევის პრობლემას. გმირის არჩევიდან იწყება როგორც ნაწარმოების იდეა და მისი სიუჟეტური აღნაგობა, ისე გარემოებათა ჩარჩოში მოქცევა, ისევე როგორც მწერლის სტილი. მივიღებთ რა ამოხავალ წერტილად გმირის არჩევის საკითხს, შეიძლება მეტნაკლებად სრული წარმოდგენა შევქმნათ საზოგადოდ მოცემული ეროვნული პროზის შესახებ.

საბჭოთა სომხურ პროზაში შეინიშნება მისწრაფება უბრალო, ჩვეულებრივი რიგითი გმირის არჩევისაკენ. ეს მისწრაფება თავისთავად დასაგმობი არ განხილავთ, იმ პირობით, თუ იგი ერთადერთი არ არის. სამწუხაროდ, უნდა ითქვას, რომ უმნიშვნელო გამოწვევის გარდა, დღესდღეობით ერთადერთია.

საბჭოთა ესთეტიკას, უეჭველია, გააჩნია მთელი რიგი უპირატესობანი. ჩვენ მხოლოდ ისლა დაგვრჩენია, გავიაზროთ ჩვეულებრივი, ჩავწვდეთ მის სიღრმისეულ ფენებს, ზედაპირზე ამოვატივტივოთ ის ლამაზი, წმინდა და დიდებული, რაც ძალიან ხშირად დამალულია რიგით ადამიანში, მით უფრო, რომ, როგორც ამ ესთეტიკის მომხრენი ამტკიცებენ, ცხოვრების დინება, ცხოვრების წინსვლა ძირითადად ამგვარ გმირთა არსებობითაა განსაზღვრული.

არ უარყვოთ რა ამ თვალსაზრისს, ამასთანავე არ შეიძლება არ შეგვაშფოთოს იმ გარემოებამ, რომ ჩვენს პროზაში ჯერ კიდევ მცირე ადგილი უჭირავს პიროვნებებს, რომელთაც შეუძლიათ გვაზიარონ დიდ ადამიანურ ვნებებს, მასშტაბურ მიზნებსა და კონფლიქტებს. ამის გამოა, რომ ჩვენ ვერ ვითვალისწინებთ ვერც ადამიანის მიერ დაკავებული თანამდებობის ხარისხს, ვერც მისი ბიოგრაფიის არაჩვეულებრივობას, ვერც ე. წ. ზეადამიანად ყოფნის „აუცილებლობას“. შემცდარად უნდა ჩაითვალოს ის თვალსაზრისი და ლიტერატურული პრაქტიკა, რის მიხედვითაც დიდი პიროვნებები ისტორიული პირები არიან მხოლოდ. თანამედროვე რუსული ლიტერატურა ბრწყინვალედ უკუაგდებს ამ მცდარ თვალსაზრისს და გვაძლევს მგზნებარე პიროვნებათა და მას-



შტაბური აზროვნების მრავალრიცხოვან მაგალითს.

თვითეული მწერალი თავისუფალია ამა თუ იმ გმირის არჩევაში, მაგრამ ლიტერატურული პროცესის ანალიზის დროს შეუძლებელია არ შევნიშნოთ და საგანგებოდ არ გავუსვათ ხაზი იმ ცალმხრივობას, რაც საგრძნობლად აღარბიებს ჩვენს ლიტერატურულ პროდუქციას, მთლიანობაში აღებულს.

მოთხრობაში „აფთიაქი „ანი“ ვ. პეტროსიანმა გამოიყვანა ახალგაზრდა გმირები, რომელთა მეოხებით მწერალი ცდილობს ჩასწვდეს ახალი თაობის არსებას. იგი განზრახ უპასუხოდ ტოვებს მის წინაშე წამოჭრილ კითხვას, ამით მხატვრულ პროგრამად აქცევს და უფრო მნიშვნელოვანს ხდის საკითხს, რადგანაც თავს აღწევს ერთნიშნა განმარტების ავტორისეულ ჩარჩოებს და მკითხველის სამსჯავროზე გამოაქვს იგი.

მოთხრობაში „გამარჯობა, დილა მშვიდობისა!“ მ. სარგსიანმა გამოიყვანა ახალგაზრდა გმირები, თითქოს საზოგადოებას განუცრომ გასდგომიან და ცდილობენ ცოტას გაღებით ბევრი მიიღონ ცხოვრებიდან.

ნორაირ ადალიანის რომანის „მშვიდი ყაზარმების“ გმირი სიახლეა ჩვენს პროზაში იმ გაგებით, რომ მას შემოაქვს სრულიად ახალი გარემო — საბჭოთა არმია და მისი ყოველდღიურობა. გმირის წარსულსა და აწმყოს შორის წარმოიქმნება მანძილი, რაც მას შეხატებლობას აძლევს შორიდან „შეამოწმოს“, შეიცნოს და გაიგოს თავისი თავი, რაც აგრეთვე პიროვნების ფორმირების ტოლფასია.

გულისტკივილს მხოლოდ ის იწვევს, რომ ამ მრავალმხრივ საყურადღებო რომანში ავტორს საგრძნობლად შეუშალა ხელი მისივე მისწრაფებამ — რომანი აეგო სამი დროის: წარსულის, აწმყოსა და მომავლის სტრუქტურული შეპირისპირების პრინციპით.

კარენ სიმონიანი რომანში „მეაფთიაქე ნერსეს მაჟა“ იმ ჭეშმარიტებას გვიმტკიცებს, რომ ადალიანის უმაღლესი თვისება არის პასუხისმგებლობის გრძნობა თავისი თავისა და დროის წინაშე. სიმონიანმა გამოიყვანა თანამედროვე ფანტასტიკის ის პრინციპი, რის წყალობითაც ეს უანრი თანდათან თავისუფლდება „მეცნიერულის“ ჩარჩოებიდან და იქცევა მხატვრული კვლევის ერთ თავისთავად ფორმად.

დეტექტივიც, ჩვენს პროზაში თანმიმდევრულად რომ მისდევს მხოლოდ ვ. ბალაიანი, თანდათან იცვლის სახეს და იქცევა ადალიანის ფსიქოლოგიის გამოხატვის საშუ-

ალებად. ბალაიანის ნაწარმოებებში ეს პრინციპიც გმირის შერჩევით განისაზღვრება, რასაც კარნახობს ნაწარმოების ანალიტიკური ხასიათი.

გ. არშაკიანის რომანის „პიტნის სურნელის“ გმირი დირექტორის მძღოლია, იმდენად ჩვეულებრივი კაცი, რომ გარშემომყოფი თანამდებობის პირებისათვის იგი ერთგვარ საზომად იქცევა სხვადასხვა ადალიანურ მოქმედებათა შეფასების დროს.

ჩვეულებრივი, რიგითი ადალიანის ასეთი შეფასება, მისი სულიერი სიმდიდრის, შინაგანი მთლიანობის დასტურია.

აქვე უნდა ითქვას, ე. წ. ინტელექტუალური ლიტერატურის შესახებ. ღრმა შეცდომად იქცა ის თვალსაზრისი და პრაქტიკა, რომელთა თანახმად ნაწარმოების შექმნის პირობად მიიჩნევა ჭკვიანური აზრები, დიალოგები, ფილოსოფიური ანალიზი და სხვა. მაშინ როცა ინტელექტუალური ნაწარმოები შეიძლება დაიწეროს გმირებზე, ვისი ინტელექტიც თვალში არ გეცემათ. ინტელექტუალობა მოჩანს უპირველეს ყოვლისა მასალის მიმართ მწერლის დამოკიდებულებაში და ცხოვრებისეული მოვლენის გააზრებაში.

მცდარია აზრი აგრეთვე ე. წ. ინტელექტუალური და ემოციური ლიტერატურების დაპირისპირებისა, რამეთუ არც ერთი ღრმა აზრი ხელოვნებაში არ შეიძლება მოკლებულ იქნეს შინაგან ემოციურ სისავსეს (ხევაკის შემოქმედება), როგორც არ შეიძლება, ჭეშმარიტი ემოცია თავისთავად ღრმა აზრს არ გულისხმობდეს.

ლიტერატურის ამ ორი განუშორებელი ელემენტის—აზრისა და გრძნობის ერთმანეთისაგან ხელოვნური გათიშვა და დაპირისპირება ისეთივე შეცდომაა, როგორც ზღუდას აღმართვა ფორმასა და შინაარსს შორის. პრანტ მათევოსიანის „ნერვიული“ აღუნი, ვის ინტელექტუალურ მისწრაფებებში ეჭვს ვერ შეიტან, ავტორს დაეხმარა შეექმნა ჭეშმარიტი ინტელექტუალური ნაწარმოები „მიწის ძარღვი“. მათევოსიანმა შექმნა სომეხი გლეხი ქალის, სომეხი დედის მონოლოგი — მის მიერ განცდილ მწუხარებასა, ტანჯვასა და ჭერ გაუვლელ ცხოვრებაზე.

თუ მოთხრობა „ნაბახუსევი“, როგორც სამართლიანად აღინიშნა უფრონად „ლიტერატურნოე ობოზრენიეს“ სტატიაში — „თავისი ცხოვრებისეული მასალით ამოვარდნილია მათევოსიანის ნაწარმოებთა მტკიცე რიგიდან“ და გმირიც „ერთგვარად მოწყვეტილია ზნეობრივ ფასეულობათა ძველ სისტემას“, ამ ნიჭიერად დაწერილი მოთხრობით „მი-


წის ძარღვი“ მათევოსიანი კვლავ უზრუნველბა თავის ძველ დონეს, ერთგული რჩება გმირის არჩევის პრინციპისა და მთავარ გმირს კვლავ მშობლიურ გარემოცვაში გვიჩვენებს.

ცნობილია, რომ საკავშირო პრესა, მათ შორის „ლიტერატურა და გაზეთი“ მოყვნილია სამეცნიერო-ტექნიკური რევოლუციისადმი მიძღვნილი სტატიებით, მაშინ როდესაც სომხეთში ჩვენ მეტად იშვიათად ვუბრუნდებით ამ საკითხს. პარადოქსია, რომ ჩვენ უკვე ვცხოვრობთ მეცნიერულ-ტექნიკური რევოლუციის პირობებში. მაგრამ იშვიათად ვაცნობიერებთ ამას.

მეცნიერულ-ტექნიკური რევოლუცია, როგორც ყოველი რევოლუცია, იწვევს სოციალ-ეკონომიური სინამდვილის ხარისხობრივ ცვლილებას. მაშაადაამე, ლიტერატურას უფლება არა აქვს არ ასახოს ამ მოვლენის კანონზომიერი შედეგები, გაუგებარი ის არის მხოლოდ, რომ მეცნიერულ-ტექნიკურ რევოლუციას ზოგიერთი წმინდა მეცნიერულ საკითხად მიიჩნევენ, რამეთუ თვით ტერმინია ბევრის მომცველი — და ამას გარდა, ერთი შეხედვით, თითქოს შეუმჩნეველიცაა ახალი მოვლენის გავლენა ყოველდღიურ ცხოვრებაზე. ხშირად მეცნიერულ-ტექნიკურ რევოლუციას ტექნიკურ პროგრესში ვურევთ და გვეჩვენება, რომ ილ—14-დან ილ—15-მდე, ან ილ—62-მდე განვლილი გზა ამ რევოლუციის ნათელი გამოხატულებაა. მაგრამ ასეთ შემთხვევაში ჩვენ სამართლიანად უნდა ვიფიქროთ, რომ კაცობრიობა განუწყვეტლივ ცხოვრობს ასეთი რევოლუციის პირობებში. რამეთუ ყოველ მეტნაკლებად მნიშვნელოვან აღმოჩენას თავისი დროისთვის ჰქონდა ისეთივე მნიშვნელობა, როგორც დღეს აქვს კოსმოსის დაპყრობას, მაშინ როდესაც სამეცნიერო-ტექნიკური რევოლუცია მე-20 საუკუნის მეორე ნახევრის მონაპოვარია.

დღეს ჩვენ თვითმხილველნი ვართ, როგორ ისახება ადამიანის და მანქანის „ორთაბრძოლა“. ადვილი საფიქრებელია, იგი თანდათან უფრო მწვავე ხასიათს მიიღებს. ამ მოვლენას მშვიდად შევცქერით, რადგან ვიცით „სიუჟეტის“ გადაწყვეტა — ამ ორთაბრძოლაში ადამიანი გაიმარჯვებს. მართალია, მაგრამ ასე რომ ვფიქრობთ, ხომ არ ვემსგავსებით იმ მოწაფეს, ამოცანის ამოხსნამდე რომ იყურება სახელმძღვანელოს ბოლოში მოცემულ პასუხში. კეთილი, დავუშვათ, რომ პასუხი ვიცით, მაგრამ ამოცანის პირობიდან ამ პასუხამდე მოთავსებული მანძილი? ამ სივრცეს თუ თავად არ დაძლევა, ამოცანას

ვერ ამოხსნი და მზა პასუხიც ღირებულებას დაკარგავს. ჩვენც სწორედ ამ მდგომარეობაში ვართ. მაგრამ ამ სივრცის დაძლევა, დინებას მიყოლა, მის შინაგან კანონზომიერებათა გამოვლენა ისეთი არსებითი საკითხია, რის უგულვებელყოფის შემთხვევაშიც შეიძლება პუშკინის ზღაპრის გაბზარული ვარცლის წინაშე აღმოვჩნდეთ. არ არის გამორიცხული, რომ ამ მანძილში უფრო დიდი და ღრმა აზრი აღმოჩნდეს, ვიდრე ერთნიშნა პასუხია. ჩვენ სრულიადაც არ ვფიქრობთ, რომ ამ საკითხებს აუცილებლად უნდა დავუბრუნდეთ. ნურც ისეთი შთაბეჭდილება შეიქმნება, თითქოს მწერალი ვალდებული იყოს დაწვრილებით დაეუფლოს მეცნიერებისა და ტექნიკის თანამედროვე რთულ კომპლექსს. საქმე ის არის, რომ ატმოსფერო დამუხტულია მეცნიერულ-ტექნიკური რევოლუციის „ტალღებით“ და დღეს ყოველი ქვეშაირიტი მწერალი, ტალანტისთვის დამახასიათებელი შეგრძნებით, შეძლებს დაიჭიროს ეს „სიგნალები“ და გახდეს ახალ ხარისხობრივ ცვლილებათა წინასწარმეტყველი. განა დოსტოევსკიმ იცოდა ფარდობითობის თეორიის შესახებ? ნუთუ ეინშტეინის მხრივ კეპლუცობა, ანდა, უბრალოდ, მისწრაფება იყო ლამაზი სიტყვებისკენ, როცა აცხადებდა, დოსტოევსკიმ უფრო მეტი მომცა, ვიდრე რომელიმე მეცნიერმაო. ჩვენ ღარწმუნებულნი ვართ, რომ თავისი დროის დიდ მწერალთა თხზულებებში უკვე იმალებოდა არქიმედესა და ნიუტონის კანონების არსი არა სიტყვასიტყვით, არამედ ატმოსფეროში „დაჭერილი“ სახით. მხოლოდ იქ გაიყრება მწერლისა და მეცნიერის გზები, სადაც მიღებულ „სიგნალს“ თვითთული თავისი ენით განმარტავს. აი, სწორედ ამ ამოცანებთან დაკავშირებით დავუბრუნდით ჩვენ მეცნიერულ-ტექნიკური რევოლუციის პროცესს და ამ კუთხით გვსურს გამოვიკვლიოთ აგრეთვე, ე. წ. „მიწის თაყვანისმცემელი“ ლიტერატურის საკითხი: ამ ტერმინს, სწორად თუ მცდარად, ზოგჯერ კი სხვა სახელწოდებითაც, ხშირად იყენებენ ლიტერატურაში. აი ამ „დინების“ სქემატური იდეოლოგია: ადამიანის დაბრუნება თავის ბუნებრივ მდგომარეობაში, სათავეებთან დაკავშირება; ამოსავალი წერტილის, პირველადისა და წაუბილწველის პოვნა, ე. ი. დაბრუნება და რწმენა ბუნებისა. შეიძლება დაეთანხმო „მიწისთაყვანისმცემელთა“ თეორიას, მაგრამ ერთი პრინციპული განსხვავებით — ამ საკითხს უნდა შევხვით ცივილიზაციის მაღალი პოზიციებიდან. სწორედ აქ წამოიჭრება აუცილებ-



ლობა, კვლავ დავუბრუნდეთ მეცნიერულ-ტექნიკური რევოლუციის საკითხს. ამ რევოლუციამ უკვე წარმოშვა დიდი ფსიქოლოგიური ძვრები. ავიღოთ თუნდაც მასობრივი ინფორმაცია, რომლის მოზღვაებაში ადამიანი კარგავს ორიენტაციას. მოვლენები განიხილებიან ფართოდ და ზედაპირულად, სიღრმე თანდათან კლებულობს. ხოლო თუ ახლო მომავალში ხელოვნური ინტელექტი ან მოაზროვნე მანქანა ნამდვილად დაიჭერს გაბატონებულ მდგომარეობას, თუ ჩვენს უფლებებს მას მივანიჭებთ, მაშასადამე, სულიერი სიზარმაცისთვის განწირულნი აღმოვჩნდებით, არჩევანის თავისუფლება მოგვაკლდება, მოვწყდებით ცხოვრებისეულ გამოცდილებას. აქ განზრახ ჩამოვთვალეთ მეცნიერულ-ტექნიკური რევოლუციის მხოლოდ უარყოფითი მხარეები. ამავე მოსაზრებით არ მოვიხსენიებთ აგრეთვე მის უზარმაზარ უპირატესობებს.

ზემოთ ნათქვამი მიზნად ისახავს, რომ უფრო მეტად გავუსვათ ხაზი დასკვნას და სათავეებთან მისვლის ორი სხვადასხვა გზისა და სტიმულის არსებობას. ნუთუ ზემოხსენებული დაბრკოლებები გვკარნახობენ, თავი დავიცვათ სამეცნიერო-ტექნიკური რევოლუციისაგან. ეს რევოლუცია ხომ ანგარიშგასაწევი სინამდვილეა დღეს, მით უფრო, რომ იგი მოწოდებულია ემსახუროს კაცობრიობის ინტერესებს. მაშასადამე, სად არის ამ „წინააღმდეგობიდან“ გამოსავალი? ზნეობრივი ნორმების დამკვიდრების უფრო მაღალი დონე. ადამიანის სრულყოფის არა მხოლოდ აუცილებლობა, არამედ გარდუვალობაც. პირველხარისხოვან მოთხოვნილებად იქცევა — მდგრადი სულიერი ღირებულებები ისე მივაწოდოთ ადამიანს, რომ მასში აიწიოს ზნეობის „მაღალმა ტემპერატურამ“, განმტკიცდნენ ფესვები, — ტომობრივი ბიოგრაფიის მოგონება, რათა ადამიანმა იმედი დაამყაროს საკუთარ არჩევანზე; მიჰყვეს მოვლენას, დინებას კი არ დაემორჩილოს, არამედ თვით დაიმორჩილოს იგი, მოიგონოს თავისი სათავეები და ცხოვრებისეულ გამოცდილებას დაენდოს. ამ შეგნებით ნაკარნახევი დაბრუნდება სასურველ სათავესთან, პირველსაწყისთან, ხოლო ამ შეგნების გარეშე დაბრუნება ნიშნავს კაპიტულაციას, ადამიანის დაცემასა და დაღუპვას. ერთი სიტყვით, მეცნიერულ-ტექნიკურ რევოლუციას კი არ უნდა დავუპირისპირდეთ, არამედ შევუხამოთ ჩვენთვის ნაცნობი მაღალი ზნეობრივი იდეალების სრულყოფა. რადგან მეცნიერულ-ტექნიკური რევოლუციის ეპო-

ქას, უპირველეს ყოვლისა, მოაქვს ახალი კონფლიქტები, ახალი წინააღმდეგობანი და დრამატიზმი. და რადგანაც ჩვენი დრო წინაგანი კავშირების დროა, როცა არც ერთი მოვლენა და საგანი ავტონომიური აღარ არის, მაშასადამე, საჭიროა ვეძებოთ ეს კავშირები.

მთავარი ის კი არ არის, ქალაქისა თუ სოფლის შესახებ ვწეროთ. ეს კამათი, სხვა რომ არაფერი ვთქვათ, სასაცილოა და უაზრო. თუ შემდეგშიაც ასე ვიაზროვნებთ, უნდა ვალიაროთ, რომ ჰემინგუეის მოთხრობა „მოხუცი და ზღვა“ ეძღვნება თევზაობის თემას, ხოლო საროიანის მოთხრობათა კრებული „საათში 60 მილით“ — სპორტისას. საკითხის არსი არა თემა ან ობიექტი, არამედ ხელოვნების დონე და კულტურა. ხელოვნება იქმნება მხოლოდ თანამედროვე ცივილიზაციის აზროვნების კრიტიკრიუმით.

დუკასიანის მოთხრობის „ახლობელი და შორეული სახეების“ გმირმა — მესროპმა მიაღწია შორეულ მთებს, მივიდა მოხუც მეფუტკრესთან, ვისი ვაჟიც პოლიტექნიკური ინსტიტუტის ლექტორია, ხოლო მესროპის სკოლადამთავრებული ბიჭი ამავე ინსტიტუტში შესასვლელად ემზადება. ვიზიტის მიზანი ნათელია. მესროპს განზრახული აქვს მეფუტკრე მამა გარიგების შუამავლად გახადოს. როცა თავისი „თავდაპირველი სიწმინდის“ ერთგული მოხუცი აუჯანყდა ამ ბინძურ წინადადებას და განაცხადა, რომ მისი ლექტორი შვილი ამგვარ ნაბიჯს ვერ გადადგამს, მესროპი მას თვალებს „უხელს“, უამბობს, როგორ გარყვნა ქალაქმა ყოველი, წაბილწა, გააფუჭა აგრეთვე მეფუტკრის ლექტორი შვილიც. „მიმიფურთხებია მისთვის, — წამოიძახებს სასოწარკვეთილი მოხუცი, — სოფელში რომ ჩამოვა — მე მთებში გავიქცევი, მთაში რომ ამოვა, მწყემსებთან გავიქცევი... ჩემმა მშობლებმა სუფთა გამაჩინეს, ჩვენც წმინდა ვშვით იგი.“

ჯანიბეკ ჯანიბეკიანის მოთხრობაში „ხევის წყარო“ თავდაპირველი სიწმინდის სიმბოლო წყაროა, საიდანაც თითო პეშვს რომ დალევს, საუკუნო მეგობრობის ფიცს დებს ორი მეგობარი. ამ მეგობრობას უანდერძებენ თავიანთ შვილებს, მაგრამ ისევ ქალაქი, იქაური ზნე-ჩვეულება, ყოფა, ისევე როგორც ქალაქში სწავლა და ინტელიგენტად გახდომა, ხდება იმის მიზეზი, რომ დაირღვეს მეგობრობა. „ხევის წყაროს“ იქით არ არსებობს ზნეობა, არ არის სულიერი ღირებულება, არ არის წმინდა ურთიერთობანი. ავტორი ამ იდეას უფრო ავითარებს, ამტკიცებს, რომ „არაგაწის ათასი წყაროდან ყველაზე უკა-

ნასკნელია იგი, მაცოცხლებელი წყარო...“ და საუკუნეთა განმავლობაში მოჩუბჩუხე ეს წყაროც უკვალოდ გაქრობის საფრთხის წინაშე დგას, ვინაიდან თოვლის დნობისა და წვიმებისაგან მდინარე ამბერდი გააფთრებულია და ლამობს ეს უკანასკნელი „თავდაპირველი სიწმინდეც“ აღგავოს პირისაგან მიწისა.

ამგვარად, ჩამორჩენილობა, სიღარიბე, უცოდინარობა წარმოგვიდგება როგორც „თავდაპირველი სიწმინდე“, რაც უპირისპირდება მრავალსართულიან შენობას, ბუნებრივი სომხურით ლაპარაკს, ტელეფონს, თეატრს — ერთი სიტყვით — ქალაქს, ცივილიზაციას. მაგრამ ეს არ შეიძლება იყოს თანამედროვე მწერლის სწორი პოზიცია.

სამეცნიერო-ტექნიკური რევოლუციის ღრმად გაგების მაგალითებად წარმოგვიდგება ალასი აივაზიანის მოთხრობები. მისი კრებული „მთავარი ნომერი“, თუ შეიძლება ითქვას, სამი სიტყვის წიგნია: სიყვარული, სიცილი, სიკეთე. აივაზიანის მიხედვით, სიყვარული და სიკეთე, „სამყაროს დაუფლების ერთი ხერხია“. ამ საკითხში მხატვრულ პრინციპთა განზოგადება შეიძლება ვიპოვოთ ვ. საროიანის მოთხრობებში: „სიკეთე ბოროტებას სჯობიაო“, — გვიმტკიცებს საროიანი და სრულიადაც არ ეშინია ქვეყნად გავრცელებულ ათასნაირ „იშმებში“ „ძველ ტანსაცმელში“ გამოჩნდეს. საროიანისთვის ხელოვნების მოწოდება სწორედ ის არის, რომ საგნები დაინახოს უფრო მხიარული და ბედნიერი სინათლის შუქზე, ვიდრე ისინი მოჩანან ერთი შეხედვით.

ზორაირ ხალაფიანის რომანში „მომაკვდავ-აღმდგომი“, ერთმანეთის გვერდით დგას ორი განსხვავებული სამყარო — თანამედროვე ცხოვრება და ცოცხალი ეთნოგრაფიული სახეები — წარმართული დროიდან რომ მოეშურებინ ჩვენსკენ. მაგრამ მწერალმა ამ

პარალელიზმს მიმართა არა აწმყოსა და წარსულს შორის წინააღმდეგობის საჩვენებლად, „თავდაპირველი სიწმინდიდან“, ე. ი. სათავეებიდან ჩვენი დაშორების ჩვენებას მიზნით, არამედ იმ ჭეშმარიტების დასადგენად, რომ წარსული, მისი გადმოცემები, თუკი ჭეშმარიტად ზნეობრივი ღირებულებები გააჩნია მათ, უკვალოდ არა ქრებიან;

კამარი ტონოიანი თავის მოთხრობა „ტაიგაში“ იმ მოღურ მტკიცებათა საპირისპიროდ, თითქოს თანამედროვე მსოფლიოში შეწყდა ადამიანთა კავშირი, რომ ადამიანებს ერთმანეთისა აღარ ესმით, განამტკიცებს აზრს ადამიანთა ურთიერთკავშირის სასიცოცხლო მოთხოვნილებაზე.

ზნეობრივ პირველსაწყისთა ერთგულების აუცილებლობად მტკიცდება რ. ჰოვსეფიანის მოთხრობებში: „ურემი“, „ზაფხული იყო, კვირა“, არტ. ქალანთარიანის „დებეშებში“, უ. ავეტიხიანის მოთხრობაში „გზები, ხილები“ და რ. ლაზანჩიანის „მგზავრში“.

...საბჭოთა სომხური პროზა, როგორც ვხედავთ, ცუდ მდგომარეობაში არ არის. მართალია, ჩვენს პროზაიკოსებს ახალი მწვერვალები არ დაუპყრიათ, მაგრამ გააღრმავეს, გააშალაშინეს თავიანთ წინამორბედთა მონაპოვარი! აფეთქების სუნი, როგორც იტყვიან, უკვე იგრძნობა.

საბჭოთა სომხური პროზა თავისი ნაკლოვანებებით და ხარვეზებითურთ, განვითარების საინტერესო საფეხურზე იმყოფება. ჩვენ აღვნიშნეთ ამ განვითარების მხოლოდ რამდენიმე ტენდენცია, რომელთაც არა აქვთ პრეტენზია მისი თანამედროვე მდგომარეობის სრული განზოგადებისა და გამთლიანებისა, მაგრამ მხატვრული აკუმულაციის ფაქტი დიდი ლიტერატურის გზაზე გამოსვლისა და მისი ფართო პერსპექტივების საწინდარია.

გვენი ავტორები

დემონიკ დემირჯიანი გამოჩენილი სომეხი პროზაიკოსი, სომხური საბჭოთა ლიტერატურის ერთ-ერთი ფუძემდებელი, დაიბადა 1877 წ. ახალქალაქში. 1905—1909 წწ. იგი ჟენევის უნივერსიტეტში ეუფლებოდა პედაგოგიურ და საბუნებისმეტყველო დისციპლინებს. 1910 წელს მუშაობა დაიწყო თბილისის ჰოვანანის სასწავლებელში სომხური ენისა და ლიტერატურის მასწავლებლად. საბჭოთა ხელისუფლების დამყარების შემდეგ სამუდამოდ დასახლდა ერევანში. დ. დემირჯიანი გარდაიცვალა 1956 წ.

დ. დემირჯიანს დიდი მემკობრობა აკავშირებდა ქართულ მიწასთან. იგი წერდა: „მე საქართველო უანგარო ნათესაური გრძნობით



მიყვარს. ამ ქვეყნის ლამაზ მიწაზე ავიდგი ფეხი, აქ გავატარე ბავშვობისა და ჭაბუკობის წლები — ყველაზე სანეტარო წლები ადამიანის სიცოცხლეში; აქვე მოხდა ჩემი პოეტური ნათლობაც...“


პარჟირ სევაკის გამოჩენამ სომხურ პოეზიაში თავიდანვე დიდი მითქმა-მოთქმა გამოიწვია... იგი უჩვეულოდაც კი მონათლეს... და თუმცა სომხურ პოეზიას ნიჭიერი შემოქმედები არ ჰკლებია, ეგრეთ წოდებულ „ტრადიციულ ერთფეროვნებაში“ მისი

სიტყვა მართლაც რომ უჩვეულოდ გაისმა... ამ მითქმა-მოთქმისა და გაცხარებული კამათის დროს თითქმის ყველას დაავიწყდა, რომ პარჟირ სევაკიც „ტრადიციული პოეტი“ რომ მას ჯერ კიდევ მათე საუკუნეში ისეთი დიდი წინამორბედი ჰყავს, როგორც გრიგორ ნარეკაცი...
დიდად ნიჭიერი პოეტი, უაღრესად ერუდირებული ლიტერატორი და გამოჩენილი საზოგადო მოღვაწე 47 წლის ასაკში ბრმა შემთხვევამ იმსხვერპლა. უერთგულეს მეუღლესთან — ნელი მენადარაშვილთან ერთად ავტოკატასტროფამ შეიწირა 1970 წელს. და-



ტოვა დიდი შემოქმედებითი მემკვიდრეობა, ღღეს უკვე საყოველთაო ინტერესს რომ იწვევს, არა მარტო ჩვენს ქვეყანაში, არამედ მის ფარგლებს გარეთაც.

პარჟირ სევაკის ეს ორი ლექსი პოეტის ბოლო წიგნიდანაა თარგმნილი. „იქმენინ ნათელი“ — ასე ჰქვია ამ წიგნს. მკითხველი, ვფიქრობთ, ამ ლექსებითაც კარგად მიხვდება, თუ რაოდენ დრამატიულია პოეტის ხმა — სიკეთისა და სინათლისაკენ მიქცეული...
ჰრანტ იგნატიოვის ძე მათეველოსიანი დაბადებულია 1935 წელს სომხეთის სსრ ალავერდის რაიონის სოფ. აჰნიძორში. სწავლობდა პედიანტიტუტში. მუშაობდა სტამბაში. ამავე პერიოდში (1957—1962 წ.წ.) გამოაქვეყნა თავისი პირველი მოთხრობები. ღღეს იგი საქვეყნოდ აღიარებული მწერალია, მისი ნაწარმოებები თარგმნილია საბჭოთა კავშირისა და მსოფლიოს ხალხთა მრავალ ენაზე.



მ. მათევოსიანი ძირითადად წერს სოფელზე და სოფლებზე, მიწასა და ცხოვრებას უბზმულ უბრალო ადამიანებზე, წერს დიდი მხატვრული სიძლიერითა და ფსიქოლოგიური დამაჯერებლობით, ცხოვრების ცოდნითა და ჭეშმარიტი ხედვით. ადამიანთა ჩვეულებრივ საქმიანობაში, მათს ურთიერთობაში ავტორი ხედავს სიცოცხლის მაღალ აზრსა და პოეზიას. მწერლის თხრობა ლაღია, მსუბუქი იუმორით შეზავებული, ამავე დროს სიყვარულით აღსავსე ყოველივესადმი, რაზეც იგი წერს.

ალექსი ნოზისძე გოგუბა (1932 წ.)
აფხაზ პროზაიკოსთა ახალგაზრდა თაობის



ბრწყინვალე წარმომადგენელია. 1960 წ. დაამთავრა მოსკოვის მ. გორკის სახელობის ლიტერატურის ინსტიტუტი. მისი პირველი ნაწარმოები დაიბეჭდა 1948 წ. 1957 წ. გამოვიდა მისი მოთხრობების პირველი კრებული „მდინარე ზღვისკენ მიიჩქარის“. პიროვნების ფსიქოლოგიური განცდებია მისი მთავარი თემა. მრავალფეროვანი და ძლიერია მისი ენა, იყენებს დინამიურ თავისუფალ ფორმებს. იგი ერთმანეთში ხლართავს ღროთა და სივრცით დაშორებულ მოვლენებს, ფიქრებს, განცდებს. მოთხრობებს ერთი რამ საერთო აქვთ — ისინი ჩვეულებრივი მოთხრობის ფარგლებს სცილდებიან, ფსიქოლოგიური რომანის ნაწყვეტს უფრო მოგვაგონებენ. თავის გამირებს იგი ხშირად აყენებს სიკვდილ-სიცოცხლის საბედისწერო ზღურბლზე და ამ განსაკუთრებული სიტუაციით არკვევს ადამიანის ბუნების არსებით ნიშნებს.

მამედ არაზის, აზერბაიჯანელი პოეტის (დაბ. 1933 წ.) პოეზიაში უპირველესი, რაც



თვალში გეცემათ, მიწის სურნელია, მიწის სიყვარული. ესაა მისი ლირიკის მთავარი ძარღვიც. პოეტი თითქოს დედაწყაროსთან — ბუნებასთან არის განივთებული და, როგორც თავად ბუნება, მისი ლირიკაც ორსახოვანია: ხან ნაზი, ხან — მრისხანე; ხან ღრუბლიანი, ხან — მზემოჩახჩახე; ხან ჩაფიქრებული, ხან — მხიარული, და მაინც ერთია, მთლიანი და განუყოფელი.

მამედ არაზს ბევრი მეგობარი ჰყავს საქართველოში და უპირველესი მათ შორის პოეტისავე აღნიშვნით, არის „ქართული ლექსი“.

«САУНДЖЕ»

литературно-художественный
альманах
(на грузинском языке)

1976

№ 6

Издательство «Мерани»
380008. Тбилиси, пр. Руставели, 42.

□ □ □

ვადეცა წარემოებას 10/IX-76 წ. ხელმოწერილია და-
საბეჭდად 14/I-77 წ. ქალაქის ზომა 70 X 108¹/₁₆.
სააღრიცხვო-საგამომცემლო თაბახი 17,63. საბეჭდო
თაბახი 21. ტირაჟი 10.000. შეკვ. № 917.

ფასი 1 მან.

მხატვრული რედაქტორი ლევან ცუცქერიძე
მხატვარი პაპაი თევზაძე
ტექნიკური რედაქტორი იმნაიშვილი


□ □ □

საქართველოს სსრ მინისტრთა საბჭოს გამომცემლობა-
თა, პოლიგრაფიისა და წიგნის ვაჭრობის საქმეთა სა-
ხელმწიფო კომიტეტის ბეჭდვითი სიტყვის კომბინატს
თბილისი, მარჯანიშვილის ქ. № 5.

Комбинат печати Государственного комитета Со-
вета Министров Грузинской ССР по делам изда-
тельств, полиграфии и книжной торговли,
Тбилиси, ул. Марджанишвили № 5.



ქართული
საქართველოს



აკოვ კობახიძე

„სომეხი მებუკე“

გვ. 573

75132



ქართული
ნაციონალური
ბიბლიოთეკა

